

东山存稿

赵
沔

文硕阁

wenshuoge.com

目录

关于我们	3
提要	5
原序	6
卷一	7
卷二	27
卷三	45
卷四	76
卷五	85
卷六	103
卷七	109
附录	125
附录	129

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

东山存稿 元 赵汭

钦定四库全书

集部五

东山存稿

别集类四

元

提要

（臣）等谨案东山存稿七卷附录一卷元赵汭撰汭字子常婺源人绩学着书隐居不仕至正末以辅元帅汪同起兵保乡井授江南行枢密院都事其於诸经无所不通而尤邃於春秋所作春秋集传师说属辞诸书皆已着录经部中此本乃其诗文存稿也当元之季汭筑室东山闭户着述明初屡徵不起仅一出修元史事毕即辞归制行极为高洁其文亦多淳实典确不为浮声犹见先民矩矱之遗詹烜作汭行状称其尝谒黄潛於杭州潛大异之又尝至临川见虞集授馆於家一岁盖其所与讲习者皆当世名儒故所为文章能具有师法若此又集中载汭自作黄泽行状一篇於经术传授源流剖晰详至其生平学术之醇正得力所自尤可以概见焉

乾隆四十二年五月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

原序

●东山存稿原序

洪武二年冬休寧趙君子常以史事召至京師既竣事歸未逾月以疾終明年春二月葬于里之東岩親友畢來會葬其門人汪蔭乃集其所為詩文若干卷屬予序之已諾多疾未遑也未几蔭以賢良召而范生准乃續錄之旁搜靡遺復申前請嗚呼吾子常平生篤志古學豈專在於詩與文哉初予年十有五學于族祖古逸先生之門子常先受業焉先生每稱其苦學善思有疑問弗得弗措且約今年再來因問其年曰長汝五歲躍然喜曰果來願兄事之以求益迨至而先生已捐館予方耕稼為養乘閒讀書而子常乃游江西學于九江黃楚望之門再客虞文靖公所比歸構精舍于東山期與同志共學焉予適與一二友生讀書于邑東崇壽觀相見甚懽交勉厚規志惟古人之求凡所得于師若友者各無隱自後別歸則嚴守程期會叙則通宵警飭未久而風濤橫潰奔竄無所不相聞問者再越歲予不獲已尋授州牧膺省檄什伍其民以御寇攘而子常亦輔贊郡鎮帥以寧鄉里既而予以忱制退處荒僻子常亦避地吾里之閬山時結屋攜書相期畢志廬室苟完變故莫測遂有遠役六載方還疾疢衰惫情況異昔子常復于東山所著春秋集傳與屬辭左氏補注咸就厥緒復留心於四聖人之易予則感激愧汗尚愿養氣畢力旦夕叩擊以卒業而遽歿矣噫是果余生之不幸抑亦吾斯文之不幸耶人非不學其墮于俗學之卑陋者不足論苟不溺于佛老尚空寂則必事權謀勢利況有文譁一世而心尚虛玄誠心乎聖人之訓以極天地之元全天地之德闡天地之用者幾何人哉此吾夫子所以莫克立君道以正萬方故發吾已矣夫之嘆其立師道以教萬世意尚隱昧而弗昭為可慨也子常深潛本源力探闡奧體察涵湧完養日固學于黃先生凡誦聖人之經必以積思自悟得聖人之心為本因諸儒訓釋尋繹其所已言者而融通以得其所未言者故於易之象春秋之書法禮之大纲小紀節文度数之詳具有端緒惜乎年止於是而未遂成書也文多因人推迫或應酬問答不得已而為之詩因感發而形之詠歌雖不專乎是然長篇短哦亦不一字苟為也子常名汭學者稱之曰東山先生因汪范二生之請故推在昔交承之契期待之深以見其設施之有在嗚呼觀其文者尚亦效於是也哉星源汪仲魯序

卷一

●钦定四库全书

东山存稿卷一

（元）赵汭撰

○诗【五言古】

题平山堂次黄先生韵

虚堂眇平冈积翠凌天半彷彿识瑶台熹微窥玉案颇疑巨灵力剗削非一旦森森古树齐奕奕朝霞烂地近巘易陟池清莲不蔓莺啼午梦残客至琴声断胜境契中襟雅怀知弗畔翛然忘物我诂肯存崖岸马迹遍幽燕华颠乐村閤居夷非矫曲悼猛得前筭巘嶮世所趋真淳日雕散跬步视安危片言几理乱苟能领斯会未觉身为患嘉谋谅贻厥岂曰夸殊观

送汪子翼赴采石书院山长

汪子富儒术雄文惊有司横经得专席往主圣哲祠昨者遇相别清言不及私惟念紫阳翁周程以为师云何陆子静所学乃异兹後生将焉从此事宜精思斯行凭在尔寧复计班资嗟余素寡陋求道多困岐离索亦云久陆沈乃其宜一闻君子论反躬愧湮微神心异象罔谁能握其机关洛有遗言本根实在兹及门多通明经说乃见讥朱子晚所造卓絶知者希象山如可作岂复忧支离使其或有异在我已无疑前修去已远问辩将畴依子有千里行谁能纠予非采石古重镇精庐俯危矶子登蛾眉亭勿作雍门悲应怀谪僊人宫锦何淋漓横絶宇宙间飞黄不受鞿君子慎修己深潜厚自持斯人固天放跌宕将安归适道必有途积德必有基所贵敦实行无为尚虚辞俗学昧本原希微罕真知侏儒笑俳优长者岂吾欺念子实命我斯言非我宜敬恭奉明德白首以为期

吕景武哀诗【并序】

吕君景武山东即墨人郡倅景文其兄也曾祖整至元间以千夫长从征交趾军败不屈挟二囚投海死子孙世其官至景武好读书为诸生受业江寧郡学山东陈子恭江西朱景暉吾郡唐仲实其师也景暉死君请於其父具费以礼成丧景暉言星变甚异乱必自两淮始久之果然姑孰潰景文得脱难侍太夫人郡陷衆殲焉又合家以免既而有荐其才者授官新安景武出入兵中竭力以养其亲岁时省兄新安求唐先生之请於兄而宾礼焉戊戌十月以病卒权厝问政山下唐君词以哀之其序之大畧如此星溪俞仲谦问余疾山中且言郡人德吕侯而欲慰其手足之思也因出此卷以观之为赋诗以表之

山东有壮士胄出古诸姜起从楼船师军败耻生降挟俘投海死终不媿鹰扬有孙若郡校刻意攻文章师亡於我殒丧具倒赀囊大兄绾银符慷慨百夫良忍死脱锋镝明神翼高堂佐郡黟山下慈母未敢将甘旨弟所营时亦来兄傍一疾竟不起呼天但茫茫何以慰母怀相看涕淋浪世乱获考终安知短与长郊原多白骨岂解归山冈

银峰述德诗【并序】

番之属邑德兴其望曰银峰当艰难时攻伐四侵内离外讐相为仇敌莫知所属总制和阳王公既开幕府於星源号令一新威德兼着民获所归远迩寧谧乃擢其武力忠荃以为股肱牙爪又察才可仕者荐而官之邑人得保遗命复齿齐民耕田凿井老子长孙皆公赐也於是元帅张昭请作诗纪实庶几流传四方以昭盛德云

戎马生淮甸烟尘暗江湖银峰万家邑转目成丘墟番君祠既毁张相墓应荒千年豪杰掘但见豺与狐四隣更问罪毒螫焉能祛牺牲待境上玉帛既与俱谁将庇吾民跂踵待来苏两属固非策瓜分岂良图干戈日相寻山谷皆储胥甘心仇彼壤斩刈互相踰衅同虞芮争祸岂蚩触殊相倾各恃援肯复哀无辜福星临婺渚千骑专城居威行征伐外泽被凋瘵余招携自有道不亟亦不徐运步理必复寒谷春阳嘘湓浦覆巢穴宫亭偃根株永谢西江水还同涸辙鱼含垢廓洪度推诚开戇愚汝才吾与达勉思致名誉汝武吾爪牙所当应时需难若春冰释冤似水涤除父子再天日妻孥欢室庐向来锋镝地画作瓜芋区始羨生人乐力耕供赋需譬如涉渊水公作济川桴又如沟中瘠忍死待公哺况非遇公贤此邑今何如我欲留公像英姿照里閭穹碑铭伟绩螭首而龟趺所示只一乡所传唯道途作诗颂公德纪实辞不诬子孙又子孙歌咏无时渝方伯及连帅视公为规模

题黟令周君儒所藏清溪白云图

结屋清溪上白云与为隣云影常在地溪光净无尘余晖及山木暝映忘冬春逍遥窗户间亦足娱心神相望彭泽宰仕止孰由人忽忆桃花源悠然思问津

悼子琯

无子未尝忧有子悲不育妙赞世所稀我穷焉得鞠所嗟百日间奔走无停躅贺者犹在门房中已闻哭汝病吾不知汝名人已録我无高飞翼安用烦羈束奉身如拱璧世乱遭指目祸福来无端每虞连骨肉殇子古称壽彼苍非汝毒勿羨彭与■〈目冉〉贪生恒局促

题米元晖江山小景

沧波浩无津挥手扬帆去回顾江上山苍苍但烟树结茅傍洲渚岂少垂纶处终然尘迹近未及扁舟趣世运如风飈朝新夕成故白云何亭亭倏尔天际住寄谢山中人奚为独多虑

病士

病鷹不忘击病驥不忘驤病鶴俛不啄仰睇霄汉长惟有病士心死灰不复扬居处终鲜欢起行若痛亡逢人目辄动内惕外周章口虽强诺唯退省但茫茫已疾且忘疗焉知民未康多谢游谈者勉旃思自强是弃果蓏哉为称充圆方

峡源瀑布

寒峡隐堂隍寻源得飞瀑悬空下千尺飞鸟惊不度雷激丹岳摧电穿青山破陰崖排积雪霏雨恒时注我来属时艰对此忘百虑尘襟欣一洗徘徊不忍去崇山限吴楚避远谁能顾应有避秦人岩前覓微路

○诗【七言古】

题云林小隐

杉松冥冥烟雾湿青合两崖愁壁立方池怪石小窗妍家具图书劣容膝十年官道暗黄尘锦里萧条少四隣峻岭截云天御暴樵歌一曲断行人古林先生身种德芝田兰畹无荆棘心闲鸡犬亦清寧虎伥狐妖俱屏迹木叶归根虫闭关雪深半夜失前山儿童挟策莫言冷信有和阳地底还

浮邱祠

浮邱说诗秦汉间龐眉鶴髮映朱顏适逢偶语几弃市又见慢儒来溺冠飘然长往不知处遗迹宛在轩辕山年谷常丰物无厉石泉一琰荐甘寒

中秋雨分韵得秋字

蓬萊别館天香浮仙家好景惟中秋举杯邀月不知处湿云满地寒螿愁大地山河忽破碎苍茫微影将焉求肯风怪雨岂终夕中轩坐见寒光流

故人

故人别我秋江涘几载重逢春梦里忽观明月忆高情愁絕长空三万里荒山久病莫能兴狂风暴雨何凭淩麈鹿呦呦呼厥类雉媒憂憂求其朋

余村道中寄鲁斋

青山并岫如苍虬石门翠树如相繆似与幽人几清境玉梅翠竹紫寒流溪行半日足生萤水

望千回山百转请君处处种桃花莫使重来迷近远

读阮嗣宗诗

明月照北林孤鸿有哀音揽衣起坐弹鸣琴忧思徘徊独伤心可怜堂上生荆杞空自繁华粲桃李种瓜寂寞青门外采薇怅望西山趾芒砀云归大泽空後五百岁无英雄途穷恸哭谁知者沈湎狂言元自公

古津渡夜谈赠金元忠

相逢岁晚诗更诵燔尽枯槎谈愈纵短茨低覆结冰花寒压溪云不成梦竹帛烟销黔首愚紫芝一曲老商於坑外竟逃真学士浮邱雅颂济南书

寄题郑天骏云山楼

歙睦之交长陔之水出焉故地名陔口山中有萧王墓庙祠甚盛其东即方家洞溪山岩险处也郑天骏讼檄於此凡疆场讥察宾饯供亿之事悉主之流亡既归商旅胥悦乃作楼江浒号云山仕客之往来者咸得以舍息而致饩焉能赋之贤善君居下位而善於其职相与咏歌而叹美之天骏由是有名於时余就医郡城万思敬偶携此卷来请文以叙其事余病久不能文然尝识天骏知其非碌碌者为赋此以系焉

广文之孙材且武身隐关梁谢行伍作楼江浒号云山坐睨江云谁敢侮江中舟楫日经过道上车马何其多官纲私载一时集主人迎客忘讥诃掩藏白骨芟林莽招辑流亡俱安堵主人展席客长哦但云信美休怀土惜君不生宣和间坐销鼠孽应无难至今闻说方家洞能令壮士发冲冠请君试上萧王墓青史无名谁守护箫鼓丛祠春复秋男儿何必生封侯

送皮典史归泉溪旧隐

皮尹昔辞上高秩隐居欲拟陶彭泽石潭空洞九峰奇潭底行云映朝日云去山空今几秋随风万里何悠悠一朝飘落还故处云本无心风亦休芙蓉峰下西江路父老送行君弗顾着书况有鹿门期回首人间但烟雾

题碧山图

尝爱李太白兴来栖碧山山中别有一天地惜无图画留人间谁为碧澄翁久向山中住栽花种柳待春风忽见新图识其趣青山淡淡云离离小桥流水涵清漪抱琴择胜可终日安得似汝图中时韩侯好诗仍好画嗜酒不忧官长怪欲图李白碧山居酒禁方严笔如借知翁有子旧曾游淡泊无营心日休图成谩与翁为寿愿翁长乐无虞忧

贈上人丕大基

陰山赤光如赫曦金人快日中天飛乾坤塞破佛力大西來只履將安歸百年王氣真垂電千尺法輪竿頂轉劉郎梵相秘難窺辛有妖言孰先見皆元初事

○詩【五言律】

觀輿圖有感【五首】

朝雨茅茨濕披圖羨禹功山河一掌上宇宙九疇中水性惟趨下民生本易窮胼胝豈無事大智與天通

又

四載勤難繼八年績竟成功推城濮雋澤想召陵深問鼎猶懷惡投龜肯易心向無微管嘆孰憶到於今

又

轍已環諸夏居身憶九夷難求伐木處尚想饋豚時夾谷真成謗中牟不易知惟存刪述事赫赫起周畿

又

皓首陳王道時君孰可匡艱難思稷契容易托齊梁越豈資冠冕秦方用虎狼空聞歸大老不復見鷹揚

又

雒邑空南渡東都亦北轅已符前五閏空憶後三元【世謂漢唐宋為後三代】分合巧相似今昔難等倫女真如拓拔一統位中原

江彥明來訪

一自逃空谷健忘見似人月來為上客松長是高隣已信貧非病慵將懶是真喜君能脫畧杖屨莫辭頻

又

敲门知有客已谓是君来乱後交游少秋清怀抱开剧谈无可讳信笔不相猜木落山容净楼居且莫回

过闵川程义士祠遗址

义士名犹在方基祠不存人心俱感惠帝泽已推恩古木烟霞杂遗编姓字尊信知开府後奕世有云孙

题张中丞祠

孤城经百战忍死复挥戈节义如日月声名等山河云深遗祠古地远乞灵多往往成功者焉能保不磨

过斗山访程明远

结屋斗山下山深人自闲有时歌白石高兴在青山大道无夷越虚名自触蛮悠然得真趣异境是仙寰

答金元忠

宾馆二贤後宗家五柳门莺鸣声出谷鹏徙翼如云学博年方妙时艰志不分一身轻宇宙匡济赖多闻

病中和伯友絶粮韵

貌比年加老忧如病转深风檐惊淅沥竹径怯陰森独立筹家难朋来阻岁侵远书思过雁危坐自沈吟

次韵玉瑯云隐图【并序】

番禺王本善故居怀玉山之北号曰玉瑯云隐乡先达进士董公为之记和阳王使君为之赋又得星源韩徵君为之图予尝过本善所寓见其净扫一室琴书图画与弓劒杂前培桂植菊怪石纖蒲幽洁可爱盖能审已推分随所寓而安视甯名尺籍而有所顾愿者不全科也乃次使君韵附于卷末以释其幽思云

马上劒三尺山中云半间无人寻草径有虎卧柴关解甲端陴後悬弓定地还胡为思旧隐毕竟复谁闲

张节妇

家难年方茂时艰志益坚九原无起日一节矢终天逮下恩犹昔隆师子象贤姓名归太史墓碣不须镌

过程河池墓【公名德仕宋为河池令元兵入邑度不能支与夫人同经于官舍】

义尽忠方着坟荒草木繁邑倾惟守死双节聚精魂古事人犹仰残碑字半存轰轰争日月烈烈等乾坤

○诗【五言排律】

蔗庵

金华老儒胡汉子景云以梦中所见名庵自作纪述生於乱离备尝艰苦中年乃有此趣故名庵以自见云

嘉植咀甘液升盘初自筵近本味方永将中节逾坚多艰思往昔梦境有开先橄榄红盐後蒹葭白露前堦庭森玉树里巷润华轩室小元非陋文高况可传虞廷闻养老绦县孰疑年衍衍方来日冥冥已定天烹鹅记黑白食蜜忘中边周兄本无慧化蝶匪文言

○诗【七言律】

和唐县尹山居

自爱山居斲素椽总将幽事付诗篇花间酌酒偏宜画雪後登楼似欲仙短笛有时吹崦外小舟无客繫篱边傍人欲识闲中乐一刻应须直万钱

又

山上新亭荫白茅亭前栖鹤可窥巢泉流谷口禽争浴叶拥篱边犬自跑日出山童歌竹外雨收林鹊影花梢卜邻亦有餐霞客漫与严光赋解嘲

又

早从上国接英游晚卧沧江擅一邱无复谢公携处妓空余陶令去时舟千章古木排云起一派寒泉傍石流客至不须谈世事小亭已扁四宜休

又

名途汗马孰云非蜗角功成事已微谁向急流思返棹竞夸好手羨微机落林笋嫩充庖美出

水鱼鲜入馔肥饱饭藤床无愧忤先生可是独能归

又

高人岁晚事多慵厚禄从渠说金锺花忆河阳红灼灼柳看栗里碧重重百年敝邑思遗爱几处生祠写妙容最是断崖诗句好总夸秋水出芙蓉

又

絶无尘土到幽局手把离骚傲独醒弁岭晚来云自白六湖春尽草长青沙边忽复飞鸿鴈屋角随常鸣鹄鵒莫对江山重回首乾坤万古一邮亭

又

青山如玦水如环醉倚溪蓬自往还松菊尚留三径外蓬莱只隔片云间无弦琴在谁能听遣兴诗成不复删彩服相携庭下戏慰情时复一开颜

又

尘事纷纷未有涯一舟聊复信年华闲过弇里先生宅漫访孤山处士家有酒何曾留俗客无钱犹自买梅花新诗写就人先覓醉笔淋漓整复斜

又

酒瓮书囊列两楹絶胜虎节镇专城南山衲子时相覓西塞渔翁似结盟漫数归鸿频户立偶看戏蝶倦堦行莲花博士归来早雪髯寻春最有情

又

半山松竹一溪云门巷萧然絶世氛适意静观玄蚁阵忘机不乱白鸥羣寒花有态窗前发古路无情户外分天上故人频问信未容高隐断知闻

次韵答唐

扁舟出郭避纷华两岸青山似若耶腊雪尚迷樵客路晚烟遥接野人家地偏阳谷花重蕊厨近陰林笋迸芽若得主人分半席便携书劒老烟霞

又

岁晚相求岂为贫每怀高谊出天真几回问信惭来使半载幽居愧负薪桃李不言人自醉芝兰满眼意常春重来尽有沧洲兴长伴诗翁赋采苹

登黄龙洞後岩絶顶望太湖

灵湫注目一时同絶顶孤攀似发蒙历历蜗庐迷远近依依蚁垤抱西东穹青一色秋无价积水千寻日耀空振袂无言聊引望海天云尽见飞鸿

题黄龙洞

苍弁西来拔地雄重岩直下贮虚空根连笠泽天光合润接蓬壶海气通灵响有时闻世外真人无位守规中油然一缕山前起乞与人间作岁丰

子贤兄赐诗兼柬谨依韵和谢并述近况呈诸兄一笑

独抱遗经托远岑敝庐犹得日相寻天寒白鹤归华表日暖黄鹂啭树陰弱质每惭经史富多情应念语言深山中二月桃花发无限春晖寸草心

又

朴学常忧岁月侵空山渐喜断追寻路穿芳树飞红雨门掩疎篱护緑陰淡泊过从元有道寻常酬对不须深春来处处闻啼鸟白日青天万古心

又

偶结茅茨傍緑岑旧书失忆故温寻水鸣幽涧疑长雨日上重岩散积陰承谢朋来渐相问每思林密更山深中宵忽忆奇瓜咏愧尔高人世外心

德懋彦明次家兄韵见示再和二章

长日悠悠望翠岑敢期胜友复重寻林端笑语日初上竹外分携山半陰性癖自宜机事浅才疎每愧故情深危途雨急忧泥滑肯信禽言漫苦心

又

尽橐图书上玉岑小斋终日自幽寻反关已愧莺迁木抵掌还闻鹤在陰俗士天机何浅浅高人踵息自深深劳生可愧非吾有莫负邹公说本心

代送尚文之句容县教谕

乡闱试罢彩衣回仙县吟诗画鷁催平世漫推文学掾清时方急栋梁才綠槐影里琴书静红杏花边车马来山近龙盘多暇日秋高拟上凤凰台

又

清朝取士野无遗百里咸夸学有师才子有为终得意文翁兴作谩停施蟾宫桂在宜通籍泮水芹生且咏诗闻说经林多俊杰弹冠拾芥总堪期

又

秋闱擢秀独青年未觉南宫进士贤奉檄自同毛义喜着鞭从是祖生先明时俎豆宫墙近静室金丝学館聯秋色三茅多逸兴停云赋就更裁笺

谢赵公子

公子才名四十秋清门自昔重南州书藏内府连圭璧剑起丰城动斗牛春日暖云生玉树晓天新月堕银鈎珍图不使豪家得邂逅还容一士求

黄氏棣华碑

乔木凋零故国同黄家兄弟最高风花间市隱如潘阆湖上仙居近葛洪放鹤客稀棋局在吹箫人远石坛空棣华原上遗双碣西蜀文章宋两公

遣怀寄程明远

朴学常忧力不胜朋来共感岁年侵尘编屡掩成三叹古调初传每独吟鴈过林中无落影鹤鸣天际有遗音河原万折通银汉不废仙槎自在寻

感怀

猫竹墩边径路平往来犹得傍先茔青青菽麦心为恻郁郁松楸眼独明山接仪型瞻岳峙水回步履遶云行当年属望成何事老大无能泪暗倾

游富寺源赠任达可教谕

青山外护大牙街中列千峰剑戟攒红树高原秋入画苍松出涧晚如蓝昔人避世今无地往事伤心兴莫谈齐鲁烟尘应复息待君重着广文衫

次童以清韵

山城二月百花开喜代元戎报捷来县小适逢多事日时危须仗出羣才乌丝写就云生沼白紵裁成月满台为有幽期常极目晴空双鹤自飞回

存中过余山中言及乱时所遭赋此为赠

衣冠早日见昇平谈论雍容接老成已■〈扌 弃〉图书归劫火偶从锋刃得余生大裘千丈仁人志九食三旬达士情共看寒梅开腊後东风渐转北枝荣

除夕赠倪明善程仲元

旧交谁可共残编乱後相逢意惘然肯伴岁除怜我病欲传家学识君贤治身士苴知何晚涉世风帆愧不前莫叹长鑱逢积雪清谈相与度新年

别仲本

同上危峰雪满衣云飞川泳总真机图中太极谈何易纸上先天理亦微未达陰阳寧有道不明悔吝岂知几敢忧岁晚忘师友朴学常忧与愿违

和叶中茂过访见贻四章

早识长材叹陆沈逢时况复重南金少年漫说从军乐志士常怀报国心已见奇功书幕府每传佳句到山林孤灯偶共抽青简夜雨寒窗感慨深

又

久知富贵等云浮漫自空山擅一邱志定不辞沟壑辱身闲亦抱古今愁每怜山色频移杖为惜蟾光独上楼荷子远来同寂寞茯苓黄菊总堪求

又

山阁初成景物新况逢好友赋诗频丹霞射牖迎初日清露沾衣望北辰野客过从无俗虑林僧谈笑总天真昔人乐处吾何有千仞峰头自在身

又

材如樗栎敢求知况是经年值乱离朝市岂无心似水山林皆是命如丝田间植杖躬耕乐雪後提竿独钓奇久矣忘怀同木石故人不用苦相疑

屏山即事时周明府来访

地近仙岩日自长短墙时度竹风凉楼头古木禁秋雨檻外危峰倒夕阳高榻坐闻金奏响小
桥行近翠盘香清谈况复陪贤达始信他年未易忘

次韵答尚文

论交有自岂相违雨雪寧辞欵素扉每恨常流轻造化故将苦语辨危微道通天地元非物德
合诚神始见几恐负初心惭俊杰一簞甘食故山薇

题黟县舒仙翁东岩隐处

仙家楼观倚崔嵬万仞峰头一径开陰壑每防雷电起夜坛静看斗杓回祇应跨鹤云中过尚
想吹箫月下来远望平原秋树短累累荒塚漫兴哀

丙申冬游黄山

束縕迎门月墮初同来有客共艰虞几年避寇今无地何处诛茅可结庐雪虐风饕樵客路山
囚濑紮野人居一簞肯许同栖息寂寞残生不愿余

游浮溪

剪刀峰下浮溪路昔隐仙成谩不开树古根柯皆铁石水清沙砾尽琼瑰坛空代远鹤时至地
僻山深人鲜来远外旌旗犹满目结茅无分又须回

赠推命焦月岩

李送水迎仍值箕奎躔火日竟何为祇应少日怀经济垂近中年迫乱离至乐每从天外得长
生难向命中期藏书避地俱无计祸福烦君仔细推【先生己未生安命在戌太阳火星同躔
奎度李在丑水在寅当时谈星者言行限至箕前有水後有李必不佳故起句及此】

次韵成大用推官黟县即事

无复居人接近郊空余白骨没青蒿旌旗蔽日军容壮营栅排云地势高败屋毁垣迷故邑小
溪春涨入空濠浮邱近有黄山约千斛松肪可酿醪

次韵谢成府推见赠

名途早日号清修尚尔祥刑佐一州几处干戈犹扰扰百年襟抱自休休时平风物应难见岁
晚功名或可收闻道朝廷思用老苍颜云髯侍宸旒

寄别叶宗茂

交旧相看不忍分此生真合断知闻坐中总是江南客幕下谁空冀北羣数口完归良细事百年多病等浮云由来匡济须人杰莫把虚名误使君

题九龙庵新楼

楼观凭虚倚玉台远涵空翠絕浮埃璿玑宵转星辰近沆瀣朝盈户牖开雷劈苍崖龙起立风翻碧海鹤飞回仙家自信春长好应笑胡僧辨劫灰

栖真别館赠松高链师

舫棹青林翠欲流寻真胜复□英游上方道士红双颊别館仙翁碧两眸绦节朝回琼岛近金丹时就石坛幽投书欲与乡人别长伴羣仙驾十洲

与叶宗茂游山村

村南村北春事幽故人乱後得追求仓惶屡作经年别邂逅能无一日游丁令归时空遗恨虞卿隐稳不须愁卜居共爱清溪好先向沙边具小舟

非士非农

岩石萧条井邑墟名山何处可藏书神伤乔木高风里日乱荒榛细雨余卖药有人知姓字灌园无力任耕锄敢逃非士非农诮会跨琴高赤鲤鱼

秋兴

多难逢秋易感伤萧条忽觉近重阳荒村风雨行人少故里烟尘病日长太史藏山书未就少师入海梦难忘愁极每疑彭泽令便将何道出羲皇

又

山寒拟欲傍阳冈病骨惊秋怯夜长归去已无扬子宅乱来难覓郑公乡有生宇内孰非寓永死人间何处藏木落天高无鴈过闲思往事立苍茫

代书戏答友人

莫怪端居傍友生苍黄逃难各身轻浮云枯木岂相恋北斗南箕空有名金谷危楼多薄命玉川破屋最高情蠹鱼寂寞繙长夜银烛谁家笑语声

月潭雪中

烟雾空蒙雪满山溪行清絕不知寒披云钓艇游仙去激水风轮入画看野宿遗黎兵後泣宵征武士道傍餐多愁多病谁知者强对清尊一破顏

赠曹元达子

故人别我今几秋见尔难禁双泪流一家寄食悲南国千骑摆麾雄北州转战不知何处在相逢未拟此生休清门生理依诸舅长大废书吾漫忧

阆山香岩院

千峰四面碧参差十顷水田展玉池下界风生尘似海半山云合雨如篴雷师降笔留丹篆佛祖开基见白龟宝殿重新煨烬後可怜无处覓残碑

次韵答王伯修见寄

万壑千岩一径幽烟霞烂熳不须收檐当雪瀑疑无夏窗近风林欲借秋钟鼓有人迎海鸟江湖无地着沙鸥方平近约来相访听彻箫声月满楼

又

数间茅屋倚漓岏莫道天寬地亦寬孙子嘯余山寂寂阮生哭後路漫漫扶搖万里非吾事栖息一枝聊自安羡尔龙潭宾主好牙籤插架日同看

赠汪仲鲁

短语长言总勿疑相交动是隔年期坐来竹雨初晴定看到松云欲尽时雪後孤芳谁复惜空中灵响妙难思山花满眼春将半莫厌从容步履迟

阆峰秋兴

岭峭崖倾径往还药囊书卷一窗间神鸦喜日朝争树山鬼依人夜撼闌露重无霜林果熟云凝不雨洞雷闲莫嫌岩穴多殊异天遣沈疴此闭关

除夕

守岁虽名岁不留停盃漫与数更筹艰危作客岂今夕隐约依人非昔游乱後亲交难会合春来书札莫沈浮开怀预卜风光好随处莺花得自由

省古逸汪先生墓

百年高兴太平时丧乱空余死後悲烟草已墟顏氏巷云山犹写杜陵诗饮水食蘖老逾壮鍛铁椎金幼已奇【先生年十六赋新竹诗云待成竿後节方露自作笋时心已空又赠人云椎金鍛铁作硬语意气砮砢真丈夫】赖有诸孙营葬地清风谁镌首阳碑

病中谢伴友

畏客山僧忽若惊松门下马雨初晴谩求衰病端何用谁使迂疎浪得名慷慨请行知雅意从容排难见真情风波况是同舟日伐木寧教愧此生

谢王伯睿郡丞

悠悠伏枕忽心惊好是灵乌报晚晴谢客奉书来隐逸令人致死薄虚名已知苦节能行义敢惜浮华不及情邂逅识君能恨晚输君临难若平生

送程明远归

一百五日客欲归别君谁怜吾事非泪随流水依山去眼散落花作雪飞溪谷春深惟草树郊原日暖自烟霏松楸在望身匏繫青壁无缘一径微

节日卧病和元忠

一百五日谁与期凄风苦雨不愆时桃花乱飞流水急鷓鴣忽鸣芳草萋春尽可堪寒作恶愁来偏与病相宜已将梦幻观人世莫向亲交怨别离

又

一百六日谁与游残花满地意如秋病意悒悒慵把卷春寒漠漠怯登楼鹃声似挟生前恨蝶舞曾忘梦里愁怪得羽人超世外海中原有凤麟洲

秋怀

莫怪人呼作病翁长年药裹愧无功梦回左角鸿沟外秋入南柯石火中阳九适逢当日厄大千曾悟本来空跼???凿井寧多事安得相携一笑同

庚子日南至愚得子枫林朱先生允升赐书并诗举资中黄先生书成得子为况且其令郎以寅年寅月夜半生而是子以子年子月日中生偶亦相类次韵谢之

藏山竹筒头堪白海上桃生不记年节日祜祥虽偶似科名宦達总输先成书漫付将来世有
後应观已定天文字尧夫今不愧敢辞端拜百王前

寄朱先生允升

先生诗教世所慕闻道书成思服膺将军枉驾可相见龐老入城知不能山林九鼎士轻重宇
宙六经时废兴我欲登门行复止新愁旧病巧相仍

都諫汪公即席用朱先生韵赐诗依前韵和谢之

皇华屡重轺车选能赋况当英妙年霜木晨星交有道金芝玉树覩争先已观淮海同归德未
必江湖别有天此去山中应可隐陈编重理获麟前

省朱文公官坑祖墓

攢簇千峰一嶂开乾坤间气此胚胎百灵受职环真宅五纬回光拱夜台鲁国共悲祠庙毁闽
关不见子孙来干戈未息诸生老独抱遗书咏七哀

次韵谢朱伯初惠橘

溪上山中两絶尘惟应黄绮最相亲治生每愧奴无术行酒空闻脯有麟丹实结容朝得句锦
囊驰赠座生春年年移作朱门供漫想山林色正匀

又

病骨逢秋怯早凉登高无分伴徜徉忽惊风雨重阳近自觉山林引兴长嘉果年年劳远赠新
诗字字写幽香何如四老无名姓千古商山有耿光

读宏斋遗藁【公姓曹氏碧梧之客虚谷之友第进士除昌化簿而宋亡故公云不仕无官势
服得人居贫无钱动得人懦善安分无机谋恐脇得人一二十年来小人道长日甚一日受侮
不少一味坚忍】

村館文場迹已陈时粧不入白头新梧翁去後情怀落虚叟归来感慨频故国神游身似客荒
村梦断孰为隣已知消长从来事安得机谋恐脇人

赠德懋赴乡塾因怀尚文

篮輿晓过悠然阁杨柳依依士塞门此日端居先业在当时避地几人存扁舟夜雪须乘兴锦
里烟尘正断魂尊酒喜君文会近莫轻一技好重论

汭始见黄先生问生何岁对曰己未先生曰吾六经补注以己未年刊或曰书已刻矣恨无读者吾应之曰恐读者未生尔岂知子之生年乃吾刊书之岁又获相交岂非偶然乎乃命春秋之学今年二十有七年矣值愚生朝次思敬韵以寓其感云

昔闻黄子书成日正值麟经托始年皇览揆初悲後死斯文未丧孰先传春秋霜露如将见歌舞衣裳忍自妍诗句只增生日感劬劳啄啐两凄然

次陈先生韵

十年寝瘵负遗经羞见生朝客满庭谩灼膏肓驱二竖懒从磨蝎问三星病逢竹叶疑无分老插花枝亦翫馨安得如翁耆且逸尊前长对舞衣青

又

学传东阜旧家声稷下兰陵独老成前辈仪刑观晚节後生狂狷异中行童顏肯信童心在鹤发偏宜鹤梦清吾郡斯文应不坠藤溪溪上月常明

赠程仲本游齐云岩

君去齐云莫漫回好依仙境结灵胎山开宫观疑金阙云捧香炉出玉台羽化有缘天上去神游还向世间来臞儒自昔居山泽坐老尘凡空自哀

代赠郑士恒卜居灵山

一榻高悬入翠微故人情重不相违烟霞烂漫新樵径水石荒凉旧钓矶灵草飘香林有主金炉分焰座生辉神仙自在人间世曾约秋清款素扉

寄壽王总制

西征千骥筦秋云父老壶浆昔迓迎闻道山陰空返棹恒应河内合留君酒倾练带来称壽碑压花屏待策勲但愿福星长在郡春生四野乐耕耘

次陈实卿韵

麟出非时祇漫伤书成世乱孰为祥石盘穿透能辞钝宝藏尘埋自发光千载有人非晚遇名山何处可深藏流传未广慚推予酱瓿谁家正倚墙

筑室次陈实卿先生韵

烟销甲第是豪奢苟美蜗居岂尚华扬子苦贫犹有宅杜陵遭难久无家续将貂尾元非旧
补天功岂有涯追远敬宗惭未就新诗合与广筵夸

送杨希武参政行省山西

嘉谟硕策合居中出入宣劳属望隆才驾六轺归蓟北还飞双旆去河东晋侯旧赐提封远
汉相新瞻礼秩崇廊庙待公归补袞边陲暂遣播皇风

送汪朝宗参政行省陕西

清忠自合侍宸旒方面频看寄远猷西迈新闻分陕重东归共识相齐优藩垣势合雄图遂
竹帛功成壮志酬回首蓬莱云海上金陵千古帝王州

送蔡齐贤参政行省福建

近臣持节镇闽中藩府东南控制雄率土已归新版籍济时还属旧勲庸天开百粤蛮烟晓
地接三山海日红圣主宵衣勤政理太平思与远人同

息交亭

久病形骸日觉非杜门真与故交违已无筋力供迎送岂有文章更发挥多难锺情宜絶物
残年顾影合知几寄言返棹山陰客鵬鷃逍遥共一机

次韵戏答留题东山者

诗翁扶醉上危巔得意留题拂短垣嗔喜未忘春梦後是非犹记劫灰前弓刀几处排坚阵
风月何人共小轩失脚黄尘应有恨元龙终不羨求田

唐伯庸以诗谢作读书林记次韵答之

麀居原不见纷华矮屋疎篱只一家雪後松筠初换叶春深桃李自开花读残青竹无人到
览罢黄庭日已斜此道近来成寂寞似君端合向人夸

○诗【五言絶句】

隣翁

世乱云浮薄年荒虎迹多隣翁近相戒日暮少经过

○诗【七言絶句】

咏蟋蟀

赤趺晶荧何处归秋来清响傍庭闱莫言微物无情意风虎云龙共一机【先生年十二时从胡井表学于家塾赋此诗胡大惊异赋乳燕诗以答之云他年高拂云霄上莫负当年乳哺恩】

陪程仲本借馆杨居士宅雨後登芝山赋

道人居处若云浮枯木偃蹇忘春秋西山雨後见红日芳草长林自牧牛

山间杂题

外合中函四顾平大明东出月西生莫言直上难回首千仞峰头踏地行

游小溪浙源山中

旧游何处覓苔矶水涵山童事事非忽到小溪深树侧鸳鸯惊起逐羣飞

次韵鲁斋登高山见寄

山上元来更有山梯云拾级不辞艰五车合着烟霞外三尺潺流水石间

读唐人诗

悲秋才罢又伤春洛浦迷魂泽畔身尘事转头都是梦总将哀怨属何人

读宋人文

六经明晦总关天白首穷经续断编石介不生王令死荒郊古塚鬼谈玄

山居杂题

山高结茅不厌低山下如今路已迷新月夕阳都不管晚来愁絶数峰西

又

高枝密叶一时空倚杖沉吟落木中乱後山居无纪历偶来林下见西风

送金元忠赴程鲁瞻家塾兼寄鲁瞻

古阆山高賸蕨薇与君同隐惜君归桑榆逐煖空匏繫百里层霄看鹤飞

刘敬思邀访南屏隐者莫景行同游南山

闲思水乐访深幽清浅还登泛月舟欲与西湖添胜迹南屏老子最风流

题澄心亭

亭中客去日西沈云净天空月影临万籁无声羣动息千山一色静高深

次韵答何判簿见寄

红光犹在斗牛间未鬪龙泉岂遽还金马玉堂随世换清风明月几人闲

又

少驻沙边载月舟依依父老话平畴霜清木落山容净三十六峰浑是秋

○词

松风慢【代送吴德夫衡阳巡检】

溪亭春晚共离觞何许是衡阳香罗初剪征衫好东风里快马轻装市远擘张闲暇年丰虎落相羊 苍梧云尽暮天长山色似吾乡莺啼緑树飞红雨三千里处处耕桑说与年年归鴈重来应念潇湘

柳梢青

回鴈峰前■〈山上〈弓攵〉下〉弓下马春满前川云尽湘潭深村无警白昼安眠殷勤祖道开筵应记取松萝暮烟一曲离歌柳梢青浅花萼红嫣

东山存稿卷一

卷二

●钦定四库全书

东山存稿卷二

（元）赵汭撰

○文

周正考

春秋虽继史为经犹存其大体谓始年为元年岁首为春一月为正月加王於正皆从史文传独释王正月者见国史所书乃时王正朔月为周月则时亦周时孔氏谓月改则春移是也後於僖公五年春记正月辛亥朔日南至十七年夏六月记太史曰在此月也日过分而未至当夏四月是谓孟夏记梓慎曰火出於夏为三月於商为四月於周为五月皆以周人改时改月春夏秋冬之序则循周正分至啓闭之候则仍夏时其经书冬十月雨雪春正月无冰二月无冰及冬十月陨霜杀菽之类皆为记灾可知矣汲冢竹书有周月解亦曰夏数得天百王所同商以建丑为王亦越我周作正以垂三统至於敬授民时巡狩烝享犹自夏焉其言损益之意甚明经书春烝春狩夏蒐以此盖三正之义备矣而近代说者往往不然夫以左氏去圣人未远终春秋二百四十二年以及战国之际中国无变鲁未灭亡传於当时正朔岂容有差而犹或有为异论者何也盖尝考之曰殷周不改月者据商书言元祀十有二月而秦人以十月为岁首曰夏时冠周月者则疑建子非春而孔子尝欲行夏之时也按太史公记三代革命於殷曰改正朔於周曰制正朔於秦曰改年始盖正谓正月朔谓月朔何氏公羊注曰夏以斗建寅之月为正平旦为朔殷以斗建丑之月为正鷄鸣为朔周以斗建子之月为正夜半为朔是也殷周即所改之月为岁首故曰改正朔曰制正朔秦即十月为岁首而别用夏时数月故曰改年始其言之已详汉书律历志据三统历商十二月乙丑朔旦冬至即书伊训篇太甲元年十有二月乙丑朔伊尹祀於先王以冬至越弗行事其所引书辞有序皆与伪孔氏书伊训篇语意不合且言日不言朔又不言即位则事在即位後矣凡新君即位必先朝庙见祖而後正君臣之礼今即位後未踰月复祠於先王以嗣王见祖此何礼也暨三祀十有二月朔奉嗣王归于亳是日宜见祖而不见又何也所谓古文尚书者掇拾傳会不合不经盖如此说者乃欲按之以证殷周不改月可乎又言从九十五岁十二月甲申朔旦冬至无余分春秋历周文王四十二年十二月丁丑朔旦冬至後八岁为武王伐纣克殷之岁二月己丑晦大寒闰月庚寅朔三月二日庚申惊蛰周公摄政五年正月丁巳朔旦冬至礼记孟献子亦曰正月日至七月日至其说皆与传合夫冬至在商之十二月在周之正月大寒在周之二月惊蛰在三月夏至在七月而太初历其在立冬小雪则曰於夏为十月商为十一月周为十二月唐人大衍历追筭春秋冬至亦皆在正月孰谓殷周不改月乎陈宠曰阳气始萌有兰射干芸荔之应天以为正周以为春阳气上通雉鷄乳地以为正殷以为春阳气至天地已交万物皆茁蛰虫始振人以为正夏以为春盖天施於子地化於丑人生於寅三阳虽有着三正皆可言春此亦历家相

承之说所谓夏数得天以其最适四时之中尔孰谓建子非春乎乃若夫子答顔子为邦之问则与作春秋事异盖春秋即当代之书以治当代之臣子不当易周时以惑民听为邦为後王立法故举四代礼乐而酌其中夫固各有攸当也如使周不改时则何必曰行夏之时使夫子果欲用夏变周则亦何以责诸侯之无王议桓文而斥吴楚哉何氏哀十四年传注曰河阳冬言狩获麟春言狩者盖据鲁变周之春以为冬去周之正而行夏之时以行夏之时说春秋盖昉於此然何氏固以建子为周之春但疑春不当言狩而妄为之辞至程子门人刘质夫则曰周正月非春也假天时以立义尔则遂疑建子不当言春此胡氏夏时冠周月之说所从出也先儒见孟子谓春秋天子之事而述作之旨无传惟斟酌四代礼乐为百王大法遂以为作春秋本意在此故番易吴仲迂曰若从胡传则是周本行夏时而以子月为冬孔子反不行夏时而以子月为春矣何氏之失又异於此故朱子以谓恐圣人制作不如是之纷更烦扰错乱无章也薛氏又谓鲁历改冬为春而陈氏用其说於後传曰以夏时冠周月鲁史也是盖知春秋改周时为不顺而又移其过於鲁尔然谓鲁有历实刘歆之误按律历志言刘向所总有黄帝颡顓夏殷周历及鲁历为六历自周昭王以下无世次故据周公伯禽以下为纪自阳公至缙公冬至殷历每後一日则由历家假鲁君世次逆推周正交逆之合否因号鲁历非鲁人所自为明矣宋书礼志又言六历皆无推日食法但有考课疏密而已是岂当代所尝用者哉刘歆惑於襄哀传文遂谓鲁有司历而杜氏因之谬矣然说者亦自病夏时周月不当并存故直谓春秋以夏正数月又疑若是则古者大事必在岁首隐公不当以寅月即位其进退无据如此固不足深辨而惑者犹以为千古不决之疑则以诗书周礼论语孟子所言时月不能皆合故也夫三正通於民俗久矣春秋本国史记书王正以表大顺与颁朔为一体其所书事有当繫月者有当繫时者与他经不同诗本歌謡又多言民事故或用夏正以便文通俗书乃王朝史官记言之体或书月则不书时或书时则不书月况伪孔注二十五篇决非真古书其有合有否皆不可论於春秋周礼所书正月正岁皆夏正也诸官制职掌实循二代而损益之其着时月者又多民事与巡狩烝享自夏者同故仍夏时以存典故见因革盖非赴告策书定为一代之制者皆得通言之则又不可论於春秋矣若论语言莫春亦如诗书言春夏皆通民俗之恒辞也不可据以为周不改时孟子言七八月之间旱十一月徒杠成十二月舆梁成在左传後则周改月犹自若竹书人记晋曲沃庄伯之十一年十一月鲁隐公之元年正月也竹书乃後人用夏正追録旧史故与春秋不同然亦未尝辄以夏正乱春秋之时月也盖殷周改时月与所损益只是一理如尚齿之由贵德而贵富而贵亲亲迎之由庭而堂而户大事之由昏而日中而日出之类皆是迭进法所以顺天道通世变在当时自不异故孔子以为百世可知非徒曰以易人之观听而已彼秦人以三代为不足法既不足以知之而後之蔽於今而不知古者亦不足以言之也自啖赵而後学者往往习攻左氏而王周正月为甚以其尤害於经特详着焉

私试策问

孟子之书於篇末历叙羣圣相传之统而终之曰然而无有乎尔则亦无有乎尔先儒所谓明其传之有在而又以俟後圣於无穷者也至於近代而以兴起斯文为己任者盖有其人矣何可以不知其传之所在乎或曰由孔子而上圣人以心相传者也由顔曾而下则学者传焉道统之云未可轻议也其信然欤昔者春陵周子之兴河南二程子实受其学自孟氏而来未能

或之先也其所以续夫千载不传之绪者亦可得而闻其说之详乎伯子尝曰吾学虽有所受天理两字却是自体贴出来叔子亦谓返求诸六经而後得之则所谓受学者果何事欤其同时则有若司马温公康节邵子横渠张子焉三君子之所造其优劣何如也订顽正蒙之训精思而妙契矣所谓非明睿所照而考索以求至者何所指欤内圣外王之学醇一而不杂矣居洛三十年未尝一语及其数且有儒伯之讥何欤登程氏之门而得其传者可悉闻欤其所造之浅深亦有可知者欤龟山杨氏之传为罗仲素氏李愿中氏而子朱子出焉其授受之际微言精义犹有可考者欤道南之叹程子之属望於中立者何如也而乃深以着书为戒何欤当是之时道学虽明而六经羣圣人之书俱未有定说乃有转使人薄之忧何欤岂他有微旨欤胡文定之传为其子仁仲氏而知言大纪二书作焉其立言之要可得而论欤其於程氏之学果能脗合而无间欤子朱子折衷诸贤之言而集其成盖有不可得而辞者矣然四书之注至於易箴犹改窜未已将无尚有待於後之君子欤尝谓诗集传後有子云必好之矣而若不满於易本义者何欤书属诸蔡仲默而克有成其果能继朱子之志欤春秋尝属诸黄直卿矣而卒无所论着何欤至其晚年尤倦倦礼书弗置深以不克见其成书为忧今其书成矣其述作之本意亦可得而推见欤其同时有张敬夫氏吕伯恭氏其所造之浅深犹有可论者欤又有象山陆氏者相与上下其说终身不能相一而且美之为为己之学何欤为己之说可得而闻欤朱子尝徵诗说於陈君举君举辞焉而以书币求反己之道於陆氏果何所见欤登朱子之门者衆矣得其传而不悖不惑者亦有其人欤其後又有魏华父氏真希元氏皆学乎朱子之学者也其於圣人之道亦皆有所发明欤夫传道有宗适道有涂而立言垂训则又成已成物之余事也然则即其传而求其统之所由续本其身而论其德之所以成此格物致知之先务也有志於学者愿相与讲明之

对问江右六君子策

【先生初游虞公之门乃试江右六君子策篇末拳拳朱陆之异同为问先生素熟於胷中剖决精当明言始异而终同焉万世之公论也】

问孟子取友善士自一乡一国至於天下犹以为未足而尚论古之人焉其言曰颂其诗读其书不知其人可乎即一乡一国之人可以谓之天下之士者古有其人焉何可以不知其人也以江右论之士之励名节者莫盛於东汉矣豫章有徐孺子者千古所谓高士也巽懦苟且之衰世非斯人吾谁与归观其一木一绳之叹其於圣人之无可无不可者何如也晋有陶渊明者实生於九江出处大节世盖拟之诸葛孔明而先儒观其诗乃或疑其出於老子其信然乎宋有庐陵欧阳公以其冲和之气发挥治世之隆盖其文以谓上接於孟韩者也孟子之绪可考乎南丰曾子固当濂洛未兴之先孝友之行经学之懿帝王之制其见於文者无愧於方来也清江刘原父博学洽闻春秋三传之释仪礼之缺遗秦汉以来之典故文学之士未能或之先也後之学文者积学之功为德之厚未至於三君子而曰文乎文乎哉其南渡也陆子静先生生乎临川之青田高明卓异前无古人与朱文公起而相望於当世学者从之入德之门或小异焉尝观陆先生之在白鹿也讲君子喻於义小人喻於利一章学者闻之感动流汗朱子亲执笔而请其书焉其相尊敬如此夫义利之分甚微所谓几也孟子分舜跖於鷄鸣周子发刚柔之善恶此求端之至精者也而二先生曷尝有异哉然而朱氏之学实宗於周子周子之

书莫先於太极而有极无极之辨学者有莫逆於心者乎鵞湖之会固将以一道德也而简易支离之说终不合而罢然二家之精微非大贤相与剖击则下二贤一等者殆无从而知之矣道之不行也知者过之愚者不及也道之不明也贤者过之不肖者不及也所以不可不知其人者其在斯乎夫治道必本於学术环数千里之间必有同志之士得乡先生之微者幸相与讲明之

对大江之西环地数千里名公钜儒相望而起者衆矣执事发策承学乃独以徐孺子陶元亮欧阳公曾子固刘原父及象山先生六君子为问始之以孟軻氏尚友古人之实以开其端终之以朱子象山之异同而尤拳拳於斯道之所以不明不行焉大哉问乎执事之用心厚矣晚学小子曾何足以知之然则请因孟子之言而姑诵其所闻以复明问之万一可矣夫所谓天下之士者不出乎一乡一国也以一乡一国之士而以天下名则其所立必有大异於常人者矣以天下之士而尚论古之人颂其诗读其书矣而犹有不知其人之忧焉则孟子之所谓尚友者其亦有在於言词之外者乎【学士虞公批云应在後】此所谓必论其世者也今以六君子观之孺子元亮以风节称欧阳曾刘以文章着若陆先生则学乎圣贤之道者也【批应在後】然因其言而考其世则皆有未易知者焉昔汉室之将微也所谓天地闭而贤人隐之时与有圣人焉生於其时吾不知其出处之何如然党锢诸贤以身殉国而卒无救於炎祚之亡则孺子之高风为不可及矣观其辞玄纁之徵避黄琼之辟问国事则不答问稼穡则答其察乎时义盖非一日虽以郭林宗之明哲犹有待於一绳一木之言而後感悟则所谓见几而作不俟终日者非孺子其孰能当之千古而下想闻其风而顽廉懦立者其以斯欤逮夫典午氏之亡也南面之君欣然操笔以位禅强臣而不悔一时在廷之士谁复为纲常计者独彭泽令陶潜以大臣之孙耻事二姓其於君臣之义得矣慕诸葛而以其名为字咏荆軻而惜其剑术之疎则子房博浪之心孔明复汉之志元亮犹有不能忘於心者乎然观乎其诗则敛英气於冲陶寄深心於淡泊有类乎知白守黑之为者而世俗之论亦惟见其杜德机焉此子房所以诛秦蹶项以报私讐而终身不以告人者也故先儒谓其出於老氏其亦可谓知言者矣【批是翁心事惟东坡山谷知之出於老氏乃吾朱子语】然其言有曰羲农去我久举世少复真汲汲鲁中叟弥缝使其淳自昔清谈之士谓淳漓朴散繫礼法使然孰知鲁叟弥缝将以淳之邪【批亦是】此孔明之正大所以不为三代以下人物者元亮其无愧焉嗟夫使晋室之胄而有一人焉庶几乎昭烈之贤则夫子房孔明之所优为者吾知元亮其兼之矣【批前数子惟渊明为难知此独无遗憾】後之君子向慕比擬而以为不可企及者其亦有感於斯乎後数百年当宋室之盛而欧阳公出焉雄文直道世盖谓孟韩复生也论其学之所至视知言养气之君子非所敢知然其立朝也与希文以偕贬而不同其进与定天下之大策而不自以为功【批指立英宗】其接後学也不以疎而弃不以远而遗世皆谓公之求士甚於士之求公焉【批东坡语】五代史之作反覆乎有国者所以兴衰之由若生乎其时而忧其世者其视昌黎子所谓畏天命而悲人穷者盖无间然矣子固出於其门文章经术庶几公之为盛而义理之渊微典故之宏博又有以发公之所未发者焉然观其力贫以养母而人无间言嫁孤妹九人而皆得其所善王介甫而深知其非则後之大儒观乎其文而愿学焉者【批谓朱子】岂惟以其诰命之不愧三代哉【批亦文公语】若原父则公之畏友也其经学之邃则士相见等篇可补记礼者之缺遗春秋权衡七经小义之作又有以破专门学究之陋其典故之博则上而秦汉以来帝王之制作古文奇字之音训下而山经地志陰阳医卜稗官小说之书

莫不淹贯虽以永叔之才学而原父犹以其不读书为惜则其抱负亦伟哉然当羣贤彙征之秋馆职之任七年不迁仁宗亲定夏竦谥则以为侵臣官加上尊号则以为非古礼【批公是立朝可见者二事】其官守之际严矣後之君子喜谈而乐道之者岂惟以其立马挥九制之为能哉虽然以三君子积学之厚制行之高所谓实大而声宏者也使非文章之盛犹足以暴白於当世然後之论者徒知贵其言词而不复稽其行事则亦异乎孟軻氏尚友古人之意矣【批应前甚好】若夫陆先生之学与子朱子不同则有非愚生之所能尽知者然朱子之学实出周程而周子则学乎顔子之学者也程子亦曰孟子才高学之无可依据学者当以顔子为师至朱子之告张敬夫也则又以伯子浑然天成恐濶大难依而有取於叔子以成其德焉其自知也明矣陆先生以高明之资当其妙年则超然有得於孟氏立心之要而独能以孟子为师且谓幼闻伊川之言若伤我者观其尚论古人者不同如是则其入德之门固不能无异矣【批讲明有素者出语自别】夫儒者之学莫严於义利之辨而学术之弊率由气稟之偏孟子舜跖鷄鸣之分周子善恶刚柔之论其析之也精矣陆先生之在白鹿朱子请其一言以儆後学先生为讲君子喻於义小人喻於利一章深察乎学者心术之微而欲其致谨於二者之辨听者为之动心流汗朱子请其书而藏之今观先生之言深切明白使人羞恶之心油然而生诚不愧於孟子之训矣然周子太极之说亲授於程子而朱子释之曰上天之载无声无臭而实造化之枢纽品彙之根柢也以其无形而有理故曰无极而太极以其有理而无形故曰太极本无极所谓关百圣而不惑者也陆先生兄弟谓太极上不当更加无极字移书争之往复数四累千万言而不能相一何欤夫以中训极者是知太极之本体矣而中非太极所以得名之实也谓易有太极不当言无者是知论太极者之不当沦於高虚矣而犹未知周子立言之妙也然观朱子尝谓子静不知有气稟之性【批善看即自姑引此应前气稟刚柔之说见陆氏於周子之书不甚留意】则其於周子之书庸有未深考者矣鹅湖之论终以不合而罢者则又有说焉夫所谓墟墓而哀也宗庙而钦也即孟子所谓人见孺子将入井之心而朱子所谓介然之顷一有觉焉则其本体已洞然者也原其所指皆由已发之心而悟其未发之性则其要归亦有不合於不同者然而简易支离之说邃密深沈之言终有未合於是毫分缕析者深辨乎疏阔节之多失石称丈量者又以铢铢寸寸为必差则其所甚异者殆无过於斯矣执事之言曰二家之精微非大贤相与剖击则下二贤一等者殆无从而知矣至哉言也其深有得於二贤者乎晚学管窥复何容喙无亦徵之於二先生之所自言者可乎子朱子之答项平甫也其言曰自子思以来教人之法惟以尊德性道问学为用力之要陆子静所说专是尊德性事而熹平日所论却是道问学上多了今当反身用力去短集长庶不堕於一偏也观乎此言则朱子进德之序可见矣陆先生之祭吕伯恭也其言曰追惟曩昔粗心浮气徒致参辰岂足酬议【批此一证岂浅闻者之可及】观乎斯言则先生克己之勇可知矣夫以二先生之言至於如是岂鹅湖之论至是而各有合邪使其合并於暮岁则其微言精义必有契焉而子静则既往矣抑不知子朱子後來德盛仁熟所谓去短集长者使子静见之又当以为如何也【批甚好甚好正要人知此意】今朱子之书家传人诵其端绪之明则顔曾思孟以至於周程张子之所传可徵也其工夫之密则自夫洒扫应对进退而达乎修齐治平无间也岂有待於愚言而後知哉独陆氏之学则知之者鲜故愚亦不足以言之也然尝闻孟子曰仁人心也放其心而不知求哀哉学问之道无他求其放心而已矣又曰耳目之官不思而蔽於物心之官则思先立乎其大者则小者不能夺也此陆先生之学所从出也是故先生非不致知也其所以致知者异乎人之致知非不集义也其所以集义者异乎人之集义【批得之矣】

所谓毫厘千里者在此】他日朱子尝曰子静是为己之学又曰子静平日所以自任正欲身率学者一於天理而不以一毫人欲杂於其间则其所以复出千古者岂不在於斯乎若曰苟此心之存则扩充持守为可畧学贵自得则思索讲习之皆非则虽学知力行之士不足以语此而况於小子後生之至愚极暗者乎易曰学以聚之问以辨之又曰精义入神以致用也利用安身以崇德也岂徒易简之云乎此先生之高明所以为不可及也然则其可以易而言之乎奈何前修日远後学寡师求之而不得其要察焉而不见其端於是专务考索者傅会缴绕而终不知本心之犹在致力持守者私心自用而卒无以异於常人然後知二先生之所为深忧而过计者盖有在也中庸曰道之不行也知者过之愚者不及也道之不明也贤者过之不肖者不及也执事有感於斯言而以江右之先贤为问且深致意於孟軻氏不可不知其人之语其亦深悲後生之陷溺而思有以救之者乎【批过当过当亦嘉与同志者讲明之耳】不然何其言之忠厚惻怛至於斯也且江右乡先生多矣而执事所举自六君子之外无及焉岂非以风节关乎世教文章本乎学行而圣贤之道又有大於此者欤【批文字关键好】尚论古人而至於斯焉其亦可谓微矣夫政治之大由乎学术千里之繆起於毫厘断木为棋荆土为鞠莫不有法焉有志於学者而於求端择术之际无以致其思则其流弊将有不可胜言者矣愚不敏窃尝有志於斯而未之能进也惟执事其幸教之

古人云在朝言朝在野言野居江右而论江右之前贤非敢僭妄辨学以正谊亦君子惓惓不忘乡党之意也处忧患之世忠有所不得行孺子渊明之心岂苟然乎宋代古文之兴至欧阳公盛矣经学之用曾公何可当哉而徒见於文字者亦君子之所慨也近时学者从事先儒之成言可谓千古之幸然秦汉以来诸儒区区尽心之所存者忽而弗之究先儒之成言力不能有所尽知者矣此亦鹵莽寡陋之失不小也是以有慨於刘氏焉陆先生之兴与子朱子相望於一时盖天运也其於圣人之道互有发明而吾党小子知者微矣子常生朱子之乡而又有得於陆氏之说其答斯问也於前数君子既已各极其所蘊而於二家之所以成已而教人者反覆究竟尤为明白盖素用力於斯事者非綴缉傅会之比也一时友朋若子常之通达而起予者鲜矣辄书其後而归之集离羣索居安得与子常常相见乎进士科得人斯文之幸也得於已而有余随事答应之无穷舒之敛之惟义所在可也雍虞集书

华川文集序

自汉西京而後文与世俱降者近千载一旦豪杰之士相继而兴高文大册视西京几可无愧而学则过之何其盛也然诚能观乎辞与声之变则自春秋而战国每降愈下殆如老者之不可复少是以不能无慨於斯焉盖尝思之如列国之辞命庄生孙武苏张之徒之书皆其人各以平日所从事者立言其身之所亲心之所喻无不在是故能深切明着并夫言所不能及者而传之知是诸子者易置其事而为书殆将不能以自达然则非辞与声之为难而学足以周其用为不易有是学则有是言春秋战国诸子其斯以为不可及乎金华王君子克早受学於黄文献公既卒业即以文名於时汭与之别十有余年矣而子克学益进文益奇自欧阳王曾氏溯而上之以达於太史公往往得其风裁犹若未当其意乃即春秋战国西汉之书拟其辞命书诏三十有余篇其辞与声之高下步趋俯仰之疾徐无弗类者尝读至齐侯徵诸侯会于首止晋侯请天王狩等篇喜其可以补传注之缺谬而有益於经其他皆逞辞流而不失於正

然後知其振起衰陋又有不徒在文字间者虽其得於天者有过於人非学有师法而才足周之则亦岂能遂兼昔人之能事也哉子充以文学进用已久圣天子既混一华夏即诏修元史廼起宋公景濂总其事而以子充佐之书将成而宋公入翰林为学士子充为待制此文运将开之候也二公者居同郡学同师而又皆有志於复古以周秦先汉之文辞相与鸣国家之盛使来者有所兴起其不在兹乎

送叶宗茂还安丰序

新安叶宗茂归自安丰讲业父母之邦居无何复还省其亲寓里旦出别所与游者而告於赵汭曰亲庭不可以重违吾惧夫师友之日疎也子何以教我汭告之曰君子之为学固将以事其亲然有急先之务焉非服劳奉养之谓也子亦观乎圣门之学者乎顔氏之子居陋巷一簞食一瓢饮子路衣敝袍食藜藿负米百里之外之二君子者之事其亲非有甘旨之奉也然且从其师周游天下畏於匡絶粮於陈几殆其身而不反何欤吾闻人之得於天而贵於物者即其得於亲者也得之於亲而失之於已虽尽瘁以服劳列鼎以致养不可以为孝孰若得圣人而师之全其得於亲者以事其亲之为盛乎二君子之志庶几在此予不足以知之也今子自视家孰与二君子德孰与二君子二君子者师乎圣人其一时同游之士皆成德达材而子无有也二君子者学成行尊师表百世而子未能也子之亲年尚强桑田足以供衣食僮仆足以备使令日用百需不待子而可足然则即子之身而求其所当务不待子言而後知矣若夫志於近而遗远舍其大而图细此古人所谓一夫之行者岂足论於知学之士乎然自世降道失学者习於俗之已成迫於势之难返虽闻顔渊子路之事鲜能兴起於是乃有徇外以为学怀利以事亲盛气强力以徼幸其不可必得卒之并其得於亲者失之而後已岂不可哀也哉夫学然後知不足孝然後知困学而不知不足者不以事亲为学者也孝而不知困者不以事亲为孝者也子质美而行修识明而慕古求闻择善不啻渴饥无亦闻二君子之风而兴起者乎是固予之所畏也请书以为赠

送操公琬先生归番阳序

圣天子既平海内尽輦胜国图史典籍归於京师乃诏修元史起山林遗逸之士使执笔焉凡文儒之在官者无与於是在廷之臣各举所知以应诏汭以衰病屡谢徵命亦误在选中使者至郡太守将吏皆能言其病状然莫肯受其咎者故不得终辞舟过严陵适前太史金华宋公景濂亦至曰有诏召王子克於临漳矣予曰汭衰病日增非可出者纵出亦无补於事所幸者平生故人重得一见於契阔之余事固有非偶然者宋公曰然盖予与宋公不相见者数载而子克则十有余年矣既至京师闻番阳操公琬先生在书館卧病旦夕以闻即可归私又自念番歙接壤自弱冠则知先生先生学通诸经百氏述作诸家诸兄之家於番者与先生有连姻相好也每相见辄能言先生动静而未获一识今乃得相见於此岂非向所谓非偶然者乎自是日上堂与诸公从事笔砚间退则省先生疾先生疾少间辄俾予连榻卧谈论经史昼夜亶亶相扣击不少休予盖有愧焉俄而礼部尚书崔公侍郎傅公同至局中以得旨告至旦为别先生乃为文一篇以告同舍同舍之士莫不惜先生之归咸赋诗为先生赠予辱知有自遂进言於先生曰先生归矣士之在山林与在朝廷异其於述作也亦然纂释羣经折衷百氏处则

充栋梁出则汗牛马虽其说未必尽合於圣人非素业与之相出入者不敢议也崇古学贵文章凌厉汉唐上拟三代使穷乡晚进謏闻浅见之士目动神耸不敢出声以诵自揆终身不能为者又况陶冶性情吟咏风月或以单辞或以偶句为人所称皆足以名世虽或无取於作者於人非鬼责亦何有焉此皆山林之士所为得也若夫朝廷之士则不然太史公网罗旧闻上接春秋下迄麟趾其序高帝创业文景守成至今使人如亲见之书封禅平准传货殖皆谏书也而後世以为谤韩退之未遇时欲作唐一经以垂无穷既入史馆不敢有为柳子厚苦辞迫之曾不少动仅以职事成顺宗实录数卷卒困於谗口窜走无完篇司马文正公受知神宗作资治通鉴垂十九年始就而小人出鄙句以訾之此皆钜人硕德名实孚于上下以着书为大业者也犹或所遭若是今吾人挟其山林之学以登於朝廷之上则其茫然自失凛然不敢自放者岂无所惧而然哉尚赖天子明圣有旨即旧志为书凡笔削悉取睿断不以其所不能为诸生罪蒙德至渥也於是先生得以病辞归而支离昏昧如沔者亦得以预闻纂修自诡岂非其幸欤然则沔於先生之行独不能无所感者良有以也先生曰子姑迟之吾待子於番歛之间不远矣

休寧县令朱君考满序

古之宰百里者以导风化察冤滞兴除利害为职故曰六合之衆悬命於县令则令之责亦重矣惟用武之世兴废无艺讎斂率割令出二三使夫人旦暮凛凛有居兴之忧凡令所以为职皆不暇施为则其重且难又有异於前所云者昔吾读书至唐宋之末造未尝不抚卷而太息於斯焉休寧在万山间民因山为田而仰溉於天旬月不雨则陂塘之利恒以死争故鲜丰岁地陋而土瘠摘山外无他产舟车不通四方之货罕至当承平时吏颇以事简为乐一旦天下多故则丝缕膏漆铜铁之属凡军兴所急者莫不远贾他郡以上供令方急而民已罢限既穷而输未毕甚哉吾土地之不敏其为邑大夫之累可胜言哉於是乃有仗箠楚以集事者其间科斂繁夥出纳不时民不能与官会而侵牟乾没以重困雕眈者视斯人以诈力相仇苟焉自营甚至灭天性忘瓜葛而不知怪夫岂令之所欲闻哉亦知夫任职之重有在於兴废之外者而不暇思也若淮海朱君之宰吾邑则不然君坦荡乐易不倚法以立威而民趋事赴工惟恐後勤力言谨戴星出入虽疾病未尝少懈故贪残舞文者无所旁缘闵其俗日漓人心不古若也於纪纲伦类之际尤致意焉是以民皆乐称之虽然今法令日修赋斂日简亲民之官且得尽其职君在邑既久於百里间情伪淑慝宜无不知以其暇日举其所当为使利无不兴而害民者必去善柔不厄於横逆而鰥寡孤独得以遂其生必有以副斯人之望者而君以秩满告矣邑人既重德君又幸其征徭粗给不致大为君累且冀君之再任也故余述自昔百里之职其重且难有不可同年而语者为君赠意君由此而佐大藩典大郡以临属邑亦必有取於斯焉

送朱子范赴来安县主簿序

求木於山林者钜细无或遗匠石一过之则拔其萃者必十围之材也市马於边陲者驽骏常并收伯乐一顾之则空其羣者必千里之足也为国家者取士天下其亦有异於是乎吾邑朱君子范用举者言得主滁之来安簿同时以举得官如君者衆矣其儒且贤不必人人皆君若

而来安寄治郡中如古行县疑若不足以屈儒且贤如君者其门生子弟与交游之士惑焉余谓不然余闻古之取士其始常宽其终必严不宽则入官之途陋而不足以尽天下之材不严则考绩之效微而不足以成天下之务今君所由进者入官之途与人同也三载考绩儒者之效必将有异於人乎君自此且大用虽欲人人同於君得乎十围之木不登匠石之场与拱把同千里之足不入伯乐之廐与下乘同士之未达何以异此先正有言士自一命以上苟存心於爱物於人必有所济是岂非君素志欤江右古文明之都盖匠石之场而伯乐之廐也岂有儒且贤又有志如朱君而恒在下位者乎母患其宽而有以成其严则上下俱得矣仆与君居相近交相好而衰病日增不能追交游之後设祖道傍与君握手为别顾不可无一言乃书是说以赠君其尚有取於斯也夫

王节妇汪氏序

汉世复除之令盖本於周官乡师辨其可任与施舍者孝弟力田者复其身则又由闾师书其敬敏任恤者而推广之唐之盛时乃命旌表孝子顺孙义夫节妇终身勿事则感讽之道备矣自是以来数百年间虽田里山谷之民莫不知有纲常之重岂可不思其故欤吾邑有汪氏者邑人王天民之妻也年二十七而丧其夫辛勤刻厉鞠二男一女至於成立虽遭艰难涉忧患未尝少动其心闾里贤之远近称之凡三十余年如一日於是有司援着令复其家表其门诚斯时之旷典矣嗟夫吾闻孝弟力田之科唐人以为无益而罢之割股庐墓论者谓非中道不取独妇节之贞古今表显无异议岂非以父子天性苟能感慨矫勉於一时而无服勤敬养之实与闺门秉志一节终天者不可同日语欤况自丧乱以来父子兄弟不能相保民俗为之一变视秦人德色於耒耜谄语於箕箒又有甚焉则天理几乎灭矣而孤嫠老嫗独以女妇之微繫民彝之重不亦可尚也哉表其门复其家使之享恩荣於桑榆非徒以报终身之劳瘁亦所以励妇节於无穷也虽然岂惟妾妇哉感明时优异之渥竭甘旨奉养之诚下以报慈母顾复之恩上以答国家化民成俗之意则为人子者尤宜知所劝矣汪氏二子长曰有则次曰得奴皆有男女矣而汪氏康强未艾天之所以报贞节者未可量也故为推本历代复除感讽之微意而学士君子有感於彝伦之重者诗以咏之

送鲍翰林赴官陕右序

韦布之士起家而仕於王都则固以远其亲矣虽其人志存终养初不以得於外者为父母荣然一旦郡太守奉天子之命以临之而亲劝为之驾则父不得以有其子子不得以私其亲论诸古人亦曰以义断恩而已况乎既居官而食禄则臣子之分已定设有中外出入之异远近劳逸之殊君子岂复容心於其间哉翰林修撰鲍君尚綱初以郡太守王公荐辞其亲来京师为中书典籤入翰林为编修遂升修撰至是自翰林出贰郡属关中文游之士咸以关中距京师数千里若惧尚綱无以慰其亲庭之望者抑何见之晚耶吾观尚綱少学於家虽服劳养志曾无寧日其辨乎出处之际而审乎义理之安不为不明居翰林者数年接於公卿大夫之论议而酌乎当务之缓急不为不久所谓中外劳碌之殊盖无足以动其心虽其家君所属望於子亦有必在此而不在彼者尚綱何患乎无辞以白其大人哉近代明公伟人有仕於州县而因得留心政理以成其志业者有以在内为无补而请郡以自效者皆士君子所当取法凡仕

於远郡者不难乎得民而难於获上今大参王公辍中台之重建行省以抚关中以都司出使军中且赞襄省事者郑君士恒其人也尚綱尝厚知於大参公而与郑君游甚善宣上恩德以加惠黎庶寧有不自遂者哉

送王驸马都尉赴会稽序

士之能以功名显於天下者岂必皆以殊异非常之绩震耀一世为贤哉当夫创业之初辟地日广新服未定反侧未安疮痍涂炭之余未有所休息使人见之如仪凤祥麟被之如和风甘雨知岁稔之有期而时平之可冀也则功近而德远矣而岂知勇果敢之谓哉盖必寬仁有度慈祥惻怛出於其性庶几如窃脂之不谷驕虞之不杀者而後可以言此此论人物者之所难也而吾於和阳王公见之公王室懿亲也由星源遂镇新安凡七年矣方徽饶之间内疑外讧人情未有底止公以数百骑入星源抚而定之一邑士民如脱其水火之厄而寘於慈母之怀其在郡也适黟祁之衆胁於邻境之阻兵者羣不逞四顾观望卒皆相率而归公焉盖吾郡自是无事则其中心诚信於人久矣是以其民悦而服之亲而爱之如其始至惟恐公一日去我矣既而有旨以公移镇於越则虽欲留公一日其可得哉虽然公之德在吾郡者大矣夫和风甘雨贵乎及时非一郡一邑之得私也仪凤祥麟要以瑞世非一乡一国之为祥也吾安知上之人不以公之惠吾州者而施於越耶又安知越人之有待於公者不异於吾人之望公於未至耶然则在越人为可贺在吾人庶几可以无憾惟幕府之士以其不得从公于迈无以写其思则来谋述公之德在邦人者以为公赠且以贺越人之得公焉虽然公之善衆矣书之则不胜书若夫郡邑之离合民生之存亡皆天也然必有开先之兆焉当星源未定时士有卧病山中而不能去者悄然隐忧虑其将及也夜梦有所如往在道而暝急投旅馆则已昏黑矣久之闻门外有车马声开门视之则天明矣问其从者曰自何而来答曰兰亭来也问何处兰亭曰古人修禊处也明日以告往来之士盖星源之君子莫不闻焉无何公将至则其姓与晋右军同而官又为右指挥使於是郡邑事大定则天明之应也而又安知公终得右军所治之郡而为兰亭修禊之主人耶呜呼此越人之天明也则吾以谓为越人贺者夫岂无所徵而言之乎

陶氏孝友堂诗序

士有行乎家庭之间近而乡里说之远而大夫君子叹美歌咏而不能已焉者其惟良心之充达乎夫秉彝好德心所同然机动籁鸣无容间息有莫知其所以然者此陶氏孝友堂之诗所由作也始陶君生富家八岁丧其母继母张弗子也长遂屏居於外夫人吴氏左乳抱右执爨犹自力於织紉以助其不给虽忧勤艰苦而不敢疾怨焉久之父母俱老生理日匮而君之髮亦斑然矣乃奉二亲於所居竭力以营旦夕之养於是食其食而甘之即其寝而安之视已遗体殆弗善也遂欢然笃慈爱之道弟妹之长者君皆及时为毕婚嫁无敢以异母而不尽心也父没子凯考礼经佐君治丧事亲戚邻里素高君行义又喜其有子皆相率致贖甚厚宾客之自远至者数百人其夫人早失父母沈无子守志以居夫人迎养於家以终其身人无间言凯所居学者从之甚衆因束修乘壶之入以足甘旨妹嫁顾氏早卒有二男一女皆育教之不使其亲少动其心焉庶几能竭其力者凡皆陶氏孝友之实如此於是进士临川葛元哲闻而叹美之题其所居曰孝友之堂亲为制文以记之四方之士得诸传诵者作为歌诗以反覆咏叹

其事有得而吟讽之者孝弟之心油然而生矣是盖良知良能本乎天性应复为感如环无端莫之使而莫之遏者欤至正乙丑冬沆始从葛君闻其详既又从陶君门人得诗一卷凡若干首乃为次其篇什而传之噫子之於亲服勤至死无所逃於天地之间者也夫岂以爱恶而二心哉世变极矣徒赖知行之士孝弟出於其性者相与系纲常之重於一时若陶氏父子夫妇力行於家盖尤可贵也然则孝友堂之诗可无传乎

送陈大博游黄山还诗序

徽之黄山巨镇也北倚九华西拓彭蠡南接广信诸山其东左挟浙河右起桐汭以尽海壖要皆支陇所分谓其隕然中居以降势委和於四表有坤道土德焉故名之曰黄山然其上则连峰极天岩岫深窅下则重冈复岭斗絕环周虽土人有不能遍求而尽达者故自邈世隐沦之士咸乐居之或以为由轩辕得名者近古所传也郡非会通之地四方宾客无因而至独唐李太白尝一游其间为之徘徊而去遂无复蹊其踪者由是兹山之胜槩世罕闻矣至正十一年岁辛卯夏四月浚仪陈公子山实来游焉始至风雨弥月而山之主僧适远归亟率其徒以先导晨发郡城出西郭明霁开豁郊原穆清旦日既盥始遵其麓涧潦平而波流易涉林洳尽而萝蔓可缘若有陰相之者乃休仆人领宾从相狎乎松篁竹林之间灵苗不采而自芳丹泉在山而常洁德人君子之常操犹有可见者乎进而据虎头之岩以下临白龙之湫风云淳兴雷雨将作凜然神物不可褻而观也乃循左巘絕大壑陟层崖登莲花之危峰以望分极浑浑焉皞皞焉若有见夫崑仑磅礴兼覆并育之仁然後知兹山之大根同乎五岳润达乎四海而英华发挥精爽洋溢与造物相为流通而莫知其终始也矧可以方隅论哉振衣下迈授馆精庐信宿而还盖充然若有得者不知我之观山耶山之观我耶与吾游者皆自观其所观耶抑将同所观於游者耶噫以公高情达识如斯其有异乎昔人之来者固宜彼仰首注目望岩而退者於公所存何如也公妙龄积学已超迈等伦俄而贡春宫对大廷以第一人及第列官朝着闻誉日隆矣顾犹远寻名山以发登峰造极之趣则夫究经纶於功载抱根柢於词林者何可以浅近量哉於是郡之缙绅儒士喜公之能来而惜其别去也杂取山中景物有名图志者相与赋诗钱公以寓其向往之私诗皆一章章十句五言以余获与斯游又俾叙其事於右简是用着兹山得名之实极一时之荣观以告夫继公而来者

送戴尚文赴句容县教谕序

休寧戴尚文试进士於乡在遗材之选将以膺朝命主句容学官自师友交游暨都邑之良咸有言以赠之其後出而别为卷者余复为之叙其言曰士之贵乎仕者非为观美也将以行其义而已是故官无崇卑惟其时材无大小惟其志二者一失所安而苟焉徼荣名於旦夕则君子有弗幸者焉况夫以不足之资而蹈无穷之变有不并其得於口耳者而失之也几希今校官秩虽卑然邑大夫僚佐在前经师弟子员在後进有宾主之礼退有师友之义洁俎豆崇明祀得以致极其诚敬谨晨昏严朔望得以修着其威仪四方宾客之往来观风论俗得以识时措之宜穷政理之要社稷人民自可驯致而出位之思泯三年大比修其旧业贾余勇於一第而患失之念忘於以事上治民则定志以揆时因时而立义斯君子之道行矣传曰仕而优则学信乎非优於仕者不足以言学也又曰学而优则仕信乎非优於学者不足与言仕也矧尚

文齿少而识明业专而行敏盖优哉其有余地者乎尚文之尊父曰廷芳翁昔者尝学於乡先生定宇陈公之门始科诏行陈公一领乡荐归则着书授徒终其身类非以仕为悦者是故戴君隐居教子从容深厚率有异於常流则尚文所以为句容士大夫教者固无待於他人言矣或者以不得与南宫进士偕为夫人惜其言几远於义故余托於仁者之後诵所闻以为君子赠焉

送高则诚归永嘉序

高君则诚学博而深文高而贍自为举子已为学者所归及登进士第调官括苍郡録事学道爱人治教具修郡守前宪副徐公深敬异之比满不忍听其去即学宫设绦帐身率子弟迎君而请业焉行中书闻其名辟丞相掾儒生称其才华法吏推其练达而君亦雅以名节自励公卿大夫咸器君行能每他掾有故辄以兼其事君稽典册定是非酌应如流意所不可辄上政事堂慷慨求去时东南义安藩府无事参政赵郡苏公方以文治作兴其人君与临川葛元哲俱见称誉日承言议声闻益隆矣俄台民弄兵城邑驱丁壮集其徒海浦连巨舰数百以自固帅阍吏弗能治有旨行省臣总诸郡兵平之省臣谓君温人知海滨事择以自从君亦庶几因得自效时浙东帅达公以除凶为已任一见君欢然既开幕府乃以论事不合避不治文书於是师出踰三时卒烦大臣自京师来以上意抚之而後定解严分宪诸将校缓急利便独君无一辞以秩满即日还省垣告归矣於是交游之士咸造君且谓儒者虽临事不见用卒能究所守以自旌别为君贺君设俎豆觴客酒行笑谓座中曰前辈谓士子抱腹笥起乡里达朝廷取爵位如拾地芥其荣至矣孰知为忧患之始乎余昔卑其言於今乃信虽然余方解吏事归得与乡人子弟讲论诗书礼义以时游赤城鴈荡诸山頽涧泉而仰云木犹不失吾故也时客多君里人乐君之归皆甚喜有起自席末而言者曰朝廷以科目取士久矣时方承平自军国要务至百司庶事举无不集士亦得以浮沈簿书文墨间稍有牵制辄效俗吏便文自解由是贤否混淆有志者无以自见宜乎君之悠然遐想於去就间欤虽然今中原多故圣天子贤宰相一旦惩膏粱刀笔之敝尽取才进士用之则如吾高君者虽欲决遯山林亦将不可得者然则入践廷宁陪老成之谏议出临郡邑布恩德於罢氓使殊功茂绩炳然一时以答清朝设科盛意岂非君平昔之志而亦吾党所望於君者哉衆皆曰然乃共举酒属君赋白驹而别

送张子仪还姑苏序

士之负强果振迈欲有所为者必奋发以励其志静专以成其能由是日有所积月有所累如拾级以登九层之台虽弗克遽跻其巔而都邑盛丽之观风云变化之妙已在吾目中矣若濮阳张天凤子仪之学於汪君仲鲁也其殆类是乎汪君世家婺源以诗学修进士业尝因教授休寧里中子仪自姑苏侍其家君从政是邑得委贄焉屏交游之恬嬉忘寝食之常节激昂愤悱弗得弗措所以励其志者有方矣既而术业就绪则韬敏给於敦柔发见闻於确慎纷华之悦寒暑之变举不违焉所以成其能者可冀矣如是而掇巍科登显仕极布衣之荣名展文儒之夙蘊如引囊取物寧复不得之患哉踰二年其家君以秩满还子仪亦辞去同学有悦其勤笃者留与卒業子仪固乐焉而亲弗可汪君於是率交游之士赋诗饯之授简於余俾代叙其意吾闻渔巨泽者必善其网罟纖鉤细饵不足以冀吞舟之获济大川者必良其舟楫敝帆坏

槩不足以敌风涛之变夫文場巨泽也名途大川也彼或騰奮乎试艺之秋而汨没於在官之日者殆亦非其具尔朝廷设进士科取天下才岂直以禄位厚汝书生哉授以州县则莅官治民是务擢之馆阁则论思献纳是资登於政府则发政施仁是赖是三者或任其一端焉则必有其具而後可苟无其具而徒汲汲焉以庶几一旦之或得则夫人之自待者固已浅其如科目何子仪以英妙之年负坚勇之节又能取诸师友以笃成之其网罟宜无不善如涉功名之洪波操一致於险夷以收利物之功则姑务坚良其舟楫汪君拳拳师友之义庶其在此余故申之以辞

滋溪文藁序

滋溪文藁三十卷浙中书省参知政事赵郡苏公之文前进士永嘉高明临川葛元哲为属掾时所类次也初国家既收中原许文正公首得宋大儒子朱子之书而尊信之及事世祖皇帝遂以其说教胄子而后王降德之道复明容城刘公又得以上求周邵程张所尝论着始超然有见於义理之当然发於人心而不容己者故其辨异端辟邪说皆真有所据而非掇拾於前闻出处进退之间高风振於天下而未尝决意於长往则得之朱子者深矣当是时海内儒者各以所学教授乡里而临川吴公雍郡虞公大名齐公相继入教成均然後大经圣贤下学上达之旨缕析毫分之义礼仪乐节名物之数修辞游艺之方本末精粗粲然大备盖一代文献莫盛於斯而俊选并兴殆无以异於先王之世矣若夫得之有宗操之有要行乎家乡邦国而无间言发於政事文章而无异本者抑亦存诸其人乎公世儒家自其早岁即从同郡安敬仲先生受刘公之学既入胄监又得吴公虞公齐公先後为之师故其清修笃志足以潜心大业而不惑於他岐深识博闻足以折衷百氏而非同於玩物至於德已建而闲之愈严行已尊而节之愈密出入中外三十余年嘉谟伟绩着於天下而一诚对越中立无朋屹然颓波之砥柱矣其文明洁而粹温谨言而敷畅若珠璧之为辉菽粟之为味自治朝国化之原名公卿大夫士德言功烈与夫儒先述作闳奥莫不在焉而浩然删修之志未有止也初官朝着即为四明袁公伯长浚都马公伯庸中山王公仪伯所深知袁公归老犹手疏荐公馆阁马公谓公当擅文章之柄於十年後而王公遂相与为忘年友夫岂一日之积哉昔者汉唐七百余年惟董仲舒韩退之辨学正谊庶几先王遗烈而尚论政理则莫如贾太传陆宣公宋文学特盛而士大夫之间不曰明道希文则曰君实景仁抑未知三公视程夫子何如是故公平居教人必以程朱为模范而力求在己不务空言则从事於圣贤之道而审夫得失之机也明矣故汭以谓读公之文则当求公所学而善论学者又必自其师友渊源而推之可也

治世龟监序

昔者帝王盛时纪纲法度悉备子孙得以据依为治号曰成宪旧章其君臣上下相与监视前代以保天命而繫民心者忧勤惕厉无时敢忘以为家法其治於未乱者如是故虽或蘖芽其间而图难於易为大於细可以无患夫岂有一旦土崩之祸哉秦人学不师古取二帝三王所以维持天下之具与其深微之意皆荡灭扫除之不但燔诗书杀学士为足以亡其国家也自是以来创业者无所因袭守成者无所持循而庙堂之筹策侍从之论思遂为治乱安危之本其不轻而重也明矣然简编之所存忠言嘉谟曷可胜纪当其时或见用或用之而未既或遂

不用得失可以具知由今观之则所善皆可以为劝而戒无不可惩也若夫贯串古今博观约取以示方来使先王经世之意一二有见则诚哉君子之用心已乎参政赵郡苏公早岁居馆阁尝即经史百氏书采其切於治道政要者通为一编名曰治世龟监至简而不遗甚深而非激通疏练达而公平之规着亲切确古而正大之体存信为谋王断国者之元龟宝监也公为御史知无不言持宪节以洗冤泽物为已任参议政府屹然不阿两典大藩皆勤於庶事尝奉诏宣抚畿甸旁求民瘼秋毫无隐而又酌理道之中正不迎合於前无顾虑於後虽一时或不见察於用事者而退居之日凡可以尊王庇民者未尝少废其讨论之工也盖公学本先王而志存当世其见於行事者如此则是编之作岂欲托诸空言者哉新安诸生赵汾序

送江浙参政苏公赴大都路总管序

邦畿王化所先郡国之本也自昔盛时輶轂之下五方黎民与豪右杂处凭高附崇形倾势轧纷莫为制由是号称难治汉世选健吏以击搏诛罚先之何有於化民成俗唐宋宰相欲假剧地病儒者乃得因以自见岂开诚心布公道之谓哉国朝并包区夏薄海内外罔不臣属神州赤县之间繁殷极盛列圣相承皆屈重臣以莅之望尊职隆非前代比矣至正九年冬十月江浙行中书省参知政事赵郡苏公除大都路总管命下之日街谈巷议咸以江浙大藩方赖公为治不宜用彼易此其殆未知祖宗重内之弘规圣上官人之睿断者乎夫发施政仁枢机转移务当其蒙古之圣人所以不疾而速无为而成者用斯道尔皇帝临御日久明睿所照於民生休戚臣子行能秋毫无隐既为亲择循吏布诸列郡深惧京师冠冕万国长民苟非其人则四方无所视效乃辍儒臣於外省俾以其道行焉变法律以诗书通政刑於礼德盖不言而示天下守将以楷模也传曰欲平天下者先治其国又曰尧舜之仁不偏爱人急亲贤也昔之为国者何独昧於斯与公起家成均诸生致位宰辅清忠粹学简在上心久矣莅官王都为二千石帅表非公谁然公平日论治道必本三代所谓明道术正人心育贤才兴教化盖拳拳焉今天下承平朝廷闲暇圣天子将登用真儒上稽唐虞近鉴中古建久安长治之策极维持巩固之方以垂无穷京师虽衆且大殆不久烦公矣士民怀公之德惜公之去而弗可留也咸相率为歌诗以泄其怨思於是临川葛元哲述公所以临政而得民者冠於篇首汾敢推明德意窃取昔人後叙遗义属辞末简以终之

送江浙参政偈公赴司农少卿序

国家既收中原兵革之後所在为墟圣天子惻然思有以安集之旁求故老宿儒忠厚畅达习知畎亩事首为劝农使绾印绶载官属行田里间呼其父兄子弟家人语告谕之辟榛莽疏沟洫立阡陌假牛贷粟皆因其所欲而利导焉遣属吏行傍郡招徕其人时江南民苦重役应之者衆不数年生聚大复官府之设公上之供始得施其政令於是罢使以其权归宪府郡邑之长皆以劝农繫衔大司农司实总核其事盖古后稷之官至我朝始复视前代会计出纳弛张权利者不可同年而语矣然承平日久良法美意寢失其初尝见江南郡邑每岁使者行部县小吏先走田野督里胥相官道傍有墙塹篱垣类园圃者辄树两木大书畦桑二字揭之使者下车首问农桑以为常吏前导诣畦处按视民长幼扶携窃观度不解何谓而种树之数已上之大司农矣使职农事者皆若是所为则国家富有四海之实何自而可充乎夫古之帝王所

以长治久安者无他焉能使天下之人均齐方一以奉其上无所偏而已方今经费所出以东南为渊藪大河以北水旱屡臻流亡未复居民鲜少五帝三王之所井牧燕赵齐晋梁宋鲁卫之所资以为富强其遗墟古迹多芜没不治安得衰衣博带从容阡陌间劳来绥辑复如中统至元时哉大司农位尊而职专长贰卿佐皆公卿辅相其人必有念此者矣至正九年冬十一月诏以江浙行中书省参知政事偁公为司农少卿公北庭文儒由初科进士高第历官省宪所至具有成绩古所谓天子之宝臣者也举国家之旧典以复唐虞三代之治安知不在公平士民怀公盛德多见於歌颂刍蕘之言忧在畎亩非公之贤则不能自达也故窃附其说於卷终

别葛廷哲序

访昔游临川闻进士葛君元哲之贤心窃识之未几君复以乡贡第一人擢第授官闽中辟行中书掾时大臣镇江浙者皆称名卿思得儒者为助故君至闽官未及上而徵书至矣至正九年冬访来钱唐君在职已逾岁观其执特操於等夷之中抗高情於事物之表进而省闱则简书委填官守严密而赞画不忘於忠鯁退而燕处则诸生在庭交友在坐而论着弥事於精详昔之所闻於是益信而余亦始获与君游矣君又不鄙授粲於馆使日亲切摩尝相与论平生为学大槩乃喟然语余曰人心与宇宙同体而梏於私者不足以知其大也与造化同运而溺於流者不足以知其精也今夫清明在躬於穆无间岂有一毫之蔽隔哉惟其蹇然之复不足以胜思虑之多於是而一体同运者始判为二物而攻取之欲行矣然则君子之学其可舍此而他求也乎访谨谢曰善夫君之论学可谓识此心之妙者矣向余见君之外而已今又知君所以进乎内者顾余不敏将何以与於斯盖尝闻曰学必已闻道然後能立已能立已则扩充变化之机在我矣尚何化物之足虑哉盖不闻道则毫厘千里之忧常在旦夕而闻非耳目之所官也今君之所以自致而懾友者如是其殆有徵乎若余者勉焉而不足於力察焉而不足於明殆无以进於斯也久矣君将何以教之意以余闻君之旧而後克会乎新乃得相与几至於道也又遽别以去能无慨於中乎君苟不弃余犹尚有以相之也

赠钱彦宾序

古之所谓轻世肆志者虽有奇才博识常深自晦匿不欲人知是故择其可以怡神遣兴者隐焉使夫人皆即其所隐以命之而不辞然不百年为其子孙者亦几无以名其德则亦可悲也已孔子曰斯民也三代之所以直道而行也一何至於是欤岂其审夫盛衰之故存亡之机俯仰一世若无足为者而然欤其人虽曰长往而不来违乎大中然视夫毁冠裳絶人纪自逃於方外或玄思遐举欲後天而老以观世变之所极而终失於愤激之过者其优劣何如也吾邑令吴兴唐君子华尝为余言赵文敏公以清才雅望见用国朝名声流於四海其同时有牟成甫张刚父姚子敬钱舜举文学之美皆与公相先後舜举以绘事擅名公甚敬其为人尝赠之诗有鲁国万钧王月重汉天一点客星孤之句而不及其画盖皆一时之杰也至正己丑冬余访唐君吴兴因得牟先生之书而传之未几又得姚张钱三公之诗而讽咏焉皆清迈博洽寄兴深远非浅闻可冀而钱公跌宕真率格力优暇无怨愤不平之意要为不可及云独其所谓经说者不可得见访其家问诸其兄子国用则曰公尝着书有论语说春秋余论易说考衡泌

间览之目後皆焚之矣盖当时同游之士多起家教授而舜举独隐於绘事以终其身世之见其杜德机者亦惟称其善画而已呜呼其真所谓轻世肆志者乎何其掩抑藏匿如是之深也国用字彥宾敬慎淡泊不愧其先能写花木翎毛盖公之古学经说既已无传则食其所隐者以世其家而有待焉亦君子之志也然则钱公之所以遗其族人子孙者不亦安且远乎余既有感於舜举氏之事窃叹文敏公之知言而喜唐侯之不余欺也故叙其说以遗彥宾俾其子孙之尊祖尚德者有考焉

留别范季贤序

至正九年青龙赤奋若月嘉平仆还自吴门访邑大夫唐公於苕溪之上公为除馆授粲俾改岁而归因得与其家义塾之师范季贤氏游季贤温恭慎重教小学弟子常数十百人取束修乘壶之微以养慈亲庶几能竭其力者与人交无论事急缓言必信仆敬之爱之而季贤犹以日惟人田是芸不克速成其学为叹比仆将归则又慨然有离别之感焉愧无以答其意者则告之曰夫朋友之交非羣居族处之为贵也切摩於晤语之际致勉於索居之时考德於契阔之余刮目乎再见之日斯古人之道矣仆不敏无以相发请以不肖之身所得於前辈者为子诵之仆之乡先生皆善着书所以羽翼夫程朱之教者具有成说仆自幼即已受读然未知所以为学也尝过严陵闻夏氏家学甚高即往访之其老成惟教授君大之在谓仆曰子生朱文公乡於公书宜无不读且公尝自言平日所得多在文义中故所为经传训辞精切严妙无一字之苟然余窃怪论语篇端以效训学可也所谓之为言者於义何所当邪仆时卒无以应心愧甚退而默思圣经贤传中如夏先生所举可以关余口者多矣盖自是稍知反其卤莽灭裂者以致力乎究竟谨审之道焉他日以事过东陵之北敷浅原之东闻有黄楚望先生者尝起家文学俄弃去侨居城中杜门着书余四十年矣因即求之得其纂释之目千余条皆六经传注中疑义先儒所未言或言之而未究与夫聚讼不决者谨请曰人皆有言理学至近代大明明理以释经而天下之能事毕矣固无待於後人也且以大儒先生竭其心思所极而犹有弗得者焉则亦未如之何矣今先生尚发其所未发者乎先生曰为斯言者衆矣岂非以先儒所未尽者终非後人思虑可及不如谨守其已言者之易为功乎以吾所见正恐其所已言者或不容遽知其所未言初未尝不可通尔今姑举一二为例传曰女有五不娶其一为丧父长子先儒以为无所受命盖丧父而无兄者是也使其言已当则女之丧父无兄者衆矣皆不得嫁乎如以为未当则固学者所当致思也思之思之而又思之而终有不得焉则阙之可也以俟後之人亦可也一或思之而有得则知先儒之所未及者或有时而可通此今未尝用一日之力而遽诬以为不可更通且譬他人之用力者是殆以已之无目而欲废天下之视也夫集诸儒之大成以立言者莫若朱子论语集注篇端有曰明善而复其初者为圣门之学发也其所谓初何所指乎以为稟生受分之始耶则其气质之杂固与理以俱赋矣以为赤子之心邪则昔人盖有闻襁褓之声而知其为大恶不仁者是孰为初之可复耶彼谓先儒之已言为易知而辄诵焉以自文者殆於富人子兼其田畴惰其作业徒抱其遗契之齿而日数之以为能不坠其家尔时先生年近八十贫无置锥之地食指所需朝不及夕而严毅清苦介然以居听其言者莫不爽然自失也仆盖由是益知讲学而不切於已治经而不究其事者无可得之道焉其後游临川见雍郡虞公因举所闻质之公曰所贵乎师友者正如是尔吾生平取友甚衆然因一言之善而得以自勉者有二人焉早岁从吴文正公於豫章时清河元公复初为行省掾

尝与余谈诸经要义余悉以关洛以来之说答之明日复初告吴公曰伯生经学殆未博也余始闻之不以为然继取古今百氏传注之说旁迂错综而究观之然後知不能博通於彼而遽以为有得於此者非愚则妄是则复初之赐後与四明袁公伯长同仕於朝有交友之义伯长一日叹曰我辈以文学见知於世不及盛时力自充拓他日老於乡里门生子弟四方朋来之士质疑请益更迭而前一或无以应之则虽欲学焉而岁云暮矣余深有感於其言故虽在应酬胶轕中而潜搜默讨以裨补其不足未成者未尝少後此余得之於伯长者也夫公之壮日文学经艺之富何可当也而一闻规益之言辄大肆其力如此其所就之远宜哉仆之不肖者虽尝一二有闻於人然每思殫精毕力以极其朴钝弩蹇之所未至而未之能也是以志念之间常若负积逋钜万者故每乐为质美而嗜学者言之子诚有意斯事则请因仆之所闻者而思之苟有取焉固无待羣居族处而後为益也仆以为子之勉诸身者得古人为学之本故倾倒言之子幸毋忽子之友曰鲁君伯常者安然其善学蔚然其有文仆敬之爱之顾以亟归不获求切磨之道会文之日试出吾言相与论之其必有感於仆之学不加勉徒负师友之训者哉

送郑徵君应诏入翰林诗序

至正十五年冬诏以新安郑子美先生为翰林待制时先生卧疾精舍使者与郡监守致朝廷之意甚厚先生坚辞不能拜命者久之适宪使番阳周公在郡亲劝为之驾其门生子弟进而言曰今圣天子举羣策以清海内大丞相集衆彦以图治功不惜禁苑次对之职起先生於山林岂惟以先生业觚翰攻文章哉先生学通古今以诗书礼乐为教於史长於治乱兴衰之说正谊直言不忘忧世先生不出如朝廷何时先生疾良已乃翻然曰欲报朝廷者吾素志也吾将辞官赴诏亲见圣主陈所欲言耳乃命趣装诹日偕吏者北行郡长貳县大夫与寓公缙绅之士张郡南门外设祖道为先生别里中耆俊文学诸生又相与作为歌诗以咏叹其行休阳赵汭病不能陪缙绅之後又不善诗则赠言曰先生应诏趋朝得极言天下事此千载一时也今为天下患者盗贼而已自淮蔡发患延於江湖所在蠭起为祸尝烈矣然雄杰怙衆有名字力足以横鹜四出者亦无闻焉视前代中世钜寇不能什一疑若不足平者国家以四海全盛之力命将出师今五六年民力已屈而盗犹未息何也不举天下大势以定攻守之宜而所在浪战不求智勇之士真可任将兵者而使省台贵人与州郡俗吏纷然羣起共军旅之权自轩轅氏以来用武之世未有能以是而全师制胜者也仗行省讨贼御史台督视如平时而贾凶鬻顽诛求刼夺之弊僨军杀将反覆坏烂之由朝廷终无自知之兵财两匱郡县之间繁征横斂一切以矫假病民而上官大吏方且拘文法守故常不思变通长久之道赏罚者用兵之大权也赏罚不明而是非淆乱天下之士不复以功名自期而中世以来治安拨乱之术行军克敌之方皆废不讲吾未知其所以为天下国家者何也今羣盗大者跨郡邑小者据一城植根固矣苟不尽反前失而欲以岁月削平安可得哉为国家计欲并两淮而南尽江湖之间求要害形便之地为四五钜镇镇各屯精兵二万选士大夫公廉有威方畧能抚士爱民招纳降附可为大将者付以一镇之权慎简中外有文武才学者为之副凡辟土募兵刑赏律令训练程式进退节度出攻城守禁防约束皆自朝廷考求故事为法以授之郎官博士出入觐视以资庙谟而事无大小皆得专达列镇屯军屹然相望脉络贯通首尾为一内可以尊京师之势外可以销奸雄之心鼠窃狗盗进退无据者将不战而自服其尤倔■〈亼 强〉者诸镇出兵犄

而攻之无不破矣其要在得人而已郡邑之间皆什伍其民以相守护毋使散越於外一家而三男子则简尤壮者一人为郡守之兵以大户之税衣食之郡皆选贤守以防御繫銜各将其兵以固封圉盖郡守必兼有兵民之柄而後缓急可仗不然虽重其失地之罪无益也此制一定则列郡有备而民心不摇矣夫使诸郡各制其兵以保一郡之民而四五大藩皆握成军据形势以扫清羣盗奠安东南诚当今之急务也若夫知人之明任使之术在朝廷矣昔汉公以六万人讨西羌微族赵充国定计必分兵屯田以待其敝贵万全也周亚夫将三十六将军擊吴楚终不肯为梁分兵审於势也李德裕平泽潞军中利害有将帅不知而庙堂辄知之者得居中制外之宜也今羣盗散据非有汉七国唐藩镇之强而充国亚夫德裕之故智则有今日所当师者矣沔无谋夫策士之术也当其避地间关朝不谋夕每恨民间利害不得上闻以至如此是以於乡先生之行而窃致其畎亩之思焉先生倘以为然虽言之可也若夫本原深切有非草茅所知知无不言言无不尽在先生矣使朝廷收得士之效於一时而先生之功及乎天下则虽铭彝鼎被弦歌可也岂惟一时一乡之所咏叹者哉

东山存稿卷二

卷三

●钦定四库全书

东山存稿卷三

（元）赵汭撰

○文

送休寧监邑坊侯秩满序

于閬坊侯彦辉之治休寧也下车未一月而士风民俗间巷村落之殊屋庐服用贫富丰啬之等家世新旧强弱淑慝之分靡不周知坐公堂出号令色夷气温日晏不倦牒诉盈庭从容决遣有不服者辄发其奸私窟穴所在与故情善恶闻者羞愧讐服咸以为神行阡陌间视畦桑勤惰虽远必至益知民事利害公退闭门扫地焚香书册左右以吟咏自娱吏卒非官事不敢踵外户于是豪强少绌微弱以安请谒不行奸邪屏迹则又将籍新辟之田以增学廩进其弟子而风厉之虽以汭之朴学穷处侯亦过而存焉盖其设施注错一以儒者之道不因仍乎流俗则其教易明其政易行也宜哉逾年而红巾盗起东南震动名邦大府往往守御无备间谍不精讹言相惊民情大骇盖芽蘖乎丰炽渐靡于恬嬉古今一途可为深慨者也侯于是时亲领民丁凭险以拒盗而汭亦奉亲避地间关困苦有不可胜言矣抑尝闻盗之逼郡境也侯谓婺源守张君曰婺源近贼而无险可据不利于守郡治属邑根本也公能尽率其大家扶老弱敛财物列壁休寧境上细民入山清野以待寇悉索其少壮与五县之衆分拒诸岭之隘完一郡以为会府西蔽则有可为者又谓郡将之长万夫者曰今守令不主兵且临民有久近恶能得其死力公以世将居守与大家为姻娅通民情知其厚薄勇怯以公而用其民则犹可为也将善侯言而张君终不肯去其守地婺源遂先陷矣嗟夫国家承平既久城郭已墮兵起仓卒为吾徽计无出於侯二画者然一时不能用则亦其势使然盖军民吏既分郡邑无尺寸之柄久矣当使省宪一贵臣驰传来徽以便宜用侯计总驭其守将简精銳求智能审形势明赏罚以尽战守之方则草窃浮寄之盗恶能深入吾郡恣睢四方残民害物若斯烈哉又闻侯之以郡檄告遽於行省於是行省以侯饷军信州遂以其主将命计事南行台太尉大夫公知其贤命侯往莅牛渚之戍牛渚为中流要害乡兵万人皆舍壁外侯言於分宪使入宿门内以备非常酿家夜汲达旦不避扞搢则请严刑以禁之上下二港口舟楫所通而无柵楸之固则命立柵为门设卒守之军士久屯多疾或逸游弹射羣饮质及衣仗郡拘民船断港中为守江备檣楫日坏两船苔生侯请以军容教士数閱以生其气精其能使皆可用官给钱葺所假民舟备凡用器以水军之法习之僉宪虞公与郡之守将咸敬异焉凡侯所言必行而武备益修屹然增巨镇之重矣嗟夫当官兵始复吾州时亦有以兵事为言者而君吏弗能用是以屡溃干戈兵民物故者十六七然其得失之由大率如侯所以议牛渚者而已可为悲夫浙江左丞赫公镇徽闻侯之贤檄召还邑行台从之比侯至郡则代者亦至官而左丞公还行中书矣休寧之人喜侯复来而惜其又去也日诣舍馆望侯顔色或请建生祠画侯像以示子孙且侯在休

寧未得究其所施也盜賊兵火之余疾疔水旱間作遺民之存者息猶未屬也且猶于侯惓惓如此則侯之為治又豈世俗凡近之謂哉雖然汭於侯之去而不胜其畎畝之情矣顧今潢池猶有未釋兵者關梁猶有未徹備者履屐需材薰猶同器若何而能簡擢羣愚相挺烏合未渙若何而能招徠師旅飢饉蕭條余生若何而能存全時紕舉羸征斂無藝若何而能休息乘時射利者欲未盈於溪壑存心愛物者美徒見於簿書若何而能着廓清寧一之實侯有學有文通达古今固已燭照龜卜於此況平生故人布在要路豈無念亂者哉因吾州之未用與牛渚之小試者而益推廣之其必有以報國家矣迂儒嵩目四方不遑寧處是以有望於清時之君子焉抑非吾邑大夫之賢無以發其幽思也噫岩石荒涼愧子真之谷口滄溟浩渺憶幼安於遼東則余於侯之行不能無慨然者良有以也

送童以清歸建德序

童君以清用文翰鳴歛睦間已久矣至正十有三年行省大臣親帥師剿滅羣盜之於屬郡者承平之兵久不試驟興發無藝武力鸛張頗聞平歙大帥有能禮儒冠典縣史者談者莫不嘉之未几自績溪遷吾休寧則惟童君其人也君慎威儀明礼让不以師旅飢饉而墮紀法故為之長者無或慢焉甘淡泊修文不以留滯艱虞而忘旧業故與之游者加其敬焉斯亦可以見為士者之有恒心矣居無何郡邑命吏皆致官君亦移書告其去談者莫不惜之嗟夫積雨彌月百川沸騰或舟而游或筏而浮網者罾者梁者筌者俟而獨者泐而拾者皆有以滿其志充其欲翩然一葉延緣苇間獨若無所見者果何為耶宜乎脫屣埃壚濯纓滄浪遡青冥翔寥廓而上征也哉雖然君睦人也其心固有所向往矣客星严子之高風勲名富貴之箴石也郡牧范公之政理公卿侯伯之楷模也端雙台而頽湍瀨歌云山江水之詩於蒼茫杳藹間亦足以忘隱約而釋幽忧者乎波決起於尋常大變滅於須臾且授簡抽毫肆為之倡者實汪鎮彥維云猶嚚然自得者曾何足論於童君也於是邑人趙汭序以送之與之游而惜其去者詩以系之

春秋集傳序

春秋聖人經世之書也昔者周之末世明王不興諸侯背畔戎狄侵陵而莫之治也齊桓公出糾之以會盟齊之以征伐上以尊天王下以安中國而天下復歸於正晉文公承其遺烈子孫繼主夏盟者百有餘年王室賴之故孔子稱其功曰一匡天下民到於今受其賜及乎晉伯不競諸侯復散大夫專國陪臣擅命楚滅陳蔡宋滅曹吳入而盟諸夏則天下之亂極矣孔子生於斯時道足以興用而患夫當世諸侯莫能用之蓋嘗嘆曰苟有用我者吾其為東周乎齊一变至於魯魯一变至於道始蓋有意於齊晚尤拳拳於魯也又曰文王既沒文不在茲乎使仲尼得君復周公之法修桓公之業率天下諸侯以事周則文王之至德吾無間然矣是夫子之志也君君臣臣父父子子則六卿之晉田氏之齊三家之魯出公之衛可正也興滅國繼絕世舉逸民謹權量審法度修廢官則文武之政可舉也足食足兵而民信之則戎狄可膺荊舒可懲也當今之時以夫子而合諸侯匡天下猶運之掌也既而道終不行則又嘆曰甚矣吾衰也久矣吾不復夢見周公鳳鳥不至河不出圖吾已矣夫此其心豈一日而忘天下者於是西狩獲麟則夫子老矣嘉瑞既應而天下莫能宗予雖聖人亦無以見其志矣乃即魯史成文斷自

隐公加之笔削列霸者之功过以明尊天王内中国之义於天下贬诸侯讨大夫诛其乱臣贼子以正人心示王法盖天子之所命也是岁之夏齐陈恒弑其君孔子沐浴而朝请讨之适当修书之际夫岂欲托诸空言者哉故曰圣人经世之书也书成一岁而孔子卒当时高第弟子盖仅有得其传者历战国秦汉以及近代说者殆数十百家其深知圣人制作之原者邹孟氏而已矣盖夫孟氏之言曰王者之迹熄而诗亡然後春秋作其事则齐桓晋文其文则史孔子曰其义则丘窃取之矣此孔子所传春秋学者之微言也周虽失政而先王诗书礼乐之教结於民心者未泯故善有美而恶有刺人情有不能忘於其上也殆其极也三纲五常颠倒失序而上下相忘怨刺不作则文武成康治教之迹始湮灭无余矣夫世变如此而春秋不作则人心将安所底止乎故曰诗亡然後春秋作隐桓之世王室日卑齐伯肇兴春秋之所由始也定哀之世中国日衰晋伯攸废春秋之所由终也方天命在周末改而上无天子下无方伯桓文之功不可诬也是以圣人详焉故曰其事则齐桓晋文古者列国皆有史官掌记一国之事春秋鲁史策书也事之得书不得书有周公遗法焉太史氏掌之非夫人所得议也吾鲁司寇也一旦取太史氏所职而修之鲁之君臣其能无惑志欤然则将如之何凡史所书有笔有削史所不书吾不加益也故曰其文则史史主实录而已春秋志存拨乱笔则笔削则削游夏不能赞一辞非史氏所及也其义则丘窃取之矣此制作之原也学者即是而求之思过半矣然自孟氏以来鲜有能推是说以论春秋者盖其失由三传始左氏有见於史其所发皆史例也故常主史以释经是不知笔削之有义也公羊谷梁有见於经其所传者犹有经之佚义焉故常据经以生义是不知其文之则史也後世学者舍三传则无所师承故主左氏则非公谷主公谷则非左氏二者莫能相一其有兼取三传者则臆决无据流遁失中其厌於寻绎者则欲尽舍三传直究遗经分异垂离莫知统纪使圣人经世之道闇而不明鬱而不发则其来久矣至永嘉陈君举始用二家之说参之左氏以其所不书实其所书以其所书推其所不书为得学春秋之要在三传後卓然名家然其所蔽则遂以左氏所录为鲁史旧文而不知策书有体夫子所据以加笔削也左氏亦未之见也左氏书首所载不书之例皆史法也非笔削之义公羊谷梁所谓常事不书乃笔削之一义耳不可通於全经陈氏於左氏所录而经不书者每断以常事不书之法则其不合於圣人者亦多矣由不考於孟氏而昧夫制作之原故也盖尝论而列之策书之例十有四而笔削之义有十策书之例十有四一曰君举必书非君命不书二曰公即位不行其礼不书三曰纳币逆夫人夫人至夫人归皆书之四曰君夫人薨不成葬不书葬不用夫人礼则书五曰适子生则书之公子夫人在位书卒六曰公子嫁为诸侯夫人纳币来逆女归姊归来媵致女卒葬来归皆书为夫人妻书来逆而已此史氏之录乎内者也七曰诸侯有命告则书崩薨不赴则不书祸福不告亦不书虽及灭国灭不告败胜不告克不书於策八曰虽伯主之役令不及鲁亦不书九曰凡诸侯之女行唯王后书适诸侯之女行唯王后书适诸侯虽告不书十曰诸侯之大夫奔则玉帛之使则告告则书此史氏之录乎外者也十一曰凡天下之命无不书王臣有事於诸侯则以内辞书之十二曰大夫已命书名氏未命书名微者名氏不书书其事而已外微者书人十三曰将尊师少称将将卑师衆称师将尊师衆称某帅师君将不言师帅十四曰凡物不为灾不书外灾告则书之此史氏之通录乎外者也笔削之义有十一曰存策书之大体凡策书之大体曰天道曰王命曰民力曰公即位曰逆夫人如曰公夫人薨葬曰公子夫人曰女归曰卒曰外诸侯卒薨曰内师曰内特相盟会曰两君之好曰玉帛之使其书於策书皆有笔而无削春秋鲁史也策书之大体吾不与易焉以为犹鲁春秋也二曰常事不书公行必反书至常事也不书必危之然後书岁正月公在外必书公

所在亦常事也不书必在楚在乾侯然後书公女纳币来逆来媵卒而葬皆常事也不书必有故然後书鲁之郊禘非礼也然用为时祀则亦常事也不书必失礼之中又失礼焉然後书蒐狩不书非时越礼然後书此二者春秋之所以治乎内者也三曰举重凡春秋之盟会征伐皆非礼也书之则不胜书必有关於天下之故而後书或书其会不书其盟或书其盟不书其会凡一役而再有事不悉书也书攻则不书伐书伐则不书战书战则不书败必有为也而後悉书之自桓而後外取邑不书自文而後外围邑不书书其重者四曰谨名分之辨以诸侯会天子不可言也书曰天王狩于河阳以臣出君不可言也书曰君出居以国君伐其弟不可言也书曰郑伯克段以戎执天子之使不可言也书曰戎伐凡伯五曰辨名实之际卒称王子猛入王城居于皇称王猛出奔称郑忽复归称郑世子忽晋里克弑卓称其君之子六曰谨夷夏之辨书楚与中国异书吴与楚异书越与吴异七曰详盛衰之变桓公之策畧不书王志天下之无王也天下无王而後霸者兴矣晋灵公之会畧不序诸侯志天下之无霸也天下无霸而後夷狄盟中国矣征伐自诸侯出则君将称君大夫称人自大夫出则大夫将称大夫必中国无霸而後楚书君将君将称君贬而後人之治在诸侯也大夫将称大夫而後人之治在大夫也楚书君将治在荆蛮矣治在荆蛮者春秋之所甚不得已也此四者春秋之所以治乎外者也八曰辞从主人春秋诸侯名号班爵赴告之非礼者多矣而吾一切以得礼之辞修之将以示天下後世则是初未尝失礼也春秋奚治焉是故爵号从其爵号名氏从其名氏是并其不请命世大夫者而治之也滕侯也降而称子薛侯也降而称伯邓弑君来朝而名之郕侏儒太子也来奔而君之非主兵也而小国序大国之上世子序国君之上吾从而志之无改焉是并其专进退诸侯者而治之也鲁桓闵实弑也而书薨郑伯髡顽齐阳生楚子麇实书卒吾从而志之无改焉是并其臣子之不能讨贼而姑为隐讳者治之也故曰主人习其读而问其传则不知己之有罪焉尔夏五郭公甲戌己丑有月而无时或有日而无月或宜日知其非而不革曰如尔所不知何慎之至也九曰无达例内书师必将卑师衆讳之则君将而称师外书人必有微者也贬之则君大夫将同称人继故不书立书卫人立晋争国不书立书尹氏立王子朝师不言弃言郑弃其师夫人必致苟非礼也则不致内女归必书苟来归也则不书归达例不足观春秋矣十曰议而不辞是非之心人皆有之策书有恒体也不待加一辞也善而见録则为褒恶而见録则为贬其褒贬以千万世人心之公而已圣人何容心哉辞足以明义斯而已矣此一经之体要所以通治乎内外者也故知我者其惟春秋乎罪我者其惟春秋乎是故以存策书大体为义而治乎内恒异乎外则谓之夫子法书者不足以言春秋矣知春秋以举重为义而治乎外者恒异乎内也则谓之録实事而已矣不足以言春秋矣知一经之体要所以通治乎内外者则凡谓春秋赏人之功罚人之罪去人之族黜人之爵褒而字之贬而名之者亦不足以知圣人矣故学者必知策书之例然後笔削之义可求笔削之义既明则凡以虚辞说经者其刻深辨急之论皆不攻而自破苟知虚辞说经之无益而刻深辨急果不足以论圣人也然後春秋经世之道可得而明矣虽然使非孟氏之微言尚在则亦安能追求圣人之意於千数百年之上也哉汴自蚤岁获闻资中黄楚望先生论五经旨要於春秋以求书法为先谓有鲁史书法有圣人书法而妙在学者自思而得之乃为善也於是退而思之者十有余载卒有得於孟氏之言因其说以考三传诸家及陈氏之书而具知其得失异同之故反复推明又复数载然後一经之义始完属辞比事莫不灿然各有条理世经乱离深恐失坠以为後世学春秋稍知本末者赖有左氏而已故取左氏所传之事各丽於经而地名之释附焉其文与义则三传而後诸家之说苟有得其本真者皆附以已意畅而通之为春秋集传凡若干卷尚虑

學者溺於所聞未能無惑別撰屬辭二篇發其隱蔽博諸同志以俟君子或有取焉

郭子章望云集序

昔者子朱子說詩於性情之道風雅之用備矣然未嘗不以體制音節為言他日評漢魏以來至近代詞章家各極所長權度甚精而獨謂古五言不可輕變蓋述作有體變復之際昔人所難雖大儒先生不敢忽也汧游臨川時嘗以此說質於雍郡虞公且問所以為合作者公曰三百篇而後有漢魏六朝朱子嘗有取焉然其為體不一大抵世有治亂人品風俗不同極才情則淫傷而無節尚詞藻則綺靡而失真善學者慎之可也余獨愛陰何徐庾氏作者和而有庄思而有止華不至靡約不至陋淺而不浮深而能著其音清以醇其節舒以亮有承平之遺風焉然後知杜少陵所以稱誦不置者蓋在於此大歷元和而後知者鮮矣暇日觀公詩藁試以此說求之頗得去取大意往來江湖間每論諸能詩者或唯唯或否否唯武威余公所賦乃若一以公言為師無復他有出入而高雅渾厚自非齊梁間作者可及豈禁苑游從時嘗論及於斯邪抑所見之偶同也自是每恨不得全藁觀之兵興以來此事姑置歲辛丑正月初與古皖郭公子章遇於星源子章嘗游余公之門者也因論公平居崇尚選學於後來變體一無取焉而五七言近體每欲棄絕不為公大節既立而詩文皆散逸罕存矣聞者相與太息於是乃得子章所賦曰望云集者與一二朋友共吟咏焉古五言遠宗魏晉得其高風遠韻不雜後人一語近體亦質厚微婉足以達其志氣所存信乎淵源之有自也又可見余公居常教人悉本朱子至其斧藻盛時陶寫幽抱獨與虞公相表里而不必他人之已同斯其所以為合作者與以子章之才能守師法而不变亦可謂賢矣友人為而傳之者乃述所聞書於卷端庶觀者知其所自來也或曰郭公志士也今四海橫流生民塗炭起管夷吾舅犯先軫諸人相與屬囊韃執鞭弭以救之猶恐不及顧相與論歌詩之源制作之體無乃非公意乎雖然吾聞子章少無宦情嘗欲泛大江上三峽相狎蜀漢之間覽觀山川之奇秀吊昔人經營遺迹求嚴君平岷峨老樵天授爾朱先生之流相與上下其議論然後大發於詩遭亂志弗遂也語曰在朝言朝在野言野使子章據功名之會真有以自見於當時而誦其詩者考論師友淵源與其蹈之志而傳之不亦可乎新安趙汧序

潛溪後集序

潛溪前集止丙申凡十卷冠以陳公衆仲序文浦陽義塾既刻而傳之後集起丁酉筆藁日新卷帙未有終也而宋公以書來俾汧序其意顧久病廢學再閱歲無以復命又念與公相知有自蓋嘗遍觀前集而惜乎陳公有未及盡見者然則後集固不可无序汧既不敢讓知其又奚辭乃為序曰修辭以為文非古也其起於漢之西京乎太史公傳司馬相如吾丘壽王東方朔枚臯王褒之屬以善屬文見知人主然皆不得列於儒林而孔子弟子別為傳謂修辭而文不本於經蓋昉於此至唐韓子宋歐陽公曾子固相繼而出始考諸經以立言其器識之大學問之博志節之固又足振而興之文辭之用於是為貴雖諸子綴周程之緒猶且誦法表章而不敢忽焉叶正則顯於東南當道學復明之世刻意修辭不踐故迹而乖離侵畔自窒其源其視韓歐特起於千載之下而知所宗尚者為何如也是以君子尚論浙東先達必以東萊呂公為歸豈非以其博而知要能自得師雖擬諸孔門游夏之倫而無媿也乎若夫辭達理明不繳繞

於陈言而固与之合则百余年间莫善於侍讲黄公者矣景濂父生吕公之乡而尝游於黄公之门其学以经为师而尤长於周礼其博极羣书鉤深索隐益将以自致为文直以才高思敏舒之敛之无适不宜而未尝有意於为作也而不但资为文辞也当其发愤择术直诋词章为淫言葩藻为宿秽期於剗削刊落以径趋乎道德之涂而於吕公尤惓惓咏思叹慕若不能自已於言者则其轻重之类得失之几察其明矣别集之行岂徒欲以文辞名世者哉盖沆所知於景濂父者如此若夫陈公谓为文必传诸师而後可者景濂父既不以自多而沆又不足以言之顾尝闻之袁公伯长尝问虞公伯生曰为文当何如虞公曰子浙人也子欲知为文当问诸浙中庖者予川人也何足以知之袁公曰庖者何用知文乎虞公曰川人之为庖也麤块而大齑浓醢而厚酱非不果然属餍也而饮食之味微矣浙中之庖者则不然凡水陆之产皆择取柔甘调其滫齐澄之有方而洁之不已视之泠然水也而五味之和各得所求羽毛鳞介之珍不易其性故余谓为文之妙惟浙中庖者知之袁公盖矍然称善也自虞公为是言学者窃论以为非黄公之文不足以当之衆仲尝学於虞公而景濂父黄公之徒也二公之所指授有异於他门者哉善观斯集者

送总制王公移镇新安诗序

古舒王公子敬治星源一岁以其军镇新安州人思其功怀其德而惜其去也涕泣歔歔望马首罗拜者踵相接於道其缙绅文学既相与作为歌诗称述其事以为公赠而犹若有未尽其意者乃相与来言曰王公有德於吾州大矣自壬辰以来星源兵乱无虚岁民死亡者十七八尚未知所届郡既陷州人有释衆自归者曰吾以全乡里也大府信其言使还镇星源以遂其志凡钱谷甲兵皆得专制以优之州人德焉曰自今而後吾知免矣踰二年会师番阳一夕弃其军去或言死或言亡瞋目语难者簧鼓其间讹言汹汹变且复作王公一下车而中外大息遂以无事州人如获更生乃锄强梗封植良善轻徭薄敛重法以禁道剽者他部过兵不敢涉其境内於是流亡来归行旅满道耕者在野村落渐葺庐舍痍伤遗黎始有生人之思矣盖星源且十载至是甫定则公之恩德在吾州者岂其浅哉虽然又有闻焉始公至时尝谒五神庙问曰何神曰五通神也见从神有衣紫者问曰何神曰此舍宅为庙者王居士也公曰吾在京口日尝梦有衣紫神自西来谒吾问神来何为曰请五百钱问何钱曰通行钱也既又借吾马乘去吾来时二马毙於道今观从神貌宛梦中所见不谓其应在此也其见於先兆有如此者尝考郡乘唐之末造星源自为一军不隸新安初移镇弦高者邑人汪司空也今星源亦自为一军其屯戍似矣前郡将亦邑人也而氏族复同矣继汪司空者关西刘公当时有两指挥五十余师今王公官为右指挥而以其军来副者左指挥也官名既合而将校之多复不异矣刘公记新城在戊戌今新城亦起乎戊戌岁又同矣当时有陶雅者守新安加赋於民以固其位至今新安税重於天下惟星源以分镇得免故其税视五县为轻近岁供亿浩穰新安为甚属县休寧谬增税十一而星源两皆专制得以恤其凋瘵焉劳佚亦分亦似矣其於数百年事脗合又有如此者由是观之亦可见公出镇诚有关於天运而非偶然者矣请书其事於卷端且使续郡乘者有所稽焉呜呼可谓异闻也哉梦刀者得州梦松者为公事固有见诸朕兆者今王公之未来也山川鬼神已前知而预告之无亦厌乱思治鬼神亦与人意同邪宜乎公之能为州民福也自古治乱相因其离合废兴之迹固有似者矣若夫其出处其屯戍便宜城筑岁月同事官名代着姓氏征赋重轻求之前世无一不同是则言运数者所未尝及而论三五之

者亦莫之详也然吾於此得以观天道矣则王公之来而见乎朕兆既至而卒能为斯民福也岂不宜哉虽然今大兵西讨一举下数十郡县而王公由属郡起典大州是则前志所未闻而与昔人所遭遇者亦不可同年而语矣吾於此又有以知世运之将亨也乱极必治斯其时乎新安领州一县五星源既别为镇祁门以隸他将上供黥歙之调度不给者咸取足休寧而并缘之奸有不可胜言者无艺甚矣传曰有人斯有土有土斯有财古之善为国家均而已矣将分裂破坏郡县使定於一以息其民去其为害者以平其政荡陶氏数百年之流毒正其税籍使赋不独於一州安知不在今日乎吾观王公恕以待人而严於治军薄於奉已而厚於养民其志之所存有足称者乃叙其说於卷首而凡以诗歌饯行者皆繫焉

送上饶张孟循父还盱江序

昔者吴公子札使鲁观於周乐自周南召南及雅颂其德之大小治之盛衰与夫忧勤怨惠之情莫不如亲见之至孔子教其弟子亦以诵诗虽多而不能从政专对为无益诗道与政通固如是乎盖尝闻之古之为诗者辞与声皆出於其情夫人情者礼乐之原而治道所从出也士将学为卿大夫以任天下国家之事秉四方之政则必尽人之情以通於礼乐诗三百篇虽辞异事殊时其发於人情之天则一而已後世为辞与声既非出於其情则固不通於礼乐而无关乎治道君子又奚取焉虽然时有古今道有污隆而人情则无以相远大风作於汉而河汾王子知其霸心之存石濂新安作於唐而魏国韩公有感於兵制之失夫岂皆不出於情而二公所言若是士不以三代卿大夫自期无事於四方而学不足以尽人之情则後世之诗虽有合於古者亦鲜或能通其意焉耳若张侯孟循父之言诗其有志於古者乎侯上饶之选也癸卯之春自盱江来新安为其使君左辖公结同姓之好於总制王公王公所以深敬乎左辖者不於其币而於其使礼成将返则命郡中士咸赋诗以钱之又出其在镇所得诗文以观之侯於星谿之篇盖有取焉既为诗一章题其後复手书之以寄余海寧山中余寢疾累年旧学都忘因三复孟循父所赋而窃有感焉夫尽人情达事变明乎得失之迹本其废兴之由此诗道所以与政通盖古者卿大夫之学也而孟循父得之其卒成二公之好而以嘉宾见重於主人宜矣迺即其诗辞所及推本季子之贤孔门之教暨近世名公钜人高识远度以广夫言外之旨焉嗟夫吾闻国风止於泽陂盖春秋之季也今四方多故雅道陵迟有伟人焉上下古今究观真滥以其发於人情之天者振而起之其文运复昌之候与吾於张侯有望矣敢以斯言为赠

送葛元哲还临川序

国朝以科目取士参用於中外百司其秩八品而以才名称者则行中书得辟为掾掾之员多者数十命士半之由进士来每不过四五人公卿大夫好恶旨殊则获上之道难刀笔绮紈品流趣异则取友之义阙矧江浙地大物衆簿书期会米盐杂集月更季谢虽俊杰无所置才以儒者为之动无不宜仅能免过一毫髮冒吏则羣言鼎沸蹙蹙不得安视夫栖身末僚掣肘下邑者尤难居矣若夫守经制行卒能完其名以终其事者殆鲜矣而吾於临川葛元哲见之始君以进士擢掾江浙时参政赵郡苏公以硕儒宿德出典大藩思进文学忠厚之士用表励其人故君首见知日承言议於中州文献之懿所得多矣郢城樊公继至清节直气伟甚一时於

君尤亲厚君於职守讨论远嫌慎微毫髮无苟而不硜硜以立异不翦翦以为同故钜公大夫莫不称为佳士而并游之彦亦无间言樊公乃自为书荐君宜在馆阁非不试之誉也噫君以儒冠据史牋论是非履难处之地且犹所立如是况夫居得为之位当可言之时有不行其所学以大厥施者乎世常谓儒者阔於事情故公卿贵人下士之风益衰而士或至自贬以求合二者盖胥失之诚使上之所以遇下者以道不以势皆如二公之待君而士之持身者亦如君之有立则儒者岂真不足用乎君既秩满学者幸其解职事愿少安承教而君以太夫人在堂岁晚急归且将纂释羣经折衷百氏以究观古人之能事极其功志之所存者又非予之所可量也虽然余闻君之乡有王丞相陆先生焉其为道不同然皆不苟安於流俗所谓有善於此不以有不善废者圣人复起其言不易君归辨学正谊有以发乡先生之蕴而极夫是非之公则予不足为君赠矣

送郑士恒隐居灵山诗序

郑君士恒卜居灵山隐焉或曰士恒才美而气清读古人书达於时变进而功名之会可与英俊齐驱退而授馆诸侯则德礼政刑得以咨访乐山林资澹泊匪宜余闻而言曰为是说者於郑君似矣而恐未足以知其志之所存夫慕远者遗近务大者忘细学乎古人而後知流俗之论卑也且隐道固多端矣自两汉来代有其人唯郑氏然节莫高乎子真学莫懿乎康成使天下後世有识者无不向之而况其後之人乎虽然二子者既远矣吾乡有二先生焉其一曰郑公子美贤乐善节槩甚高钓於岑山之阳畊於师山之北而当宁闻其名则子真之岩石也其一曰朱公允升研精六籍超轶百家好古博雅莫为侔匹卜居石门其书五车则康成之通德也士恒慕郑先生而不及见则求其门生子弟而与之游告於当路者而恤其孤就朱先生而愿学焉则先生出而教子郑公之里发其书而广其传其度越流辈有如此者岂非学有余蕴足承高密之业顾思先德而兴起者乎士恒不徒隐矣士恒自挈家避地东南以至於此虽涉历艰险而不忘问学以遂其初盖有志者欤灵山在郡西北郑先生门人鲍伯原父别墅在焉泉清而土沃地僻而俗淳藏焉修焉游焉息焉莫善於斯矣其能谢侯牧之招逃宾师之位远市朝而居山谷用宜於士或者释然为士恒喜乃相率作诗饯焉而余为叙

上虞学士书

汭闻之航大海者患其望洋而无际也有智人焉以毫芒之针定其所向而後波涛风雨顷刻万变而吾之所趋者不迷以其所守之得其要也圣贤之道大矣其深而难测远而难至非海之所可喻也是非善恶之故利害得失之端变眩出没乎吾前者虽波涛风雨不足以擬其纷纭而轆轤也然则为学者独可以不知其要乎汭又尝闻其说於父兄矣吾之至尊至贵而举天下之物不足以加之者此心是也吾之至亲至切而举天下之事不足以先之者求放心之谓也然非真有所见无以为日用常行之地非真有所得无以为造诣归宿之极舍是而他求焉虽有考索之富而扩充变化之无术虽有辨析之精而持守坚定之未能则夫隐微之间私欲之萌潜滋暗长而不自知者卒至於波流风靡而吾之所谓至尊至贵者亦从而褻矣然则所谓为学之要者庶几在此而实有未易知未易能者乎此汭之所以日夜忧惧以求闻乎先觉之训而未之有得者也今获登於门墙仰观乎道义之崇高而胸襟之和乐即之而愈远测

之而愈深而知阁下之所存者有未易窥者矣退而伏读阁下之书则粹然理义之言粲然名物之辨上古圣贤之统绪近代诸儒之闡奥莫不在焉而词气冲和英华醲郁又有以兼该乎诗人文士之所毕力而未能者然後知夫巍巍乎泰山乔岳阁下之为高也浑浑乎长江大河阁下之广且深也非深识乎统之有宗会之有元者孰能与於斯乎然汭之幼也尝闻大江之西有吴先生焉行修道立为世表仪而成已诲人深有忧於空言之无益及观乎阁下所为行状而知为学之方矣今先生之书将家传而人诵之然其心学之渊微非以其所闻者而表章之则世盖有未易知者矣汭生於世二十有七年老母今年七十有三所以辞之而远去者其志诚在乎此而不敢失也伏惟阁下察其有志闵其无成以其所得而赐教焉俾於入德之门不至迷其所趋而天之所以与我而至尊至贵者可以反身而有得则阁下之赐大矣

答汪德懋性理字义疑问书

陈先生性理字义取先儒周程张朱精思妙契之旨推而演之盖为初学者设然欲析之极其精而不乱合之尽其大而无遗使一本万殊万殊一本之理释然於中则惟深潜涵泳不亟不徐以俟其一旦之通畅可也揣摩比较虽若得其皮肤终非实见尔尊兄参以前辈格言撷其疑似萃以下问寡陋何足取衷不欲遽忤嘉意辄於条目之下各缀臆说数语更俟切磋不可便以为是也昔有传侏儒观俳優者言其立於衆人之後非有见闻而亦大笑或问之则曰长者岂欺我哉今吾侪为致知之学而徒取先儒之言以为已言持先儒之见以为已见者何以异此又况於借视听於盲聾者其可不审乎每勤相爱之隆深愧无以相发故并以是说复焉未审高明以为是否

答任本初书

承尊翁惠书喻以贤昆仲来岁从游山中贤昆仲亦皆有书三复不胜惶恐尝闻晦庵先生之言有曰补填前日欠阙栽种後来根株者为过时而学者立方也其自言曰予之学自铢积寸累而成亦可见十寒衆楚者之无益於事矣吾兄清谨而谦厚甚得友朋之誉然每相见辄以学不加进为言今者又欲抗雅志於山林究遗经之终始不图近功不思幸得非所见者大所期者远安得特达如是邪但愿常怀此心勿使放失则上可以答家庭之心次可以副交游之望矣自顾空疎蔑能相发故以子朱子二言为贶此在足下加之意而已昔高适五十始学为诗卒以诗名苏老泉二十八始知读书既而文章高古为一代之絶学虽不同理则无二足下方妙龄尚何扞格之有哉新岁初十日後始得暇登山贤昆仲过访可在何日不宣

答徐大年书

郑村良便後每恨相见之晚簪盍孔艰慨思晤言惟重瞻系当卧疾敝乡时适有郑氏便人匆匆不能具书急取黄先生行状封寄左右凡书所欲言者何以加此不作书非有意也庚子春夏留星源山中友朋自歙至者尝言见足下所寄书而忘却取来自是凡属数辈求之至今年春乃始得见三复不能去手庄生曰逃空谷者闻人足音蹙然而喜矣况於稽经考礼如面论者乎幸甚幸甚郑康成三禘五帝六天纬书之说岂特足下疑之自王肃以来莫不疑之而近

代如陈陆叶林诸公其攻击亦不遗余力矣窃尝究观诸名家论着於经旨似犹有未尽者於礼意似犹有弗类者此先生所以不能已於言也虽然去古远矣岂易言哉汭尝叹王子雍有高才好着书又与典午氏为婚姻势望赫然苟非高明博洽真有据依安能议其所短而孙仲然独取圣证论驳而释之其所辨证必有可观陈史既不作志其书复不传千载而下无所稽考可惜哉是以先生行状中凡诸经疑义皆畧存梗概良以此也其於历代聚讼之说虽千百一二而本源制作悉已包涵惧观者忽而弗思耳今足下乃能反求经传具示所疑岂非区区所望於同志者乎幸甚幸甚杨子云曰衆言淆乱折诸圣礼家异同之说其来远矣苟不反求於经将安所折衷乎谨据周礼述旧闻以答来贶足下其察焉经曰祀天曰祀天神曰祀昊天上帝曰禋祀昊天上帝曰旅上帝曰大旅上帝曰享上帝曰类上帝曰类造上帝曰祀五帝曰禋祀五帝皆因官属职掌器物司存言之然其间尊卑远近亲疎隆杀异同分合有序有伦圣经简奥无费辞非後世文字比也盖典瑞言祀天旅上帝祀地旅四望四望别言既非祀地则旅上帝别言非祀天明矣大宗伯国有大故则旅上帝及四望亦以上帝对四望言而小宗伯兆五帝於四望四类亦如之始以五帝对四望言五帝即上帝明矣旅者会而祭之之名上帝非一帝也犹四望非一方矣大宗伯礼天地四方皆有牲币各放其器之色而诗曰来方禋祀以其騂黑四方之神即五帝也故曰禋祀而得与天地通称六器日月星辰四望不与焉大宗伯以禋祀实柴燔燎祀神之在天者以血祭狸沈醯辜祭神之在地者禋者升烟以祭之名三祀皆积柴实牲体玉帛燎而升烟以报阳也自非天神之尊者不得言禋祀明矣大司乐祀四望祭山川各有乐而五帝乐无文以其皆天神同六变之乐也又岂但与昊天上帝同禋祀同祭服而已哉虽然五帝之非人帝可无疑矣其总言上帝与专言祀天者岂无别乎其祭曰旅曰享曰类曰类造其事曰天子将出曰师甸曰国有大故以及曰祈谷与大司乐冬至祀天神於圜丘夏日至祭地祇於方泽孔子谓之大郊者其於尊卑远近亲疎隆杀之节亦辨而详矣若来书所谓天与帝为一惟兼言分言有异则经中神号祭名礼物徒异同而已矣先王制为一代大典岂为是辞费以来後世之纷纷乎大宗伯礼四方作六玉言小宗伯兆五帝主建神位言足下谓大小名从其类决五帝为人帝非经旨也夫五行之神为五帝而太皞之属配焉亦云帝此孔子闻诸老聃而告季康子者也公羊子曰自内出者无匹不行自外至者无主不止此郊之所以尚配也今将迎气於郊而废其所配者主其配者大皞以降虽有功德亦人鬼也人鬼岂能司天时而布五气者乎陈祥道杨复斋之言曰天有五行四时则有五帝帝者气之主也果以五人帝则人帝之前其无司四时者乎朱子又谓凡说上帝者总昊天上帝与五帝言之意与陈氏同诸公虽不主康成至此亦不能异也足下岂弗考乎王制祭天地之牛角茧栗宗庙之牛角握此天神人鬼之别也国语曰郊帝之牛角茧栗谓郊为禘而牲无异文此所谓禘非人鬼之祭矣又曰凡郊禘祖宗报五者国之祀典也加之以社稷山川三辰五行而别不言祭天地则韦昭注禘为圜丘不诬也祭法以禘郊祖宗对举言之与国语同则四者皆大祭而事体相似可知其四代配食之帝一以先後为次则四大祭者轻重必有差矣王氏谓禘者宗庙之殷祭而郊为圜丘祀天以其祀言则先庙而後郊庙言人鬼而郊不及天神以其实言是重祖以配天而轻所自出之帝惟庙享也又谓祖宗乃二庙不迁之名是禘郊以祭言祖宗以庙言也大庙之不迁又非世室比颙顓之於夏契之於商其庙视周文武世室亦可同伦乎二世室一曰祖一曰宗此母论礼意如何古人制言有序名物以类必不如是之舛驳弗伦也六天之神陰主化育着为星象下应人事北辰中居御极而五帝随天运转以散精布气於四时与开辟之初五天之精感为帝王之祖皆非有得於化原有见於古初者信不足以

及之然中垣太微昭布森列不可诬也况周人立闕宫以祭姜嫄大司乐享先妣序於先祖之上则南郊祀感生帝何必异乎纬书焚於隋河图洛书至宋始大显使无陈邵二公亦妖妄之类耳学者初不见全书往往望风诋排先生尝谓恐尚有如图书蓍策之数在其中可谓恶而知其善者贤於孙仲然远矣安得起陈林诸君子而质之然先生论宗庙之禘与郑氏三禘亦不苟同行状中可见其谓成王以殷礼祀周公因诗言白牡以辨明堂位之诬也足下乃取何休氏周公生有王礼之云诬斯甚矣鲁郊非礼春秋所书非一端但非成王赐之耳其谓鲁帝文王於周庙者因鲁有文王庙而辨於周公庙禘文王之僭也尝无庙主藏於稷庙也鲁既有文王庙安可虚而不祭但为藏主之所乎明堂位之夸无不至矣上言配帝於郊配以后稷下言以禘礼配周公於大庙自车服旌旗以至乐舞庙饰皆天子也而独不敢言上及文王吾家伯循欲推王礼以说鲁禘其论起於唐末而不兼羣庙之说子程子苏子由陈祥道诸公皆无取焉足下谓之古今通论可乎向来尝感杨信斋讥郑玄读祭法不熟杜佑读大传不熟杜氏主康成而兼存王肃未知读书生熟如何然康成所得有在祭法外者虽信斋未可忽也王肃亲注家语而自废五天帝之说苟无卓然之见读书虽熟犹不足恃而况不熟者乎罔乎後世而傲视古人如此每为续礼仪通解君子惜之此先生教人所以贵乎致思也足下如有意斯事则圣经贤传与诸名家成书历代史志具在区区废忘久矣何足辱下问乎春秋二百四十二年内外之说注脚已具右方六经补注为人借去一时无他本可奉寄当俟後便图之然此书颇难看沅游湖间常出以示人鲜有好者金华黄公与夏先生尤不悦以其多引而不发也其论五经大旨皆已槩括入行状颇以平日耳闻缀而辑之庶几将来君子得以考观其尚有能成先生之志者乎自遭乱离此事姑置而又早衰久病虽尝窃有撰録未能脱藁其尚克广先生之学使有传乎虽然所谓学足以明圣人之心志在以六经明晦为已任者先生所望於当世君子学者未见其人也惟足下勉之又勉之则所以大肆其力於遗经者必有上达日新之功非俗学所敢知矣书辞已繁不复他及又未知何时可达左右临楮神驰不宣

与汪仲玉书

沅为病所纏久疎谒见下情不胜驰仰昨者伏闻亲至郡城镇遏苗獠日下远去诸县吏民皆受德惠万口懽贺感服无已又闻驻节古城北屯兵民无不仰望於二十五日扶病至德贤万户满拟一见顔色少慰久别之怀既承旌旄南还回首怅快而已恃宪度有禀表侄程质字彦文久仰二天之庇妄欲托身潭府备竹头木屑之需倘蒙矜恤收録如获更生之赐也已浼彦仲兄与季温博士代覆万告留听幸甚幸甚草草布字不虔总希钧照不备

与朱枫林先生允升学正书

三月二十七日程兄转示尊翰乃得动履之详甚慰甚慰向所附桃梅书已达而书册未至承非久归高隐必可彻尊览也春秋疑义难决有自来矣所谓事大体重人微言轻一过目未极底蕴便欲决其是非此黄先生所以寧终身不以示人也若小子则不然郑渔仲有云事无两造之辞则狱有偏听之惑如得老於是经之士相与指撚无论合否择其大有关系者得百十条设为问答以附书後则一得之愚可以自见而经旨明矣岂不快哉是以於刘公高论拳拳欲得闻之承批示二说其一谓春秋随事笔削决无凡例前辈言此亦多至丹阳洪氏之说

则此件公案不容再举矣其言曰春秋本无例学者因行事之迹以为例犹天本无度历家即周天之数以为度此论甚当至黄先生则谓鲁史有例圣贤无例非无例也以义为例隐而不彰则又精矣今沔所纂述却祇是属辞比事法其间异同详畧触类贯通自成义例与先儒所纂所释者殊不同然後知以例说经固不足以知圣人为一切之说以自欺而漫无统纪者亦不足以言春秋也是故但以属辞名书而序文具见微意明不可与释例纂例等书同论也其二谓宋华元出奔归国间无异事再书名氏为特笔此等处最好畧但恐有理难伸耳春秋之有变文非得已也然犹是史文中改易一二字至於特笔则非史氏恒辞所及矣然非有大正於君臣父子之间亦不苟为异同也凡先儒曰变文曰特笔云者皆无根据直是以意取之与愚见不可同日语至若所谓间无异事有异事云者不过史家得便宜二传本为盟会发例若推之以释他事则如实来暨齐平执曹伯畀宋人一事而再见者苟间无异事者皆得蒙上文矣若宋公使华元来聘宋公使公孙壽来纳币晋侯侵曹晋侯伐卫各是一事者虽间无一事亦不得蒙上文也凡大夫出奔者未必悉得反国其出与归事本末亦多不同故出奔与反国各是一事史法不得相蒙是以圣人修经出奔与归国亦各有笔削或书其出不书其归或书其归不书其出是虽一人之事而书法亦不相因此宋华元自晋归于宋虽间无异事不得蒙上文亦不过史氏恒辞而已窃料言此者必援郑良霄事为证若愚见则大夫书入法与书归不同况良霄之罪郑人既讨而杀之春秋书郑人杀良霄以讨罪为重苟间无异事则自许入郑得并上文出奔为一事不必更端可也华元虽挟晋为重然其出其归皆为国事非怀恶以入之比乃以间无异事故书之与良霄同文鲁史虽固陋宜不至此亦无待於圣笔而後重书其名氏矣然良霄事与获麟後记陈宗豎事史法正相表里夏书陈宗豎出奔楚冬书宋宗豎自楚复入於陈陈人杀之者历三时间数事於史法自合更端书之既再书陈宗豎故下文但书陈人杀之并复入为一事而不复再举其名氏详於下则畧於上详於上则畧於下所谓史家便宜盖如此由此推之使华元归宋上有一二事则与特笔复何辨乎借令良霄与宗豎易地则书法皆同矣此既非笔削之旨则华元再举名氏何特笔之云苟为不然则凡先儒曰特笔特笔云者宜无不可通矣愚见如此未审先生检閱後以为如何其他云云不惜一批示使得致思区区之望也近年以来昏愤殊甚已写出者辄不复记倘时得人掊擊亦一助也长历大衍历考经异同疎密之由已悉改入日月差缪类王周正月说却入左传补注中草藁谨封上求教江氏长历序得令人抄示幸甚德懋久不相见其文亦恐不存矣适舍弟归故里承动静得拜此良便临书草草不宣

答赵伯友书

四月朔日罗丞宅专人送至二月初四日所惠书捧诵惊喜远自初别以逮近岁十八年间死生契阔之情历历如奉面谈近日自江右道通後始属权伯文中则张孟循诸公问讯至是乃副所望其懽忻其感慨盖有不可言喻者翹企郁塞之怀涣然冰释矣承笔削行状作黄先生传足见高情此先生清介絶俗非尊兄无能继其逸轨者广其学以永其传盖有望焉一赞已得其要子云固不待异世也故特奉纳春秋师说一部属辞一部通五册尊兄既熟行状又观师说则於其六经复古之学艰苦之由已得大槩然後细勘属辞一过乃知区区抱此二十余年非得已不已强自附於传注家以徼名当世之谓也顾其书参互错综若未易观然其入处祇是属辞比事法无一义出於杜撰请以正经及三传置几案间遇担荷不过处试一检閱则

得失判矣私窃自拟以为有取日虞渊浴光咸池之功未知高明以为如何耳非尊兄吾不妄发绳愆纠缪之益不可以遗他人承欲为通监纲目着一书甚善此间有乡先生汪公尝作纲目考异不在手未暇寄去然愚见却又有说烦校定春秋文字後却求教也欲与左右商订若此者何限汭既羸病不能去水陆千里行旅萧条兄亦岂能一来视之垂喻终当一会晤良感盛心矧令弟一别八年不得音耗此又访问之所宜先者俟昆仲相见卜居有定处行者居者两皆无虑天其或者可遂吾愿乎然以尊兄简淡易足所谓月粟一官石资於人者廉矣若更得令弟生理有恒则定居之说良易惜相去远无由与知耳罗氏人来者立告去奉此殊阔畧程彦文秋後复西行当图嗣问伏惟顺时自爱不宣

贺郑师山先生受诏命书

汭自闻先生被诏命即欲一见左右称贺病甚不能去此月八日輿曳至中途见东行者皆却走言苗军且至仓卒莫知其实辄亦引归一二日来讹言甫定而疾复作恐旬月间不能亟见故敢道其所欲言者先生幸加察焉汭闻乡里之论有谓可为先生贺者有谓当为吾郡贺者有谓当受命即行者有谓可无行者然此非惟不知朝廷之意亦不知先生之德也国家自世祖以来不惜高爵显位而起山林之贤诚令典也曩者如汭梁吴彦晖闽中杜原甫皆尝被斯命矣然则或谓可为先生贺者未为知朝廷也吾郡先达衆矣以布衣召入翰林诚未有如先生者当今四方多故求贤如渴岂无意哉然则或谓可为吾郡贺者亦小之也若愚则当为天下贺尔前辈谓士大夫惟出处一事不可谋於人盖以时义不齐而士之自处者异也自处者异则其为人谋也难乎其适中矣矧可以轻议哉然则或谓当受命即行者未为知先生也昔以处士徵而不至者盖有之矣若夫言论风旨汉然无闻徒使上之人谓贤者不为世用而弓旌为虚器岂君子之志哉然则或谓可无行者亦未为知先生也若愚则非惟不敢赞之以必行而亦不敢尼之以毋行直以谓先生当有以报朝廷尔夫天下之大患莫患於下言之而上不信也今也士大夫一言而丞相信之丞相一言而天子信之此先生所以有今日之命夫以公卿大夫图天下事而皆若此何治平之不易而寇乱之足忧也其可不为天下贺哉且士大夫言於丞相者必曰郑先生惟不出尔出则天下事可平也丞相言於天子亦然天下事先生与有责矣其可不思所以报之哉夫谓当为天下贺者衆人之情也谓当有以报朝廷者先生之志也公卿大夫不计天下利害者五十余年是以致於今日今其敝事虽多以先生之明而虑之如烛照而龟卜尔以先生之德而处之如辨苍白而数一二尔何难之有哉然则事固难於口陈而易以书道者窃谓先生当条列治安之策极言时弊通为一书如果行也则以献於天子不行则上之中书先生言之而朝廷行之而天下被其赐虽不仕犹仕矣朝廷固无负於士大夫矣士大夫固无负於君相矣各尽其职以行其治安之策则天下不足治矣虽然先生之仕不仕犹不计也而况於策之行不行哉昔苏明允以诏书召试不起犹且以君命不可虚辱於是有十万言之献今朝廷之所以待先生者至矣其可已乎然则所以报朝廷者莫善乎是明矣果若是将见先生之道措之天下而有功垂之百世而无穷然则虽为先生贺可也岂惟天下哉虽为吾郡贺可也岂惟先生哉汭之所以为贺者如此虽然非以为先生虑不出於此也盖欲探先生之志以解衆人之惑尔若夫可行而行可止而止先生固素定於胸中矣愚胡敢赞一词尚图走见以请耳书不尽言伏惟亮察

寄上苏伯修

即日未审尊候何如伏惟纳福沆向因高则诚如京尝附短状上问起居计当得达左右迹者伏闻暂持玉节出判漕台日与士民同增鼓舞逢掖之论率谓盐荚诚经费所赖第以阁下居之则为非宜沆窃以为不然夫古之君子所以任天下之重而繫一时之思者初无分於出处也岂有中外之间哉矧积弊因仍禁榷无艺海隅残孽尚烦干戈阁下硕德雅望舆论所归忧深思远形於辞色抚绥丁户於凋瘵之余俾之安土乐生益寧边郡则湟池赤子喘息无地请命有期矣夫岂居一官效一职於他日者可同日语哉沆与一二同志山居读书期稍竭駑駘以无负於门墙而意广力孱未之有进惟曩岁所闻海语则不敢斯须忘耳虞宅得欧阳公为神道碑计已彻尊览但所据行状未经删改谨皆缮写上呈伏惟阁下必有不刊之论可慰老先生於九原也刘静修先生墓表曹学士志铭偏州晚学皆不得见方欲谋重拜门下以毕其所欲求教者秋暑尚隆未敢辄易参谒伏惟为国为民善自宠珍以副善类之望谨奉手状不宣

与梁按察书

三月初八日新安诸生赵沆谨斋肃顿首再拜奉书宪使相公先生阁下前月末胡县丞使人传台旨欲沆诣节下一见缘沆寝疾岁深每感风寒辄成重疾动止不出户闼药饵多於饮食肌肤日削手足痿软不能步趋闻命慚悚莫知所为伏惟阁下蜚英腾茂早已超乎辈流体中备和晚益弘於德业今者持节一道以激浊扬清为己任所至官吏震恐黎庶苏鲜而区区疾病沈沦猥以朴学余生特蒙存录乃弗勉强扶掖一望颜色以慰平生岂非其命耶反覆思惟无以报塞雅意谨献所录春秋师说一部又属辞一部四帙其间所列笔削义例稽经考传悉有据依虽於按治事宜无所增益如赐校正使克有传於後在尚世君子尊崇经训扶树教道或有补於万一岂惟晚学小生皓首穷年之一遇而已方命有罪非敢矫饰惟高明有以教之幸甚幸甚谨奉书上谢伏纸无任悚息伏惟台慈鉴察不宣

代王总制回王左丞

某顿首再拜某大左丞相国宗兄钧座即日孟冬渐寒恭惟藩屏清严民兵夷怵穹後协相钧侯动止多福某靖惟建武始割豫章为军盖江南有国所以护边琐也矧今鼎足洪都军督府外绥岭徼内控江湖自非敦龐伟异之资恢廓深沈之度终始一心险夷一节孰堪重寄克建殊勲乃者苗酋干命率其鋤耰之衆扫境以犯金汤俄而我师西征一鼓而覆诸宫亭之渚视周公瑾赤壁奇功虞允文采石伟绩殆此盖我国公削平僭乱奄有湖湘信乎有天人助矣然当戒严日久关梁既阻调发不通而凤山麻源千里间曾无鸣桴之警吠犬之惊是则吾宗兄夙着忠诚益坚保障之明效也功名日起曷可量哉区区无任钦仰某切闻古之以气义相结者犹曰异姓天伦况乎稟姓受氏同出一源所以统繫百世而使之别於他族者在人心固宜有先後也然则英豪之士遭遇知己相与締交结言以坚翊亮之诚者岂可独後於他人哉如某者虽惭圭获迎侯门每思要结忠贤共酬恩遇是以於宗兄尤惓惓焉不图高谊先之锡以华緘董之专使首摠报效之诚以昭同志终约兄弟之好用笃懿亲载盟之辞凿如金石筐

筐之实重於琼瑰某敢不指日铭心奉以周旋母或失坠属张君归速未究谢言薄采苹繁久稽问敬山域弊陋鲜敌腴施惟增悚息文学郑士恒于张君有童冠之旧辄俾因之以达鄙诚於节下所冀益壮丕图勉恢盛业使杖杜同姓之思不忘於今日则常棣孔怀之义岂愧於良朋异时太原氏衣冠之盛勲业之隆复振於江左则自苍姬而下实宠嘉之区区不胜至愿惟宗兄其鉴之家尊夏中省视来此感佩至意附楮引忱瞻奉未涯伏惟为君民自爱不宣

与师山郑子美先生

即日秋凉伏惟徵君师山先生动履安福某疎远仪刑倏经两岁屡谋谒教辄以事牵盖丧乱之余出处两艰亦其势然也重以学问荒芜自惭寡陋而交游过爱往往称誉过於是滑稽君子恶其无实巧构飞语历诋辈流且使其言若皆自不肖出者虽荷诸公照知不为所惑然私心则谓当此时义倘得朋友由此见絶使得遂其返关却扫苟全远害之图则滑稽者之赐大矣以此益复深居简出虽以先生平居见知之深见爱之厚亦不觉其间阔之久也迺自远归欲一造馆下稍述鄙陋而宿疾未除方谋灼艾谨録谬藁数篇豫纳几下上求绳削而并及取疎之由如此俟炙疮愈即谋省谒伏惟高识雅量度越一时必有以教之尔未悔侍间伏冀为斯文自重

答蔡参政书

四月初六日新安诸生赵沅顿首再拜复书於大参相公先生阁下中书诸相公先生阁下伏蒙星源翼差官及婺源州官同雄峰翼使者兴安府委官休寧县吏齎公文币帛为参议官左右司官同稟都堂钧旨以沅为隐士下其书所在官司以礼敦遣者疾病阽危闻命悸恐间数日又以参议公与诸公所题手书来示捧领三读深以病废日久上虚大丞相求士之盛心次负参议公与诸公荐扬之厚意感激忧惧不知所裁谨以不能上道之由沥诚具书上谢万一伏惟少加察焉沅之生也禀气甚薄二十五六时风痰之症积成痼疾手足头目日渐长大而躯干与两臂独细弱如初步履极艰饮食甚少如耄耋老衰者其残废不堪人事之日久矣迹岁以来加以寒湿外感身兼数症药餌无功医者厌於调治友朋倦於馈给温热间作痞结怔忡弗能食饮顾视余景亦不甚惜此皆使者与诸官吏连日所亲见若是者其可当大丞相之求与参议公之知遇乎然沅所以得虚誉於时贤者盖亦有说早岁获见一二前辈於经学稍知用心既而以久病故仅守春秋一经其他经皆不能复更读史书仅考左氏传亦不能记诵其他自史记而下治乱成败之说皆力不能及盖以久病早衰不能勉强非自弃也此则必与沅有往还之旧者然後知之其尝邂逅一面者不能详也而况於仅闻其名者乎若是者其有取於武功经营之日乎其亦有裨诸明公之末议乎然则虚大丞相求贤之盛心负参议公与诸公之举者非小子之罪也自古创业之君其功臣谋夫未闻有一人出於经生文士者迨其中世误於经生文士则或有之何则以其素不讲当世之务也晋人所谓宜束之高阁以俟太平者夫岂不试而言哉若沅者足迹不远无四方之游无俊杰之交自度病不能进早岁则絶意场屋其於时务未尝用一日之工然则使沅不病且不敢以无实之名昧昧而前以冒弓旌之招而况於笃废俟尽夫复何言是亦可见其命之穷无其才而有斯疾者矣顾无辞以复於执事者辄敢以先师黄楚望先生行状一通春秋集传序文一篇上呈所以见其早得虚誉於

当时者以此而以其久病废不能脱藁恐有遗恨於身後者亦在於此伏惟参贊之暇一赐览观使小子得藉诸明公余庇稍求医药进饮食一二年不克死幸而克成其书以示天下以传後世使天下後世知大丞相与诸明公待士厚病者得养废者得起老先生待朴学皆得遂其志成其业以垂无疆是则仁人君子之泽非但一时一士被其赐而已也干冒尊严不胜悚息不宣

寄上苏公伯修

即日仲春伏惟尊候动止多福沔自姑苏舟中拜别即转吴兴度腊改岁回钱塘会葛元哲昉闻旌节所次用释驰系沔窃闻古之君子居廊庙则功显在山林而言立是以或出或处初无容心而高风伟绩显白一时焜煌干祀尤可尚也矧礼失乐流文散史缺非弘才卓识夙有闻见不能辑而存之阁下素抱述作之志倘及今视听精明体履清暇网罗遗逸成一家言以幸後学枕非小补前辈欲着书多以闲居日少志弗克就九重侧席良辅乃躬瘁効劳则汗青未有期也沔穷山晚进仰恃一日之知辄敢僭效其愚如此惟家贫亲老不得供洒扫於溪堂备捡閱於书府旦夕瞻企无时可忘耳因高则诚入京谨奉手状起居干冒清崇不胜悚息伏惟幸察不备

答朱子范

往岁专诣门墙拜顾存之辱庶几获质所闻夫何中道而同行者以亲姻为嫌由是此心弗克独遂尚蒙枉骑出见寒林古木中依依数语而别则亦人情事理有当然者非敢介然於左右也春初闻从者重赴广陵深以未申祖饯为媿雪中获领手翰三复竦然所以惠我者厚矣某於义利取舍之间析之精矣顾念不敏之资察焉而不足於明勉焉而不足於力虽持情之耿耿终抱志以悠悠则未审吾兄何以匡其不逮也蒙喻金兄有共学之志顾何以得此矧寒宗於先世有连姻今本初兄弟又为至戚亦何敢偃然拒之大抵学问之事以志合身安为本空山凡事草创来者往往不获便安为叹客主为之两难其迂疎之学不达时宜终鲜及人实又不待言也以此不敢相与为苟且以误其迈往之志尊兄必察其愚不以方命为罪尔承闻此兄质美而志坚又有吾兄为之表帅可谓有余师矣他日倘获承接自当三谢不敏望执事为善达此意幸甚幸甚

答倪仲弘先生书

沔顿首拜覆仲弘先生翰制尊右近尝扣谒馆下获闻至论殊慰离索虽相距不远然别去不能不怅然也去岁蒙尊翰緘示教答疑义佩服之余再具求教而书竟未达兹复掇其一二錄呈并平昔所欲请益而未能者以徼终惠倘辱不弃幸孰大焉尊翰太极不离乎阴阳而亦不杂乎阴阳则天命之性不离乎气质明矣按此语须子朱子而实出勉斋勉斋曰天命之性自其理言之不杂乎气质而为言尔向亦未得其说後见朱子有云某解太极图云某此句当子细看今於某解说尚未通如何论太极因此求之方悟朱子微意所在盖非有以离乎阴阳也一句是正说太极本体二句是发明周子立言之旨谓无极而太极五字乃是即阴阳而指其

本体不杂乎阴阳而言之耳非谓太极真不杂乎阴阳也故曰即太极不离乎阴阳而亦不杂乎阴阳而为言皆是深致意处张子曰形而後有气质之性善反之则天地之性存焉勉斋恐读者未达此旨误以稟受於天者为两性也故以朱子释太极图之意释之盖谓此理既赋於人则已墮於形气中非复本然之全体不可纯以天地之性言今日天地之性乃是自其理而言之不杂乎气质而为言尔非谓天地之性真能不杂乎气质而可以舍彼而全此也尊翰又云若以理之不离乎气者言之则天命之性得於有生之初若以理之不杂乎气言之则天所赋於有生之初而我受之以为性者本无不善也此初字是指天命人性赋受之初言所谓不离乎气者也用前二句观之则是得於有生之初者果有两性也通後二句观之则是理之在人者有二而所谓复其初者乃是舍彼而全此也气质之性虽曰形而後有然使得之於天无是本然之性则亦何以为是气质之性哉故程子以本然之性为极本穷原之性又谓二之则不是意可见矣愚意如此未知是否尊翰云尊德性者存心之事静时工夫也道问学兼致知力行而言动时工夫也致广大而尽精微存心而致知也极高明而道中庸存心而力行也此一节尤不能无疑盖动静工夫皆是就心上说如所谓存养省察是也与致知名义事意不同可疑一也且以尊德性专为静时工夫则与存心而致知力行者自相抵牾可疑二也谓存心为尊德性之事则可谓尊德性为存心之事则不可可疑三也昔有以问为致知学为力行者朱子不以为然今欲并包力行为说可疑四也洴昔年读书最患多疑每一开卷则如蝟毛而起虽圣贤书亦然尝谓程朱二先生发明斯道庶无复余蘊若於其原有一字不通则是道体之全犹有所昧故亟欲求教倘以不为渎则继此当有不一之请也惟是昨承海论深叹夫践履之难则小子犹不能无憾於斯然不敢遽请其目者诚有所待而不敢轻也良以平昔仰慕高致非止为一二文义请益而已向以间阔之日多故不敢妄请今则相望甚迩聚会可常则其性习之偏必已深察之矣虽不敢数扣函丈而书问啓教当在所许也然常思之士之为学必於斯道之全体大用稍能窥其大纲而又必於其知之所至行之所逮浅深分数无毫发之不自知然後知行交勉日有程课而进修之序有所考师友之教有所施也不然则浩浩茫茫实无立足之地而欲以疑於近似者自诡贤於流俗者自安谓之知道且不可而况於君子成德之事乎盖尝反已而思之其麤心俗见渐知解剥乃由长年历事而然似非义理浸灌所得者向承尊诲谓若稍能变化而终未敢便认以为是也区区稍类谨厚亦以资稟之偶然而忧思之余其是非羞恶之心不能自泯此古人所谓匹夫之行若圣贤践履之教恐非谓此也夫践形由乎知性读圣贤之书而麤通其六艺乃知性中一事耳未可便以圣贤之学为止於是也洴之所自知与其所愿学者如此其所不知与知而未当徒言而不能践者寧无望於师友之训哉夫病者之求医必尽告以受病之原而後剂量浅深得尽其技是以虽知辞多之为渎而不能已也若夫有千金之药而不能信服则护疾灭身之罪其将何辞先生念其附托之意不在於他则必有以教我矣楮短心长言不尽意伏惟恕察不宣

近承附至良方已领稍凉便当依法合服也大学辑释敬已伏读一过区区妄有所疑即已随处标识其一二当讲者谨条具求教幸有以订其谬也

一凡例二字固是着述通用但施之圣经贤传之首似大郑重朱夫子着书义例甚精皆未尝自列於书首况乃编次小节无大关涉又皆先儒成法或只用自叙之语引起却逐一写去未审可否

一泛滥二字已尽编集成书之罪谓之龐杂则波及於立言者矣

一点掇训释以便初学亦是一说但朱子着书或详或畧必有深意存焉非是不为初学作计若必欲剔抉无遗使人一览意尽则入耳出口者得以肆其灭裂沈潜玩索者无所用其心思徒增浮躁之风罕有自得之妙所谓语意平常者似可省去也四书海涵地负初学所未解者多矣岂能一一点掇邪如两三句以上虽非特笔决不可无陈先生曰四字盖书名已更故也

一以挑剔精妙警策明快赞胡先生通旨甚当但此八字乃宋季作经义之法未可专以此等为好也自有四书集注後唯勉斋西山双峰暨胡先生多所发明皆是於四书中有真见者双峰融贯朱子之论时有失其真处胡先生必欲章章出一通旨是以过求处尤不少耳辑释於诸家议论皆有去取则所谓不敢録者似不必独於胡先生说破也伯武尝对子韶言之亦不可不知耳

一所引胡吴新说皆是本无可说而强生议论故於枝蔓上更出枝蔓如所谓格致二条贯彻乎诚正修齐治平之间非诚意以下不事乎格致如以敬止二字为文王明德新民之极致皆似是而非不通究诘且大学工夫所谓其叙不可乱而功不可阙者在朱子俱有成说无复余蕴若谓格物工夫则随所遇而用力焉可也今以格致二条为贯彻乎六者之间则是知致邈无其期而物有未格知有未至而意已可诚心已可正身已可修家国天下已可齐可治可平也又谓非诚意已下不事乎格致则夫诚意正心之术齐家治国平天下之具皆学者所当穷格之先务非可以临渴而掘井也所谓明德新民之极致者如下文所引淇澳烈文之诗是也文王新民之极致则上文周虽旧邦其命维新者是也敬止二字乃是就文王德性上说并新民言之非经旨通前後二家之说观之似於章句或问之旨元未看得贯通完全但欲寻行数墨剽窃立论耳信乎学以为已者之难得也沅本不敢僭直至此近蒙书示朱子及张吕二公问答三复悚然知三先生胸次如青天白日无复毫发留藏回护之态真是圣门诸贤哲气象盖所谓唯知义理之无穷不见物我之有间者岂复校其能不能多与寡而为之进退哉益知先生之盛心为有在矣是以肆其胸臆至於如此乱道处幸有以教庶不负其求教之初心也人行速又有猥事不谨详乞尊照

即日天气乍冷伏惟尊候清安沅向者伏读大学辑释尝尊严命以鄙见求教继辱手书多蒙印可且有随所见不憚忠告之属此在先生固为盛德余事而小子问学空疎误承推獎不能无愧尔屡欲具谢不敏而以冗猥未能也中庸所采前辈精义大畧无遗视大学殊胜然此书实未易言惧无以复於左右者故稍久不敢奉还近日偶观东阜翁礼记集义纲领有云儒家以大学为门户中庸为阊奥入其门庭造其阊奥由是而读戴记之四十七篇大本立矣宜无难者反覆数过殊未知其旨意所在若只以诵习其说便为入其门庭通贯其义便为入其阊奥则子思子所谓立大本者恐不谓是未审老先生所谓门庭阊奥当是何事乃复有待於诵读戴记而後大本可立邪庄生曰语道而非其叙则非道矣先民有取焉昔者朱夫子从李先生受中庸之书求喜怒哀乐未发之旨自以为未达而先生没有如穷人无归之叹其後如长沙与南轩论之三日夜不能合由是观之则朱子之所以审问而明辨之者岂特文义之间而已哉若只以文义求之则是书有章句有或问有门人之録有石氏所辑因其所已言而求其

所未言思过半矣若必欲视为已事则程子所谓放之则弥六合卷之则退藏於密而终身用之有不能尽者恐非可以寻行数墨而求之纸上也朱子尝谓范淳夫一生只将圣贤言语忙中即抄一番便了所以见处全不精明淳夫高明博雅度越流辈久从二程夫子游一时名世之士莫不推服而後之大儒论其失乃如此则吾道之大诚有未易知者哉又尝谓不用圣贤许多工夫亦看圣贤底不出不用某许多工夫亦看某底不出其所谓圣贤工夫某工夫必有事实决非虚言然则苟不求其工夫所在以实用其力而遽欲苟附益於圣经贤传之间皆朱子之所不许也若曰着述事体与反己之学殊涂则亦未审其何所据依以为折衷羣言之本欤大抵近世君子多以辨析义理便是朱子之学纂述编缀便是有功斯文故於向上工夫鲜有发明日用之间无所容力其资质近厚者亦不过苟免显然悔尤而已圣贤中庸之教岂如是哉若汙之氣薄質弱尤切忧惧而用志不勇未之有闻先生诚不以其言为妄尚幸有以教之也蒙诱掖諄切不敢自弃屡欲面啓而拘事未遑兹因便风谨勒此承动静俟得近闻却当进谒并请中庸下卷参玩前後续求所以教也不备

向因送客得邂逅一见少慰翘渴值仲本拉过其家不获践回途谒教之约继又以事奔走郡城是以中间虽尝两奉惠书而皆不得以时上答状也昨方抵馆舍则知从者亦尝过邑郭但未知继此可得侍晤否县公亦欲少欸若得径为此来尤幸汙屡读中庸辑释纂録前精义大畧不遗良不易矣思欲罄竭愚虑少副谦德之万一而涵泳所闻未之有得袁氏所録吴先生绪说多宗程子其异同之故亦非一再省览所能骤决也是以虽欲妄有指陈而自知其非未敢辄竟其说尝观朱子自序有曰沈潜反覆盖亦有年一旦恍然似有以得其要领者此盖语人以其先难之故後得之由使毋以易心求之也既曰恍然又曰似有则有非指要纲领四字所能发明者矣夫是谓之知德夫是谓之知道而知言则其效也其曰然後乃敢会衆说而折其中则可见前是盖有所未暇焉盖其於明善诚身真修实践如行者之赴家其至可期饥者之得食其饱可必至夫一旦豁然贯通之日而後衆说之异同得失折之於此无一不得其衷焉非揣摩比较从事於行墨者所可同年而语也区区自虑以为如汙等輩资质之凡近心思之麤浅苟不能於为己为人之际一刀两段发愤刊落然後实求反己亲切之训以致其絶利一源之功而徒尔朝繙暮闭口诵手抄则是终身无由知至毕世不能意诚而释迦达摩果贤於孔孟矣若夫先生志意之诚确工力之专勤而虚已择善无间物我其所存所就岂晚学所能与知但近日常前輩着述殆夫借仆铺面张君锦绣者恐不足为先生道尔仰戴亲爱之厚常切愧叹深惧有负所期故敢倾倒其胸臆之私其是其非尚幸明有以教之是所愿也中庸辑释二帙周礼订义古义书各一帙同纳余俟後便恐从者解去书馆则侍诲有未可期者故特专人贡此汙此间去留迟速却俟得严命後为之图尔干冒清闲无任悚息

与袁诚夫先生论四书

日録疑义书即日仲冬伏惟楼山聘君先生尊候安福往岁仆人还蒙赐手书緘示孟子日録许以难疑请益可於文明处间达窃惟先生古道盛心嘉惠晚学如此而小子疎庸辱教有自敢不竭其胸臆思所以承诲论者乎谨以日録诸书参之向者所闻要语所得尊翰诸有愚虑悉呈先生其终教之戊子赐书云足下天资非不聪明学问非不博瞻究竟非不精详但觉本领尚未分晓统宗会元之地欠着工夫此处未甚融贯则读经书未免有窒碍汙窃谓此一

深中浅陋之失但上三言亦予之大过尔又曰虽朱子不能不微有此失所以专守其说者又加甚焉沆於先正大儒所造智不足以及之不敢辄揆所闻立议以取侏儒观场之诮窃谓先生学於吾文正公而文正则於朱陆二氏之学互有发明者沆闻陆先生曰今士大夫不志於利惟朱元晦此言真如震雷惊霆当时名儒杰出各立门户甚衆至此皆粉碎矣後之君子顶门上若当不得此一鍼则於元晦地步未易抗衡也况所谓统之宗会之元者其可从下窥高以意识卜度乎若学者於经旨专守一说则事又不同盖义理无穷故不当以先入之言为主但得於彼者未见其无疑则舍於此者乌可以轻易也若夫向里一关无所开发而徒欲守先哲之见以为己见诵先哲之言以为己言则小子虽陋亦未忍自画於斯先生尚有以教之否戊子见教云论语志学一章前三句是穷神之事究竟至此则吾心之所存与天地为一後三句是知化之事了悟至此则吾身所行与天地为一沆窃谓若此则是圣人四十已前穷神至五十已後始为知化四十已前究竟至五十已後始了悟也易所谓德之盛者其後前迟速乃若是邪究竟了悟乃释氏所谓心学一边事儒者不道恐非所以论圣人又曰知天命与天地合德是致和是万物育耳顺与日月合明是致中是天地位沆窃谓以此意配此章之叙言之则当其与天地合德时未能与日月合明当其致和而万物育时未能致中而天地位也此章虽为圣人之学然其进有序不可如错综言之又蒙见教耳顺之说且口授微旨而未及请益後闻之録师说者有曰此谓天下之声耳无不闻而心洞知之尔彼释氏尚能通他心吾圣人岂有不能沆窃谓未易以言语辨也夫大虚之无外往古来今之无终始声色貌象之充塞满盈而无纪极皆子思子所谓虽圣人有所不能知者也而释氏则以为知之故赞其师者以为山斤海滴地尘空界尽无量劫无所不知而犹未尝即此以为具足今使圣人果有以知其所知则彼犹有贤於圣人者使圣人果无以知之则亦无待於知彼所知而後为圣也夫天以左旋而成岁功日以朝升而曜羣动圣人者顺性命之道以参天地而赞化育者也是故仰观俯察以知幽明之故原始反终以知死生之说而非有怖於中而後求有待於人而後徵也然则范围大化不必周知三世曲成万物无取兼照十方岂非以其所本之异乎彼且以尧舜为凡夫圣贤为非类盖亦自知其不可同於儒者矣今儒者则曰彼所能知吾圣人岂有不知则是见月之生明於西而拟天以右旋求日之照夜也岂其然哉此在晚进固不当妄论幸先生尚有以教之日録从心所欲不踰矩之训以从与不踰属天地心与矩属圣人在圣人分上固有此理但非此章之义如必用此说则是从心上元阙却天地两字也大学日録云明德新民各有至善其为至善各有分限明之新之者循其分限而不相侵越是为止於至善沆窃谓如曰明德新民各有分限是明至善可也今由其为至善各有分限是於至善上更有分限矣大学经传於明明德新民未尝各出至善二字微旨可见如曰明明德新民皆止其分限而无欠无余可也今日循其分限而不相侵越则未审明明德不止至善何以为侵越新民界限新民不止至善何以为侵越明明德界限乎戊子赐书云未当止而止未滿其分限非至善也当止而不止越其分限亦非至善也过於此则侵於彼如谏亲不从而止是侵入谏君分限谏君不从而随之以号则又侵入谏亲分限沆窃谓以未滿分限对越其分限语意才备可见侵越二字只说得一边过於此则侵於彼就谏亲上犹可至明何则君亲尊同谏诤事同尚不达天属义合之分而昧所施之宜虽谓之相侵越可也今明明德新民虽有内外本末之分然首尾相因只是一事盖明明德止於至善则家国天下一以贯之而新民在其中矣未有余於明明德而不足於新民者亦未有有余於新民而不足於明明德何以谓之过此则侵彼乎又云格致则欲其学而知之止於至善诚意则欲其勉而行之止於至善正心则欲其操而存之止於至善修

身则欲其泛应之无不止於至善。汭窃谓至善以事理当然之极得名。日録以当乎理而妙於事释之精矣。但谓格物致知诚意正心修身以下工夫各欲止於至善则恐非大学本旨。大学以在止於至善上承明明德新民下即继以知止能得而以知所先後继之然後因古之欲明明德於天下者而遂推八事以先之。叙却由物格以顺说相因後之效而无复止至善之云。传文中亦以无所不用其极之效其下引诗以见新民用其极者则直蒙上文言之不复更云至善。自第十六章传以後皆无一语及至善矣。其详畧後先必有深旨。盖尝论之必修身以上五者皆备乃为明明德必齐家以下三者皆备乃为新民。故总以明明德於天下一语起之必明明德新民无不用其极方是止於至善。故经传说至善处皆合明明德新民言之不复析为二也。若八事则不然。当其物格知至意未必诚也。当其意诚心有未正身有未修而家国天下未能齐治平也。安可以一事之功而袭至善之名乎。苟一事未至且不得为明明德且不得为新民。又何以谓之至善乎。传所谓仁敬孝慈信乃是明德既明之後所止莫非至善。其目虽五其为至善则一。盖未有人臣止於敬而为君不仁者未有人子止於孝为父不慈者使得之於此而失之於彼。则其所谓得者亦必非其至也。况所止之善必有其名。若仁敬孝慈信是也。今谓格致以下各有以止於至善则其至善之目随事得名当有八义。将何以为之名哉。然则以物格知至为知至善之所在则可谓知之止於至善则不可谓意诚以下为得所止之叙。则可谓各止於至善则不可。故格物致知诚意正心修身之功各造其极只可谓之物格知至意诚心正身修而无至善之名。齐家以下亦然。何者八事反覆相因初无二绪而止至善为明明德新民之极致不可以物各有止之泛言者而汭言之也。日録云有定者意诚能静者心正能安者身修能虑则齐家治国平天下在其中矣。汭按近日前辈多有同此说者。窃谓有定则意可得而诚矣。定未底於诚也能静则心可得而正矣。静非正之谓也能安能虑则身可得而修。凡举而措之者无不宜矣。安固不可以言修而曰齐曰治曰平者乃所虑之事而非能虑之云也。日録云知所先後则进为有叙而不拂乎大学之方法矣。汭按以方法训道字是欲与第一句道字相应。然既曰知所先後则是已得其方法不可但谓之近不拂亦非近字之义。日録云修身之功在省察其身之所行而整饬其过不及之差。又曰欲人於此动辄省察其身之所行免致五者之辟。戊子赐书云圣人虽曰安而行之亦须常加省察修身之功圣人亦虽有但易如贤人尔。汭窃谓如上所论则五者之辟虽圣人亦几不免而後中也是犹有所存然後能不亡有所理然後能不乱也。何以为大而化之何以为有迹无迹何以为之由仁义行非行仁义向者僭易说此意与濂洛先生论圣人氣象处不同。正谓此尔。己丑赐书云圣人有心而无为才说有心则是省察。汭窃谓圣人有心是对天地无心说。若曰圣人有心省察却是有为矣。据愚见则贤者不忘省察为有间断。顔子不能无违於三月之後是也。圣人纯亦不已自无过不及安用省察。若曰心不自圣亦只可言明德不可言修身可言顾諟不可言省察是故大学明明德传中无学者工夫修身传中无圣人氣象。故汭尝谓明明德新民止於至善是举圣人事为大学标准。自格物至平天下乃是学者工夫。举古之欲明明德於天下者而逆推其用力之叙。则所以明古之圣人亦必由学而後至而学者之功必可至於圣人是则所谓大学之道。孟子日録浩然之气章云正心即大学之正心言勿强正其心。汭窃谓必加强字作勿强正其心而後语意可通。则非大学之正心矣。向承赐教谓必有事焉是急所先务勿正心正是勿期其效之意。但不以预期训正尔。既曰勿正是预期其效之意。则以预期训正左传有明文比之加一强字而後通者固不省力乎。大抵此章之旨本不必以大学之叙言如欲合而言之则诚意正心之功之效未尝不备。孟子此盖所谓不动心者心正之验也。持其志者正心之功无暴

其气者正心之助也下文言浩然之气则志又在其中矣盖养而无害已包言诚意正心之功塞乎天地之间即其效也日録曰所行皆直则吾之动作与天地同运而天地之气即吾气矣谓非心正身修之验可乎然其所以至此者岂有他哉义者人心之裁制而形於事道者天理之自然而具於心得是气以为之配则内外昭着充周不穷而心无不正身无不修矣所谓直养有二集义者养之始事也但事事合义曰自反常缩则意无不诚矣必有事为养之终事也循天理之自然而不以人为加之非正心而何始之害有二义袭而取不慊而馁是也不知义者不足与言此告子所以外之也终之害亦有二忘与助长是也若专以必有事焉为集义则烦复失叙而不可通矣昔二程先生皆以有事为敬其曰敬则内自直者必有事焉而勿正是也其曰以敬直内则不直者正与助长之谓也伊川所谓不集义却是无事者为不先集义而徒欲持敬者言之耳非谓必有事为非言敬也上蔡亦曰浩然之气须於得其正识取而初心之要实在勿助勿忘之间舍是他无以为正心之功矣孟子之论初未尝废却正心工夫但此章养气之论乃是举其所自得者以告人故不以大学之叙言之其实未尝不互有发明也以寡欲为诚意之事亦非大学之旨盖寡欲是恶恶如恶恶臭方是诚意只言寡欲则其自慊不自慊未可知也篇末云万古一理千圣一心世虽远而心之神明实相接迹虽异而心之天理实无不同沕谓有以见万古为一理则不必言相接相接者两物相连及之义也有以见千圣一心则不必言无不同无不同者两物相似之名也将欲一之适以二之盖亦语病之一端乎中庸修道之旨向者豫章临川皆得剧论今亦不复多为之说以渎尊听但谓此书篇首三言从上生下语意相涵可法如云所率者即天命之性所修者即率性之道两性字无异义则两道字岂容有二乎今必以此道为有污坏之道必修而後复则与率性之道异矣又恶可以同条而共贯哉大抵此三言是欲推原性道教所以得名之实曰性曰道皆指其本体之自然故教字亦从君师立法为言如所谓诚明谓性之性明诚谓教之教皆是更转一义而已谓之得名之实可乎中庸传道之书也是以继之曰道也者不可须臾离实从天理自然处言之故下文有戒慎之教无克治之功此孟子性善之教所从出也使其指有所污坏言之则当迁而之善可也安得连举三道字而断之以不可须臾离乎不可二字是儆戒之辞而日録以未尝须臾离释之则未尝离云者乃以自然之理言之也然则上文独不可谓因其未尝须臾离者而修之以为教乎夫道以自然之理言日録则以污坏释之不可者儆戒之辞日録则以自然之理释之其非此书宗旨甚明始借圣贤之书以寓己意则无不可若曰修者整饬敝坏之辞不可谓之品节则此字之始迺段肉为脯之名夫条而段之十脰为束於品节之义为近初非以肉之敝坏而为之也窃观先生四书中庸日録特为精密多所发明惟首章之义为一书大纲而未易通解如此故中间虽有微文小节不能无惑者皆不及遍举惟德人君子以辨学明经为志不厌不倦之美诵法圣师庶几有以终教之乎沕齿日以长读书穷理未尝少忘於中山居陆沈殊罕寸益西望引领不胜驰情非寻常人事语也尝附问豫章知文明以秩满归计无从达今留钱塘因元哲还便谨具録平日所欲上请者附纳左右倘有尊翰批答则敝邑张尹乃杨随翁高明初亲戚其家常有人往还可以转致末由省谒伏冀调适寝兴为斯文自重不宣

春秋纂述大意【寄宋景濂王子充】

春秋师说三卷

黄先生所着六经补注翼经罪言等书篇目虽多其攻撃辨难使人致思只是一样文章大畧与公是先生意林权衡相似雅意欲得同志二三人共传其学其入门只是教人看许多疑节後却自思之虽告危太朴亦不过如此初受春秋只令熟读三传於三传内自有向上工夫比请益则立例使人思之如行状中二百四十二年内外之说一二年不能晓得其易置後则注脚元只在前说中盖二百四十二年之外者自伯禽至鲁国亡之春秋史官相承之法也二百四十二年之内者隐公元年至获麟之春秋圣人之法也凡一事皆具此二义以为单传密付尽於此矣然退而读本经终是例断不得许多书法异同始且旁及他经辛巳秋归朱文试回疑小子辈年少学浅故此老不轻授即慨然同往拟同受其易象之学比至相见颇喜朱文精敏然问答之际不易前规大意与行状中谢李学士之说同朱文先回沔独留得口授六十四卦卦辞大象谛而求之大抵於象学无入处久之所考左传杜注等义例颇见鲁史遗法欲以此复命请益而此行先至道园为虞公留住一岁来年专往九江则先生捐馆矣易学既难着手而春秋微言颇有可思者乃摭取诸书中说春秋处参以所闻辑为春秋师说三卷附行状後所以备述其事者盖黄先生是深究经旨失传之由以先儒多才高说得经学太易为戒以深思自得為準故严立一家门在熟於先儒成说往往看得不然此是第一节首冀留览幸甚

春秋左氏传补注三卷

黄先生论春秋学以左丘明杜元凯为主所谓鲁史遗法既於左氏传注中得之而笔削微旨殊未能潜窥其罅隙後思礼记经解始悟春秋之学只是属辞比事法公谷所发书不书之义陈止斋因之以考左传正是暗合此法故其笔削义例独有根据所可惜者偏於公谷与杜元凯正是吾得一边乃以陈合杜举经证史以章旨附入左传集解中属辞比事以考之今属辞书中八体由此得其六七後考日月之法传中事实钜细往往脗合为益甚多其他傳会处与凡例之谬为先儒所攻者并论之然前辈知左氏义例之背谬而不知其事实之可据知後传论世变之可取而不知其以书法解经在三传後独能发笔削之权此补注所以不容已也

春秋属辞十五卷

初尝会萃诸家说合经意者作集传岁久未能脱藁日月之说亦未定始悟属辞比事欠精欠密窃谓先王制礼後王定律事虽不同然其伦理分义治体法意莫不在乎尊卑上下内外之间缓急轻重大小之际况春秋兼该礼法事有常变道有经权而学者廼为一切之说以释之宜其不能通也於是离析部居精别其义类而更以属辞比事之法细推之则凡滯碍胶结处皆涣然冰释因之以考日月之法亦昭若发蒙如有神助矣盖属辞比事之法至是愈见其妙而经之八体始定既又思八体之名虽不可易沔出於一得之愚若非彙别牖分使人一见了然非惟觀者未易深察虽吾书亦未必无矛盾也廼分为八篇而类释之名曰春秋属辞尝谓圣人作经虽不可测以今观之二百四十二年简重如山亦必属辞比事而後可施笔削所以学春秋者若非属辞比事亦不能达笔削之权故其间纪纲义例皆是以此法求之於经的有证据然後取先儒之说以实之殊与臆断无绳墨者不同此属辞之所以名也第一篇与末篇即是黄先生之意考之经传并不见笔削之迹第二篇笔削之旨廼本二传陈氏择其所当存而补所未备第三篇至六篇间有先儒之说而後传之指居多或辨其所未然第七篇发机於

二传何氏及西畴崔氏然黄先生日月例亦只守孟氏之说尝取林少颖谕日月二篇置六经补注中亦不甚取後传不全废褒贬所取三传义例今皆不能尽合譬如适国都者其道路行程轨辙一遵指授至於宗庙之美百官之富只合据今日所见言之乃为弗畔尔愚见如此悉俟是正

春秋集传十五卷

旧藁纂述之意备见旧序

新藁日月之法既明八体既备义例俱有定说之後重改旧说尚未尽脱藁然属辞已有全书而集传终不可无传者属辞是先考定史法以明圣人笔削之权集传是推原事情世变以达圣人经世之用二书各有所主互相发明而後经意乃备

右具如上此经唐宋说者虽多大抵有二途一曰褒贬一曰实录褒贬之法每相矛盾其说自不能通而实录只是史官之事与孟子说春秋处不合诸家各以其意立论言人人殊既失事情又昧书法故黄先生一切断以虚辞必经旨既明义例既定然後可择其存者存之若黄先生力主杜氏得圣人制作本原止斋根据三传从书法立义得学春秋之要皆卓然有功於经然啖赵以前说者已数百家近代复数百家沅往来江湖所见不过数十家然无踰三传三注及陈氏者最後见庄氏文雅堂书目内有未见者四十余家一时甚不能忘情疾病颠沛後心力凋残不复动念惟有以是正之幸甚

共学斋记

后王降德之道不明士君子能反诸身以为学者千百年来大畧三变以复於古而异端不与焉处污浊之世不忍自同於凡民而又患夫资之不足也於是乃有佩韦弦以矫偏运甕枕圆以警惰昼有所为夜必焚香质於神明念虑善恶之萌必察焉而各以其物识之以观其消长盖动心忍性不如是不足以有立於时则自知也亦明矣於是有君子者出主忠信以饬其躬以匹夫而立师道使在三之义赫然白於天下後有作者不敢忘焉其视专一善名一行则又远矣於是又有君子者出以其得於天而成诸己者本经训以淑斯人使礼先乐後之教下学上达之旨复明於世益自秦汉以来学术多失於是始归於大中可谓罔极之恩矣自其教行高明特达之士翕然归之然其间善学者乃复因其性之所近端居默识以极夫反已致曲之功而後传之无弊则君子之学夫岂易言也哉沅学於古人而未之能进窃惧夫气昏力薄不足以底於成乃题山居读书精舍之西室曰共学与同志者居而勉焉噫人固与庶物并生者也苟无以反之则情识利害之间将无以自别矧学不至於知至而意诚其气机之窃发者每起於芒忽而不自知而天理之存焉者寡矣彼愤悱坚制高迈卓絕以自拔於凡污者亦何可少乎易曰智崇礼卑智崇效天礼卑法地圣贤之言无二致也羣居终日而义有不出於此者何足道哉乃书之以以为共学斋记

华川书舍记【因宋君论文而详叙其本】

婺州义乌县有泽曰华川王君子充书舍在其上同门友宋君景濂历叙上世以来为文者之得失而卒归於圣人以为记辨博精诣殆不可加矣至正十一年冬沆与子充相见於钱塘子充又俾沆伸其说既不得终辞则以复曰圣人之文非一家之言也昔者成周盛时帝王制作大备其载诸方册以垂轨当世者谓之礼经若韩宣子适鲁所见其类矣诗采诸民间策书辞命职在史氏未尝使学者执笔习为之也吾夫子顺先王诗书六艺以设教而学文之训门人识之亦曰考观圣贤成法以尽其职分所当为者而已盖自一身以达天下弥纶益着而非外求由小学以底大成品节愈严而无二本成德达材之衆率由於斯而徒以文学称者非圣人之意也是故夫子删诗定书赞易修春秋以为万世明法而必曰述而不作曰吾从周则岂以言出诸口者谓之文哉战国争疆道术分裂则一家之言兴而异端起矣自兹以来吏治不足继以武功而为国者始思息民以黄老经义未明流为笺疏而反身者唯知洗心於释梵由是马班崔蔡之伦以文名家凌厉纵横浩不可遏而先王经世之术微矣贾谊董仲舒掇拾於残阙而莫之行诸葛孔明范希文鞠躬尽力而未足以有明也舂陵河南大儒继作然後二帝三王所相传授者始焕然於时关中张子因之崇执礼之教精思以致道修辞而断事以一乡而准天下考三代以示方来卓哉学者之楷模矣迨新安朱子继周程之绪大明经训以觉斯人而浙河以东若吕薛二郑氏取周公旧章离析错综如示诸掌学者始由斯得以窥见圣人制作之盛焉然当是时陆子静氏出於临川以其得於心者行乎家邦充然自足而诸君子之志荒矣薛郑会归於朱子而吕氏则无间焉陈君举薛之徒也乃自以书请益於陆氏此又论先哲於乡土者所宜慎思而明辨也况夫有志於斯文者乎子充早受业於同郡学士黄公黄公之见於文章者岳静渊澄不大声色固非欲以言语文字名世而子充明经洁行卓越不羣因乡先生精神念虑所存以端述作之本原极古人之能事必有徵矣则虽俯仰一室而所以系吾徒之望者何可量哉浙东多文献故家他郡莫及昔余尝欲往游而未能也异时考德会文之乐舍华川奚适乎

永贞庵记

道吴兴郡而西百里至安吉县之东北有昆山焉左蜿蜒以前横右蹲踞而外塞隆然其中如錡釜之覆者奉训大夫延福大监湖山张公之子世华子英葬其母陆氏夫人之墓也子英以至正九年己丑正月毕窆窆豫为屋数间於墓西规置守者以给祠事子孙岁时展省得以止而休焉取易坤用六之义名曰永贞之庵墓前地可十亩钜竹万竿即其南为亭四楹名曰云亭其东有泉靡啮醴深甘洁冬夏常流名曰长生之泉盖庵以明礼亭以着诚而泉以知本也葬者事亲之终不可不慎殷易首坤厥名归藏永贞以大终藏之道也水泉蝼蚁古人虑之而非以为利故曰庵以明礼墟墓之间生哀其发扬於上为昭明焄蒿凄怆者蔚然其如云沛然其将雨而未尝有所聚散往来也况於孝子慈孙之致爱致愍者乎故曰亭以着诚礼原於天诚立於已自吾身而反之吾亲有存有亡其气同也自吾身而达之吾子吾孙有今有後其心一也君子之事亲行乎自然而发於不容已起乎一念而放之无终穷者岂有他哉观乎流泉之不息而可见矣故曰泉以知本君之意盖将使其子孙进於庵而知礼之不可诬拜於亭而信诚之不可掩退酌斯泉而悟夫一本者之未尝异也则张氏孝思之泽寧有既乎浙河以西俗敝久矣而丧亲之变又君子所不忍言其能瘞於土者则美田庐以崇梵释治园圃以盛游观岁驾大舟引妇子举一觴以酹焉托体魄於千载之藏而求夫安且固者盖蔑如也若张君

因安厝之严以致终身之慕即视瞻之敬以明礼义之原者其可少乎故为之记使其乡人子弟观之幸而有感焉则贤者之泽不特善其一家而已诗曰孝子不匮永锡尔类君其益广之哉

沧江书舍记

新安江合衢婺之水而东未至海二百里为桐庐县湍濑既尽潮汐欲平恬波慢流一碧千顷岸江之山完厚深固雄峙挺出又足以挟而有之故自昔遯世之士咸乐居焉邑故有闕礼坊宋儒方公慤即唐比部侍郎方公勋别业为居室注礼书之所後人因以旌之今徐君方舟作沧江书舍即此地也始方舟举进士不得志於有司乃退食郡吏之禄以为养然岁大比犹辍吏牒趋场屋至是乃尽弃举子业一意於为诗远师汉魏近宗盛唐视他作以为格卑不足法也其在新安每从文学儒者相羊山水间吟讽终日殆不知有簿书期会之劳间惟属家人益植花竹果木环舍前後令诸子肄业其中以迟吾归老予是时亦与君游盖尝奇君为人而窃叹其不遇自後一再会君钱塘谈诗论文亶亶不倦因扣其中曰吾非乐为吏每意有不合辄欲舍去适朝论复省台欲拯禁樞之敝为庶民请命而赵郡真定公实来吾幸以末学见庸书生穷达不足论得大人君子为知己不与寻常刀笔吏俱汨没无闻斯足矣矧後数年吾山中花木俱长茂诸儿读书有成服劳奉养各供其职吾当反衡茅理残编闭关却扫咏歌古人暇日泛扁舟烟浦间望三山於海门吊胥涛之忠愤覓双台於江浒挹严濑之清风岂为晚耶予闻其言而善之且喜其气之不衰而信其事之有成也遂为记之以俟云

唐尹生莹记

事有起乎千载之上而说犹未明非圣贤所传而终不可止者非葬地之法乎夫人之爱其身与子之爱其亲无间於死生人情所同也魂升矣魄降矣而终不敢谓升且降者为无知亦人心之所有也是故蠅蚋之嘬狐狸之食则上世之人而泚之水泉蝼蚁之害昔人无可奈何则周末之为志者尝忧之夫见於上世者历代帝王既已定为棺槨衣衾之制殡葬莹兆之仪使人人得以尽其情而无缺於所不见其於周末而无可奈何者则汉魏间多识之士始竭思虑以为其所得为而葬法兴焉然其归在於利生者而用之有信有不信其信求之有得有不得也是以家自为书人自为法而不可尽通又以其有时而信也故其传终不可止然则其说之用与不用特在祸福疑信之间而凡上世以来人情所忧惻而不能已者初未尝论奈何疑其说者遂以死者为散灭不灵而悖其送终之道乎夫信而有得者必其家之积德厚而宰物者畀善地以为之符不信而无得者反是理亦无足怪者而浙右之俗以其说之不信也凡有丧皆措诸水则是死者恒不爱其身而生者不知爱其亲也呜呼可为悲夫此吾於吴兴唐公子华生莹之作而深有感焉者也始公官休寧见其故家子孙与祖宗坟墓相为久远至数百年窃叹美之而又恶夫誅於祸患至岁久不葬者其弃官而归也余尝即而访焉暇日相与泛舟游河山之阴西望沈村之原若厦屋千间重门列庑而突奥之尊且严也若营万塞车环骑绕而中坚之完且固也予仰而叹曰美哉兹原殆所谓山川奇会处乎时犹未知为某氏物而公已心识之余既归之明年公乃以书来曰向云山川奇会处者客有以风水家言相之曰是谓吉土盖天目之原委也吾既以值得之异时将规以全吾归子盍为我记焉既又以书见招

至三四不倦今季冬余至武林公以夫人蒋氏丧赴余往吊如礼时公方为夫人营宅兆於所得地区穴之左葬有期矣或曰三吴葬不择地其来已久昔公葬其先君已得佳兆今又豫为斯莹可谓爱亲以及其身者虽然贤者所尚俗必效焉吾恐葬书不可尽信吉地不可多得是死者虽幸脱於焚弃而终不免於暴露也则如之何余曰是不然夫所谓吉地者乃天道报施善人之一物尔非可以智力求也唐公自起家教授借秩亭长佐郡幕掾行宣政化皆存心忠厚无世俗短薄行其宰休寧悯田租不实革三十余年守令顾虑不行之敝政设施毅然不惧不惑有德於人甚厚夫人以鲜兄弟留养其亲近三十始嫁待衆媵有恩抚庶孽如己子语言不出户外而四时祭享必敬必亲皆古所谓善人者而其先又多阴德则天畀佳城以安体魄而利子孙固宜彼或无公一日之积而惟欲以力求之则虽终身无得或得之而谬不足信亦何怪哉夫葬必以礼者先王所以因人情而厚伦纪也葬地之法不经而诡秘未能家喻户解而终不可泯絕亦人情物理有固然者今或不葬不以礼士盖有所不为惟善不加勉而徒恃不经之说可以胜造化而昌後人则余亦有所不信也故为公记之而具述余所感者以谄其乡人君子公名棣字子华晚号遁斋去官二年以奉议大夫平江路知吴江州致仕今年才六十有五其地负壬揖丙董是役者夫人之弟祜字国祜云

起云轩记

沔尝泛舟严陵仰观乌龙马目崇高极天新安金华二水合流其下云气之兴浑浑灏灏千变万化日新不穷而莫可名状也切意其间必有卓越之士高居自致极一世之荣观以乐幽闲而忘外慕者焉欲舍舟求之而未能也至正癸巳之秋戴君庭芳自其郡归为沔言於严陵得友曰马君周翰以起云名轩居而欲子为之记也余时闻其轩名已犁然有当於心已辞不获故问君出处之详戴曰马君素无宦情尝起家教授而非世俗之仕也其家居雍雍于于与物无竞图书以为苑囿礼义以为舟輿其所存固未易知也盖尝得蜀郡虞公赵郡苏公碑其先莹世家之远可以槩见以吾子者二公之客也故求记其名轩之义子又奚辞沔非能为二公役者而戴君之言若是其可无一辞以复於马君哉嗟夫浊世之士乐富贵而患失之厌贫贱而不能去也则好恶忻戚交仇其中其起居若惊其閱寒暑如疴其观山川之流峙如在梦中则云物之舒卷亦野马尘埃而已矣而又何取於斯今马君之贤度越流俗如此已不愧於青门故家矣即轩居之名以求之其胸中必有得於观感之妙而非世人所能知者昔余所欲求而愿见者君殆其人耶易曰云上於天需君子以饮食宴乐其取象於云也尚矣唐之诗人有得於咏物适情者於言云尤善君其尚有取於斯耶抑尝燕坐静观物与性合有不能喻之於言者耶余不能为郢书燕说而雅善名邦山川之胜又乐闻君之为人也姑书此为记异日从戴君买舟率水之滨顺流东下求君於是轩中而请其说君如有以告我当续书之

素隱齋記

世尝言隐者士之不遇也余独以为不然苟志於隱矣遇不遇不足道也彼不遇而隱者豈其中之所乐哉孔子於乾之初九曰龙德而隱者也然夫子尝欲居九夷矣尝欲浮於海矣而皆不果佛肸召欲往公山弗扰召欲往遇阳货曰吾将仕矣有乾初九之义而不以何哉问津於长沮不对问於桀溺不对使子路反见荷蓑文人曰隱者也至则行矣其长往不来有如是者

既而子路卒委身於孔悝而冉有子贡樊迟輩亦相与尽心於季孙之鲁其不隱不以遇也則彼三子者豈皆不遇而後隱哉古今時不同而士之出处亦有不可以槩論者世之亂也羈旅賔隸之流云蒸龍變莫不奮其一旦之死力以易終身之富貴章甫逢掖雖欲不退藏不可得也世之平也宗廟朝廷百官有司悉用文治瞋目語難之士欲進而自售得乎而世常言士必不遇而後隱則其所以為士者從可知矣孔子於大過曰君子以獨立不惧遯世无悶彼不遇而隱者其能无悶也哉是故論士之隱者不必以遇不必以不遇顧其中所存何如耳星溪江君子文居深山之中以素隱名其齋其亦異乎不遇而後隱者乎子之結發讀書不蕲乎聲利隱自其素志中遭世亂起家從事軍府而不貪天以為功不闕人以封己雖是非萬變禍福相尋而超然其間與人同憂而不同其患其進也不易其常其退也不愆於素如是而隱寧有不遇之嘆乎余嘗論君色和而气温无城府於中不表襮其外視古幽人逸士无愧焉信乎能素其隱者故為道隱之時義以為名齋之記

黟令周侯政績記

國家既平羣盜所復州邑大帥得承制具官時永嘉周侯君儒宰吾徽之黟縣卓然以廉能著稱汭蓋耳熟焉而未知所以為政也今年六月以病求醫於黟寓縣北僧廬日與父老相接頗能言侯設施之詳且曰侯有陰德於人請記其事余曰凡子云云皆侯之政爾何以為陰德且居是官則不苟於其事侯非有為而為者又何以文為父老曰不然郡邑不幸陷賊居人无更生之思矣賴朝廷厚恩復得列於編民當天兵遠臨刑威莫測饑饉荐至徵發繁興隕身喪家者何可勝紀而黟人以侯故咸免於非辜其為陰德甚著記而傳焉以示吾邑人子孫使无忘侯德不亦可乎余嘉其辭直且喜道侯善政乃比其事而書之曰至正十三年三月侯始至官即宣布朝廷恩德使民戶曉凡紀綱禁令悉復旧規選吏募民守要害人民翕然還業无復疑慮矣數日有使者至勸民入粟實軍儲侯言盜賊兵火之余民甫安集不宜遽有科擾使者怒以語侵侯且潛之於其長侯即移文愿解職事明日使者果至禍叵測侯毅然上道曰得一言而死足矣既而主將察侯无罪第以不當辭職加誚让而已還縣會府帖下錄諸從事者家侯曰詔書已釋罪錄其家非德意吏言始官軍至時給民印号以明歸正邑民不至者數十家當籍侯曰此等或轉徙他郡或避寇遠山未還或方從軍效用何遽論為盜親治文书上之皆得免又有命徵郡邑大家城郡治侯力言小縣瘡傷後不堪重役往返數四卒得請郡將捕叛卒之匿民間者大索境中比屋惶惑侯出令民无得輒動日與將居處親其鞫問不得妄有稱引民恃以安守疆卒言宣之太平縣一巡檢從百余人突入境中不可止民駭之侯請主簿將民丁護歸邑中毋令扰民比至問所以來乃太平被盜時縣失其印以盜始從黟來欲執黟民牛李二人去問印所在侯謂巡檢曰公從二人者求縣印当即其家索之不必以其人去乃與巡檢至李氏居坐門外遣卒入索印无有再命索之无有又命索之巡檢辭固遣卒入印終不可得至牛氏居亦如之巡檢媿屈一旦引去從人有泄其情者曰太平人有惡於富人某某與其吏謀遣卒襲執牛李歸拷令妄稱縣印在某某家乃致死牛李獄中則被引者禍不可解而家破矣知計不行故去爾黟地壤沃一熟而飽三歲亂後畊稼失時溝渠壅底北門竭之渠經邑中曰槐溝積穞填荒尤甚侯按圖考問差次其役疏浚有方咸復其旧縣第七都為浮梁祁門走郡官道郡盜反復以來里无居人田皆荒穞不治侯按視其地嘆曰今茲艰食而田復不畊則失业者无還期矣乃下令遠近之民有能畊吾廢田者比秋成十分其入畊者取其六田主

收其四明日负耒耜至者数十人侯亲至田所勉励之无种者假之不十日境内荒田皆蒔矣前此侯尝禁邑中廩穀毋得柴入他境人以为非至六七月米斗值十余千黠人有饿者始服其远见第七都所耕荒田大稔民赖以活者千余家榷茶使者治休寧吏卒出入旁午求茶商短长以怵吏民其来久矣守疆卒报有茶司吏止茶商境上责赋吏去而商与茶在侯使问商曰私茶以两计汝惮称量则毋入吾境俄有报巡茶卒十余辈先後至者商计穷引避谷中焚茶而去卒至县诟吏胥索食饮侯视其行橐曰此辈得毋侵掠吾民耶设有言者我必以法治之卒闻大惧求茶商不可得潜散去各以所掠还民家而遁自是私茶不复入境吏卒亦罕来矣县小吏沈甲与民李丙家争磨石私遣尉卒索之居十日丙男妇死李乙言妇有孕尉卒暴之致死事由沈甲侯曰与人争磨石不言官私使尉卒卒不稟尉而往皆有罪即收繫之谓乙曰汝言妇由卒死惟验乃辨设验不实则汝罪亦不轻也吾视汝特怨沈与卒欲以人命破其家尔乙不服侯问妇有他亲属乎乙言有母兄在即并收乙呼问其母兄女死果有冤当验耶皆曰女病笃非有侵暴事不忍从验也乃从之释乙而论吏卒如法其听讼谨审多类此黠地陋号大家不过三四官吏远来常恐失其意於是举一县事惟所欲为而细民告病矣郡邑甫定吏每持豪民陷贼事民得以财自解则所负挟无异平时侯知盗所从起无深恶於其民临政明辨而遣决刚毅大家者不敢尝以私服役公庭唯谨小大相安而邑无事矣公退杜门自奉甚约至不可堪有愠见者亦弗恤也凡皆黠人之言如此侯以发阴私不畏强御为怨家所倾然事本末吏牒具存虽巧诋莫能文致不过直以非罪之而已是故黠人尤惜之欲来者之不能忘而公论之遂不泯也是有假於余言焉汭闻迩岁廷议以盗贼滋蔓由守令非才有旨牧守得不次试用称职者满岁为真尝切叹曰起一世人才共成治安之业事无急於斯者圣天子忧民至深至切顾方伯连帅举措何如耳侯才识通练尤长治剧以诸生为府吏历茶盐漕所至举法除弊卓卓有声为书论浙盐积滞究其橐害甚详大要以三岁一住煎为说尝恤为吏者无所师法述临民出政之方五十条以授初仕者从军策画多中以功擢用其素所树立欲自表见於当世故为令期月具有成绩乃卒与冗官俱罢又遭摧抑如此诚远近所共叹也为之记不惟以慰邑人之思庶几在上者知艰难中为朝廷牧养小民有若侯之用心诚为难得而公卿大夫有意乎兴贤育材以报国家於无疆者亦将有感於斯焉

月潭八景记

由屯溪溯流西南入张公山二百里尽浙江之源水皆自高注下湍流峻急滩浅者可揭也当山水奇会处辄汇为蛟龙窟宅自浮游至龙深以潭名且十数而月潭最奇潭上两山相揖如牛饮於溪其鼻皆巨石夹溪对峙如门其南有山合诸小水来会离立参拱故潭形正圆其深不可测也每春夏溪流大涨束於石门涌而复坠则震荡回湑声振天地势摧山岳水之所入深若归壑虚汨之所出旋如车轮使人目眩心掉不可端视其水落波平则浅深一碧莹彻无瑕鸟飞鱼跃於溪光山色间皆悠然自适夹溪多白沙翠竹贩舟鱼艇往来其间如画图然而雪天尤为清絕此月潭之大都也朱君伯初父世居潭上心独有乐於是乃阁其南曰临清亭其北涯曰观澜造小舟置笔床茶竈其中曰钓雪其取於是潭者备矣其於游观之乐至吴潭之北曰平林竹树蒙密有隐君子居之平林东五里有古丛林曰星洲寺每与客舫舟其下意适则澹然忘归南七里有顔公山相传昔有隐者於此仙去君暇则杖屨独游游辄数日而还盖君之所好乐者如此而廓然无累於其中又如此是故其神不劳其形不衰优游无为若将

终其身而不厌也於是好事者即潭之景物曰月潭曰石门曰临清阁曰观澜亭曰钓雪舟曰平林小隐曰星洲寺曰顏公山为诗凡八咏以贐君而属沔记之沔盖未之暇也至正十七年夏五月始来游於潭上而切有感焉时郡邑洊经兵火水村山郭名乡甲第高台别墅凡昔之以纷华盛丽相夸诩者莫不化为丘墟瓦砾荒田野草则人与物之变灭相寻者多矣惟君与是八景者俱无恙也然则君之不以此易彼也宜哉吾闻之智士无思虑之变则不乐察士无凌淬之辨则不乐钱财不积则贪者忧权势不亢则夸者悲皆囿於物者也岂惟囿哉舟已败矣而乘风破浪者方新车已覆矣而夙驾疾驱者未已乃若有物使之然然则世之人终不以彼而易此宜也盖於是重有感焉遂为之记使後之人知月潭八景之显於时实自君始

橘隐堂记

朱君广仲父筑室於溪流之上环舍前後皆种嘉橘题其堂曰橘隐曰与乡之老人徜徉其中以奕棋饮酒赋诗自娱盖有慕夫古者商山四皓东园角里之伦也客有谓君曰昔秦为无道海内思乱故此四人者避而去焉高祖龙兴羣雄景附高此四人者之行而求之数岁不得卒为吕后太子以卑辞厚币致之於是四人者皆老矣观其对高祖之辞甚陋且堕张子房计中而不悟者虽一时徼安刘之名其道不足称也今君日以种树为乐视世之荣枯得失废兴成败漠然不入於胸中又何羨乎四老人者而比擬之耶君喟然叹曰若是乎子之论人所谓终无已者夫秦失其鹿刘季与一二刀笔吏羣椎埋屠狗【樊哙】吹箫【周勃】贩缯【灌婴】之徒相与犄而逐之不可以儒说也彼诚知儒者迂阔於事情设有以儒见者辄慢骂解其冠溺焉叔孙通挟礼乐之说惴惴焉在鯁生竖儒间缩项吐舌不敢出一语急取故羣盗大猾荐之其不为陈涉之孔鲋项羽之韩生者几何是宜此四人者远避而不为出也迨天下既一上乃欲以爱易太子在朝之臣举无能回上意者而张留侯陈户牖之术至是亦穷矣此四老人者一出而国本定汉祚遂安既乃飘然去之不知所终则非有所利而为之亦明矣而子犹有疑於其出处去就之间乎今吾幸不为世所知惟戒家人子孙异时有橘实大如四五石瓮盎者慎勿摘也吾得深根固蒂於是足矣客笑曰若是则子过此四人者远矣遂书之以为堂记

松云轩记

星源郡邑东北有川曰龙潭龙潭之上为鸿村山水奇会处汪君仲鲁既葬其母夫人於此又筑室墓傍以居室外构隙宇宇间函丈宾友之接燕闲之处皆在其中扁曰松云轩或者疑之则曰君蚤以进士举世皆谓公誉可立致中遭乱亡避地无所提卒数十立保伍塞亭隧左右吾风餐雨宿不倦乡人赖之虽擢居州牧犹谓不足为君报今一旦退居山泽与林翁野叟折旋斗室间非人之情沿龙潭而下两山壁立如丹艘之呈一溪曲折其间宜小舟卧游循鸿村而上千崖献奇万谷汇碧泉石之怪谲林木之靚深可以娱心神悦耳目者多矣乃独寓意於松云是皆有未易解者客或晓之曰士之所以出处进退者非富贵功名游观闲逸之谓也然或志不足以自强才不足以自固而出处进退之间未能超然无累於中则变故之来能不摧折溃败鲜矣尚何富贵功名游观闲逸之可言哉今君当覆邦万方舟流靡届之时能与乡里宗族同其忧患而夷险一致人无间言松之独贯四时不改柯易叶庶或似之其用舍以时

去就不胶则云之无心出处亦靡间焉人见其偃然一轩中日观夫二物者蓊蔚葱蒨淡荡冲融倏往忽来合散无迹而不知其心有独感神有冥契则虽无是轩与二物者可也又何必穷极穹显搜抉奇奥然後为得意哉夫辋川之景物胜絶一时而後凋之节可媿平泉之草木累于貽厥而无心之道罔闻是皆高人达士之通弊也又何疑於一轩之易足乎疑者不复能诘他日余过君鸿村庶得其说及与君相见是轩中俯仰终日竟不见所谓松云者而君淡然自得亦无异举进士时乃喟然太息以客为知言遂记其说於轩中而去

东山存稿卷三

卷四

●钦定四库全书

东山存稿卷四

（元）赵汭撰

○文

方山楼记

吾州在万山间饮食起居无不与山接惟浙江之上游率水出焉酈道元水经注所谓率东者川平山开洲渚隐见烟云蔼杳有江湖之思两涯多穷林密竹垣屋靚深前直孔道舟车所辘行旅所趋日用百需不求而至居人皆有以自乐与他里不侔中更丧乱荡为丘墟而荒郊断岸衰草寒烟四顾寂然江山不可复识矣程静翁世居北涯之上迺絶大溪而南作重屋两山间以居屋前有山端重若屏顾而乐之因题曰方山楼楼距故居不数里右阻大溪左挟邃谷长松钜杉参错掩映四方宾客往来之士风飡露宿之余登楼而赋者皆徘徊而不能去壬寅之春余还自郡城道过率东泛览溪山有感於今昔之异呼舟叩门访君登楼少憩亦喜其能择胜而自适也为之叹息不已君曰不然吾岂乐乎是哉夫人之嗜慾无穷而生业广陋有限以有限给无穷是以利害交乎外而好恶取舍战乎中虽有林泉之美耳目之娱其心焦然常若不可以终日我则不然筑室足以居妻孥供祭祀而已不必有余推此类也则名誉不必矜恩雠不必快子孙孙子不知何人之计不必豫为之忧是以吾心休休焉无往不乐不待林泉之美耳目之娱而後为适也余曰善哉信如君言居室可益也不能必其身之安田畴可广也不能必其子孙之能守恩雠可快名誉可矜而不能无失意之时激昂青云得志富贵而已有议其後者矣昔人有藏舟於壑者以为莫能夺也然而夜半有力者负之而去今君之自处者如此虽有大力其如君何道经率东而有感於江山风景之不同者登君之楼而获闻斯言亦可以悠然而自释矣不亦善夫遂书之以以为方山楼记

云麓书隐记

鄂州蒲圻县南有叠秀山山之壮丽吾邑主簿何君故居在焉始何君去其乡数载桑梓之念已切於中有所谓图叠秀云林之胜使时自览观以自释者因题曰云麓书隐以见其志云既归大邦遂佐兹邑每与人言之不忘且俾汭为之记汭闻而叹曰嗟乎君何以隐为哉吾精神敝於乐饵寒暑迁於床箦饮食起居动静百为一切易其常度盖滨於危亡者屡矣唯如是君子以隐疑之故虽病之至於斯极而有不察也呜呼岂犹有待而後信耶夫隐之能为不祥若是而君又何取焉吾观君以文学从政兢兢畏慎不敢少越绳尺而亦不为崖异以徼名屡董重役未尝以鞭朴示威而吏不能欺事无不集触风雨犯寒暑出入颺颺■〈犋〉之区与从御同甘苦或不为上官所察未尝迁怒於民其居官任职超乎流俗有如此者乃欲一旦飘

然与世相忘恐不可得又况一室萧然簞瓢屡空有愠见者弗暇恤也则虽欲千里西还为隐居计事亦恐未易遂意君徒有所激而为是言或姑以寓其意焉耳故不暇深叩君所以然者而论着之无何君复以书来言曰吾先世蜀资中人也宋末曾大父第进士官于广而蜀已残於兵乃留家於鄂自吾祖吾父以及於吾家於是者四世矣俄而逃难骇散吾宗奕世之祀不絕如綫今子孙存者唯吾一人而已况先人敝庐久为荆棘之墟丘墓所在又皆狐兔之藪不孝之罪尚忍言耶倘旦暮得代去且当号於当道君子以图归省结茅茨修坟墓力耕以供祭祀暇则求父书而伏读之庶几克遂其初志而旷官速谤亏体辱亲之罪亦可免矣此君之自叙云耳然则士之志於隐者非得已也而世之君子偶然若不察其情曷不以何君之事观之乎传曰学士大夫则知尊祖矣尊祖故敬宗敬宗故收族又曰其所厚者薄而其所薄者厚未之有也况君家自穀斋见山至龙冈先生三世鳌极有转移而科名相踵不絕诗书礼义之泽非他族比也雨露春秋之感精神翰墨所存委诸草莽而不图其可乎哉然则君之彷徨西顾而不忘乎云麓之下者夫岂有所激而然哉昔者蜀郡虞公家於江右者再世矣尝与人言蜀被兵时故家大族狼狽奔走流寓东南而蜀之君子官於中朝若郡县者皆不复能归若某姓某公子孙今在某郡仅有某人未尝不为之感叹焉时九江有黄楚望先生其先亦资中人为公所留念者盖公惓惓桑梓之义未尝以疎远而有遗类如此况乎何君以孑然千里之身独承家世之远乎余察君之意苟得伸其情事区区穷达得失利害之间若有不足计者然後知余所以量君者浅也虽然又尝闻之士之所以自立者才与志也昔者孔子之门有千乘之国可使治其赋者矣有百乘之家可使为之宰者矣圣人皆不使之处以枉其才至闻漆雕开之言则喜闻子路使子羔为费宰则怒夫二子者居一官效一职岂由求之比哉而志之所存者弗获信则有遗恨矣故圣人皆不使之仕以违其志後之有国家者措诸行事未必一一皆合於圣人至於简才贤以成治功獎恬退以励风俗亦未有偏废者也然则何君之志其有不遂者乎故为之记以俟

云山庵记

出邑西门涉两溪而南郊原衍迤冈壠回复烟云竹树间有屋数楹负岩石而面隈曲曰云山庵者寓上人宇内立锡之所也上人以疾病为道场以汤液作佛事救疗一切患苦无二无别不蓄古方书每因症为剂君一臣二佐後使先如龠透簃如矢破的衆医所不疗者辄起之其以为可治未尝一失是以远近数十里间请其药者十室而九以疾求视者踵相接於途日与人药多至不可计未尝记主名即有不能报他日复请应之无倦色诸以粟米金帛食饮瓜果来馈谢者无多寡咸欢喜受之如获檀施上人以粟米饮食瓜果饲徒属欸宾客以金帛益市善药辅其术以应人之求出其所资沛然不穷乃积其赢余作此庵供养观音大士置田若干亩择其徒之谨愿者付之使耕且食而职香火焉尝谓余曰浮图号出世法而不能不在人间故世尝以不耕而食病之吾观世人以阴阳方技食於人者衆矣求其有功而不可以伪售虽食焉而无愧於吾教者惟医其庶乎此吾所以既不敢安居以食而欲必从事於斯也然既假是以救疾苦以报佛恩且自给焉而不精其术则去为奇衺者几何此吾所以遇有疾必尽吾心而不暇计其报施之有无也虽然吾道既行吾愿已得矣而焚修之地弛於妄庸见堕豪夺使奉吾教者疑且怠焉不可也请为我书之石庶後來有倣其可乎余曰可哉师抚之金谿人幼失父母十三出家十六为僧策元寺始学医其师曰僧允中在策元尝一新其寺游潜山建

观音堂於市来者如归辛卯之变始至休寧丁酉秋乃克作庵於兹地其志愿所发观乎其言可见积久充周至不可为限量报缘所及必将大有震耀於方来而况是庵乎然则庵之永久亦且师一念中耳又岂他人能为废兴也哉乃为记其始末如此凡田土物色处所勒於碑阴

栢轩记

郑之恒侨居黟水之南乌聊之北题其隙宇曰栢轩其言曰栢不材木也无所可用是以能终其天年吾闻之庄生云居无何大夫士为诗文以释其名轩之义者甚衆言人人殊郑之恒不恠以其间日之黎阳山中见支离无谓而问焉曰吾以栢名轩而人鲜能喻吾志者言之辄异何也支离无谓曰子无惑乎人言之异也世之所重者材也而子独以不材称材之所贵者用也而子独以无用全子无惑乎人言之异也虽然生之有壽夭岂材不材之谓哉深山之梗枿豫章閱千百年未有过而问者道旁之樗栢未拱把而伐於斧斤其所托者不同也夫栢之不材犹樗也栢以社而存犹樗之以神也然社有变置而举或废之则樗与栢岂能自全邪谓不材之木独能终其天年非庄氏意也彼庄子者悲夫世俗之士以材为累不若不材者之无用也故为是不得已之言又悲夫不材者亦有时而不得免也将自处於材不材之间然材不材之间似是而非犹未免乎累也则夫可以害生者岂惟材哉邦君之於国也圣哲之於名也皆累也彼且欲鲁侯洒心去欲而游於无人之野使仲尼辞交游去弟子而逃於大泽其忧患乎一世者岂有涯哉嗟夫乱世多害智愚贤不肖俱困而莫知除其忧此夫人所深悲而非为一己之私也子之以不材自处岂其意耶曰然则庄氏昔所谓者非耶支离无谓曰庄子固尝言之矣其所保者与衆异也且子亦尝闻所谓物之初者乎游於物之初则不物於物不物於物者益之而不加益损之而不加损天地蘧庐也古今一息也死生旦夜也虎兕无所措其爪角兵无所容其刃无伤於物而物亦莫能伤也是岂材不材之论哉虽然为栢有道即子之居行子之志使董梧无所用其助而舍者争席则材与不材皆不足为子累矣又何恤乎人之言郑之恒矍然而起释然而悟曰善哉进於道矣虽然吾於栢有取焉请书是说於轩中以为记

顏公山重造全真庵记

顏公山全真庵事载宋郢州守郡人罗公颂所为碑石毁而文仅传二百年来庵新作者三无为记之者岁癸巳僧惟忠乃因眷家朱君请书其事於石余谓兹山在邑南五十里外而环邑中无远近举首即见之其高出衆山之上固不待言惟旧志言山以顏公隐居得名而不言公为何如人迨僧慧圆则像设如圣僧大士矣山故有龙池二求雨者必先祷於公而後请水于池衆奉水至其乡则雨随而注其灵应之迹今昔无二而碑不言庵所从始毗有为菑谷中者得古佛像高数寸盖范金所为僧虔奉於顏公神室中自是求雨者必请得金像与水俱尤称灵异而碑不及其事又志言池濶五亩罗公谓今二池各不过寻丈疑後人湮之若是者皆无所徵暇日当从君登山一览胜槩以释所疑然後为之记未晚也既而君屡以登山约余以衰病久弗克行甲辰秋七月几望访君义门故居夜同宿顏溪僧舍旦日缘陇直上十五里得全真庵後直危峰峰中引而下为小阜其左蜿蜒前抱右断处直下为壑有堤塞其断高二丈余二池在堤内当庵前右庵所直峰名高湖峰为山絶顶後倚古郎山乃星源巨嶂其两端之陇并出而内拱者盘据复余里视境内诸大山行而不上分而不完者特异古所谓山川百源能

云雨天子将大雩上帝必先命有司祈祀者非兹山之祷欤世变礼失凡名山有神灵者皆以佛老子之祠当之其像顏公如古圣僧而又重以金佛事无足疑者是山之能出云雨以济生人而靡间於治乱安危固自若也山高而支巖下故防山以内蔽使无是堤则水潦下泻如建瓴而又安取池五亩哉或言高湖峰疑以昔人堤水为池得名今遇霖雨弥月水皆入二池而涵山中人方以为异则谓後或湮之亦未有以证其必然既山之神灵有在则凡若此者姑置勿论可也乃为考其本末而为之记曰始开山奉顏公祠者僧如昇其岁月不可知矣重作庵者慧圆则宋建炎庚戌之岁也名其庵曰全真且为书扁者金部高邮吴公并今之请文於罗公则知惠州邑人朱公权也宝佑丁巳庵毀於火碑碣皆灼坏而金像与顏公俨然独存募衆力创梵殿庀钟楼如式者僧道穹也庵无田以膳衆僧徒应供者以出入为艰廼即顏溪土地神祠为别庵居之以便请召自是上方非祷祀不至而屋室有坏者矣大德丁酉有从僧淨贵之请舍田倡衆食淨人以职焚修且刻之石者里人杭州路人匠提举朱君震贤首为淨人者程普应也至正丁卯悉撤其敝而新之者僧良辰淨人俞道坚俞道美也钟楼旧在庵前危峰上後又建於其左皆凭虚下瞰数百寻以不利於久廼作於前峰蜿蜒中其岁复为丁酉而创重屋五间於殿後以为斋堂则前邑令吴君遵也盖庵之規制至是略备矣高湖峰两腋泉会於山麓是为顏溪土壤沃而菑害鲜其族居於溪上者巴余汪三家世修祀事以答灵贖而惟忠巴氏子也上距如昇传代二十有一今淨人吴普壽本洪都建昌卢氏子以勤谨称山高苦寒云雾所蒸衣服器用常湿润屋善敝势不及百年其人非朴实而坚苦者亦不能久居也而惟忠之徒曰印宣者将以己资买田庵中而反於是山老焉乃并为书之朱君名复於提举为从子云

听雨轩记

韩君仲廉尝治一室书册几杖凡百日用之需具在兄弟二人同处其中自为师友以为人间之乐未有加於此者适秋夜大风雨作相视翛然有感於眉山三苏公京师驿舍之约题其室曰听雨轩其後稍出游江淮见武威余公而告之余公为篆书听雨轩三大字归而揭诸楣间造其室者莫不油然增手足之爱焉中更乱亡井邑为墟季子之不幸蚤世而余公书独存仲廉即其寓舍重辟一轩仍旧扁以寄其幽思且使泐记之泐以病废笔砚久矣而仲廉每相见辄以为言念终不可无一辞以释其意者乃告之曰昔者二苏公之大科举也其君为仁祖其相为韩忠献公以二人荐者欧阳公而其进退者司马君实范景仁诸君子也盖自三代以下未有盛於斯时者二公者起西南数千里外明天子贤宰相将皆以宰辅储之区区小有得失何足深计而乃忧别离之不免慨功名之难期於韦苏州之诗遽有感焉何与夫苏州之示二季特其适然之辞尔而公以为终身之戚每遇离合感慨必形於言又何欤传曰未及而忧忧必及之彭城之漂泊黄筠雷儋之相寻固已兆於斯矣今君兄弟幼同学长俱有志於四方千里之涂未发轫也而又姑取昔人感慨之无已者以名其轩居虽曰天伦之乐存乎寂寥澹泊之中有非他人所能知者而亦岂可谓之适然也哉虽然未及为忧与忧而弗释君子皆弗与也故子由彭城所赋读者凄惨而长公亟思有以解之然长公既谓子由自少旷达天资近道矣而犹必以退休相从日长为辞则其未达者犹在也吾观仲廉冲然其如寄陶然其若忘於旷达而近道盖庶几焉况乎进退存亡处之有素方之二公其海崖之後乎轩名虽旧而其人所存则已进於道者矣故卜子夏之告司马氏者不复以云

知本堂记

宗法之废久矣近代盛时虽号为世家大族者其子孙往往散越无以相维与凡民等而况於衰乱之世乎可叹也已传曰人道亲亲也亲亲故尊祖尊祖故敬宗敬宗故收族此宗法所由立也苟人道不明而尊祖之义阙则虽有世家大族而穷祸患害不能相收亦何足异哉故曰鸟兽则知有母而已庶人则知有父矣若夫学士大夫则知尊祖矣今兄弟虽或异母其与己同出於父则一也而世或以同产为加亲是知有母而不知有父也亲兄弟与族人之为兄弟者虽有戚疏其与己同出於祖则一也然亲兄弟则知爱之族人之为兄弟者则不知爱也是知有父而不知有祖也知识且不足以及其祖父於族人何有焉是故贵不与贱齿富不与贫叙争夺之端多於异姓忮忍之害憚於他人岂惟不能收也哉然则尊祖之义固不可论於凡民也呜呼其亦可哀也夫若夫有志之士因其所可为以为其所得为使亲亲之道复明而为尊祖敬宗兴行於一家以达乎一乡一国是固学士大夫之用心也同郡汪侯仲玉早岁尝有志於斯中遭多难虽军务填委未尝一日而忘乃即星源大畈田中创重屋为楹间者五其上通三间以为室奉始得姓之祖神主中居及初渡江者及始来居大畈者而昭穆序列左右者十有□世又为庙於屋南像其祖之有封爵在祀典者配以其子孙之有功德者四人重屋之下有堂有斋舍延师其中聚族人子弟而教之庙有庀有门时享月荐买田以给凡费者若干亩合而名曰知本堂以族人之属尊而年长者主祀事焉别为专祠於大畈西浯村先人故居曰永思堂祀高祖而下四世其田与祭则继高祖者主之焉盖知本者以明大宗之事而永思则小宗之遗意也夫宗法之不能复古自今世以来病之侯之意盖欲因四时之享以寓合族之义使其族人之登斯堂者思世家之远如彼而有功德者之盛又如此则必不肯一日自同於凡民子弟之学於是者晨夕瞻敬知千百人之身本同出一人则亲亲之念藹然自生必将力求所以无负於先王之教者矣呜呼若侯为此者岂非学士大夫之志也哉自祸乱以来所在大家殲夷不能相保何可胜数大畈之族以侯力独完又作斯堂以尊祖敬宗教示将来其所以遗夫族人子孙者可谓远矣故为书之侯名同始得姓者鲁成公子讳汪父名尝食采颍川初渡江者汉龙骧将军讳文和始居大畈者讳中元有封爵而在祀典者唐越国公国朝封昭忠广仁武烈灵显王配食者团练使积官御史大夫讳瀆神号端公中元其仲子也曰顺义军使检校司空讳武皆以靖寇扞患有功曰宋西京文学四友先生讳存有经学行义曰端明殿学士招讨制置使立信以忠节显皆其谱实云

休寧监邑坊公闵雨记

春秋鲁君有以闵雨得书者君子曰其有志乎民也闵雨则其有志乎民何闵雨而雨也闵雨而雨则不闵雨者为无志乎民罪也以无志乎民者为罪之在则闵雨者之有志乎民不可不书也若坊公彦翬之为休寧者其知春秋闵雨之义已乎曰若坊公可谓能闵雨者矣公之闵雨奈何公在官之明年雨不违时野无惰农苗以美矣俄雨环休寧之邑四郊同日大水漂禾稼荡民居室不可胜言也而邑之言则曰大涝之後无丰年既而果弥月不雨苗将槁矣公惻然忧之若锋刃之在己也亦既率僚吏行祷羣祀暨名山大川于社于门矣而不雨既又召佛者老者方技者各使以其法求焉而又不雨则旱甚矣於是民嗟以怨而公不怨也巫穷以怠而公不怠也昼曝於野霄露於庭不知其病也乃斋宿走祠所再拜稽首兴手瓣香跽而祷之

曰以蒙从政於茲而岁不雨蒙不足托於士民之上矣今旱日甚殆不可生是天絕之也民无罪而天絕之吏有罪也请以絕民者移诸吏言讫泪缘睫又再拜稽首退而屏处却食期必得雨乃以厥明日雨於南郊又明日大霈於邑西雷电昼冥四合齐注於是槁者苏秀者实岁不凶矣若坊公可谓有志乎民矣然则他邑亦有闵雨者乎曰有则何以不见称於君子其闵雨非闵雨也事至而後为之者也他邑早则民叫无辜於天而吏弗闻也乃蠡集於公堂噪而假粟焉吏为发廩以賑之而後定则其闵雨者非也事至而後为之者也夫民易动而难定也易使而难悦也是故善保者必慎其几焉若他邑之民上者亦殆矣古者三年耕必有一年之食则坊公独非事至而後为之者欤曰公为政期岁矣不得责三年於是也其为政奈何民之情伪无或隐也然不恃以为明狱之大小无不察也然不倚以立威吏民之欲求宠於公者苟假其一嚔一笑斯足逞矣而公不与谗谀诋诮之辞不至於耳苞苴请托之问不至於户豪举武断欺负之徒不行境中於是闵雨而雨焉则亦异乎他邑之在民上者矣君子曰若坊公之有志乎民者不可不书也是故笔其辞附诸春秋闵雨之义以俟夫通四方之志者取焉

九思堂记

九思堂者高昌仲礼公闲居之所也至正十一年冬公泄两浙盐政命前所治邑休寧诸生赵沔为文以记之沔闻诸君子一言而可以决天理人欲之几者曰思而已然或昧其当务则刚者健决而失中柔者纏绕而无断去夫不思而蹈於恶者不远矣故吾夫子之教欲人即身心日用以慎夫所宜思其目虽九而思则一夫曰视曰听曰色曰貌曰言曰事六者皆人之所以交於物也曰疑曰忿曰得三者又交物之所不能无者人惟忽而不察与夫思之不以道也是以欲动情胜而蹈於一偏设有觉焉而天君内正以念其所当然则必明必聪而是非不壅於闻见必温必恭而惰慢不摄於身体必忠必敬而悔尤不见於言行以至於疑不滋惑忿不忘身取不伤廉而动无不当矣故思者所以遏人欲而存天理之防也详其目则接於外者有恒一其心则主於中者不二譬如明镜在室上下四旁靡不照而岂有一偏之失罔断之疑哉自古圣贤所示修身为政之要莫切於此公能取之以名其堂信乎知所先务者矣然沔观公之治休寧也不姑息以为寬而民怀其惠不任刑以为猛而民畏其威不避嫌以为刻而民信其廉既去而复相与立石颂焉字刊而重刻比沦於水又出而树之愈久而愈不能忘为御史弹核无所顾虑言既不行退居於家者八年未尝以一辞通贵人亲戚在水监行视河患不避险艰及当兴重役则喟然叹曰大禹圣人亦行其所无事而已夫以公之见诸行事如此则存诸念虑者正矣其於夫子之言所谓非苟知之亦允蹈之者欤近世论大夫者咸观其取舍以为得失然公尝谓沔曰凡人材性长短皆得於天至於义利取舍则为之在我又何难耶盖非见善明而用心刚不足以与此岂崇猜集忌以察为明者可同日道哉公之祖哈喇托音监战公以万夫长与御史丞相同树勲绩考呼图克布哈公仕止镇江监郡有贤声而公以胄子入官其世家之泽远矣因名堂之义以进其德而伟然自立於一时也宜哉

休寧县达噜噶齐巴侯武功记

国家既一南北极天所覆罔不顺承数十年来郡邑之间丰乐暇豫相安於无虞以为治盖昇平之日久矣乃昔盜起淮蔡羣偷相挺以逋天诛而蕲黄无赖之民始蠭出为之外应大江而

南要郡紧县皆震动摧陷转相寇贼则亦渐靡之极也哉徽州治山谷间一旦闻警守弃其民将委要害居人仓卒亡匿市井为空盗乘虚纵入郡邑以焚荡屠洗脇民出藏货为兵民不胜愤相率奋起图之事不效举义者咸死焉而盗益恣睢长驱四出无顾虑矣时不闻官府之令已三月王师自严之淳安乘胜独克日战歙南境中得陷贼农畝辄释不杀使归告父兄子弟无轻从盗官军至矣郡人藉以少安实江浙行省宣使巴侯之兵也又两月行省兵始复徽州侯从元帅沙布鼎公抚定休寧以达噜噶齐官治其民其後盗去而复来者一再行省兵亦再克定皆仍侯休寧先时军士遂所复新陷州县辄用入贼境法而交午之使一切以军兴草芥其民侯左支右吾寧以身任怨而不忍重伤遗民於疮痍之後故休寧之民德侯独深既取侯制胜之迹绘为图以观之又请记侯武功以文着其岁月以传邦人子孙於永久焉侯名巴特玛实哩字某高昌人世居河西为贵宦家早游京师以材勇闻至正十二年春盗始侵掠浙江郡县行省臣用荐者言以侯为其省宣使募兵严婺间得壮士数百人还报受命济师徽州时徽州已陷盗犯严之淳安行省平章伊噜公亲视师浙西宪臣来督战贼屡北师进侯以所募士为前锋贼乘高下石伤侯善马侯与壮士隐身负崖聚足而度大呼出其後奋擊走之行登贼所据云头塔山坏其石寨焚庐舍二十余处视地形势还见省宪白之六月初二日也十五日进焚邑人为贼将者方请之所据道观得贼六人冶工二人弓矢刀枪甚衆十七日至第七都与贼衆大战得贼十余人明日进徽州歙县之街口二十日焚邑人为贼将者余高居室执其家人子弟付吏二十六日至深渡斩首二级二十九日战於郡东三十里大佛杀贼甚衆是日复还街口时贼将项奴儿自蕲黄来率衆急攻杭州其骁将拒王师自南来者歙南请相地形便导官军置营以乡人助战侯以省臣命帅兵赴之邑人争负米取间道饷焉七月初六日追盗孙村斩首三十级明日复与贼战败之初六日贼据叶干山险阻以待侯仰射者皆坠死破其阵得贼三人十三日贼五千人阵於逢村既战射贼将二人堕马获之追至岑山渡而还十六日得贼将一人追至逢村擒杀甚衆生降一百九十二人喻以恩德纵还其乡十九日与贼遇上村贼溃二十三日追至烟村贼以舟渡驰马射之坠水死者三千余人二十五日战歙浦岭下贼可万人陷阵夺其大红旗二午还余岸贼大至与千户布延呼鲁百户苏世杰俱力战杀贼甚衆所射三十余人皆殪之贼纵围官军侯与二将疾射得脱时犯会府者皆自溃而还始陷徽州大掠金帛去者云南康人也至是复来羣盗十余万萃於徽州复分寇诸路俄而行省平章薨於师侯与诸将退保淳安盗复进据云头塔山浙西佥事与行省参政亲勒兵侯仍以前锋破其塔山砦射杀贼二人八月二十八日也自是并日追贼以九月初三日复至深渡初八日以省臣命次兹村循进与大军犄角得贼二人十八日行省兵大破贼元帅沙布鼎射伪万户之据徽州者殪之二十四日以省臣命引兵归其大军明日战贼徽州城外先陷阵多斩获贼奔祁门其攻宣州者亦溃而还郡既复行省臣承制具官故侯有休寧之命十月初二日至休寧民皆还业侯囊弓坐槩旦暮巡警重法以戢军士之暴民诛恶少导贼残大家者二十三日贼复以衆至县西十里杨村侯先诸将跃马挥双长刀突阵出入排擊追奔二十余里擒获不可胜计扑耙者贼中利器以御刀槩一可当十贼畏侯善战每选精其技者以当侯是日有操扑耙大呼直趋者侯左刃按扑耙右刃劈其首贼徒属目皆失声遂大败之十一月十三日民有言项奴儿自广德陷常湖为大军所逼弃其衆迹来已入休寧境中者侯与邑义士分道遮捕斩首三十余级生得项奴儿及其将二人妇女二马四骡一银牌一伪符牒五别帅以兵下祁门未定遽分兵还黟盗一夕奄至师溃还休寧黎明侯闻贼至即彀弓上马迎战时大雾四塞咫尺不辨人马盗由邑西绕南门取东门同时大呼齐入我军无营栅帅与吏士

在邑之民皆遁焉侯单骑去盗数人追蹶且及侯回刃拟之盗不敢迫复徐去间道从省臣退保淳安始羣盗出祁门将散去会湖口剧盗以其衆来助故祸愈烈分掠休歙二邑境中同日皆遍杀人满山谷既多得财稍引去其前寇者皆为官兵所败十二月二十四日从省臣进复徽州与三万户之兵军休寧至正十三年正月十七日贼复大至官军战小却明日战邑西蓝渡杀伤相当贼来愈衆又明日遂薄邑治侯力战至暮溪桥坏舍马步鬪跳出重围者再夺贼所得我军名马以还天又大雪官军不利师退侯亦行募兵严之遂安会行省平章公以大军平芜湖广德移军撃贼淳安走之命侯与格尔千户蒙古军及赵万户军俱进次兹村烟村之地是月三十日会大兵定徽州三月初五日至休寧仍以达噜噶齐治其民自始受命募兵至是周一岁矣先是郡邑不时定士多亡失三易主将故侯功状未着然意无纖芥不满识者多知而村落间儿童妇女皆知其名矣夫当盗贼方张之时以新募数百之衆深入溪山据其胸腹而日与之战使郡人知官军有必至之期无敢轻於从贼他出之寇有所顾虑而奔溃以还又能抚循遗民俾休息伤残使疮痍易合则其所繫远矣岂独是邑之人於侯能不忘哉矧侯方妙年以忠勇絶伦之姿益广爱人之术异时建大功名取高爵显位为国家着得人之效将自兹始乎故为之记

商山书院学田记

新安自南迁後人物之多文学之盛称於天下当其时自井邑田野以至於远山深谷民居之处莫不有学有师有书史之藏其学所本则一以郡先师子朱子为归凡六经传注诸子百氏之书非经朱子论定者父兄不以为教子弟不以为学也是以朱子之学虽行天下而讲之熟说之详守之固则惟新安之士为然故四方谓东南邹鲁其成德达才之出为当世用者代有人焉然考其学所由则在宣政间婺源有汪公绍者始作四友堂於其乡以居四方学者其子存遂以明经教授学者称为四友先生一时名士若金公安节胡公伸辈皆出其门此吾郡义塾之始见也其後则有尚书锡山陈公之茂初尉休寧命乡举秀民为学官弟子而躬教之故休寧之学特盛岁大比与贡者至千人盖有自来矣迨夫世降日下文治既微俗亦少衰焉荐经祸乱自井邑田野以至於远山深谷民居之处莫不荡为丘墟学者逃难骇散未安其生又奚暇治诗书礼乐之事哉识者於此盖深忧之而郡别驾汪公义学之建田租之广所为惓惓者也公四友先生七世孙也其平居时尝欲推先世遗意创义塾以教乡人子弟多难未遑间虽从事军旅日不暇给而未尝少忘於中至正丙申岁既以义兵克定乡郡驻师休寧什伍其民使相守护郡邑盖少安焉重惟人亡礼失经残教弛莫甚於斯时作兴之机不可少缓也乃求溪山清邃之地得邑人吴氏遗趾於商山之南五里规创书院以为学者讲习之所其既廩之供则买於旁近得田二百余亩在黟者五十余亩命邑士黄权图其地形广狭识其物色处所岁入若干为籍以示久远而司其出纳其学舍造作土木工役之事始终钜细之相其成者皆属诸宗人周周亦四友之族也其庙学之制释奠之仪师弟子供亿之节教学之规一切皆使学者相时考礼以序为之公若无所豫焉公之所尤汲汲者在乎定厥居以收其人於散亡之余继之粟以续其食於族处之日使士得安身一志以从事於其所当为者而已於是周与黄权以告於邑人赵汭而请记其事汭闻而叹曰於乎斯文之兴丧天也世变极矣岂其遂泯絶於斯乎抑将有待於人乎夫有国家者化民成俗之方莫先於学而学之为道又非可以私意苟且而妄为之者矧新安之学本乎郡先师者父兄师友之授受犹或有传也其可一旦废

而不讲乎此固大夫君子之所宜尽心而凡民俗吏以为迂远而阔於事情者也今别驾公以刚明之姿承家世之远虽兼职军民令行郡邑而凡所以为妻妾之奉子孙之遗者漠然不动其心既建知本堂以膳其宗族而兴学育才之志不懈益虔盖如此其观夫兴衰之变存亡之故而审夫得失之机也明矣天其或者尚存斯文遗绪於东南则商山之学者必有光於四友之堂而汪氏为世有功於新安之士矣是岂非公之志哉乃为之记使刻诸石以勉夫在学之士而凡学田之物色处所岁入之数咸勒於碑陰

东山存稿卷四

卷五

●钦定四库全书

东山存稿卷五

（元）赵汭撰

○文

书东坡尺牋後

宋礼部尚书赠太师东坡苏公忠义贯日月名声塞宇宙盖千载一人也妙龄登高科思以文学经济如贾太傅陆宣公中岁偃蹇不偶始留心佛乘交友禅伯如白乐天柳子厚晚节播迁岭海遂欲陰学长年起然遐举如安期生梅子真此公平生学术三变见於手笔书疏者具有本末也若夫文章妙天下特其余事传周易尚书解论语亦博洽之及尔要非志气所存然公尝有言曰胶西多古君子使盖公真往来其间轼何足以见之与答陆子厚书所论黄高人之意适同噫内圣外王之道不明而豪杰之士不能忘情於方外者如此然则世人所求於公者殆其粃糠土苴至正己丑秋过倪氏黟川寓居敬书此於其所观东坡尺牋後

跋欧阳文忠公墨蹟後

欧阳文忠晚岁好习书意有所至辄形纸墨若今赵郡苏公所藏二帖是也宋翰林学士恩礼颇不及唐然於天下国家事无不得言则言语侍从论思献纳之职未尝废文忠犹以禁职不当外同百司欲渐修故事盖君子居是官则思尽其道如此使如太史公所谓文史星历主上尊礼不如公孙丞相者其肯一朝居乎且公在致和间为职事言可也治平初入政府熙寧补外矣犹纪閱録视眷眷不忘欲广其君之见闻而引之当道者夫岂以远近亲疎而有二哉时王荆公方得政职谓都俞之间有乐子无知之意盖与文忠用心正相反则尽排衆议独运化枢以至於败乃翁事亦何怪哉

跋东坡墨蹟後

大参苏公出示东坡墨蹟一卷前一帖玩其词意疑是元佑间未被谴之时与嘉父公尝有书与嘉父论春秋学甚详继闻其作春秋博士而喜者也次一帖过岭後书不知与何人後二诗在化州追写惠州所赋则行渡海矣按东坡以绍圣四年丁丑五月再贬儋耳时子由亦责海康相遇於滕同行至雷六月相别迟即子由长子侍行者二诗实当时所书也罗浮栖禅之游视丰乐桥钓鱼逍遥堂采杞无异与焚香默坐小室饱饭烂睡为垂老安逸皆是翁实语始翁过岭有云今日岭上行身世永相忘仙人抚我顶结发受长生盖已信死生祸福非人所为矣临印魏公独以要观南海窥衡湘为伤於大豪欠却敬天之威气象岂儒先君子所学不同执

德亦异邪虽然以垂老之年当转徙流离之际而浩然无毫发顾虑非此事素定於中者殆未易能

题三史目錄紀年後

作史之难尚矣司马迁班固纂其家学范晔欧宋润色成书皆历年之久而後克就其揽取该备固宜又汉唐惟吏治武功最盛是非易明然而王勃刘子玄辈搜讨摭拾其间犹未已也陈壽而降盖无几焉宋有天下三百年人材学术上媲成周论政议礼明道正学皆未易一言蔽其得失中间二三大贤欲以修於身者措诸当世稽古考文之士星罗林立抱遗经以求致用之方而故家世德衣冠文物与其国祚相终始表世系志艺文传儒林者亦或未之见也况理度世相近而典籍散亡辽金传代久而纪载残阙欲措诸辞而不失者亦难矣哉参政赵郡苏公早岁入胄监登禁林接诸老儒先生绪言最为有意斯事尝取三国史志文集总其编目於前而合其编年於後事之關於治乱存亡者则疏而间之题曰宋辽金三史目錄所以寓公正之准的肇纂修之权輿也後虽出入中外不克他有撰錄而所至访求遗文考论逸事未尝少忘近岁朝廷遣使行天下罗网放失大兴删述之事则宋辽金史皆成矣若夫合三书於一致以求治乱之原而不相矛盾极其贤人君子之心志以徵文献之盛而无所逸遗则由目錄紀年而广之岂无当论着者公其尚有意乎

题耕读堂卷後

余读耕读堂记於郡邑故家兴废之由窃有感焉异时豪杰特起之士奋自田里掇危科躋膺仕视功名富贵如持券取物皆读之功也而奚暇於耕迨其後裔蒙世德因遗业袭纨绮厌膏粱凡可以悦耳目娱心志者皆坐而有之则并忘其读矣栾郤狐续降在皂隸叔向所嗟贵游子弟转乎沟壑推之垂训古今一辙可为悲夫鲍氏之先以慈孝称其见於乡先生方公回程公文所纪述者太史氏已特笔书之其勤生缉学皆以积累驯至而无所愿乎其外子孙守之以家法焉是故伯原父当英妙之年即恬於进取筑室读书从师取友而不忘稼穡之事所以承家保世者深且远矣縉紳先生庄色而书之固宜岁戊戌余自邻郡还道哭郑先生所过名乡甲第皆荡为丘墟而耕读堂独岿然无恙时伯原父方家居父子自为师友翕然为乡里所称盖尝望而叹曰鲍氏慈孝之泽未艾也因尚絅寄示此卷辄书其後以明诸公为知言云

书赵郡苏公所藏经史遗事

後金章宗朝史官所得内送显宗为皇太子奏东宫阙官帖黄一纸命编入实录进士刘国枢记其父司经迎所闻皇太子嘉言暨诗文凡八条诗不錄翰林学士张行简起居注草藁起明昌六年正月朔止三月十五日後有张公题识及部数脱藁提空式今赵郡苏公通辑为一卷而藏之金至世宗南北战争甫定盖天所以靖斯人也皇太子简贤德职辅导其深知所以为天下本者乎及观国枢所记则於南面之术得之已多惜乎弗克嗣位而崩殂尔起居注记章宗言动甚详其礼仪国用除罢聘好可备参考所云礼部尚书张空其名为说直官重勘镐王狱者乃张公之父讳故下文书名字皆阙其右体新史言允中之狱成於宰相无将妄想之奏

朝臣惟曹利用乞貸其死而章宗不从則猶有未戾人心者時張公已罷兼職不及記覆治何狀不然尚書當時名士以說直舉豈得默默無一言耶張公自言以明昌三年閏二月兼記注凡歷三十九日而本傳不書百官志亦不言起居注嘗用學士兼則闕文多矣且當時左右有簪筆之臣纂修有實錄之篇史官不為虛設而典籍散失如此良可惜哉公家藏書万卷於遼金逸事宋代遺文猶拳拳收購不倦此其毫芒爾蓋有志述作者其平居暇日必如是而後可庶几也當朝廷修先代史一時文學之士莫不與能乃獨留公外藩論者每為惜之而沆竊以為不然者眉山公有云文字議論是非予奪難與人合甚於世事藉令公被命入書局果無昔人頭白汗青之誚而函承旨意敏於撰述有如今日之所就者乎沆所不能必也善乎資中黃先生之言曰制作之文上關天運非可以私意苟且傳會其間者然則網羅遺逸成一家言藏諸名山以俟後之君子將不在於公乎

書蘇奉使本末後

自帝王巡狩省方之禮廢後世人主尊居九重懼憂民一念無以自達下情或不得而上通也於是始遣使分行天下以問疾苦明黜陟為事所謂揭日月於久昏轰雷霆於重聵誠承平之曠典聖哲之宏規矣若乃委任隆重戒勅諄嚴由乎睿斷則未有若皇上至正五年明詔之盛者焉故輜軒未出國門而四方萬里至於海隅蒼生寒飢滯屈鰥寡孤独皆翹然有惠鮮之望矣是時江東西閩浙間官吏發百姓治道路張設赫奕如待神明使者所至持訴牒遮馬首號呼者千百余輩皆漫不加省不過即官署一布德音而去未知聖天子屬以何事乃漠然如是乎頗聞他道有掣持長吏發擿司寇者莫不稱快然民生多艱弊源非一苟咨詢謀度有所未至則興廢舉墜之方洗冤澤物之實果何如邪八年冬來錢塘於省掾葛元哲所得觀參政趙郡蘇公奉使京畿還朝所報公事綱目首詢民疾苦其事二百八十九次興廢除利病五十七禁革科擾四十九均平差役二十三平反冤獄一十六昭雪改正二十二追問贓污七十六責罰稽違七十一斷革凶冤惡三十六體察糾劾五审理罪囚九十七建白時政二十一勉勵學校三勸課農桑四而荐舉官吏一十四終焉所歷神州赤縣三十處罷斥官吏四百八十六人觀其後先可以知廉問之有序考其詳略可以見緩急之得宜大抵好惡重輕一因民情而已無所與非惟不能造端以求衅亦未嘗廢務以市恩也既又聞金憲楊公昼躬詰問夜稽案牘殫智竭慮所得悉在於此當時黎庶感悅稱為包待制優伶鼓舞方諸韓魏公則聖天子深仁厚澤固已宣布浹洽於邦畿之內矣夫以公之用心如此而亦與不稱旨者同得罷歸未審廟堂之論謂奉使當作何體此其意或有在非草茅所知也夫善為國家者如醫之理疾必審其元氣盛衰感受新久以施標本之治故病去而身安彼庸醫以溫平藥沈痼固無足言然或昧於緩急後先而疏導涌泄率然以施者亦非病家之福也矧京畿上承輦轂實冠諸道設復有當抚循者公其得已乎未几台宪交論賞罰未當上复起公於家不一月三進其職則公之行事虽不見察於一時而未嘗不显白於天下後世也竊惟皇上恤民深切至於亲遣大使而耳目所及公论亦待久而後明則四海之内不得均被德泽岂无执其咎者於是重有感焉乃書其說於至正奉使本末卷終

書蘇參政所藏虞先生手帖後

邵庵先生文章学问冠冕一时而临池之工近代莫及今大参赵郡苏公以成均旧游同朝日久得先生手笔为多比来江浙而先生没乃出前後十有七纸以清河元公暨先生与其先公二帖并於卷首辑而藏之至正九年又十月访谒公於临安私第公出以见示因得谛观连日窃思曩岁获侍先生燕闲之论每及当世人材必曰吾伯修汭起请曰苏公今见用於朝有大名於天下所録当代名公言行词章山林晚进得窥国朝文献之盛者赖此二书而已若公学行之详则或不能尽知於是先生为言公所以贤於人者因顾侍史抽架上文字一帙来曰此伯修所作镇湖南时録以见寄者也汭展卷疾读先生凭几听焉至论帝王统绪之正先生止汭读叹曰论兹事於前代先儒具有成言若夫世变不齐异论蠡起自非高见远识公万世以为心者安能明决如是乎继此每读尽一篇先生必为申其旨意以告在坐者且曰伯修之文简洁严重如其为人吾尝欲叙其述作之意顾老病未暇今当成之俄其子敬祖从参政干公辟为江西省宣使当受事趋京师归求契旧书问以待先生曰自吾归田野未尝以尺牋通中朝故人惟苏伯修王君实乃无间尔即口占二书授简於汭俾执事焉首末外封名皆自署未几竟以病不起叙不及为敬祖既丁艰故书亦未达尔然先生卧病时尝谓诸子曰吾居闲久矣知心之友存者无几汝曹欲刻石圻中求铭苏参政可也今观先生与参政公父子诸帖皆辞意淳悉情谊蔼然见其於公世契深厚如此赵子长帖乃归田後第一书惟寄声君实衆仲所谓无间於此可徵衆仲尝从先生游亦亲厚故及之盖虽家人子弟间事未尝属他人尔卷中有曰阁下力学修行推於实用有曰阁下为人物学问所归皆与称公之贤以语汭者辞旨不少异盖先生知公甚深期公甚远匪为一时游从之好故其平居与学者言即其所尝告公者也托贞石於幽隧岂偶然哉先生好魏晋法书如卷首在朝数帖虽临事遣笔楮墨各殊而指腕妙处使米元章黄长睿在亦无所容喙目眚後字画多倚侧重叠然笔意犹髣髴可见代书泛出门生侍史得於口授故时有讹字所谓副端门人南游应遣候之应当作因尔追念畴昔为之慨然乃録所闻先生语与手书中有相发者系於卷终

书所编李文公集篇目後

李文公集十有八卷百四篇江浙行省参政赵郡苏公所藏本汭既从公传写复总其篇目如上始汭见欧阳公论文每称韩李其读幽怀赋恨不得与之同时上下其议论而老泉苏公亦谓李文其味黯然而深其光油然而幽自是每欲求其集观之不可得所得者文苑英华中数篇而已既又见豫章黄公谓皇祖实录文如女有正色又子朱子论复性书虽病减情之旨出於释氏而亦善其有如此思虑益以不覩全集为憾至是迺请於公而得之甚慰也公名翱字习之中进士第元和间为史馆修撰疏言既以武功定海内当革敝事复高祖太宗旧制用文德兴太平不然恐大功之後逸欲易生因条上正本六事宪宗不能用後迁礼部郎中面折宰相李逢吉过失移病去雅好推毂贤士韩文公尝书与之云於贤者汲汲惟公与不材尔其复书以为韩公虽好士惟其有文章兼附己者无所爱惜或不能然则不肯荐拔与已不同又尝以书责裴晋公居相位道不行忍耻内愧不能忍退其於师友及知己厚者骨鲠无讳忌如此则视逢吉辈复何憚而唐史乃言由不得显仕怫郁无所发面斥逢吉既斥之又自惧而去其言抵牾非事实甚明昔人谓韩公於学莫如文章於德莫如好直而习之文行庶几似焉则以韩諡易名而韩李并称可无愧矣参政公将刻梓以广其传於学者故汭窃着其为人大畧且非排史氏之妄以明欧阳公为知言云

书罗鄂州小集目錄後

右乡先达宋朝奉郎权发遣鄂州军州事罗公文五卷权通判鄂州军事临江刘公清之所编次公与刘公同官於鄂公既卒於官刘公因以是编刻置郡斋於公平生所着不能十一故题曰小集其藏於家者余五十卷不幸一再传而中絕遂俱亡矣惟新安志尔雅翼二书吾郡尝刻诸梓此小集者郡人亦尝再刻之故家有其书兵火後板本既弗存三书皆不易得矣汭避地还藏书多散失求小集於友人又得乡先生陈公栎所传本而正其疑繆顾二家本皆前阙篇目乃为叙錄如上宋南渡後士大夫经术政理无愧东都惟文辞若与世俱降者虽能言之士参立角出各名一家高文大册照耀先後而庆历元佑之风轨邈不可追矣公之为学自三代制作名物帝王经世之迹古今治忽之变下逮草木虫鱼之隐蹟博考精思靡不淹贯起欧阳王曾氏上接汉秦求其合作而斟酌剂量之故其为文质厚中正而节度谨严本人伦该物理关世教而未有无所为而为者使天假之年恢廓光大见诸设施议论风旨自本朝而达天下则韩欧诸子所以弥纶昭代者赫然复见於当时夫岂至於散落仅存如今所传而已然则刘公既哀之而子朱子每见其文而推让之比闻其即世而叹惜之者其不以斯欤公早岁尝以廕授京官矣考满归即请祠既第进士得县矣复请祠越五载乃起倅贛州既满归又七年乃得郡其於进退取舍之际如此志之所存何可量也而天固嗇之壽则当世君子所以重为公惜者岂惟以其文哉虽然公之於文则有道矣公尝论儒者之学去己之私以尽其所受之分以施於上下亲疎之际前圣有作大经大法皆具今之学者亦求合於彼而已其有不合者积思以通之汰去浮游散越之念而日就亲切忽不自知其合矣呜呼昔之以文名家者盖未尝及此也以公学於古人而反求诸己者类得其要如此於文辞其有不合乎读公之文者试以此言思之公讳愿字端良号存斋刘公字子澄後鄂州卒时甲子岁十一月日南至赵汭书

罗君传道鄂州使君七世诸孙也将赴官洪之靖安使其表弟汪弁奉写本鄂州小集来校其阙误将刻诸官舍汭以所藏本证之去其续编之弗类者而补其阙逸以还刘公之旧昔四明王公伯厚以博洽名一世守吾郡时於鄂州遗书尤致意焉尝与郡人前太学博士方公万里求诸罗氏得尔雅翼而刻之学宫其杂着则舍刘公所编外片言不可复得矣况兹再更变故也乎并錄所叙篇目以归之嗟夫吾郡先达如金忠肃程文简汪龙溪吴竹洲方秋崖吕左史诸公文集失传者多矣乱亡之余安得子孙皆如传道之克自树立以世其家而因得重刻家集以广其传乎旧题後十有一年八月几望汭再书

题妙絕古今篇目後

右起春秋传止眉山苏氏凡七十九篇宋故端明殿学士致仕汤文靖公汭伯纪所编始余卯角读书家塾得诸兄所錄鄱阳马公文有妙絕古今序已知世有是书然观马公辞意若无取焉者因忽不复求其後於书肆中见之卷首不载马公之序自书谓千戴英华萃矣马公盖不喻然後题称紫霞老人者赵公汝腾也颇言其择之精然自春秋战国而後能言之类衆矣七十九篇之外夫岂他无可取者虽反覆细玩其篇目而终莫知采择之由因置不取暇日登吴山望海门叹其宗社为墟稍求遗文逸事得失衰微之迹与汤公出处大槩而後乃识其意思往书肆求之则已为人取去矣自是尝往来於怀每遇藏书家必询之吴兴唐君棣宰吾邑闻

余言既归访诸好事者则已刻梓行後其家以板质钱於富人故传之者鲜唐君从富人摹本以寄余始得之乃为次第其编目如上呜呼是编所録若郑子产乐毅诸葛武侯范文正公类非以文辞名世者当宋之季世内修不立外攘无策生民重困疆场日蹙天下所愿见者四君子而已弥远清之嵩之大奸相继擅国贪权黷货与中外为市而又有进聚财之说於其君者於是以致万乘之主而纳私贡丰内帑近习女谒浊乱朝政观范勾重币韩起求玉郤至以富魏舒以贿囊瓦以货见讥於识者而左氏亦以惩肆去贪为春秋之法岂非迷途之疾呼也邪端平诸钜公学术足以匡君才猷足以定国而厄於权臣志弗克遂窃观国势日蹙亡形毕具与晏平仲叔向两贤深语交论齐晋之衰而莫能振起者同一喟也然而本原始祸则理宗德弥远立己而举国以听焉视周襄王不以私劳变旧章有惭色矣於是自天子公卿大夫而下尽失其职旷其官若季氏之妇所以诲其子左史倚相论卫武公子产谏子皮邨无正谏赵简子者乃其君臣之龟监邪又究而论之则自高宗忍耻事仇称臣割地使三纲不正国威不立以至於斯当时士大夫非无申胥鲁仲连公子无忌虞卿之忠谏而楚以六十里为讎人役卒有愧於论弋之夫此南渡以来志士仁人没世不忘之遗恨也观是编者惟以其文取之可乎楚灵王闻祈招之诗不能自克以及於难襄王用庄辛之计而国复强劝戒昭矣贾谊之论秦所以亡韩信之对酈生之说汉所以兴出汉中出散关二疏不以炎祚垂亡而废天讨也唐高祖纪赞唐所以兴平淮西碑中衰而能复振首论藩镇之痼疽以成王进传赞则其溃裂坏烂之余殃也二代之兴亡具矣读屈原传答燕惠王书客难获麟解送孟东野序苏子美文集序士之不遇可胜言哉然闻东郭先生之论淮南之训王承福之言伯夷严光徐孺子之高风者遇不遇曾何足动其心也考庄生论方术太史公自序刘歆移太常博士书韩退之送文畅序目錄序则道学之散久矣然孙子战地之说术也而通乎微泰豆氏之御庖丁之解牛轮扁之斲技也而进於道列御寇论无为之无不为庄生本陰阳动静以明内圣外王之道又皆古圣人之微言也盖尝闻之汤氏家学祖朱宗陆而且有取於庄氏之书其以斯欤荀卿之学长於礼其论之精者与戴氏记当并传亦不可以文论也夫以文为学者若唐韩柳宋欧曾王苏氏其人欤然观其答李翱书送徐无党序答吴充书齐書目錄序文甫字说虽皆以文为学而能探其本潭州新学诗书洪范传後吴职方赴阙序思堂记则又闵学之陋而稍知反诸身丰乐亭记政成而归美於上陇冈阡表身达而能显其亲族谱引则知尊祖敬宗矣梓人传言为相之有体云峰院记闵土俗之好争皆非无实之空言也虽然当宋室盛时有若王元之范文正公张方平又皆人材之出於学术者而欧阳公足继昌黎伯苏子瞻以其雄文直气叙而赞之可以廉顽立懦矣此七十九篇者所以为絶妙古今而非他作可及也欤然而自序但以千载英华萃是者时上方好文学君臣相尚以虚文而危亡之恤不因其所好而启迪之庶几乎知所自反也哉其後贾似道专国汤公以从官一再去位五辞召命不起则天下事不可为矣而马公终身受其轩輊於国亡而後止则其观是编而不悟无足言者若赵公者亦惟以言语句读取之而且欲进之於经岂当时宾主间偶未之及邪抑未知其意而不欲斥言也不然则六经固家传而人诵者苟不践其实其不为言语句文者几希余尝考宋季之事而深悲其贤人君子之不遇以汤公是编之作犹且不见知於当时而未白於後如此而况於他乎故为发其微意以眎观者

题吴君仪教授植芸轩卷後

汧闻邑南吴公君仪父之贤心窃向慕之而不及见也既而得与其子希道游喜其和易而能立疏通而有守虽盛衰祸福变故相寻而晏然不易其平素语曰后稷家儿不惰穡伯夷家儿不夺席岂不信哉自是以来益以不获识吴公为恨无何病卧故山虽希道亦不相见者数年矣一日黄子中来访希道以毗陵陈思氏为其家君作植芸轩记属子中见示余三读其文而窃有感焉吴公年踰六十始以医仕且犹不忘畎亩而陈君反覆称述将若不可及者何也盖尝闻之四海既一风声气习非复南州之旧胜国遗老每戒其子孙以儒术苟不见用於时则当退业农圃或隐於医卜不然寧小作商贩自资慎毋倚权势习刀笔以坏心术僨家声而貽後祸今观吴公所以自处者如此所谓非苟知之实允蹈之者乎吴公之先君子号达斋未冠即领乡荐乡先达左史吕公以其子妻之不及继其世科而国除屹然山林弗自光耀则君仪父所以持身保世者固有所受矣池上之亭燕及曾孙可也希道趣尚不堕流俗固宜廼书所闻於卷後而归之陈记後十有八载孟夏下泝里生赵汧敬题

书揭学士赠相士吴大春卷後

人之生圆颅而方趾阳上而陰下乾坤之位定矣心为火居南而在上肾为水居北而在下肝为木居东而在左肺为金居西而在右坎离震兑成形於内而三辰五行见象於外矣然而二五之变错揉不齐其短长清浊异禀其吉凶利害殊遇则夫衰旺生克精祲休祥见於一尺之面者与星历家所推往往相似此人之所以肖形天地此命乎天者所以不可推移而姑布子卿之术所从出也荀卿子乃独以谓古之人无有学者不道为非相之篇以排之至其言相之说不过长短大小善恶之间而所谓善恶者又不过以疾秃跳偏为恶美丽妍冶为善而已然则稟生受分万变不同即其人而无不可见者卿固不及知欤自卿为是论儒者多宗之然自秦汉以来善相人者固未尝絕於世宋之盛时名公贵人廼或假此为知人之助希夷先生陈公天人之学近代以来莫之先也於钱副枢种諫议亦皆以相取之则相之为术诚有不可忽者虽然岂惟知人为有助哉其於自知也先审矣使人皆知分之命乎天者一定而不可推移盖一照索而可决焉咸少安而无躁其於人心世道良非小补顾学而精之使言无不中而足以取信於人则亦未易能耳尝闻北方贵人有精於斯事者患无可告语晚得一士使居暗室悬五色丝一握其中钥户塞牖而穴壁以进食告之曰相眼学也坐久眼明能辨丝色而数其多寡则可以出而受术矣盖期年而後悉如其言廼得尽其术尝於大比之岁閱进士於广坐中历言其人是岁科名得失与其父母之疾病壽夭无一失者其非进士而与坐者亦能言其挟某术精某艺闻者莫不惊异以其术之精微若是故传者鲜焉则荀卿子之论犹不废於缙绅间理亦无足怪者吾邑吴大春尝以斯术游衆大之都名公贵人莫不尚焉待制赵公尝请学士揭公为文以赠之後二十年其子心监甫自外归里人以休咎询之无不验於後者一日攜揭公序文过余山居曰吾先人之术以五行十一曜为法象盖术而通於理者也揭公未尝进而叩之故未及有所表章吾先人谨藏其文於家而未尝敢出以示人也余曰无伤也公之文视荀卿子之文则有间矣夫相之为术固有难言者不以其所不知而即其所知以为言此所以为可贵乎矧子能取信於人其得失常悬於三寸之舌端亦非他人之言所能为轻重也虽然为吾子述所闻书其後使观者知子之论人其术与常流异而子之先人所以见知於当世者终赖揭公之文以传不亦可乎

跋刘郎中所藏邵庵先生戴笠图诗卷後

右邵庵先生戴笠图画者陈可复乃宋邕管安抚陈公元晋裔孙先生表侄也所题诗四章後既改第二章好事者复请先生小字别书以刻诸石流传颇多而行字韵一章则传者未之见也第四章结句云此是先生戴笠图是字阙下半体由悬手书笔不着纸病目後作字若此者多矣先生家素贫仕虽显而食指衆俸入初不自给所居临川之崇仁负郭有田一顷余廼夫人赵氏存时蚕绩衾具所置者悬车後岁收仅支数月鸾服犀带金带各一时入隣里质库中四方来见之士道路相望座上常满有饰亭馆植花木作重屋以规邸舍之利者其束修乘壶之入羔鴈之贄与夫碑板之义取还以为宾客费虽空乏弗恤也每风日清好则领宾客从以门生子弟山僧野老徜徉山水间或寻梅放鹤觴咏而归一日出游遇雨借笠田家戴之乃得还戴笠有图以此先生平居口未尝言贫而诗中薇字絺字二韵颇纪其实盖有无入而不自得之意石本自跋云人间之境如云渡水如花随风不足记也读者更以此意观之则一时高致可想见矣江夏刘公明善既得此图常宝玩之公方显用於时而於前辈流风遗韵不忘敬慕如是则其趣向可知诗後名公题者已衆非先生昔所简拔则颂其诗读其书而知其人者汭登门最晚刘公亦已见示故述当时事於卷尾以明图与诗所由作云

跋赵文敏公临东方先生画赞

汭往岁游吴兴登松雪斋闻文敏公门下士言公初学书时智永千文临习背写尽五百纸兰亭序亦然今观宋仲珩所藏东方先生画赞临本见公於书学虽老不倦前言於是益信然公子仲穆父尝谓汭曰先人书某不当论晚岁尝书大洞经必求佳纸遣人於姑苏捣冶入潢每用清晨起盥漱焚香下笔以三纸为节是书真不愧古人惜乎书之未毕而捐馆矣因出以示坐客皆称叹以为笔势超絶乃平生所未见惟湖州学记为近之尔郊外有幻住庵唐君子华偕余游焉庵中唐人天王四幅子华言此亦公所鉴定者每指其衣文妙处以为古篆籀遗法也子华以善书着名盖尝有得於公者仲珩好学书小篆八分草隸皆通习之故以所闻见於吴兴者且以见前辈於翰墨之事用力精深如此不以贤於时人而自足也

跋谢翱西台恸哭记後

汉丞相诸葛武侯卒蜀人巷祭野哭当时不能禁宋丞相文公欲为武侯事而不可得卒不屈其志以死江南人哀之有甚於蜀人哀武侯者三山谢翱臯羽其起兵时谄事参军也望夫差墓过越王台登子陵台触物悲恸不能自己固宜然既自归曦发宋累又作为歌诗慷慨怀古且匿名记其事以自讳豫求葬地於子陵台侧将自附於梁伯鸾类若有意於警发愤愤乎张子孟坚恐其事湮没取其文稍释庾隐而传之盖有见於此虽然先正有言观大节必於平日

跋谢翱冬青树引後

余为儿童时尝见文字记嘉木扬喇勒智发宋诸陵将建塔钱塘旧大内越中有义士夜募诸少年别求遗骸尽易其所暴露者後虽取去与牛马骨杂瘞塔中悉非真龙所蜕矣其义士与

作传人皆不着名氏自马相而下题其後者十数公亦隐其名所叙述却甚详且言是夕事几觉有踰垣折足者然余後游钱塘问於父老乃无人能言其事或云是塔凡三经雷震最後乃焚其金裹浮图尖之若瓠壶者使皆无名氏遗骼何以能动天如此余无以应之张孟坚所注谢臯羽为唐珏玉潜作冬青树引盖是暗记此事向所闻义士者岂即珏耶然注中或言是王修竹又何人也此大奇事非季布剧孟之徒不能办数十年间岂无族人子孙能言其事者乎孟坚更转语好事君子倘得其实宜详注谢诗以传倘能一过越中访问南山陞求得植冬青故处封域而表揭之且记其事於郡乘又一大奇事也毋徒曰疑以传疑而已

葬书问对

或问葬地之说理有是乎对曰有之然则其说孰胜对曰葬书至矣问曰葬书真郭氏之言乎抑古有其传乎对曰不可考周官冢人掌公墓墓大夫掌凡邦墓皆辨其尊卑度数而葬以其族大司徒以本俗六安万民次二曰族坟墓则葬不择地明矣岂有无其事而着其法者哉汉书艺文志叙形法家大举九州之势以立城郭室舍形人及六畜骨法之度数器物之形容以求其声气贵贱吉凶而宫宅地形与相人之书并列则葬地之法其肇派於斯乎余尝读张平子冢赋见其自述上下冈陇之状大畧如今葬师寻龙捉脉之为者岂东汉之末其说已行於士大夫间至景纯最好方技世见其葬母暨阳卒远水患符其所徵而遂以葬书传诸郭氏耶然无所考矣问者曰葬书世所有然自齐梁至隋唐君子不道至宋司马温公乃欲焚其书禁絶其术何也对曰其言有大悖於理者书固可焚术固当絶也夫盛衰消长之变一定而不可推移者虽圣智巧力无能为盖天命之所存而神功之不可测度者也後世诸子百氏好为异端奇论者衆矣未有取易此以为言者而葬书独曰神功可夺天命可改嘻其欺天罔神谤造化而诬生民也甚矣世俗溺於其说以为天道一定之分犹有术以易之则凡人之为事是非黑白物我得失之细固可以颠倒变乱伏藏擒制於方寸之隐发以遂吾私而无难世道人心遂有不可回者岂非葬书之言有以误之欤禁而絶之固善问者曰夫其谬戾既已如此而又以为葬地之理在焉何也对曰术数之书其言不纯往往类此夫造物之智难以言传固不可以为言者之失而蔽其善也曰敢问其言之善者何谓也对曰所谓乘生气者是也班孟坚曰形与气相首尾此精微之独异而数之自然最为得形法之要盖与葬书之言相表里夫山川之起止合散其神交气感备百物之情故地形之书与观宫宅人物者同出一原而後世杨廖之徒遂精其能而极其变然後坤灵生息之机得乘以葬而无失焉盖非殊资异识足以尽山川百物之情逆来顺往旁见侧出皆得其自然之数者不足以语此则其事虽鄙而理亦微矣故其书愈多其法愈密而此三言者足以尽蔽其义盖古先遗语之尚见於其书者乎又问曰星天象也术家以名山岂葬书之旨耶对曰五行陰阳天地之化育在天成象在地成形声色貌象各以其类盖无物不然无微不着而况山阜有形之最大者哉苟至理所存不必其说之皆出於古也曰直者吾知其为木銳者吾知其为火转动者吾知其为水而圆之为金方之为土何也对曰易象乾为天为金为圆因其从革以观其在熔则知之矣四方形而土居其中盖体坤而得地之象也问者曰然则或谓人间万事皆顺惟金丹与地理为逆者何也对曰人有五藏外应五行散精布气以养形也阳施陰受以传代也非逆不足以握神机而成变化天有五气行乎地中流润滋生草木荣也絪縕上腾发光景也非逆不足以配灵爽而贯幽明知金丹之为逆者则生气得所乘之机矣夫岂一物对待之名哉又问曰今闽巫方位之说亦得葬

书之旨乎对曰论五行衰旺生克此自陰阳家事非所以求形法葬书言方位在势与形之次而近世临川吴公刊定其书寔是语於杂篇之首盖尝与人言方位时日无關於地理可谓得其本矣譬诸方技家起死回生必精乎色脉之度数长生久视不出乎内外之法象盖形气之治神机合变不系於方其本如此问曰然则欲知葬地之理者将即形法而求之备乎抑合陰阳家而论之也对曰是固当辨譬之人事形法其言相也陰阳其推命也有不相待者矣然言相者因百物之异形而各极其情状以察造化之微而知吉凶必不以相人者相六畜也推命者以生年月日时论祸福吉凶犹或失之者由其为术之本不足以范围大化也移之以推六畜辄大谬者六畜之生不同於人也夫方位之说本非所以求地理况乎随意所摘不得形法之真而槩以其说加之则亦何异以虚中子平之术而推六畜以论牛马者而论人耶又问曰然则其说何自而始术家多谈之者又何耶对曰不知其所自起也頼人相传以为闽士有求葬法於江西者不遇其人遂泛观诸郡名蹟以罗镜测之各识其方以相参合而傳会其说如此盖瞽者扣盘扪烛以求日之比而後出之书益加巧密故遂行於閩中理或然也夫势与形理显而事难以管窥豹者每见一斑按图索驥者多失於骀黄牝牡苟非其人神定识超未必能造其微也方位者理晦而事易画师喜模鬼神而憚作狗马况羈旅求合之巫恶肯攻所难以艰其衣食之途哉此可为智者道尔问者又曰理既如是则葬书所谓反气纳骨以荫所生也者固在其术中也何乃於夺神功改天命之说而斥絶之若是耶对曰本骸得气遗体受荫者气机自然之应也然吉地不易求而求全吉者尤未易葬师尝鲜遇而遇真术者为尤鲜是其术之明晦用舍地之是非得失且悬於天而不可必今其言曰君子以是夺神功改天命何其不思之甚乎孔子曰不知命无以为君子葬书之所谓君子者乎又曰然则今之名卿大家其先世葬地多验如执券取物至其盛时竭力有求辄无所得或反倍谬取祸岂亦分定者不可推移耶对曰不但如是而已夫家之将兴必先世多潜德陰善厚施而不食其报若是者虽不择而葬其吉土之遇与子孙之昌固已潜符默契盖天畀之也後世见其先之鼎盛而不知所自来於是妙探巧取牢笼刻削以为不知何人之计则其急於择地者亦殖私规利之端尔其设心如是则获罪於天而自促其数者多矣择而无得与得而倍谬岂非神理之显着者哉问曰然则大儒子朱子亦有取焉何也对曰大贤君子之事不可以常人类论古者三月而葬凡附於棺者必诚必信水泉蝼蚁之为患至深善腐速朽之藏如委弃於沟壑盖时有定制民无得而遗焉皆昔人知之而无可奈何者伊川程公谓死者安则生人安乃自後世择地而言其自然之理尔朱子之葬必择地亦曰为所得为以自尽夫必诚必信之道而不失程子之意云尔然而君子之择未尝有加於报施之常则其托斯事於季通氏者又岂有所歆羨期必也哉固非可与常人类论也问者又曰死葬者生人之所必有而大儒君子所为乃後世之标准也故世之论葬地者必以朱子为口实则仁人孝子之葬其亲地不可以无择也明矣今物理之难明者既如彼而得失之悬於天者又如此则所谓为其得为以尽其必诚必信之道者将何自而可耶对曰死葬之以礼祭之以礼斂手足形还之葬与葬以天下一也故丧具称家之有无夫吉地之难得岂特丧具之费而已哉先王制礼严於庙以尽人鬼之情而藏魄於幽以顺反原之变其处此固有道矣积善有余庆积不善有余殃秦不及期周过其历祈天永命归於有德而心术之怀气数随之此必然之理也圣贤岂欺我哉学士大夫秉礼以丧亲本仁以厚德明理以择术得失之际观乎时义而无所容心则庶乎不悖於性命之常而亦可无憾於慎终之教矣岂非先哲之志而君子之道哉又问曰然则孝经所谓卜其宅兆而安厝之者果何事而前辈谓中原土厚水深地可不择江南水土浅薄不择之患不可胜道则将奈何对曰

圣人之心吉凶与民同患而不以独智先羣物故建元龟泰筮以为生民立命而窳窳之事亦得用焉岂以偏方地气之不齐而强人以所难知者哉且江南之林林总总生化化者无有穷时而地之可葬者有时而尽也又安得人传景纯之说而家有杨廖之师哉夫道不足以公天下法不足以关後世而可以垂训者未之闻也虽然有一於此葬书所谓势来形止地之全气者诚未易言若夫童断过独空缺旷折水泉砂砾凶兆之速灭亡者固有可避之道也大山长谷回谿复岭之中岂无高平深厚之地可规以为族葬者虽鬼福之应无及於人而盛衰之常得以尽其天分譬如有病不治常得中医其视委之庸巫听其贪戾妄作冥颠暗覆於一坏之壤而不自知者则大有径庭矣昔人谓误解本草为生人之祸今葬术岂轻於本草然药餌得失见於目前而葬地吉凶每存於身後故未有能稽终知敝者也事有关於送终之大节儒先君子有所不废而流俗因仍未能极其表里精粗之蘊与夫得失之由故作葬书问对吾友程君仲本最为留意斯事学之十余岁矣而审问明辨弗得弗措盖有志乎明理以择术者非世俗凡近之为也故书以遗之仲本之师乡先生朱君允升其人也朱君明达精博於六经之蘊奥文字之源委邃古之初万化之源陰阳方技之本昔贤开物致用与其精神思虑之存乎艺事者莫不心悟神解诚穷乡晚进之蓍龟永监也於山川情性寧有不得者哉以仲本之善学而卒業於朱先生如王良造父驾轻就熟将有以得夫天人物理之大全岂曰俯察而已

医说

医之为术古之君子类皆能之以为养生事亲慈幼之切务非可漫焉诱诸人者是以百家衆技莫得而先焉况人之有身肌肤之会筋骸之束元气之藏神明之谷经之所起脉之所止荣卫周流屈伸聚散与天地比运气靡常土风殊理五脏六腑胜负衰旺死生疾病之所以皆儒者格物致知之道所当必究未有冥然於一身之内而得为大儒君子者也去古既远由百家衆技而上率以空言相师而不究其实惟医则利害得失决於旦暮间甚远不过旬日以文辞隐蔽故学者鲜焉於是判为专门而世俗养生事亲慈幼之际亦惟他人是托其不能无憾者衆矣宋之盛时尝命文臣知其说者取前代方剂杂民间所献遴选而慎存以极谨审之道业斯术者赖焉奈何庸人谬为增损一以温和解掩其所不知而终无益於治疗之效汉长沙太守之书观症察脉以知病之所在而汤剂施焉其道最为精当而近世以来遂为絶学间有剽闻一二曾未得其要领而疏导涌泄率意妄施戕生人於掌股间而目不瞬其流弊岂有涯哉故凡儒者所当为而不知讲则世俗之士将起为之其祸有不可胜言者不独医也河南处士郭公子和尝以其修己治经之余取张氏书精意研覃补其阙畧子朱子为序以表章之沙随程公可久亦有论着今传者罕矣四海既一河间刘氏东垣李氏之说始行东南其遗书未尝散布者犹数十种有志者由是以溯长沙之学而有得焉可以养生可以事亲可以及人庶几古者大儒君子之能事不遂泯於方来已乎虽然医仁术也其体甚大其理甚微其用物也猥而杂其取效也近而着非通乎天地之化辨乎事物之蹟者不足以成其能也非贯乎方论之博极其心思之至者不足以致其用也盖必有明敏之资躬质厚之行而又反诸身以求古人格物致知之所必究者而用力焉使其心静而理明志坚而神定然後圣神工巧脉病证治之说可以意会金石草木形色气味之性可以类推而又博济而匪私善施而不伐庶几医道复古者乎余尝重有慨於斯切意通都大邑或有其人而未之见闻浙东朱公彦修亲得河间东垣之传於其师每欲一从之游亦因循未暇也至正己丑冬来钱塘卧病进士临川葛元哲

会舍君时为行省掾以长沙法亲煮药饮予且曰予书佐卢叔原善论医当使为子发药既而叔原至按脉处方乃东垣治内伤法也药三进而病愈予归山中每思叔原不忘辛卯十月予复来而叔原方给事公府少暇日则指徐君子贞告予曰此予表侄可与共论斯事者予时始与子贞相识因造其家得观李氏诸书叹其用力之久客中感疾屡从子贞得药如钥透簧汤沃雪又喜其取效之速闻朱公昔游会府子贞之先君子爱慕之因遣子受其说又知其学为子传书肆老人陈思复为予言子贞之父孝於亲养生送死不堕流俗尤笃友谊则其过庭之间所以为学问之本者必有道矣盖是数者皆非今世方技家所能备而子贞兼有之且年甚富气甚清读书论文日进因之以成其能致其用使得於己者可及於人续於前不絶於後其事甚伟而乃优游独善使其道闇然而不章余盖深惜之故具以平昔所见为子贞言子贞恍因予言而有感其必善施博济不失父师之意有以副交游之望乎

崔尚书寅斋说

自二程夫子以敬为圣贤心法之要朱子又从而申之以为圣学始终皆在於此读二氏之书者靡不知於是是有以敬名其斋居者程门高弟衆矣求其由敬入者尹公彦明一人而已登朱子之门者尤衆迨其所以论敬则曰惟畏为近之夫畏非敬也常人之情必有所畏然後能敬於是有以畏名其斋居者然则敬其果易言乎然先儒言敬实本虞书虞既言敬矣又屡言寅字书敬惕也欧阳公之为言恭为且畏之辞为敬畏二义而一言以举之莫切於寅者藁城崔公宗明名其斋居之室曰寅盖取诸此虽然沔尝闻之敬与畏皆非由外铄我也孟子所谓礼之端者人皆有之苟於此而有见焉不患乎持守之无术矣顾学者苟非资质之美则无以为用力之地非感发之深则无以慎其终求诸古人在汉有稭侯者其为笃慎虽天子亦必敬之有万石君者恭敬无与比家人化焉齐鲁诸儒质行皆自以为莫及二君子者於圣贤之学初未尝有闻也惟其得之於天有大过人者故能中存敬畏如此在宋则有若司马文正公自言其平日视地而後敢行措足而後敢立有若赵清献公昼有所为夜必焚香告之於天二君子者於圣贤之言则固有闻之矣若二程夫子所谓心学者亦未必尽合也然而持守以道而警戒严密乃如此向所谓敬近之者益有徵焉岂非深有所感发而然乎今崔公质美行驯视汉二君子固无足多让至其以寅名斋则肃然敬惕之义常接於目而着於心是必有闻乎文正清献二公之遗风而兴起者也其见知於明天子而拜大宗伯也宜哉縉绅文学为公发明名斋之义甚悉以为公之於寅所谓非苟知之实允蹈之者故取昔人操履之实申释其义以明公之志云

二星说

丙午三月太白在酉光耀异常芒角上拱如佛像之圆光然岁星在卯亦如之时镇星亦在卯说者谓卯火垣也而为木旺之地木火土金通相生故太白尤异於常所喜者岁星之得其所也五纬固有常占矣然则虚中之术不但可推人命虽世运亦不能逃也耶

范叔豹字说

吴兴范君元质字叔豹请於缙绅先生求文以道其义至屡数十篇其辞富其义博矣而君犹求之不已且俾余亦赘言焉予屡以不敏辞而弗获乃为之言曰夫即名字以求言因称谓而知警进学之一端也为其说者容可易於言乎夫本人心稽圣训察刚柔善恶之宜以极扩充变化之妙使夫人终身诵焉而有余上也辞有微义有止约不至於陋振不失於矜次也审於义而未周措诸辞而多失无次矣前二者余既不足以及之强而言且出於无次者之後君又奚取焉虽然姑以管中一斑者为君告可乎夫君之字所以取义於豹者以其有文而善变也然豹之文生而有之非由外饰其变也蔚然而着足以美其身人之生而有之足以美其身者非仁义之谓乎反而求之扩而充之虽有不美之质犹将变焉时至而化则仁义不可胜用矣而况於质之美者乎此古之君子所谓人之文者也君和易疏直而为质之美而无昏妄之杂也然则因气质之善以尽问学之功即名字之美以致反求之实有余师矣迨乎进而能变则和易者为忠厚非有加於前也疏直者为严正非有待於外也目视耳听而品节存焉手持足履而仪章着焉罔不由乎中也然则其为文也盛矣彼以敦重朴钝为不足而膏口吻华笔端以为能者曾不足以美其七尺之躯而况能美人乎先民有言一为文人无足观矣夫文豹犹见取於人而文人至於无足观者恶无实也文之在已苟无其实且不足观而况於在人者乎是亦有不足为君愿者矣虽然文人之文未易能也君之求而不厌者亦不徒以文也然余之言必至於斯而止焉其尚有以谅余心而警省也夫

代举留沙元帅状

尝闻削平寇乱须资忠勇之才牧养民黎必藉廉明之政惟久任乃全终始故借留非比泛常切见某人某始以江浙行省都镇抚统兵克复江山玉山等县有功继而回兵救援省治破贼建德淳安克复徽州抚安属县再从平章政事萨木丹巴勒剿除逆贼规画钱粮接济军马进复饶州乐平等处尽心体国罔顾其他险阻无常坚贞不易可见其忠当红贼扰攘之时本官每善以寡撃衆生擒斩首不计其数或策马陷阵为士卒之先或振威一叱而贼徒奔散初复徽州亲入贼阵射杀蕲黄贼首伪彭万户贼徒畏其威名可见其勇自奉俭约门禁甚严号令赏罚悉由至公子女玉帛秋毫无犯官民共知远近称诵可见其廉本路僻在万山户口实为繁夥始缘官吏轻弃城池遂致愚民无辜陷贼继而官军数少由是贼去复来然而脇从之徒不过百中之一本官察都邑之冤枉洞见秋毫布国家之信恩确如金石招安诖误则指天誓心闻者感泣禁革科扰则家至户晓民赖以安比之战功意尤深远可见其明加以好贤下士见义敢为识朝廷之大体达将帅之弘规真可为斯民父母不可一日而无者也况兼本路兵戈之後饥馑相仍城池公廨正此用工未及成就非本官尽知民情事体终始监临大关利害今者朝除达鲁花赤将至本官屡尝辞职民情忧惧恐或一旦失其所依为此不辞远道陈乞举留谨具状上告

祭婺源汪王庙文【代总制王克恭奉使汪广洋作】

惟王鄣山之英黟水之灵生为人豪歿为神明保障六州不为已荣识机慕化克全民生庙祀邈绵足以表其忠烈之盛子孙千亿足以彰其惠爱之诚回视当时如世充建德辈不知天命困犹力争残民毒衆卒为顽冥飘风游尘徒污汗青昔王生存尝以殄寇道出星源邑人留像

千載猶傳則夫一時六郡之內蒙其福澤者又可名言也哉克恭欽承朝命來鎮于茲撫軍字民匪神曷依廣洋世遷高郵奉命出使水木本源敢忘所自唯王誕辰實在茲日虔率官僚即祀廟宅薄奠斯陳神其來格

東山寓舍安神主祝文

維至正十有三年十月乙未朔越十有五日己丑孝孫某暨合家眷屬等新作先妣以上四世神主於東山寓舍祠堂奉安先高祖考帥屬百六府君神主先高祖妣程氏恭人神主居西第一室先曾祖考稅院二府君神主先曾祖妣金氏安人神主居西第二室先祖考縣丞定一府君神主先祖妣朱氏安人神主居第三室先考倉使相二府君神主先妣汪氏安人神主居第四室敬以清酌庶饌之奠即祠堂合祭昭告祖考四世之靈惟我祖宗始居休寧龍川歷唐末五季入宋三百余年以及本朝又几百年傳緒十有七世至於某等當其盛時貲產擅一鄉家學以儒名在官為命士而喪祭之儀通乎禮俗子孫既衆聚散不常固未能为一定可久之規也汭等不幸遭此厄運兵火之余兄弟离散祭奠无所繼以先妣喪亡哀苦逃生哭泣無地深悲至痛何可忍言歲月不居練祥已屆兵戈既遠疾疴甫平始獲漸謀休息而几筵之位屢設屢遷褻瀆甚矣蓋練而後祔祔而還寢傳有明文然家廟不在勢既不得羣居兄弟散處不容別安靈座乃即茲山新成隙宇為四龕南向作主之式神位之次大畧取法先賢庶几垢面往來朔望得以伸哀蔬食菜羹子孫不致忘本而已於禮意之合則不敢知孤苦余生情文荒忽伏惟尊魂鑒之尚享

外祖汪公祖妣朱安人改葬墓所祭文

嗚呼禮有繼絕乃先王所以重傳世而厚倫紀故為後者得見於經昔吾外祖與祖妣之歿不數年而舅氏天逝奈何貲分析而主嗣不立祔食於伯氏者再世七十余年矣豈無近屬而莫之爭此吾母所以痛心疾首乎斯事固嘗悲思啜泣俯枕湮席以逮老乃卒抱恨於九京夫世降俗遷有難言者而兩家多故以至於此則其責實在諸甥然諸甥各已老大而五喪其二則內之羣從兄弟亦十亡五六而況乎禍亂之相仍今其人存而業不墜宜為吾舅氏後者惟曰禮字季和一人而已乃慨然悲從叔之不祀而愿身為之後以主其祭事非有為而悉存乎忠誠嗚呼使非母族猶有斯人則諸甥之情事終身不白而將何以見吾母於幽庭蓋於外祖與祖妣改葬之議始建而山川委和近在咫尺乃若神藏鬼秘以為承祀者之吉徵日吉辰良秋高氣清虔奉二親窆于新塋庶神氣之歸復伫天光而發榮使世家由是而益昌大以永世則不嗣於昔而續於今者乃天理之復明痛吾母之莫見空涕泣之交零爰銜哀以致奠冀昭格於冥冥尚享

祭外舅文

維年月日壻某謹以清酌庶饌之奠再拜頓首敢昭祭於外舅故純二朝奉之靈老成凋瘁旧德誰存公如靈光岿然獨尊馬醫擊鐘夏畦鼎食飾外為夸公則異是銖累寸積云升川增若非已有不振不矜聞鷄而息戴星而起槁項華顛劬躬未已近憂遠慮必謹其端淵冰之戒听

者为寒善不近名人惟求旧厚以镇浮质而不陋遐不黄耆芘其後人一夕不起天胡不仁垂絕之音闻者孔悲天乎痛哉饮恨奚为大物有归犹相代禪矧伊传邨而足追睠一气阖辟廓然大公孰短孰长孰为穷通微纒糾纏平陂相倚有命在天公奚憾只公奚憾只陟降相羊鉴余深衷酌此一觞

宋处士诔文

处士金华宋氏讳文昭字文霆曰蓉峰处士者集贤院所赐号也处士以质行信於郡邑见称於名公贵人以闻於朝着於是集贤院为制处士号下其书以旌之其子曰濂字景濂亦用布衣召入翰林不起以遂其养而父子一时俱见重於縉绅矣沅与景濂游而不及升处士之堂亲炙其德容词气以窥其所存之万一然尝观景濂博物洽闻足以名一世而不以自多为文章下轍魏晋上拟周秦而视若蝸翼蛇跗苟可以慰其亲虽忧患在已而不辞志有不得行虽縻之以好爵而不顾凡世之所谓械机荣辱漠然若不入於其中可谓贤矣逮其述处士之行且犹欷然自失以弗克承明训绍先德为忧则处士之身教盖有非言语文字所能形容者乎处士年八十有一以微疾终终之日濂与兄弟及子若孙咸在左右盖世所谓全人备福者而远近闻讣莫不嗟悼伤悲哀善人之不可复见也乃作诔曰

维处士之先世居於秦载自唐初厥有闻人宪丞大理实迁吴兴为易讲师朋来振振五季弗靖再徙乌伤时维体仁教义益彰卒諡文通河汾有光奕世皆儒幽而不扬潜溪之滨伯仲来止宋熄其炎世族中否吏虎而冠盜聚蜂蚁孰寧厥居完而弗毁积厚未施虽伏必发爰有吉人溉其萌蘖雍容紆徐有待无捷委祉垂祥以开来叶猗欤处士稟淳毓和内刚以毅外则柔嘉涵濡薰陶夙成厥德孝以事亲诚以接物其孝伊何服勤尽瘁恳恳菑畚载观其志其诚伊何内省必端一诺之信重如丘山乡隣有急临难毋苟彼狂阻饥聚啸林藪吏资其画卒殲羣丑扞患之劳用昌厥後教子淳淳文通尔思积久充大蔚为儒师彼富我仁彼爵我义貽厥之志孰为崇卑闻人一善喜见眉间遇不仁者咨嗟俛顔非矫而为稟乎自然简俭冲默自全其天里閭推尊宗婣是则声流天朝雅号攸锡配彼蓉峰长乐无极属罹艰屯颠沛离析履险如夷有冯有翼天祚高年聿昭世德世德方兴有子明哲大发於文施而不食增崇本初以考元吉如何不淑木坏山颓善人云亡四邑之哀呜呼哀哉我未识公辱交公子载钦道义匪但文史出入惟亲兢兢惧喜脱遗疾疢躬奉甘旨孙子子孙均庆同美胡不百龄遽闻摧毀兴怀悲恻痛如在已欲置生刍沉疴未已述德序哀敢忘丧纪呜呼哀哉

御书赞

徽州路休寧县达嚕噶齐臣雅克哈雅以其先臣某所得今上皇帝御书和斋二大字示县尹臣棣臣棣谨拜手稽首而述赞曰

於穆圣明神文冠昔由潜而升乃见天德睠兹守臣和冲以居爰锡嘉名云章彙如按体结字肆笔而成日月分耀山川奠形龙图出河羲画攸则天纵多能千载一日圣明御■〈宀禹〉并育羣生凤至麟游万邦以寧小臣在官敢曰疎远敬顺罔违温恭是勉至宝所在荣光必腾

勗尔是德曾孙是承

邵子赞

陰阳昼夜死生天地人物开闭浑然一以贯之余暇弄丸游戏

陆先生赞

儒者曰其学似禅佛者曰我法无是超然独契本心以俟圣人百世

赠河南省参政追封真定郡公苏公画像赞

义足以守身故不乘时而速化忠足以体国故能因事而有为是盖势有所弗趋患有所弗避而卒能活边庭数百万之衆振殊俗以书诗者欬噫锡爵受封显荣褒大者报施之彝道尔当巽懦苟安之日微斯人其孰与归

江浙省都镇抚哈密公纪功之碑

至正十四年江浙省征行都镇抚哈密公选吏定黜之明年平章移师乐平尽殄逋寇厥岁既大穰生息稍复父老言於县令长曰自蕲黄盗起江东浙右咸被其毒黜数十里小邑居山谷间其人坐受虔刘得不死所赖圣朝厚恩幸复齿编民惟平章奉若天威以严节制惟镇抚削平羣盗以勇树功矧又俾我贤令安而全之休而养之使有今日然平章勲业有大史氏书凡民敢议请以镇抚嘉绩勒真石以示方来且明国家将帅有人草窃乌合为不足平也既以言於县即退诣海寧赵沔请文曰公初以丹阳县达噜噶齐从省臣镇京口既而有旨从江浙省萨木丹巴勒平章讨贼平章贤其才版授征行都镇总制诸将所复郡邑得便宜具官十二年十月会元帅刘托音兵复武康十一日舟师次湖州横山贼以五百艘拒战公手火筒炮曰贼兵多脇从吾不忍万衆无知就死将惊之使自散尔发二炮出贼舟上贼进不止则连以炮败其数舟余悉隐遁俄赭衣数万循山奄至公登岸谓将士曰贼虽破皆新衣不过仓卒被驱迫尔慎无多杀仍使骑前呼曰汝等皆吾良民宜舍兵亲射贼将二人殪之衆皆弃兵走又遣骑呼曰有能夺贼马执贼将来者有重赏衆皆倒戈夺马十余匹以献十三日会元帅韩邦彦兵败贼湖县治所斩馘以千计平章至郡二十六日大破贼长兴明日擊贼五里桥擒杀殆尽湖州平十一月初八日大破贼馒头山广德平十二月初三日擊贼溧阳大败之擒贼将甚衆溧阳溧水皆平十二年二月以平章命将所部军擊贼徽饶军次严之淳安适戍徽将士水陆奔溃公执偏裨一人责僨军状斩之其将皆惧请自效十八日与贼战威平镇破之明日贼悉其衆来赤帜弥望公突入贼中左右排擊当者皆靡上下山谷或骑或步解而复合者数四诸将之兵继至遂大败之二十一日天微明贼猝至营外公不及甲跃马陷阵有号黑杨者骁贼也以所操扑杷中公右臂公仰刃断扑投槊中其颌黑杨殒地下马将斩之贼锋交至乃卓劒洞其腹奋两刀斫贼多所杀伤大兵乘胜逐北俘斩不可计时寇杭者亦为参政董公所败慄悍畧尽自是贼势衰矣二十二日擊贼徽州城外走之明日次徽州治所以诏赦从贼者罪使其

参谋巡检周希濂府史侯塾照磨张德明等宣布恩信以安集之平章至郡命公以所将兵同韩元帅进讨三月次休寧用其县达噜噶齐巴特玛实哩仍戍之移军祁门黟人皆出迎得僧为贼将者二人斩之以杭州路西南隅録事司达噜噶齐伊尔苏克为黟县达噜噶齐周希濂为县尹平章僉从斡齐尔为主簿治其民转粟饷军徽州平时盗据饶州立伪署如省府煽虐祁门境上四月十一日公与韩元帅蒙古军镇抚舍哩巴噶伊噜勒万户之兵俱进自以所将兵行遇贼侯骑三十人尽擒之益知贼虚实乃置营栅为疑兵间道走分水岭伏隘道旁候贼过辄断要害掩杀之回兵苦竹港尽殲其衆擒贼将号宰相者二人倍道直捣浮梁二百里贼垒连络剗削如破竹然五月初一日与贼战饶州三十里冈自寅至巳大破之分兵三道入城遣鋭卒要其去路贼多赴水死手擒伪平章一人万户八人得饶州路所失印平章公命以达噜噶齐治饶州领征行都镇抚事如故所将先锋王千户孟千户皆为万户按地利阳镇盗中夕斫营身被十余创夺贼槩格杀数十人贼遁且日进兵尽殄之江东宪上其功时湖滨盗犹衆江西省移书会捕公犹以所部军平之南康黄溪贼恃坚壁杀掠尤甚选勇士袭破其砦南康平江西省宪嘉其功遣使宴劳甚厚以事闻於朝十四年二月也公西域人有功云南知名为人慷慨得壮士心临贼境必先谕以恩德不服乃加兵周令使人其治以兵戈後务为休息洁已爱民设施无所疑挠邑人赖之诗曰

寇攘纷披大邦之縻哀厥凶残恣睢四驰矧是穷山邑于岩石不戒於隣转而相贼搜原剔藪豺狂狼毒孰有其命牢牲视人吁天何高扣地何厚方伯连帅曷日予掾大盜再举貪懦弗懲盜嘻民忍卒潰于成帝命南征平章总戎从以虎臣将其选鋒殲厥渠魁罔俾行悔哀此下愚大恩斯霈孔武哈公言奋其威矢无虚发刃不徒施一夫授首万衆逃命三吴既平黥歙底定畀我贤令时民渴饥罔俾金壬渔夺其私我有居室昔盜攸考妇子具完匪令谁保我有田畴亦既芑稂黍苗欣欣匪令谁艺痍伤未合疾疢相仍令曰时拙母或举羸嗟令之仁公实惠之公曰匪我平章之思惟平章公天子所命不振不矜式前庙胜江湖澄清袞衣来归帝锡哈公虎节熊旗为国藩屏为民司命壽考无疆受天之庆

克复休寧县碑

蕲黄盜乱江东徽州受害尤大徽属六邑惟休寧得祸最深自行省兵始复徽州即以达噜噶齐戍休寧卒完遺民以成底定之功者前省宣使高昌巴侯也侯在县一岁郡邑命吏皆至官邑人惜其去咸走大府言侯得民心缓急可仗不宜置散地吏议莫夺则相与伐石刻文着侯功德焯示来裔其序曰惟至正十一年冬盜破江州杀守官掠南康鄱阳袁凶煽頑转相仇賊明年四月繇婺源犯休寧军民一夕皆遁遂陷徽州休寧地四达羣盜蜂午殘毀尤甚俄頃賊将项奴儿自蕲黄来益收兵急攻杭之昱岭关分寇建德宣州从奴儿来者孙哲与邑人吴相及诸良家子弟谋得壯士可二千人相期执项奴儿以迎官军六月二十二日战郡西七里溪衆敗皆死之盜尽焚諸起事者家奴儿遂夺昱岭关犯会府时不闻官府之令已三月矣行省兵破淳安侯以所募士乘胜独克战歙南溪山间凡三十余日横挫賊鋒使不得合寇浙西坏其始谋得被驱农隸輒释不杀咸印识其衣纵还乡里賊气愈夺当是时巴侯之名已震於賊中而山谷逃難之民莫不忍死以待王师矣既而寇諸郡者皆奔还官军退保淳安项奴儿复自广德陷常湖等郡浙西僉宪哈喇哈纳公亲勒兵军声大振九月复徽州侯从元帅沙布鼎

公进抚休寧民既归业元帅还郡侯治县事诛恶少导贼残大家者十余人十月二十三日盜迫西杨村包山络谷不见其後候骑还侯方卧店即决起上马西望发三矢而进手挥双长刃先诸将突阵人马俱奋出入排擊当者无不披靡贼大败僵尸三十余里自是邑无不倚侯为重矣项奴儿之衆潰於浙西间道逃来民争起逐之侯与邑义士遮捕生得项奴儿檻车送行省伏诛别帅以兵徇祁门未定遽分兵入黟盜一夕奄至师潰还休寧时大雾四塞盜由邑西绕南门趋东门大呼合擊我师无营栅帅与吏士在邑之民皆殲焉侯杀二人以单骑免盜相视不敢追杨村之敗盜将散去适湖口剧贼驱使同来衆可五六万大掠休寧境中杀人满山谷求执项奴儿者灭其乡十有二月行省兵大破贼於昌化复徽州侯还休寧十三年正月与三万户之军俱次邑治居十余日盜又大至天雨雪官军战不利失一万户侯力战至暮溪桥坏舍马步鬪堕重围中杀伤甚衆夺贼得我军名马以还行募兵遂安三月行省平章萨木丹巴勒总大兵平瀾西复广德擊贼淳安以诏书赦其人卒定徽州侯以蒙古千户之军戍休寧乃除蓁蕨正涂街筑宫室招商居肆农还田亩朔望率诸生谒先圣先师新作公署稍复都邑之制焉此休寧克定之大凡也而侯之勤劳亦可槩见矣侯名巴特玛实哩家世北庭贵族年甫三十长身有胆气为法不苛使吏畏而民安之羣帅之兵三进久次休寧未尝杀一不辜军使旁午不敢暴其境内则侯诚有德於人矣詎可忘哉其诗曰皇有万方邈是东南郡守县令厥长惟监小大相承如臂使指德洽羣黎威行万里遂墮列城天下为公孰为恬嬉不习而同惟仕惟家惟官惟市不虞横目示以其技业业新安据崖枕溪壮哉休寧去险即夷列肆连云冠带衣履积居充溢吴会伊迓大山长谷名卿故家富贵豪胥角为尊奢盜发淮堧崇妖矫异烟起黄冈宫亭鼎沸夏畦马医俳舞雉驱尔相彼公杀人以嬉列炬长趋岩石如砥既焚休寧遂及郡治积僵如山泽以量尸釜爨似罗脰肝若飴羣行于野抢掳而食释尔耒耜执我矛戟少年风生士不宿诚义则信矣孰计成败矫矫巴侯駉駉黄华大藩选将衆誉羣夸快马如龙双刀如雪驻坡募礪且驰且射既剪云头遂营歙东山木林丛杂蛩蜂触热排炎缘高縋深百战不回羣愚和心师却而振孔武宪臣卓彼东帅西域之珍既复郡治进抚休寧属侯囊鞬与帅俱行上恩孔仁帅维渥之凡民有心帅维度之寇潰而奔民其子来女不盜从予心女怀稚耄欢呼帅言允仁酺酒椎牛罗列辕门盜逼西郊侯奋而起委馘横尸于三千里孰为进讨斥堠弗戒尔师尔僨我则弗敗弗敗则那式昭其勇跃身重围手馘弗纵盜则日增郡亦从生再失再复羣帅之力相臣後至於赫天兵云兴电扫翼之风霆维此邑人侯实生之舍我弗忘从我弗思蔓草寒烟我耕我稼亦有来牟伊谁是赖敗瓦颓垣鬼哭神哀日中成市伊谁是开妇女儿童具知侯德孰云侯归使我心惻天子大圣羣公至明相臣凱还大賚是经朱芾彤弓三锡弥光为国虎臣以守四方民生多艰矧伊茆独邑人作诗敢告司牧

卷六

●钦定四库全书

东山存稿卷六

(元) 赵汭 撰

○文

邵庵先生虞公行状

曾祖刚简宋朝请大夫利州路提点刑狱赠中大夫妣赵氏赠宜人祖■〈工工〉上〈工工〉下宋奉直大夫知连州仁壽县开国男食邑三百户国朝累赠嘉议大夫礼部尚书追封雍郡侯妣氏追封雍郡夫人父汲故国史院编修致仕赠中奉大夫四川等处行中书省参知政事护军追封雍郡公妣杨氏追封雍郡夫人虞氏系出虞仲世家会稽唐永兴文懿公世南事太宗陪葬昭陵子孙为雍人事见本传永兴生工部侍郎昭工部生江陰令陟江陰生盱眙丞知待盱眙生长城令礼长城生金吾卫长史明金吾四子叔曰殷中和间守蜀仁壽郡因家焉遂为蜀人仁壽九子伯曰赏赏五子次四曰琚琚二子幼曰庾庾四子次二曰承询承询二子幼曰继崇继崇三子季曰昭白宋银青光禄大夫国子祭酒赠太师周国公周公五子季曰轩赠太师魏国公三子季曰祺及进士第历官左中大夫赠太师秦国公秦公生左丞相雍国公允文赠太师諡忠肃功烈具宋史丞相三子伯曰公亮性高简不乐仕进晚以奉议直秘阁赠开府仪同三司仲曰公着知渠州官至中奉大夫仁壽县开国男累赠光禄大夫季曰杭孙大理寺丞至中奉大夫赠通议大夫开国六子次二提刑也与临邛魏华父成都范文叔李微之辈讲学蜀东门外非洙泗伊洛之道不言着易诗书论语说以发明其义由是蜀士尽知周程张朱传授之旨所居官辄举其职从四川置司羣为参议官自请行边却强敌数十万知简州擢夔州路提刑迁利路立保伍之法三年民归之者三十九万余人为屯田听民自耕边实人足敌不敢犯学者称为沧江先生沧江二子伯尚书也以文学着称知永州兴学校靖寇暴更以简易治之去而民不忘迁连州六子伯曰普兵部侍郎直宝文阁兵部三子仲曰从龙朝请郎通判惠州子三人伯为通直郎黄冈尉尚书无子以黄冈继宗事即参政也宋亡自海上还隐於临川之崇仁礼义忠厚乡里信之与翰林学士临川吴公伯清为友吴公称其文清而醇晚稍起家教授有知人之鉴於诸生中识故江浙行省参政鲁公子翬今翰林承旨欧阳公原功而深期之夫人杨氏故工部侍郎国子祭酒文仲之女杨公世以春秋名家而从弟参知政事平舟先生栋以濂洛之道自任夫人未笄时即尽通其说至近代典故亦贯穿不遗平舟以彗变上书夫人侍侧进曰叔当去位久矣平舟叹曰汝曷不为男子生我家乎及归参政事舅姑以孝闻虽在患难动不忘礼族姻严惮之生三子伯讳集字伯生即公也仲曰盘进士及第官至承事郎武昌路嘉鱼县尹季曰叶咸淳间杨公守衡州以参政从未有子杨公为禱於南岳俄梦客将啓曰南岳主者来谒既觉而公生於馆壬申岁二月二十二日也乙亥杨公守漳州明年趋岭外参政亦在行公三岁即知读书干戈中无书册可携母夫人授论语孟

子左传欧苏文闻辄成诵九岁北还至长沙就外傅始得书之刻本则已尽诵诸经通其大义矣又五岁始来崇仁吴公伯清见其所为文谓参政曰贤郎後当有大名於世时江左学者犹守旧业郡邑学校有用前代科目法出题讲课以程其艺者所取辄百数十人公与嘉鱼令以所业应之咸考中出诸老儒上时犹未冠也故国名卿学士多寓是邦公入则受教家庭出则从诸公游於经传百氏之说帝王之制有国家者兴衰得失之由与其为之之术无不学焉而典故沿革世家爵里考核於近代者尤精详矣杨夫人尝曰吴伯清今世大儒可为师表故公与嘉鱼令从吴公游吴公於先儒之言有所辨释公悉能推类以达其意吴公亟称之宋之将亡蜀先被兵其世家大族狼狽奔走仅保遗息於东南内附以来日以衰微忘其所自者衆矣尚书之解组永州也道过临川寓公邕管安抚陈公元晋之夫人其女弟也率诸子迎伯兄以归因得前郡守江陵项公别第於崇仁邑南门外故参政自长沙来居之稍收养其族人於伤残驱迫之余蜀既不可返而家益贫无以为生盖不胜遗绪之忧也公生有异质长益自奋於学参政少慰意焉手植紫薇於庭以期之尝与嘉鱼令屏居一室日讲所学因读邵子书有契题其宇曰邵庵故四方称为邵庵先生大德六年以大臣荐擢大都路儒学教授十一年除国子助教明年丁内艰至大二年再除国子助教四年授将仕郎国子博士延佑元年除从仕郎太常博士三年奉诏西祀名山大川四年除承仕郎集贤修撰考大都路乡试五年被旨以集贤直学士召吴公伯清於家六年除翰林待制儒林郎兼国史院编修官丁外艰服除以旧官召泰定元年考试礼部进士除承德郎国子司业二年除奉训大夫秘书少监四年考礼部进士拜翰林直学士奉议大夫知制诰同修国史陞奉政大夫兼经筵官明年兼国子祭酒天历二年陞中顺大夫未几拜奎章阁侍书学士陞亚中大夫仍前翰林直学士知制诰同修国史兼经筵官兼国子祭酒岁中进阶中奉大夫至顺元年为御试进士读卷官奉旨修皇朝经世大典任总裁二年拜翰林侍讲学士通奉大夫余如故今上皇帝入纂大统被旨赴上都秋以病谒告归田里元统二年有旨召还禁林从使者至即疾作不能行而归至正八年五月二十三日終於崇仁私第年七十有七初藁城董忠宣公以左丞相镇江右延参政与吴公而宾礼之因以知公之贤及拜行台中丞请於参政以公俱行命其子受学焉俄入朝公始来京师方海内承平中朝无事四方名胜萃焉为文章相尚以雄严新奇不必尽合於古柳城姚公在翰林广平程公吴兴赵公继之与公言俱大悦即以异日斯文之柄归之涿郡卢公处道清河元公复初素相善有所述作辄即公论定元公尝谓公曰子文无雷霆之震惊无鬼神之灵变将何以称於世乎公谢曰诚不能也後元公卒以公所为为善业觚翰者稍为改弦易调矣时元老大臣为中书鲁国文贞公翰林承旨唐公多国初侍从旧人因董氏识公者辄见亲厚於先代文献有所徵焉公亦得以尽知国家之旧典西北之遗事台臣言公材堪御史虽不果擢用而公名高一时矣始教授京庠平阳王文宪公以相臣尹京贤公之为待以客礼故公得尽心训迪益自致於所愿学者时前代故家子孙仕於朝者不数人公与四明袁公伯长最厚尽交友之义尝追考故国士大夫德业之盛各述其乡邑之旧而论着之大史院教授洛阳杨茂弘者知置律候气之事尝与太史郭公试用之而应以为律历不可偏废将为书上之自恨其文繁失宜不足达意以公素讨论斯事求为之润色公既为整饬其书又以告诸有位者会茂弘以病死不得达其所着书犹藏大史签院齐公伯亨家成均之士数百人多宗戚子弟施教者每不安厥职公为助教即以师道自任申国学之成法以严正大之规本圣贤之遗书以发精微之蕴明事理之非二通雅俗於性情修辞者陈义必精辨惑者无微不显学者资质不齐俱获其益有志者待公之退多挟策趋门下以卒其业他馆之士靡然宗尚多相率诣馆下请益

为之师者一无间言为博士言於祭酒曰惟学务修德诱以利禄使之进虽勉弗喜也圣天子嘉惠监学使得岁贡士以次授官盍求其足以为劝者而激励之李秦公时领学士闻而是之趣以名士当言之於上乃於诸生中得端静有守尝试以事者二人并牒上之委於吏议不得达而秦公已归翰林矣大成殿新赐登歌乐其师世居江南乐生皆河北田里之人性情不相能不能成音公为亲教之然後成曲复请设司乐一人掌之将有所考正焉仁宗方责成监学拜台臣为祭酒以重其事屡起名儒为之师皆欲有所更张以副上意公力助其说有为异论以沮之者执政为之动好进者乘间媒孽其间谤议沸腾前後两司业或称病或投檄去公亦以病免在太常时晖忠宪王为使盛年不饮酒好静默间独从公问礼器祭义甚悉及至家必留坐欵曲或尽日无倦色公为言先王制作之本天理人情之实以及古今因革治乱之迹忠宪屡为嘉叹益信儒者有用公以去蜀久乞充使幸得一视坟墓遂被（阙页）用者将以一道德同风俗非欲使学者专门擅业如近代五经学究之固陋也圣经深远非一人之见可尽试艺之文惟其高者而取之不必先有主意若先定主意则求贤之心狭而差自此始矣後再为考官率持是说故所取每称得人以次对复入翰林即荐芜湖令欧阳原功於朝除司业又举以自代尝约待制马公伯庸同推挽之马公复书曰玄翁博洽有古学司业先生力荐不置在先生则得矣如祖常等心愧何玄翁者原功别字祖常马公名也欧阳公闻之亦寓书於公曰阁下学足以变文体身足以为道郭此固海内士所属望者也分义则然芜湖终更乃闻有自代之荐樊英无奇终贻他日之累淮陰新进难免当时之惊朝廷竟用公言召欧阳公国子博士一时二三名贤更相推让缙绅翕然相庆经筵肇开劝讲进读之臣具极一时之选未几驾幸上都次北京以讲臣多高年召公与集贤侍读学士王仪伯执经从行秋还皆有金织文锦之赐自是岁常在行晋邸知公贫特命出中统钞五十锭即其家赐之公气貌温和敷陈剴切间及时務必曲尽事宜尝因讲罢论京师恃东南运粮为实竭民力以航不测非所以寬（阙页）遽了乃以属公而译者始克讫事奎章阁初置授经郎上命公选汉人授经者公以豫章揭公曼硕莆田陈公衆仲名闻上竟用揭公陈公仕至翰林应奉而终公犹深惜其不壽也尝以先世坟墓远在吴越者岁久芜没乞一郡自便上曰尔材何不堪顾今未可去尔时关中大饥民枕藉而死有郡县无子遗者大臣有受命赴掾而粟无所从出致哀痛以死公侍廷顾问所以掾关中者公对曰承平日久人情宴安有志之士急於近效则怨讟兴焉不幸大菑之余正君子为作新之机也若遣一二有仁术知民事者稍寬其政令使得有所为随郡县择可用之人因旧民所在定城郭修闾里治沟洫畎亩薄征敛招其伤残老弱渐以其力治之则远方而来归者渐至春耕秋敛皆有所助一二岁间勿征徭封域既正有望相济四面而至者均齐方正截然有法则三代之民将见出於虚空之野矣上称善因进曰幸假臣以一郡试以此法行之三五年间必有以报朝廷者左右有曰虞伯生欲以此去尔遂罢其议天子於所体貌之臣多呼以字故奏对者亦得以字行孔林新修大成殿告成有旨行香公请充使上许之既而复曰是欲为归计尔乃命公传旨以他学士行公初除阁学士以祭酒之职朝暮训迪难於兼领乞辞免有旨奎章阁事切要特免祭酒至是复以国史所重恐兼职废务辞不许上将策士於廷公被命为读卷官拟制策四篇以进其策汉士者畧曰夫亲亲莫内於九族今百世本支繁衍盛大则既尊位重禄矣尚有以劝之之道乎尊贤莫先於百姓今世臣大家勲业弘茂则亦既富方谷矣尚有以体之之道乎多方内附之衆因其俗而道之者亦既久矣一而同之之道尚有可充者乎生聚教养之民因其生而厚之者亦既周矣协而雍之之道尚有可致者乎上览毕命用其次一篇即所问九圣之道者是岁有旨修皇朝经世大典以公与中书平

章赵公子敬全任总裁公移文阁中言建大厦者必藉衆工之长田甫田者岂责一夫之力大典之书所以见宗祖创业之规模列圣继承之次第圣上睿思之深远国家治体之详委事体大重关系非轻今院监官员多兼他职不无分其心力其专执笔者数人而已切见礼部尚书马伯庸识见详密多闻旧章国子司业杨廷镇素有历象地理记问度数之学可共典领修撰谢敬德应奉苏伯修大常李惟中国子助教陈衆仲前詹事院炤磨宋显甫侍仪通事舍人王继志俱有见闻精力优赡可共笔削如蒙转以上闻许令添助撰録庶几是书早成议未定而上命阁学士专率其属为之公遂兼修治典治典者大典臣事六篇之首凡国家诏旨官府建置沿革宰相拜罢年月世家功臣勲业始末官吏黜陟之例廷臣条列之议莫不系焉文字浩穰卷帙山积祁寒盛暑未尝少休也俄赵公告归公遂专领其事閱两岁书始成为八百册以进是日宴於兴圣殿受书览之大悦复命礼部尚书巉公子山别制为小方册以便观省行幸则以二驼载之驾前时公以目疾丐解职不允乃上章举治书侍御史马伯庸自代其辞曰臣某猥以疎远仰荷圣恩拔诸凡庶之中置在清华之列参侍书帙之顾问仍仝史馆之编摩儒者至荣叨承过望乃者目生内障今岁弥深文字不分视瞻如隔或蒙召对每惧颠跻敢因求退之诚切效荐贤之报伏见侍书侍御史马祖常高科进士昭代奇材已被简知敷历台省观其退食之暇手不废书每期上接於古人不肯苟安於常见其制作刻之金石而无愧其雅颂被之弦歌而有余揆诸等伦允为超异切见本阁学士多以近臣宰辅兼职如以本官兼代微臣侍书职事使之出赞肃肃入陪秘殿之论思黼黻皇猷实愜衆望以闲局而扳要职或貽诮於衆人以君子而有多能固宜兼於数用庶几贤人毕效谋为而臣得以桑榆遍求医药稍全目力可竭心思追寻末学之微歌咏圣朝之盛时御史中丞赵伯寧为上所信用乘间为公请曰虞伯生久居京师甚贫又病目幸假一外任使得便医药他日复召用未晚也上怒曰一虞伯生汝辈不能容邪乃已初上在潜藩已知公名尝幸治亭见所题榜命左右摩取观之馆阁文史之间号为散地无所与乎国而上方向用文学开奎章阁置学士员立艺文监以治书籍设艺林等库任摹印将大修圣贤经传之说以为成书知名之士多见进用自中朝至於外方金石之锡承诏撰作几无虚日以公弘才博学无施不宜一时大典册咸出其手故重听其去公每涉笔论思不忘规切承顾问及古今政治得失尤委曲尽言冀有所裨益用事者患其知遇日隆渐多论建思有以间之而潜言兴矣赖公夙诚雅望敷历有自故不能有所中伤尝被旨撰一佛寺记其处有前代遗迹适进对上问曰人言汝前代相臣子孙今为是文适美前事尔公对曰前代远矣其臣庶子孙不忘本初者已鲜有能思其祖父而不忘其祖父所事者必忠孝之士也臣不足以此能为陛下言此者必忠孝人矣今臣等幸以疎庸际遇圣时政位通显泽流後嗣庶几子孙世世不忘朝廷厚恩则诚犬马至愿故臣以为非忠孝之人不能为是言上目一侍臣叹异之勲旧有得赠封王者公已受命草制适同列二人至言有旨姑封为国公二人亦上所亲近公不复疑即草制以待俄丞相自榻前来趣书制甚急公以草藁进丞相愕然公知为同列所给不复言即改易以进向非公为之隐二人者且得罪矣度量率多类此既归江西复有终隐之志先世有赐田宅在吾门而力不能东踰二年乃克於故庐之西筑室以居益讨论旧学俯而诵仰而思不以闲退自佚暇日引宾客从以门生子弟徜徉山水之间咏歌圣神寤寐先哲不知年岁之晚也圣明在上顾念儒臣无间疎远屡有勅即家撰文以锡近臣及老氏之宫公卿大夫思有所论载者冠盖相望於道四方之士不数千里登门其欲考典礼之逸遗以尽乎一代之制作者亦必以公为归朝廷修先代史大臣有欲起公任其事者既而弗果议者惜之然公素重兹事晚复失明殆不可为矣崇仁当故宋时为令者尝劝其

大家出钱买田收租入以待荒歉名其仓曰平粜内附初其惠犹在既而以其田上不在官下不在民粟米力役之征无所从出遂沦入於道士之观官吏无复建白岁久不能复公归屡为部使者言之又以告故交之在行省者率复其旧邑人受无穷之利矣始感疾即呼长子付以後事卧病旬余饮药辄不效医潜易他药以进公心知为重剂却不服且解之曰吾脉甚平息甚均吾中甚安然不复起则命也复何求哉又旬日大风动地飘瓦拔屋前後巨木数十株居人震恐公神气愈澄彻语言简远如平时诸子复进以药公曰吾病殆非药所能治矣持去毋溷我五月丙辰夜起危坐甚急畧问家事子弟俱侍立意其遂逝有哽咽者公从容慰之曰未须诀别也已未迺革治命以深衣敛勿用浮图公性孝友方二亲以故家令德中遭乱亡侨寓下邑左右承顺无违少与嘉鱼令同学於家父子兄弟间自为知己公哀嘉鱼早歿不得大施於世视其孤不异已子孟兄采以笕库输赋京师稍失检察比至折閱数千缗公尽力营货代为偿之无难色抚庶弟裴嫁孤妹具有恩意常以禄不及亲为叹遇珍膳未尝尽器虽盛暑不以童子挥扇曰劳人以自佚君子不为也自幼为学则有雅度山林之士有所见闻者必倾已下之老而不厌岩穴隐沦抱负积蓄不能自见者咸就其所至为之表章好接後进虽齿少且贱与之论辨扣擊如敌已论荐人才必先器识心所未善不为牢笼以沽名誉监别文字是非得失不折之於至当不少止其诡於经者文虽善不与也然亦以是二者忤物速谤致取忌於时最善清江范公德机称其制作妙入神品其卒也尤哀之舟过清江抚存其孤子为之慨然方权门赫奕公视之邈然雅为张察公赵鲁公所爱敬赵公之归公请召复职上从之而赵公不复起矣自余知公者虽或浅深不齐然与之言必尽其诚会议朝堂论政荐士多见容受屡以片言解疑误出人於滨死亦不以为德也娶赵氏系出宋宗室秦邸累封雍郡夫人前公四十一年卒子男四人安民以荫屡官奉议大夫广州路东莞县尹□□大夫惠州路府判延平广东宣慰司从事秩满授武缘县博合寨巡检翁归参政干公至江西辟为其省宣使高门未仕女一人适谈绂孙男五人虎孙纯阳原阳贞阳□□女一□□□□呜呼昔者孟子没历战国至於秦汉遗经仅存当时号称能言之伦已莫能尽知其说魏晋而降注意渐广而好简者相尚以清虚词章愈繁而厌末者遂宗於寂灭豪杰之士奋乎其间求一言之几於道而不可得也至於近代作者勃兴而後六经羣圣人之书本诸其身而可以措诸天下国家者焕然复明於世所谓罔极之恩乎宋熄其炎山林奥学之儒日以老死言之而不谬举之而不违几希矣况乎知学之有自而辨其微因其所知以极其所未至者哉公以絶人之资承家世之远自其亲庭传习已极渊微又得一世大儒以端其轨辙其於前哲之所发明者彙聚部分凿如金石因言见志慨然有千载之思焉遭遇盛时以经筵胄监翰苑台阁历事圣明名声震於当世固乃逊志於退休之余玩心於义理之微以终其身而无间於死生之变吾党小子盖有不足以知之者矣公於诸经之说不专主一家必博考精思以求致用之道谓易因卦立言畅於周公究於孔子首尾完具生乎千载之下而仰观千载之上以凡人之资而欲窥见天与圣人之道不可下此而他求也尝得江东谢仲直氏传授之说以先天八卦圆图为河图九数而九位为洛书而十数而五位者为五位相得之图心雅善之或请着论以伸其说则曰易道广大何所不该诚得其自然之数则无往不合也然先儒有成言焉当存之以俟知者其不苟异如此谓学而修之则可以行之者惟礼为然治经者当以为先务其经传虽多残缺惟二戴氏书杂以文士记变礼之得於传闻者不可尽据以为信其余则尧舜三王之遗说天子诸侯大夫士之成制大畧具在不可以浅近窥也然欲因时制宜使不失帝王之意则非明智之士不足以及此尝欲上泝下沿通古今为一书使後之观会通者有考焉以见用於朝弗克就近代儒先

君子之衆自濂洛新安诸贤外参立并出其人皆未易知其学皆未易言也公以高情远识尚友古人皆就其所存以极其所至而慨夫吾党之士知之者微矣尝欲取太原元公中州集遗意别为南州集以表章之惜篇目虽具而书未及成临川吴公当弱冠时即以斯道自任据经析理穷深极微莫之能尚也及乎壮岁犹幡然以为非是知类入德之方上达日新之妙盖有同游之士所不及知而公独得闻之者矣吴公没其书大行读者各以所见求之往往失其本真公每为推本吴公成已之要以告人而後愿学者得以致其意焉尝言先儒於致知之目其考乎二氏者皆将有所辨正非博闻之谓也盖尝接其徒扣其所以为说然後叹夫圣人之教不明学者无所据依以为下学上达之地而欲切究性命之原死生之故其不折而归之者寡矣其於为文主之以理成之以学即规矩准绳之则以尽方圆平直之体不因险以见奇也因丝麻谷粟之用以达经纬弥纶之妙不临深以为高也陶熔粹精充极渊奥时至而化虽若无意於作为而体制自成音节自合有莫知其所以然者比登禁林遂擅天下学者风动从之由是国朝一代之文蔼然先王之遗烈矣尝题其稿曰道园学古録门人类而辑之得应制稿十二卷在朝稿二十四卷归田稿三十六卷方外稿八卷余散逸者尚多存其可得而编次者为拾遗若干卷尝言古之君子有所不为其所当为者未尝苟也故於字书音律星历医药之说皆留意不倦篆隸得汉人笔意行楷直抵晋唐虽以书名家者咸推让焉泐以穷乡晚进无闻於当世之作

东山存稿卷六

卷七

●钦定四库全书

东山存稿卷七

（元）赵汭撰

○文

汪古逸先生行状

先生姓汪氏讳炎昶字懋远自号古逸民学者称为古逸先生曾祖冲祖天衢父季安世居新安之婺源新安汪氏繇唐越国公华始显大中间有讳道安者自歙州兵马使充婺源镇都虞候生银青光禄大夫检校太子宾客兼御史大夫上柱国某柱国初自婺源镇将徙三吴镇因家於上游十里大畈今大畈汪氏皆其後也先生幼有奇志然短於记诵常以坚苦自励至忘寝寐遂於书无所不读鉤深探赜洞极渊奥虽素号博学者蔑能加也其学渊源六经得程朱性理之要於言意之表取朱子论语孟子大学中庸四书采择羣书发挥微旨每有得则疏之不汲汲於成书长身修髯衣冠甚伟动静语默进退之间超然不随流俗巧利鄙诈之士闻其风而意消见之者莫不悦然如有所失也宋太学生孙公嵩元京国亡归隐海宁山中杜门赋咏锻苦链枯凄断沦絶以寄其没世无涯之悲先生早从孙公游亦善为诗遂絶意当世婺源有江君凯伯几者许公月卿之客也许公者宋名进士国亡归隐婺源山中制齐衰服之以居奇江君归以其女故江君亦不求仕而独与先生游江氏所居号雪缸有涧泉林木之胜日与先生徜徉其间赋诗饮酒上下古今抵掌剧谈以相娱乐世或比之古者山泽列仙之俦以为非今之士也然先生虽老矣犹不废讲学时海宁有陈壽翁先生方家居着书尝请先生所注四书观之先生与陈公初不相识即尽送其书陈公所且告之曰平生无他技能唯不护疾忌医是其所长千万不必致疑於直言也时先生年近七十犹求益不厌如此陈公每诵其言以励登门之士先生教人必使循序而进去华务实勿徇虚名於古文章得昔人用意深处每指其律度绳削以示人而戒毋轻作其自为文奇而有法诗微婉遒劲亦时出於悲壮激烈云先生蚤丧父事母孝每先事周旋常恐少失母出一言奉之唯谨家常不足於食然自视无可为者教授之余未尝有所计度或反关不出动十数年然时节必力致美肴饍以奉其亲虽老不怠太夫人年登九十若不知其家之贫也至正戊寅夏四月先生寢疾呼其子淮琛使具蔬食菜羹既设整冠起坐稍进饭啜羹置筯谓淮琛曰事死如事生祭不必丰羹饭之谓也言訖反席正身敛手晏然而逝是月二十四日也得年七十八岁娶江氏子男三淮琛照乘为弟禹玉後棠金蚤卒女适詹某孙男三药树琪树芳树先生卒时皆幼所注四书集疏未脱藁诗文多散佚不存淮琛尝刻诗五卷於家同郡方公万里见先生所为诗辄叹曰不意吾州复有此人巴西邓公善之与孙公有世契宪江东日行部休宁求孙公已捐馆因得先生所作赋一篇及他文曰此柳子厚之笔也又有传先生诗数十篇至江西者蜀郡虞公伯生见而叹曰此豪杰之士也山林中乃有名作若是者乎其为名流所称如此新安自朱子後儒学之盛称天下号

东南邹鲁宋亡老儒犹数十人其学一以朱子为宗其论议风旨皆足以师表後來其文采词华皆足以焜煌一世国初沆祖长卿貳令星源自许公而次如胡公济鼎吴公遜翁者无不得而友之而滕公山臞方为主簿故家承平时所藏诸公文翰最多沆尝抚卷慨然以生晚不见前辈为恨及从先生游然後知先进之士所以不可及者其立身行已流风余韵莫不皆有所自云先生之歿从孙叡与淮琛来谓沆宜状先生行沆谢曰尝闻録贤者必详其所终今窀穸之事犹未有期也幸而克襄其何敢辞後十有九年叡始克买地於同里黄荆山高路之原奉先生柩■〈穴上之下〉焉而以书来告其事则淮琛之死已踰一年矣呜呼以沆之不肖其能知先生所蘊而称述之耶若先生卓然上友千古则有不待学者之言而有不亡者矣姑録其梗概如此後有君子尚克表章之

黄楚望先生行状

先生讳泽字楚望其先长安人唐末有官於蜀者知资州内江县曰舒艺卒葬资州次子师明留居後遂为资州人师明长子知权知丹山县事知权长子延节宋初以德行道艺闻拜宣德郎通判渠州讨寇有功召入面奏当世利害剴切太祖大悦除大理寺评事兼监察御史以子德润德全官稍显累赠金紫光禄大夫季曰德柔先生十世祖也五世祖拂与二兄播揆同年登进士第蜀人荣之为赋诗称美其事考某字仪可以孝友闻累举不第随兄驥子官九江蜀乱不复能归因留家九江而贫日甚矣先生生有异质日诵数千言年十二三即尽通当代进士经义论策之学内附国朝年十六矣慨然以明经学古笃志力行自励好为苦思屡以成疾疾止则复苦思如故尝见邵子论天地自相依附既以此思之因及河图洛书浑天盖天吾道异端不同之故以为格物致知之端孰有大於此者昼夜思之弗得弗措也年二十余始旁通古今史志别集诗文皆不习而能诗尤超迈清美久之於周程张朱之书有得作顔渊仰高钻坚论以自勉是时行省钜公犹有尊贤敬学者屡以书院山长之禄起先生教授江之景星洪之东湖考满即归闭门授徒以为养悉取六经百氏传注疑义千余条离析辨难以致其思不复言仕矣始先生尝梦见夫子以为适然既而屡梦见之最後乃梦夫子亲授所校六经字画如新其家无一亩之殖而决意归休以六经絶学为己任盖深有所感发也时大德甲辰先生年四十五矣自是以来十余年间屡悟圣经隐赜之义凡数十处而失传之旨以渐可通乃作思古吟十章极言圣人德容之盛上达於文王周公以致其寤寐不忘之意时郡守寓公犹有能敬重先生者待先生以学校宾师之礼月致米六斛钞三十千盖国初贤守设此以奉致政寓公之无归者方二亲高年陋巷破窻不蔽风雨先生敬恭奉持菽水驩然如有三牲之养也又十余年而二亲相继终先生年近六十矣数经岁大祲家人采木实草根疗饥行部有蔡副使者考学者之籍谓先生一耆儒尔月廩太丰削其三之二时先生老不复能教授而家人辈饥寒自此始矣当其絶食相视默默不知所出而先生瞑目端居涵泳优游未尝少变或与客谈论终日揖让如平时客不知先生未饭也然终不为一日降志以谋温饱唯以圣人之心不明经学失传若已有罪用是为戚盖自昔所闻儒学之士贫屡空乏以终其身未有若斯甚者而先生晏然曾不少动其意非有高明卓絶之见坚苦特立之操其孰能与於此先生卒於至正六年丙戌月日得年八十有七以郡人王仪甫所归棺殮九江学者盖少先生又深自韬晦不求闻知唯待人接物则无贵贱长幼一致其诚故死之日远近闻者莫不哀之娶某氏子男二圣予幼者早夭女二刘齐贤徐可久其婿也孙男二女一先生於经学以积思自悟为主以

自然的当不可移易为则故其悟也或得诸幽闲寂寞之余或得诸颠沛流离之顷或得诸疾病无聊之日或得诸道途风雨之中及其久也则豁然无不贯通自天地定位人物未生以前沿而下之凡邃古之初万化之原载籍所不能具者皆昭若发蒙如示诸掌然後由伏羲神农五帝三王以及春秋之末其人伦之端礼乐之本皇道帝德神化宜民之妙井田区画之初封建自然之势鬼神祭祀之始神物前民之用起数立象之机声教文治之原制作因革之渐忠质文异尚之体世变礼失之由以力假仁之习皆若身在其间而目击其事者於是易春秋传注之失诗书未决之疑周礼非圣人书之谤凡历代聚讼不决数十年苦思而未通者皆水解冻释怡然各就条理盖由专精积久而後得之每自以为天开其愚神启其秘也其於易以明象为先以因孔子之言上求文王周公之意为主而其机括则尽在十翼作十翼举要以为易起於数因数设卦因卦立象因象起意因意生辞故孔子曰易者象也立象以尽意居则观其象而玩其辞圣人言易之为教如此易不可废象明矣由象学失传汉儒区区掇拾凡陋不足以得圣人之意而王辅嗣忘象之说兴至邢和叔则遂欲忘卦弃画虽以近代钜儒继作理学大明而莫能夺也作忘象辨有一卦之象有一爻之象或近取诸身或远取诸物或以六爻相推或以陰阳消长而为象学者犹可求也然有象外之象则非思虑意识所能及矣而况於立例以求之乎李鼎祚缀缉於王氏弃擲之余朱子发後出而加密丁易东继之而愈详圣人立象之妙终不可见作象略象学既明则因象以得意因意以得辞陰阳消长有一定之几上下贵贱有一定之分善恶吉凶有一定之则位之当者孔子无由独言其非卦与爻之小者文王周公固不谓之大然後知三圣人之易一而已矣若舍象而求则人自为易不期於异而自异作辨同论尝曰易有八卦有六十四卦有三百八十四爻有大象有小象有大传繫辞有说卦有序卦有杂卦有河图洛书蓍策之数学者当随处用工各诣其极至於一以贯之而後全易见矣其於春秋以事实为先以通书法为主其大要则在考核三传以求向上之工而其脉络则尽在左传作三传义例考以为春秋有鲁史书法有圣人书法而近代乃有夏时冠周月之说是史法与圣法俱失也作元年春王正月辨又以为说春秋有实义有虚辞不舍史以论事不离传以求经不纯以褒贬泥圣人酌时宜以取中此实义也贵王贱霸尊君卑臣内夏外夷皆古今通义然人自为学家自为书而春秋迄无定论故一切断以虚辞作笔削本旨又作诸侯取女立子通考鲁隐公不书即位义殷周诸侯禘祫考周庙太庙单祭合食说作丘甲辨凡如是者十余通以明古今礼俗不同见虚辞说经之无益尝曰说春秋须先识圣人气象则一切刻削烦碎之说自然退听矣其但以爲錄实而已者则春秋乃一直史可修亦未为知圣人也其说易有常变而春秋则有经有权易虽万变而必复於常春秋虽用权而不远於经各以二义贯一经之旨尝曰易象与春秋书法废失之由大略相似苟通其一则可触机而悟矣盖古者占筮之书即卦爻取物类象悬虚其义以断吉凶皆自然之理乃上古圣神之所为也文王周公作易特取一二立辞以明教自九簪之法亡凡簪人所掌者皆不可复见而象义隐微遂为百世不通之学矣鲁史记事之法实有周公遗制与他国不同观韩宣子之言可见圣人因鲁史修春秋笔则笔削则削游夏不能赞一辞则必有与史法大异者然曰其文则史是经固不出於史也今鲁史旧文亦不可复见故子朱子以为不知孰为圣人所笔孰为圣人所削而春秋书法亦为历世不通之义矣先生所谓废失之由有相似者盖如此又惧夫学者得於创闻不复致思故所着书目虽多皆引而不发乃作易学滥觞春秋指要经旨举略稽古管见示人以求端用力之方而易春秋全解则终身未尝脱藁示人也其辨释诸经要旨则有六经补注诋排百家异义则取杜牧之不当而言之意作翼经罪言其论周礼以为六官所掌皆

修唐虞夏商已行之事虽有因革损益或加详密而大体不能相远非周公创为之制也古今风俗事体不同学者不深考世变而辄指其一二古远可疑者以为非圣人之书此不难辨独其封国之制与孟子不合则所当论盖孟子所言因殷之制周官乃国家之制也计武王兴周殷诸侯尚千有余国既无功益地亦无罪削邑此当仍其旧封百里之下为三等如孟子之说乃若周公太公有大勲劳及其余功臣当封爵与夫并建宗亲以为藩屏岂可限以百里之法哉自当用周制耳诸侯恶其害已而去其籍是书当世学者鲜得见之则周家一代之制虽孟子亦有不能详也其於官属多寡之由职掌交互之故错乱之说发尤精当其祭祀之法则兼戴记而考之作二礼祭祀述畧礼经复古正言其辨王肃混郊丘废五天帝并崑仑神州为一祭之说曰祭法虞夏殷周皆以禘郊祖宗为四重祭周人禘尝而郊稷祖文王而宗武王禘祭天地以尝配即圜丘方泽是也郊祀上帝以后稷配建寅之月南郊祀感生帝以祈谷也四时祀五天帝於四郊以迎气也祖禘尝以后稷配尊始祖之所自出也宗祀文王於明堂以配上帝总配五天帝也其後则祖文王於明堂以配上帝宗武王於明堂以配五帝凡此皆郑氏义也故周礼大司乐注以圜丘方泽宗庙为三禘盖天神地祇并始祖之所自出为三大祭皆五年之禘也郊次圜丘社次方泽宗次祖皆常岁所举之祭也东迁土蹙财匱大礼遂废所修唯郊社二祭故圜丘方泽二禘传记亦罕言之非浅闻所及矣周礼有祀天旅上帝祀地旅四望之文天地主於一故称祀上帝四望非一神故称旅肃欲以圜丘为郊可乎司服王祀昊天上帝服大裘而冕祀五帝亦如之既曰亦如之则五帝之祀与昊天上帝非一祭矣肃欲混之可乎孝经称严父配天又称郊祀后稷以配天宗祀文王於明堂以配上帝易豫卦曰先王以作乐崇德殷荐之上帝以配祖考上帝亦天神也肃欲废五天帝而以五人帝当之可乎崑仑者地之顶神州者地之中皆天地之所交也地祇主崑仑神州非是设此二祭乃求神於二处大地神灵莫测不知神之在彼乎在此乎故求之於彼亦求之於此也康成以方泽主崑仑北郊主神州北郊不见於经误分为二王氏由此并崑仑神州为一祭而遂谓北郊为方泽可乎若郑氏知乐九变之祭为禘而不言及尝又以为禘小於祫此则其失也故断之曰郑氏深而未完王肃明而实浅晋武帝肃外孙也故用其说并方圜二丘而祀南郊历代无所因袭而周礼天神地祇人鬼极盛之祭遂为古今不决之疑矣其辨感生帝之说曰姜嫄履帝武敏歆而生后稷周人特为立庙而祭谓之閼宫君子以为圣人之生异於常人无异义也况乎生民之初气化之始五天之精感而为帝王之祖亦何疑乎五帝感生之祀上世流传既久非纬书创为之说也且河图洛书蓍策之数皆纬文也其可废乎其辨胡仁仲以社为祭地曰二社以享水土谷之神而配以勾龙稷非祭地也礼天子诸侯羣百姓大夫及庶民皆立社故有王社侯社大社国社置社之名其义高下不同如此而谓之大祇之祭可乎殷革夏周革殷皆屋其社是辱之也旱乾水溢则变置社稷是责之也王者父事天母事地而可责可辱乎周礼王祭社稷五祀则希冕以社稷下同五祀而用第五等之服不得与先王先公四望山川比则社非祭地明矣传曰戴皇天履后土是后土则地也周礼大祝大封先告后土大师旅大会同宜於社又建国先告后土则后土非社矣舜典类於上帝禋于六宗望于山川六宗者上下四方之神即五天帝及地也故其祀在上帝之次山川之前周礼四望与五帝同兆于郊又与祀地同玉又与山川同祭服则四望者祀地之四方也又有分乐所祭五土之祇祭地之礼不止於方泽矣而欲以社当之可乎周礼以圜丘对方泽以天神对地祇以苍璧礼天对黄琮礼地以祀天旅上帝对祀地旅四望书及礼记乃多以郊对社盖郊祀上帝社祀水土之神其礼专圜丘方泽徧祭天神地祇其意广远分为四祀明矣天地之道高深玄远大神大祇不可烦渎故岁事祈

之於郊而水土之变则责之於社此古人立祀深意也胡氏家学不信周礼故率意立说如此大抵先生之意以为圣人制礼远近亲疎高下贵贱皆有自然之序必通其本原而後礼意可得盖圜丘所祭者全体圆转之天总南北极赤黄道日月星辰所丽者而言故主北辰而曰天神皆降是总祀天神也上帝者高高在上之天以其在上而为主宰故曰上帝分主五方故曰五帝合上下四方而言则曰六宗皆天神之分祀者也方泽所祭者全体承天之地总山陵川泽极天所覆者而言故主崑仑而曰地祇皆出是总祀地祇也地有四方望其方而祀曰望五岳四渎之祀曰山川川泽山林丘陵坟衍原隰之祀曰五土水土之祀曰社皆地祇之分祀者也所谓自然之序盖如此其辨赵伯循王者禘其始祖所自出之帝於始祖之庙以始祖配之而不及羣庙之主曰大传王者禘其始祖之所自出以其祖配之诸侯及其太祖大夫士有善省於其君于祫及其高祖此以禘与祫对言则禘祫皆合祭通上下文见之也盖诸侯之祫犹天子之禘诸侯及其太祖大夫士及其高祖是有庙无庙之主皆在而又上及其太祖高祖故谓之祫天子则於七庙及祧庙之上更及其所自出之帝故谓之禘也若曰禘其祖之所自出而反不及有庙无庙之主寂寥简短非人情矣故程子曰天子曰禘诸侯曰祫其礼皆合祭也尔雅禘大祭也非大合昭穆何以谓之大祭乎字书训释曰禘者谛也审禘昭穆也若非合祭何以有昭穆乎盖后稷有庙郊既祀帝嘗虽配天而无庙不可阙人鬼之享故五年一禘则后稷率有庙无庙之主以共享於嘗所以使子孙皆得见其祖又以世次久远见始祖之功德为尤盛也况后稷之庙毁庙数十世之主皆藏焉岂可当享嘗之时而屏置之乎盖禘祫所以相乱者由天子诸侯之制不明先儒或推天子之礼以说诸侯或推诸侯之礼以说天子不知诸侯之礼有祫无禘天子之禘礼必兼祫虽其意不主合食而率子孙以共尊一帝自然当合食矣礼曰天子犝禘祫祫尝祫蒸则是天子祫祭随时皆用也其辨成王赐鲁天子礼乐曰周公相成王制礼作乐为天子诸侯不易之大法身没而王与伯禽躬为非礼以享周公成王贤王鲁公贤君必不至是以鲁颂白牡騂刚推之则记礼者之过也禘者殷诸侯之盛祭周公定为不王不禘之法故以禴代之成王以周公有大勲劳於王室故命鲁以殷诸侯之盛礼祀周公以示不臣周公之意故牲用白牡白牡者殷牲也騂刚鲁公之牲也又可见鲁公以下皆合食於太庙而礼秩初未尝敢同於周公又以春秋推之则亦非常岁之祀成王斟酌礼意盖如此而非有祭文王为所自出之礼如或者之云也其禘於羣公之庙则後世始僭之然晋亦有禘盖文公有勲劳於王室欲效鲁禘祭而请於天子故得用之也若夫东周诸侯为所自出之王立庙称周庙如鲁与郑是也然止谓之周不敢以祖庙称之诸侯不敢祖天子也然则子孙亦不敢与享於庙单祭所自出而已祭用生者之祿则亦用诸侯之礼而已若鲁既得禘於周公之庙则周庙亦应用禘禘必有配则固宜於文王庙以周公配也若据赵氏则鲁本无文王庙止於周公庙祭文王临期立文王主与尸以享之此於礼意实不相似若以为有文王庙则是自文王庙迎尸以入周公庙以父就子以尊就卑必不然也鲁之郊大雩则平王之世惠公请之是以得郊祀苍帝而三望虽僭而犹未敢尽同於王室也盖以鲁有天子礼乐为成王赐者本明堂位祭统以为惠公所请者出吕氏春秋鲁郑周庙晋有禘祀见左传先生以经证经而折衷百氏之说多如此其辨说诗之失以为古者重声教故采诗以观所被之浅深然今三百篇有出於太师所采者周南召南是也有録於史官而非太师所采者豳风及周太史所作是也其余诸国风多是东迁以後之作率皆诸国史官所自记录方周之盛美刺不兴汉广江沱诸诗虽是诸侯之美而风化之原实繫於周其後天子不能统一诸侯诸侯善恶皆无与於周故不以美刺皆谓之变风以其不繫於二南而各自为风也周礼王巡狩则太史太师同车

又其官属所掌皆有世奠繫之说方采诗之时太师掌其事而太史錄其时世及巡狩礼废太师不复采诗而後诸国之诗皆其国史所自記錄以考其风俗盛衰政治得失若左传於高克之事则曰郑人为之赋清人庄姜之事则曰卫人为之赋硕人必有所据矣故大序曰国史明乎得失之迹伤人伦之废哀刑政之苛吟咏情性以风其上达於事变而怀其旧俗是说诗者不可不辨采诗之时世也黍离降为国风此时王泽犹未竭也故人民忠爱其君犹能若此其後听既玩而言者亦厌遂与之相忘则虽国风亦不可复见至此则书契以来文治之迹始剗絕矣以时考之国风止於泽陂在顷王之世当鲁文公之时故曰王者之迹熄而诗亡故说诗者尚论其世也先生经学自得之说为多以其书不传故掇其關於体要者着之当其时唯临川吴文正公辨学正谊尽通诸经最为知先生者後吴公拜集贤之命至扬而还养疾九江濂溪书院初见先生所着易学濫觴春秋指要心大善之题其卷端曰楚望父之着经也其志可谓苦矣易欲明象春秋欲明书法盖将前无古而後无今又得六经补注观之谓学者曰今人无能知黄楚望者孟子曰能言距杨墨者圣人之徒也楚望其人乎亦为序以归之其略曰楚望贫而力学读易春秋周官礼记为之辨释补注弘纲要义昭揭其大而不遗其小究竟谨审灼有真见先儒旧说可信者拳拳尊信不敢轻肆臆说以相是非用工深用意厚以予所见明经之士未有能及之者也晚年见此宁不为之大快乎予叹美之不足因以验於学者盖必於诸经沉潜反复然後有以见其用工之不易用意之不苟云然先生雅自慎重其学未尝轻与人言以为其人学不足以明圣人之心志不以六经明晦为己任则虽与之言终日无益也学士李公溉之使还过九江请先生於濂溪书院会寓公缙绅之士躬定师弟子礼假馆庐山受一经之学又将经纬先生家为子孙计先生谢曰以君之才辍期岁之功何经不可明然亦不过笔授其义而已若予则於艰苦之余乃能有见吾非邵子不敢以二十年林下期君也李学士为之叹息而去或谓先生幸经道已明於已而又閤於人如此岂无不传之惧乎先生曰圣经兴废上关天运子以为区区人力所致乎德化县令王君子翼请刊补注藏先生家先生犹慎重之非其人不传也荐经寇乱故宅为墟遗书之存者鲜矣悲夫先生宁使其学不传於後终不肯自枉以授诸人是故能以数十年之勤尽究诸经於阙塞之余而不能使圣人之心大明於天下後世盖其道若是也岂非天乎昔者吾夫子赞易删诗定书正礼乐修春秋将以为百王大典遭秦焚书灭学帝王经世之法遂斩然泯絕於斯时盖自开辟以来宇宙横分一大变也郑康成当专门固陋之世以一家之学纂释羣经具着成说孔颖达考核百家大明郑义虽於圣人之道无闻而博古穷经斯亦勤矣自是四百余年习为定论至宋清江刘原父始以聪明博洽之资据经考礼欲尽排周秦以来传注之失宋代经学之盛刘公实张之而说者曰亲矣及子朱子出而羣言有所折衷遂定於一犹吾夫子之志也然朱子於易简其辞微其义将使皆得自致於经晚岁犹拳拳礼学而弗克论着其成书贵阙疑而又深疑古今文之异体春秋独得书法废失之由折衷诸传各极其当矣而门人学者於二经师说不能有所发明故君子论古今经注以为自朱子诗集传之外俱不无遗憾也先生乃欲以近代理明义精之学用汉儒博物考古之功加以精思没身而止此盖吴公所谓前无古而後无今者也呜呼其遂不传也欤汭始拜先生於其门请问治经之要先生念其远来不以为不可教告之曰在致思而已然不尽悟传注之失则亦不知所以为思也请问致思之道先生曰当以一事为例礼女有五不娶其一为丧父长子注曰无所受命近代说者曰盖丧父而无兄者也女之丧父无兄者多矣何罪而见絕於人如此其非先王之意明矣姑以此思之或二三年或七八年倘得其说则知先儒说经其已通者未必皆当其未通者未尝不可致思也汭退而思之女之丧父无

兄者诚不当与逆乱刑之子同弃於世久之乃得其说曰此盖宋桓夫人许穆夫人之类尔故曰无所受命注犹未失也若丧父而无兄则菑功之亲皆得为之主矣尝以质於先生先生曰子能如是求之甚善然六经疑义若此者衆矣当务完养而慎思之母轻发也遂授以求春秋之要曰楚杀其大夫得臣此书法也当求之於二百四十二年之内夫人姜氏如齐师此书法也当求之於二百四十二年之外汧思之经岁不得其说先生为易置其语曰夫人姜氏如齐师此书法也当求之於二百四十二年之内楚杀其大夫得臣此书法也当求之於二百四十二年之外汧盖自是始达春秋笔削之权乃知先生於六经之学以其所自得而教人者盖如此惟易所谓象外之象则有不可得而尽闻者呜呼悲夫有遗恨矣谨述先生世家文行大概与其经学复古之功如右伏惟立言君子以当世斯文为已任者尚克表章之至正十有二年十有一月朔学生新安赵汧谨状

长乐县程令君行状

令君讳愿学字希圣别字节卿徽之休宁人其先自晋新安太守元谭以治郡有绩锡褒诏赐田宅於郡因留家焉十三传而至忠壮公父子以节义显於梁陈庙食其乡子孙蕃布天下而休宁之族尤繁衍多闻人君上距忠壮公二十有六世十二世祖南唐检校中丞澧始占居邑南■〈彡义〉川曾祖大明祖自得父逢午字信叔再领乡荐一为魁不第即弃去举子业弗为家居教授所学日益精诣族父勿斋先生雅敬之每过公所谈论辄竟日数郡交荐版授紫阳书院山长着中庸义说数文言益畅朱子之旨以为教学者多所发焉秩满授嘉兴路海盐州文学命下而卒追赠承事郎徽州路同知婺源州事母吴氏追封宜人子二人令君其嫡长也少卓犖有奇志慎交游重然诺以行义自砥砺甫冠游京师钜公名士莫不倾倒尝黎明与其友出郭外道过大第友入谒谗令君少俟比出已暮令君犹俨立不去蜀人赵公炆职秘府闻而嘉之即造令君与语大悦即日挈行李过其馆授策焉居无何有旨修职方氏书赵公亟荐令君入书局书成同辈俱被优用令君独後久之乃擢从事兵部部从事数十人惟令君为南士毅然特立俦列不敢慢尝奉旨将段帛劳诸侯王之戍和林者□□王事屡往来岭北不以艰远辞也秩满调镇江路司狱旦暮出入犴狴察其寒饥痼疾者而时其衣食尝叹曰彼固罪人然或以非罪死则岂天讨之谓哉比满几无以为归适有诏下府君乃以令君宣诏诸邑时使者所至郡邑皆敛诸民以为之赈府君夙敬令君欲以是为归计也比至属县卒事吏以常例致赈令君呵曰我以賁诏来而取民财以去乎督其还诸民而後行比至他邑亦如之迁湖洲武康县主簿明法令申约束革其弊政豪右武断者媚之相率重赂大府俾令君以他役入京比还则以忧去职矣服除转循州长乐县尹循介闽广之交远宦者蛮夷其民弛法废度肆其贪虐依托官府剥下归上者县率数百人而长乐以僻远尤甚居民迫渔夺困征敛率逃窜他郡其尤桀黠者负险隘操鋌挺以自卫间有出身奉上不避徭者脏猾利其资产中以他祸足涉城市而家破矣君始至则尽得其奸党巢穴发以他事悉断遣还其乡里整饬案牒申明德意植贫弱寛徭赋分遣耆老入其乡申谕朝廷治意民信其所为流亡之衆来归者不可胜纪县治所寓生聚日蕃渐可比内郡都邑乃建先圣庙於治之西南胜地择其士之有学者为之师山谷之民大冠长裾来游来息彬彬然见先代之遗风焉时上司人往来属邑辄托散土宜以钓重贿邑则掊诸民以赠之君独却不纳而自割俸薄赠之人知君风裁不敢受而遂不复来矣如往他邑则间道不敢令君知之邑有赖某妄诉黄某刼掠财物事连数十人黄被

讼不知所为举族逃匿已五载矣州移檄下索罪人甚急黄闻令君至即诣公庭自归君呵曰汝盗也而逃耶黄泣诉曰某与赖争拦喝耳非盗也不逃即举家齏粉矣今闻邑有贤君愿得自明君曰汝窜者甚衆今一人来安能明乃与刻日令尽领同窜者至黄诺而去上司以君擅纵强盗问罪黄所领先期至郭夕闻之皆散去黄独叹曰我宁死不忍累程县尹也乃受逮州尝以他名色敛民财愤君不受命欲因此中伤之令黄诬君前尝受赇黄曰某陷非罪不能自明宁忍贼陷忠良耶考掠备极酷毒至宛终无一语涉君州犹讯连坐十余人会部使者詹侯行郡直其枉君乃免民有死非命者其妻诉不愿理君呵曰此即杀人贼也一讯即服事连富人请以万缗贖君君不纳富人惧重贿大吏移鞫他县冀得行已志且以成君罪君仰天叹曰使杀人者皆可以财免罪则有财者皆可杀人耳天地鬼神其可欺乎他县果问如富人意吏抱成案将署忽大雷雨昼晦栋折瓦坠官吏震骇失文书所在竟置不敢复问罗江五峡诸獠时出掠边境大府发兵捕治畏盗不敢逼遣介诱谕令纳缺折弓刀即以获寇反命豪酋视官府如无为暴益甚民甚苦之会有羣獠入邻境劫财物杀人盈道郡邑吏不敢问反致羊酒囑使他去盗果入长乐境君自领卒要之於道缚其渠魁七人余悉散走邑簿尉惧变尽室宿舟中视缓急为去留君不为动曰寇来吾自当之集吏民授以方畧使各分守隘要益遣卒捕逐其余獠大惧终君任不敢涉足长乐境邑素多火灾民言城隍神衣朱所致请易之君曰火灾由民不谨尔乃下令浚沟池修火具庐舍苦盖者易以瓦在职五载火不复作民以为神相之矣长乐去家数千里仅以一僮自随五六年间介然如一日也秩满归舟行至庐陵之十八滩以疾卒时子植在侍遂殓以时服元统乙亥年六月十七日也君生於至元丙子五月四日壽六十岁植奉君柩归葬於里之深坑源後十年甲申君之执别驾王公巴延彻尔来官於徽访得君之子讲通家之好比满谒选於京求得君历仕政绩于吏部朝命以承直郎真定路中山府判官致仕实至正八年六月也令君气稟刚明资貌挺特而操行清苦且承故家令德凡所交皆国初老成钜公其所薰陶以成就者为有自来故历官中外忠而不谀勤而不扰廉以自持诚以接物又明练法律以辅之是以遇事有立不以祸害变其所守而宰物者亦赫然临而鉴之非其操心行事不愧不作者能如是乎君没後客有游江西虞公伯生之门者公闻令君已没叹曰斯人有用世之才若在今日急缓可仗惜其年未甚远位不足以展布其才耳其为当世名流所知类如此夫人滕氏赠宜人令君无子弟幼学早卒子男女四人君抚之如已子植其季也遂为君後孙男二性上经孙女三人沆虽不获识令君而缔交於植且闻君家世及君持身莅官之实为详切谓於古循吏无愧也故为述其梗概俾上之太史氏以图不朽焉至正十四年夏五月望日里生赵沆谨状

节妇吴氏婉传

王纲妻吴婉者与纲皆和阳含山人也年十五归纲时淮西已乱居二年兵至含山婉从舅姑匿梅山深谷中兵猝至家人骇散婉为一贼逐得迫使出山行遇纲叔克昭及弟维婉问曰父与母安在克昭曰不知也复问纲安在曰亦不知也婉曰既父母与吾夫皆不知所在我将安归遂投道旁之水中贼以矛接之不及乃刺杀之踰一月克昭始得与家人相见具道婉死时事如此纲竟不知所终纲父克仁字子安悯其妇之罹於难也每为人道其事金华儒者多为文辞称美之且目曰吴贞媛云新安赵沆曰自丧乱以来妇人女子能执节不挠者往往蹈白刃而无悔其不幸仓卒不获死地者可胜言哉王氏妇齿甚弱遇强暴能得其死亦可谓贤矣

故为述其事以遗子安且以慰纲云

资善大夫淮南等处行中书省左丞汪公传

左丞姓汪氏名同字仲玉始名武同避叔父讳也其父德润以子不育故祷於雷坛是夕梦神降雷作觉而同生身长瘦黑其先世多业儒同独不肯事笔墨■〈兰〉跟不检束母夫人叶氏怒其不成器辄自矜曰同儿成器乃与人异与羣牧戏为分队立长教以坐作进退法曰吾为将帅则於某处立营於某处置旗鼓羣牧悉听命见者异之十五渡淮北行买马交游诸军校习骑射所有货货尽丧不能归过庐江县鹭鸶桥问沽遇贫道者与饮道者曰吾能推命汝勿忧十年後当以武功显名传天下官二品慎保令终语讫出门即不见及归所假称贷不能偿父怒同曰兄为偿之吾力耕以养父母不累于兄兄歛儒者也信其言且曰勿诒父母忧偿盈其数计钱二千四百二十缗终亦不事耕耨至正壬辰兵起蕲黄号红巾破江饶闰三月二十一日陷婺源知州张士谦力御不克被擒死江州乡里遭焚掠逃窜乃推同为首依山谷保聚扞御之同分署部衆後乘五岭前倚溪谷寇不敢犯兄歛走官军所陈策以决进取平章萨木丹巴勒喜曰得子兄弟无忧矣癸巳三月萨木丹巴勒统军自严复徽以元帅韩邦彦镇抚哈玛尔军复湖州广德以会于徽三月同率衆破贼栅殲渠首开五岭道路献馘辕门於是特古勒德尔军由回岭进元帅刘托音军由亭子岭进同先领兵直趋州城四月一日复婺源县捷闻平章遣使賚白金盃色段新楮二万券赏之署义兵千户率义兵協辅官军由浮梁界迎合邦彦哈玛尔军马复饶郡四月十六日率先官兵由饶岭迎会浮梁二十二日寇兵大至邦彦分队逐敌大破之积尸满野三战乘胜前趋五月一日复饶州捷闻平章遣使賚劳同为余干州同知歛为浮梁州同知歛即辞归邦彦苦留之对曰歛本田家不闲军旅遭寇荼毒忠愤激切以至此仰叨战胜之威饶既平定则婺源山中可以少安上养亲下教子其素心也功名非所望弟同为国吾当为家耳秋寇再至时岁旱饥甚故饶之民竞趋焉同从邦彦军七月至十二月大小八十余战每先锋破敌往往运铁筒冒矢石出入贼中或出其後衆皆披靡无能当者由是同之勇銳善战无不称服左丞罗罗至饶首嘉劳之萨木丹巴勒曰同战功多亦数危殆宜稍优之甲午正月委镇圆沟八礮桥时饥饉之余盗出没掠人以食八礮桥驿道百余里无人烟使人行商不敢过同设法招谕择害人者殄其一二以警由是驿道无虞七月调守浮梁贼至辄败去先是万户汪保移镇西营贼无所忌不意同至战败自相谓曰不料汪老子又来同夜率壮士突贼营入之汪保愤已无功乃曰吾守西营同知自往守景德镇汪保居西营未逾月贼破西营擒之即据浮梁同往复之请官镇御且辞病归使者踵至同曰吾随军守饶身经百战不敢饶朝廷官爵但士卒饥疲多亡溃吾亦病弗能堪矣时福通元帅镇徽知同还家举为府判乙未三月到郡四月往镇祁门元帅马国宝信左右谤语同谢病还休宁七月宣州陷江东宪使周伯琦得脱贼庭来驻徽礼请同会元帅杨英军复宣进遇苗军帅杨完者欲拉同往杭同不行以病还婺源饶自平章萨木丹巴勒去後朝廷以托克托鄂尔和并为元帅分统萨木丹巴勒军遇贼剿捕参政恩宁普军镇州城镇抚哈玛尔素以战功不受约束由是军不统一贼得乘隙而进官军溃恩宁普军还驻婺源以束帛玄纁起同知婺源州事贼已至境内诸军无鬪志十二月同与贼战于横槎严坑还谓诸帅曰军士宜并力为国除贼婺源不守又退往何地人无应者明日贼至城西同方给诸军粮未甲即上马出北门溪垆遇贼与鬪道狭劒戟弓矢皆莫能施贼乘高下矢石同稍却马失足坠荷池同跃出拔劒鬪且却贼

还视不敢逼十二月之二十五日也因步追及恩宁普军於开化之翦溪身被数创恩宁普躬
傅善药刘脱因解衣衣之畀所乘马扬於衆曰汪知州胆勇才畧诸将孰能及之同驻开化之
马金募兵守险厄休宁俞帽集民兵据岭南溪西之险以抗贼兵不能胜以其从兄士英岳卿
来告急同曰我军士未集乏器械不可往士英强之曰帽於公为懿亲以公故据险抗贼以待
公一往兵气自倍不往则乡里之人旦夕齏粉矣同不得已出白霁岭应之丙申正月十三日
也军士粮乏帽请进兵同曰贼初至必衆我军士未集刍粮器械皆无进不成功徒祸乡里此
行不遇为声援耳十五日同退驻马金贼衆大至帽走士英逃匿贼追获杀之其子茂逃从同
为先锋长参政恩宁普以休宁县尹起叡招谕休宁婺源人人响应於是兵益集四月同分部
署严队伍令汪德贤汪圭为左右翼器械稍备吴观国吴止善叶宗茂汪周来从者衆而观国
宗茂为播弄握权叡心恶其奸贪邪媚不与同事四月十七日兵渡马金岭至羊栈岩贼来战
败之至凤林又败之高梘渡又败之二十三日复休宁五月二日复徽州会深渡官兵进驻徽
城升府治中实授承直郎徽州路府判五日领兵复黟县六月复祁门同每先锋破贼军士乘
鋭气所向无前牒万户朱文选守祁门还军休宁道见有父子代牛耕者下马抚问以牛与之
远近感悦叡方奉二亲开化恩宁普遣使要叡至委集余兵督守诸险厄以为同声援其父谓
叡曰婺源乃祖宗坟墓所在汝留意况汝弟左右持忠心者甚少叡於是招谕婺源遣同书刻
日会兵中平五月十九日同军渡五岭二十日复婺源会合元帅达年等军驻守二十五日还
驻军休宁升浙东道僉都元帅叡驻中平结集民兵以卫乡里六月二十一日贼复来婺源守
兵溃二十六日叡领兵与贼遇辄胜进复婺源升摄婺源知州分兵设策守饶境贼不敢过会
元帅达年特穆尔万户王敬田松山军来婺源不肯驻州治於河西寅坑口树栅自固纵军四
出杀掠不已八月叡见诸军不进自领兵破汪可梅田砦九月同领军二万余衆破西坑克田
凤游山诸贼砦直抵浮梁连与贼战皆捷将乘胜往复饶城因达年二帅忌其成功要絶饷馈
乃还军欲与战叡力止而和解之遂还休宁元帅刘玖来镇徽贪暴为甚同往浮梁吴观国以
帅府都事权府不以礼交玖又徇私专杀以造衅端人以忠言告者皆为观国所抑遏叡尝言
赵汭学识高远可为师表事宜咨而後行汪幼凤正直可为辅至是汭极以书言继又面论其
故并幼凤皆为观国所短毁不听用玖先以小惠收其衆将汪圭曹马汪德贤杀之将以计取
同同手杀其骑兵五人夺其马擒其一人而语之曰纵汝还语刘元帅我与元帅俱为国家除
强暴岂料肆贪暴之欲少不遂意即以计杀害忠良如必欲战请元帅约日亲阵吾不敢避勿
为此盗贼见识玖知同不陷其计曰吾不可留也还军驻严赵小九元帅以私愤与玖战玖败
走衢宋监司杀之十二月使者至升同为朝列大夫郡府治中兼浙东同知副都元帅郡帅巴
尔斯请同俱守徽同至郡即议修城垒且曰近有强敌退无所归宜完城为固守计有司皆憚
其烦劳巴尔斯懦而无断同曰决在元帅元帅世守此郡同亦生长此土不宜再为严陵客也
巴尔斯应曰汪元帅且饮酒明日议之同曰国家大计岂可以酒废议元帅如不欲修城则元
帅精兵皆在祁门宜令还驻郡同以所镇休宁兵进守祁门庶亦两便巴尔斯曰甚善同还休
宁巴尔斯又听左右言以祁门军不可移而止同曰是岂可与同事丁酉三月镇南王专使致
书嘉劳江浙省平章庆通萨木丹巴勒书问不絶五月丞相达实特穆尔以天子所赉酒赐同
七月邓院判由宣来取徽逾三日同日夜往攻之有备弗克而元帅达年特穆尔由婺源攻其
後叡方以母忧家居吴观国潜逃遂安李克鲁本以进士为帅府都事与同甚相得时留邓军
中以书告曰元帅前後受敌计将安出幸至中途论心不必疑也同先以宗茂余善往克鲁果
於黄墩候之曰吾谓汪公必至乃疑我邪须面可言耳宗茂还言克鲁候於黄墩元帅勿惜一

行也至黄墩从者曰前途具饕餮候元帅数步即是过黄墩则壮士百数骑突出克鲁曰主将请元帅相见同抽劔欲自刺克鲁走抱止之曰天下豪杰自有人元帅平日以意气相许与亲见然後知之即驰马偕至郡邓院判请往金陵遂见相国俾平婺源寅坑口营栅还居郡城戊戌从邓取严还送妻孥往金陵居而已以院判镇婺源筑城治兵始戊戌十二月岁己亥冬告完为四门门各重檐复屋城上环树杨柳官舍仓廩一新於是饶之德兴浮梁皆来附儒贤并归军集食足分兵教战名誉甚隆初吴观国逃遂安依长枪邢同金邢自归于婺州观国叛邢以归缘同族父周以请同欣然招之叡闻与同书曰观国当危难则逃事有绪则来岂可再令隳成业乎同得书笑曰宁人负我观国再至日言事艰厥成又福建以省参政致同江浙以枢密同金徠同庚子六月同领军征饶驻太阳渡竟单骑潜往浙丞相达实特穆尔奏为枢密同金且曰虚此以待君有日矣张太尉又以礼召至姑苏同见张心不纯潜迫致丞相达实特穆尔诸大臣於死乃往淮安与史左丞见气义殊洽与议中原事曰李察罕公忠足任往一见之可也乃行见李公曰明公以身任天下之重宜广揽英杰为天子扫清寰宇建万世不拔之基李公曰善相见恨晚曰吾中原事定平江南当自姑苏始君远来必朝见主上竭所欲言还则与君定约同朝京拜资善大夫淮南等处行中书省左丞御笔褒宠曰江南忠义之士还江南见李公公曰张士诚非忠於国家者旦夕当声罪致讨君与史君宜協力焉同曰诺还淮安史适与张有隙亦委心於李未几而李为贼降将田丰所害史曰不幸及此志不获施宜要金陵兵往取姑苏则不暇我谋可待中原事定寻为之计乃遣使授书往金陵使本姑苏人至中途叹曰吾宁往姑苏为保妻子计张得其所通金陵书大怒出兵高邮张四平章与史素相得招与言事同曰往不可测也史曰将卒家留姑苏必有所顾一也中原事如此後援未可恃二也金陵兵未即向太湖三也我辈姑待时可也未必便害我辈况四平章我昔尝救解其危急宜不至此八月二十五日往会於高邮二十八日登舟九月二日达姑苏士诚即拘同问曰我待汝极厚何负於汝而反我邪同曰我之来以汝为元太尉忠於国家今汝既叛我岂得从汝反邪四平章力营救之且具酒饌为别同曰为语平章甚荷厚意吾能死忠不为无义生也但我死後诸公亦不能久於富贵耳十二日遇害临刑顔色不少变方去高邮而朝廷以为荣禄大夫淮南省平章命下而同死矣伤哉其子澄随母留金陵岁癸卯八月朱先生升为取之还乡里

论曰昔关侯为曹操刺杀顔良於万衆中以报德而卒往从昭烈者义气之所存也昭烈为汉室之胄雄才大畧足以有为侯之不违昭烈义也卒死於战谋不胜勇故也同出保乡井立勲於国义声昭着心之终始不变其初其勇而义与侯盖类焉天理民彝不可泯於人心固如此视苟乎富贵者为何如哉

鲍孝子传

鲍孝子讳元凤字叔和世家歙之棠樾为硕宗曾大父讳庆云故儒者宋季试漕闸补特奏官不仕而庇其乡大父讳珪父讳回皆雄於产叔和生有至性於家庭极和睦至正壬辰二月红巾贼起蕲黄破江饶四月踰婺源陷郡城于时老弱狼狽奔窜叔和母吴氏年及耄矣昆弟聚议谋避兵叔和泣曰妻子固宜生全然母一而已脱有不虞为子者宁独生乃奉母氏挈家默居刘村青山旦暮瘁力为养俄而贼将项奴儿纵残四掠人人股栗莫克自保叔和语其妻子曰势诚急矣若等各保若生假天祚吾家骨肉图再聚也遂吁於天戴星裹粮躬先负母远行

深入岩穴间履绳梯攀艰苦备至继而间行踪询妻子薄暮偶会恍若神为之导者母氏惊且喜曰吾儿舍妻子脱我於难天实知之独惜庐舍已毁将奈之何叔和跪以请曰愿高年眠食无恙虽乱离无足虑也後兵寝还乡葺理旧庐觴豆为乐复如初里闾啧啧称其孝叔和从子伯原山长余老友也每属余纪其事乃次第为之传云

东山赵沔曰昔江次翁负母避乱於下邳人称其孝邓伯道弃其子以存弟之子人尤义之余观鲍叔和事甚与次翁相类至其权於重轻临难亟保其母而卒全其妻子此则伯道之所难者鲍之先有传叔子壽二先生并以孝义书於宋史叔和克济其美者耶呜呼民俗既降德色谄语於其亲者不尠也观风於乡井者盍表吾叔和以为劝哉

戴庭芳母金安人墓附葬志

至正十三年十有一月庚寅戴君庭芳葬其母安人金氏以子琥尚文妻孺人金氏附安人兄子之子也地在戴氏居里南由山乡遐富之原壬山同坎异■〈穴上之下〉间以疏甃距安人歿七年孺人歿十月初安人丧夫踰月而生君卒丧提孤子号泣归其父母既重怜安人无依亲为鞠君於家君既长还故居自伤生不见父常哀戚无喜笑容与人言及其亲辄泣下安人卒君服丧营葬将有以自致者江南地多砂砾水泉藏善坏尤拘方位时日君三世单传思得久大之兆而里巫客师人人异言葬是以缓红巾之乱君先事挈家逃难建德城中丧其子妇事平以丧归尚文念妻有淑质男女辄不育又不幸死外郡别葬他陇在远或忘请於君是以附葬君之归自建德也居室既毁於盗服用百物无在者君一不暇省日惟卜葬是务常与琥意行先人墓北阴端阳倪昭晰呈露如挈领振裘倒囊出物盖有得於山川中合之妙焉而风水家求观者莫不着发蒙脱口称善无复以偏辞横议君是以克终大事卒如其志云戴故休宁望族入国朝犹称大家方兴未艾吉土殆天授尚文为明经选士闵贤嬖早亡无嗣请从祖姑其处心厚防患远亦宜惟君孺慕终身上不蔽於天下不誅於人其未葬也如有负而不酬其既葬也如有释而获免世之荒忽慢藏与贪戾屡迁或数世不葬者闻君之风庶几少愧而古者地域有利葬不踰时未葬衰麻不除真帝王中国之制哉君世系见故翰林直学士贡公所为君考南山处士墓志尚文今由乡举为句容校官金氏宋迪功郎严州司户参军修和曰成忠郎武冈军新宁县主簿革曰国子生应凤安人曾祖祖考也曰皇赠武畧将军江浙行省副都镇抚南庚曰平江十字路万户府镇抚震祖孺人之祖父也前事尚文从外甥金侯过余山居言祖母葬未得地重为家君忧色辞甚戚沔曰君家流泽深远虽不求吉地将自得事毕君复余曰子言其然惟子妇葬附祖姑恐後來莫考愿有述也故为之志

倪仲弘先生改葬志

新安有贤行君子曰倪仲弘先生以其学教授於黟二十有三年既没而家贫不能葬逾四年乃克反葬於休宁故里赤丘之原地下湿欲更诸爽垆力未能也黟人思先生之德久而不忘门人汪志道其弟存心相与谋曰先生设教吾邑遂留家焉盖所谓没而可祭於社者吾里西北黄坑有善地请改葬先生於此以繫邑人之思可乎其孤闻之谦不敢当又二年为至正十四年冬十有二月邑令永嘉周侯希濂赴官饶州道过汪氏之居闻其言而叹美之曰吾於此

得以知先生之贤且以弟子之地而葬其师义无可者即日命志道存心以已意为书授先生家又命诸孤急遽日营葬而後去於是遂以今年乙未正月癸酉改葬先生於黟南黄坑余思坞之原从黟人之志也先生守身制行不为名高而事亲至孝接物以诚非其人不交非其有不取非仁义道德之说尝论定於郡先师朱子者不以教人凡卑污苟贱之事不接於身利害得失揣摩计较之辞不挂於口虽大寒暑未尝一日辍其业以嬉终其身人不见疾言遽色是故黟人信其言而尊其行既没而复思之倪氏世家休宁至先生而益贫无以为生居常授徒以养黟人汪君泰初闻其贤而敬礼之筑室下阜里中请先生奉二亲来居躬率子弟与邑人同学焉志道存心皆其子也先生讳士毅仲弘其字也曾祖机祖文虎考良弼皆以文学教授其师曰陈壽翁先生亦休宁人所注书曰四书集释闽坊购其初藁刻之尝别为纂释之例甚精书未脱藁又将以次及他经皆未就而卒其卒以戊子岁四月九日得年四十有六娶吴氏子男四人尚綱尚德尚义尚礼尚綱後汪氏尚义为从父士安子女嫁徐宗显孙男铨女幼始先生居父丧未终而感疾不起又三年而太夫人与吴氏相继卒故黟人尤哀之葬之日凡为先生之宾友与门人弟子皆切感黟人之知义周侯之乐善而先生身教之道益彰矣既葬乃谋买石刻文墓次以泐自幼为先生所知又号为能知先生者则授笔焉泐閱战国秦汉以来大道既隐而忠信孝友醇厚之士未尝无也圣学复明於近代士始以知道为宗久之又失其传而学者益以空言自蔽由是高节卓行鲜复见称於时则民伪滋而世变极矣若吾倪仲弘者何可得哉故因志改葬畧见其为人如此使君子有所考焉

处士汪君墓志铭

新安凤亭汪氏祖饶州刺史恩饶州当唐末以上书言事见知吴相徐温为其府属以显子孙多徙他邑然积善弗耀克世其家莫盛於凤亭历五代宋十有七传而逮於乱凤亭西南接饶境寇攘狎至汪氏聚族而谋伍其子弟毗隸栅隘自保盜相戒不敢犯者数年事既平顾旁近大家殲夷颇衆而凤亭之族独完於是族之长明初谓其子曰吾族居当四达之冲丁斯厄会而卒能全活老稚不陨其世者岂区区人力所致哉慨思前人深积厚累以显芘吾子孙者靡不至矣焉可忘也然曾高而上家谱可以概见诸祖父墓碣在焉惟我先君勤劳足以济多艰任恤足以周急难立善之规至於今不废而墓门之刻阙焉其何以示子孙於异日乎汝其图之子汇退而述状来请铭予感汪氏事可劝为善者故不终辞序曰君讳天佑字佑翁五世祖邦光宋太学内舍生尝伏阙上书论与金人和好非是不报然用此见知张魏公因出入其门退如建安问学於子朱子以孝悌忠信教授其乡高祖安节早游四方有奇志庆元初赵丞相南迁遂不复仕曾祖箕有学行尝取先代忠孝义烈事约为千文以教子弟初入小学者祖应龙父可贵皆以长者称母齐氏有贤德君生乙亥大军渡江之岁也生二日兵猝至乡人皆尽室以逃或扬言曰负赤子者不可以俱齐夫人曰汝等宜速行吾与吾儿同死耳行抱儿独後未数里兵来急仓卒匿道旁土穴中儿熟寐两日夜无啼声兵退乃出而前行者皆被掠人莫不异之三岁知读书四岁屹然有成人志尝与羣儿戏池上两儿堕水中君视旁有笕水竹即拽投池中二儿援竹得不死其机警不羣幼已如此内附初调发剧繁巨室皆重困君甫十岁即出应里役长益练达有能声公无阙事而世业不坠乡里尤赖之尝有邑吏受赇者知君与吏有隙指为证君曰讼庭者公论所在也以私灭公人谓我何卒白吏无罪邑人伟之盜发先世墓君诉於有司必获贼乃已凡费皆已出一钱不以烦族人庚午辛未岁连大祲皆出粟以

济饥者不足则为田剂质诸富家以继之急甚不能受粟者烹粥哺之所活以万计素善事亲父年登八十君凿池筑室其上日奉老人从宾客奉酒称寿为乐以适其意君硕貌美髯倜傥重然诺急义轻财而事亲能养里人嘉之为扁其堂曰寿庆又以其不求仕而有及物之仁号君春郊处士一时儒先生若程君登庸吴公存宗人汪君泽民同里程君文皆为诗文以叹美之以丁丑十二月十有五日卒于家年六十有三配方氏先君卒子男一明初也女二皆择配儒士孙男三汇为长次帅次勇後九年丙戌十一月某日始克奉君与夫人之柩合葬於凤岭之源始君以能养闻至明初所以养其父母者一如君志吾观汪氏世有隐德而不食其报至君所树立者又如此宜乎其宗之遭变而能存也汇生一岁而失母君抚之尤笃昼则坐诸膝口授诗书古文夜引手腹上习字画故其述君事不虚美无佚善日以报吾大父之恩也呜呼其亦有感於君立心之厚也夫铭曰世孰为善孰不为善维天既定吉凶乃见凤亭之宗遭乱益昌曰汇我能昔人之光嗟处士君济其世美我铭其封以诒孙子

芝山老人李君生墓志铭

番士之老人李君圭卿谓休阳赵汭曰吾今年八十有一矣妻亡而长子丧亲戚故人逃难阻絶子孙存者幼不胜事乃亲卜宅於风雨山多蛇冲先莹之侧以俟归藏既又请於官愿舍所居宅为道院身奉老子祠其中以俟没余齿郡府为上其事集贤院间独念早岁由吏入官每思服勤奉职以报国家而所至辄被讼其在维扬竟夺两官以归於是遂不复仕而岁月所积恩数所覃与夫休致彝典亦皆耻於自陈矣今兹又以耄荒遯世吾惧夫无以诏吾子孙於後日也请以文累子墓门有石吾将亲观其刻焉言毕则尽出历官行事本末与一时贤人君子赠言汭受而读之诚有可徵者盖於是切有感焉乃不复固辞而以复於君曰君以高年丁厄会苟得怡神老子法中虽行其意可也此事无可论者君由御史台典史为中书省断事官史都水监史皆以刀笔佐人功归所事虽有善不复书由大都路仓官选权大都路供儒府知事半岁以忧去皆天下剧职再尹大县平赋均役戢盗擿奸具着劳绩而决狱尤号精审屡有所平反在君皆为能事盖有不可胜书者独君官所至辄与人讼而人或未知致讼之由请比而书之不惟君之为人得以显白而志存当世之士亦於是乎有所考观矣京仓出纳浩穰吏常以腐坏损折为忧每收以大斛小量出因积其赢以谢监临诸司及吏卒之巡行者其得善去者十常八九君至仓恐负累乃集二十仓主吏问计皆不知所出君令仓各簿记日月主名所费如干即事败明无一钱入已比秩终领财计大臣谓诸庾吏非有赢粮不得辄书满去以二尚书治其事君等坐繫逾月皆出簿自明大臣知连坐衆事不复竟而君所监仓独余粮千五百石用被选抡此君为永济仓监纳支时事也淮安之虹县有鹰山海东青鹞岁来巢焉邑豪民争占籍镇南王府为打捕户以王教禁民无得入山樵采惊散鹰鹞因为奸利君至官即诣宪府极言其害得啓王免采鹰罢户豪民尽怨君而王府亦恶之矣县有东朗湖灌田万顷邑民渔猎樵苏其中为生淮东富民苦重役者咸徙家邑中岁贿吏幸见容号白居户久之请於官涸泽为田输其恒赋民讼之十余年不决君蠲租复湖传发白居户各还其乡由是白居户与前豪民怨君者共结权势告君罗织不公宪府移泗州听其狱告者不得志又移淮安路卒白君无罪此君为虹县尹致讼之由也太湖县小吏詹甲教方乙诬戍卒践死幼女又合富人与卒有怨者出钱贿吏成其狱具得甲行赇之籍罗甲夺人田反以事陷田主瘐死狱中豪民持官府得失猾吏为两造师尉卒与盗分货君皆痛绳以法而詹甲连僚吏由是僚吏与被法

者咸欲以计倾君所决狱同官辄异议君视囚有久系者日促吏具案独自署决遣之乃共造飞语潜君於行部使者使者下车索君独署案求过差毫发不可得复逮君所决囚与告者问得失皆言君守法无私使者亦贤君而嫉之者愈甚矣君每遣吏上事大府度有当请谢者辄下县取一大家任其费名能干人县官吏共署剂与大家者约得罢一岁恒役取当君不肯署剂遇有不可止者府下县切责之君不得已令勿为剂第置簿记贷民钱岁月出纳所由久之僚吏嫉君者以为是可媒孽君矣乃共走淮东宪府告君擅用所贷民钱移安庆路听其狱告者不得志又移和州卒白君无罪此君为太湖县尹致讼之由也镇南王宿卫士岁费衣粮钜万不可会二大府相视莫敢发乃以属君君尽汰其冒滥一无阿王府益恶之郡有疑狱遇赦当释録囚使者复收繫之其怨家有力焉君抱案诣宪府言狱当释状廉访使是君言君又以事上行中书省言使者审録不明宪府遂恶之因君断他狱遂按君受不枉法赃君竟自诬服此君为扬州路推官夺官以去之由其终不得自明则有非前事比者矣而世或以好讼疑君故备録其事以为业已为吏今世苟思竭诚奉公不宜憚与人讼彼恒怯畏事遇不可不能必达其志者虽不被讼亦何赖哉如君者庶几能达其志者矣君世家汴之太康高祖毅宋迪功郎饶州司理参军始家于饶曾祖达祖荣皆不仕父仲饶州都大司磨钱局都监勤生好施母蔡氏生君五岁而歿继母齐氏鞠君不啻如己出君在虹得赠都监承仕郎徽州路知婺源县事蔡氏齐氏暨妻钱皆宜人钱宜人二女长适平阳元仲谦次适郡守燕人曹某子文郁侧室牛氏生二男不育侯氏生男克昭博学负才及壮而卒女嫁番阳陈焕文有学行妾汪氏二男子某因乱不知所在某幼孙男某克昭子也君名镇安圭卿其字晚号芝山老人铭曰为吏今世孰行其志能独远于戾委趣归休高年百忧出入间以游文以着绩爰勒贞石迟君反斯宅

尚友斋铭并序

余子韶名其读书之室曰尚友与其学者居而习焉俾其友赵沅为之铭嗟夫昔者孟子论一乡一国至于天下必其善士斯可以友其善士以友天下善士为未足又尚论古之人是曰尚友夫友者度其德则齐比其义则叶以相交益为道者也度其德则十百比其义则千万者岂可以友命之哉且一介之士谓之匹士匹士而以一乡之善名则善出乎一乡矣由一乡而度一国以絜天下其间相去亦远矣而况於奋乎百世之上者乎然则子韶居斯室为斯名必有不徒然者子韶少有特操所居晏如非其人不交也非其有不取也今又进而论於古人其志之所存者益远矣乃为推本其平居所尝用力者作尚友斋铭铭曰

有宏斯宇有严斯室君子攸居自宵而旦至于中昃罔不於是惟昔先民善立有相德成不孤四方万里道同则合以类相求矧在僻陋隤然以处焉知其瘵粮靡宿春驾无逸举孰即而谋我思古人有圣有贤为世楷模其道孔昭其言孔富焕乎在书爰即我所昼庄以诵夜恬以休匪究曷明匪存罔觉勿亟勿徐情有不通穷年毕世邈不相干识其所趣如听以耳近而非迂慎厥衡勒居中以制迹其步趋必端汝外必齐汝内毋逸而踰燧以耀日方诸感月道岂外繇於惟此心千载一息厥理不殊穆穆灵明对越在天动息与俱是曰尚友夫岂致饰以相夸誉惟子韶氏尚克允蹈斯名不渝

孝则居士程君可绍墓表

君姓程氏讳可绍字致和徽之婺源人也其先世居邑之凤岭至君之高祖宋待补上舍子敬迁高安镇西居焉曾大父仲贤大父震昌父子英皆义士而承先世诗书之泽幼从伯父林隐公复心与云峰胡先生学修身谨行克自树立乡有不给者调之有急赴救之里有税场官每事资君得无败事他如葺桥舫以济涉施汤茗以惠渴者一乡德之中年由高安镇西徙居中市溪北筑亭水滨曰观澜为延师教子之所危学士太朴为书二大字揭之楣间至正戊子汪尚书叔志胡山长世佐朱进士公迁皆咏识之居之左起屋立龛奉先世神主取大雅诗语题曰孝则堂丹阳尹黄公子厚为之记刻朱子孝经刊误以励後学乡先生仲鲁汪公伯武王公为之序而林隐公与之编辑世谱勘订经传惟日不足岁壬辰红巾盗起时下令民有擒贼首从者予爵有差趋今要爵者比然君曰人生富贵各有命以人命而易功名亦奚安哉乡之蜂屯蚁集者君以正道化之多屏息癸巳冬母孺人以寿终君居丧尽礼一门四世雍睦如初是岁旱遍野忧惶君斋祷於禾嘉潭龙湫而雨甲午又旱君发所积以赈不足则散所储帑帛问余他郡人以是益贤之丙申挈家避乱衢饶之境邑之豪士首辟君辞不赴语使者曰人生百年遭此厄会偷生为幸何意功名乎再避难德兴之文港芦坑临终语诸子曰风尘湏洞至此极矣谨身保族若等勉之言毕而逝君生元贞丙申三月二十一日歿至正丙申十一月十一日享年六十有一娶同邑祝公寿朋女讳隆性慈惠笃孝敬闺门肃然一宗慕之生大德丁酉四月十二日歿至正乙未十月二十五日子男二礼用达道女四柔德适潘闰德适吕意诚适张意德适李君墓在里之南岸之原噫君昔与予游师山郑先生之门情好深厚其壻贵武吕公西岷李公复以武备咸集雄峰翼继又以文事会徽府而礼用达道明敏博达信君之德为有後也一日达道过予东山精舍奉君行状再拜曰先人捐世今已五年生不能致孝养歿不能发幽光为罪大矣先生於先人知之为深愿赐以文予既悲君之未遇而又重其子之请也敬叙其梗概如此庚子岁七月既望书

东山存稿卷七

附录

●钦定四库全书

东山存稿附錄

东山赵先生沔行状

先生讳沔字子常姓赵氏其先陇西人唐中和间有讳思者避地新安海宁之龙源里八世孙曰安庆时方寇乱率义民剿平之事闻授西隅总管安庆生光祖为宋京庠学官岁大祲出廩赈贫提刑汪文振尝铭其墓二子次曰大振淮东漕司总管大振二子长梦营将仕郎梦营二子长弥孝浦江税官弥孝子象元号可斋才识超异元平江南徽既下邻邑有持兵未服者将加屠戮可斋尽发私藏诣军门请而屠戮不行由是贰令休宁迁婺源丞改授信州司狱以疾辞既而朝京授杭州仁和令未至卒於扬州二子幼曰克明号松庄孝友敦厚乡称善人实先生之考也娶同邑汪氏生五男二女先生最幼初夫人梦飞鸟自齐云岩来集於怀觉有娠明年延佑六年己未三月癸亥先生生焉资稟卓絶自孩抱闻读书辄能成诵及就外傅读朱子四书疑难不一师告以初学毋过求意辄不释夜归取文公大全集语録等书繙閲五鼓始休由是有悟遂厉志圣贤之学不事举子业少长遍诣郡之师儒遂有负笈四方之思鬻恒产以为裹粮执贄之具亲友或议其非弗顾闻九江黄楚望先生杜门着述岁丁丑往拜之先生穷经以积思自悟为主故其教人引而不发使其自思一再登门乃得授六经疑义千余条以归辛巳秋复往留二岁得口授六十四卦义与学春秋之要过严陵请益於夏先生大之问易象春秋书法如何先生以所闻於黄先生者对夏先生叹以徒费心力为戒因出示其家传先天易书曰此羲易一大象也继如杭谒黄文献公於官署公以师道自居不少借辞色及诵所进书大异之待以殊礼甲申失怙卒丧谒翰林虞公於临川授馆于家一岁其所上书曰圣贤之道大矣学者可不知其要乎尝闻之吾之至尊至贵举天下之物不足以加之者此心是也吾之至亲至切举天下之学不足以先之者求放心之谓也然非真有所见无以为日用常行之地非真有所得无以为造诣归宿之极所谓为学之要者庶几在此此沔之所以日夜忧惧以求闻乎先觉之训而未之有得者也然沔之幼也闻江西有吴先生焉行修道立为世表仪而成己诲人深悲空言之无益及观阁下所为行状而知先生为学之方矣伏惟阁下察其有志以其所得於先生者而赐教焉俾於入德之门不致迷其所趋而天之所以与我至尊至贵可以反身而有得则阁下之赐大矣时江西宪试请题虞公拟策问江右先贤及朱陆二氏立教所以异同具对卒言刘侍读有功圣经至论朱陆二子入德之门尤为精切详备未乃举朱子曰子静所说专是尊德性而熹平日所论却是道问学上多了今当反身用力去短集长庶不堕於一偏也又举陆子曰追惟曩昔粗心浮气徒致参辰岂足酬议以二说为证使其合并於暮岁微言精义必有契焉子静则已往矣虞公评其後曰子常生朱子之乡而得陞氏之说於二家之所以成己教人反复究竟明白盖素用力斯事者非缀缉傅会之比也厥後再往公愈加敬异及疾革先生适在左右凡丧事损益皆以为托诸子请先生状其行岁丙戌再游九江则黄先生已捐馆矣有袁诚夫者文正公高弟缉师说为四书日録旨意与朱子多殊请商订先生为条别是非数万言袁公心服多所更定赵郡苏公伯修虞公之徒也为浙省参政与先

生友善比入守邦畿要同往以母老辞归名其居曰东山精舍虞公尝为之记举先生之言曰
汭蚤岁学於乡求程朱之余绪诵习经训辨释其文义之外无所致力焉诚恐终身不足知至
毕世不能意诚古昔圣贤师弟子之授受如斯而已乎切尝思之以求涂辙之正至於道南之
叹而有感焉盖其属之龟山者必有所在而豫章延平所以授之朱子者亦非有他道也不然
罗李二公无事业以见於时无文采以垂於後其所学者何学所事者何事而吾朱子所谓潜
思力行任重诣极者亦将何所指乎此精舍之作所以愿尽心焉者也其於大学则谓三纲举
圣人事为大学标准八目乃教学者用力之方故明明德新民传中无学者工夫而修身传中
无圣人气象其举古之欲明明德於天下者而逆推其用力之序则明古之圣人亦必由学而
至而学者之功必可至於圣人又以为格物是穷尽物理程子所谓讲明义理分别是非之类
是也致知是程子所谓明诸心又云潜心默识玩索久之庶几自得之类是也二事不可合为
一唯程子言之甚明若曰致知在格物在字之义不同遂疑格致分而为二则传中言齐家在
修身修身在正心谓二者合为一可乎且闻明道先生谓学者若无事可行且去静坐之言而
伊川先生每见人静坐辄叹其善学及朱子得於罗李二公所相授亦必危坐终日以验夫喜
怒哀乐未发之前气象为如何而求其所谓中者久之而知天下之大本为有在乎是也由是
鷄初鸣则起澄心默坐涵养本源以为致思之地而後凡所得於师之指及文字奥义有未通
者必用向上工夫以求之於是造诣精深而一旦豁然矣盖虽雅志不苟於仕而身则优为当
四方扰攘尝论为国家者不能举天下大势以定攻守之宜而所在浪战不求智勇之士真可
任将兵者使台省贵人郡县俗吏共军旅之权仗行省讨乱御史台督视如平时而诛求刼夺
之弊反覆坏烂之由朝廷终无自知之兵财两匱郡邑一切以矫假病民而上官方且守故常
不知通变长久之道赏罚不明故是非淆混而治安拨乱之术行军克敌之方皆废不讲徒欲
以岁月削平安可得哉大率近岁用兵之失不越斯言而先生经济之才亦可见矣自精舍成
四方学者尊之为东山先生云壬辰兵兴先生奉母夫人避地尽心调护及郡邑继复而夫人
以天年终丙申天兵克定郡邑其主将慕先生名德礼罗不至丁酉寓于衢之柯山己亥结茅
于星溪之古阆山山深閭寥人事几絕潜心着述虽当颠沛流离而进修之功不少辍壬寅春
归东山时大明龙兴创业金陵吾邑已附属六年矣有司屡奉命徵辟继以议礼召皆以疾得
辞己酉起山林遗士共修元史先生在召中暨竣事得请还未几疾复作十有一月丙申而先
生捐世矣得年仅五十有一於戏痛哉配同邑程氏女二人长适汪璫次适苏旼男一人梦吉
甫入学侧室朱氏所出也先生孝养二亲出乎天性居丧哀毁过礼事诸兄备尽敬友抚幼以
慈三兄歿於他乡诸子不能为丧具先生奉柩归葬从兄子弼有遗孤先生抚之成立当赋斂
烦重之际俾能保其恒产吴氏甥失其恃怙无所依为之收养若此者在先生皆所优为有不
能殫述者新安自朱子後儒学之盛四方称之为东南邹鲁然其末流或以辨析之义纂辑羣
言即为朱子之学先生独超然有见於圣贤之授受不徒在於推究文义之间故其读书一切
以实理求之反而验之於己非有以信其必然不已当时乡先生皆留心着述所以羽翼程朱
之教者具有成书先生受而读之犹谓未知为学之要常曰读书最患多疑每展卷则羣疑竞
起如蝟毛要须得程朱复作而命之而後可释然尔是以质诸师而不得者卒求之程朱遗言
而有见焉其於穷经之要则有得於黄先生而推极之其初见黄先生问年答曰己未黄先生
曰生吾刊六经补注之岁也或曰书刊矣恐无读者予曰当是读者未生耳岂知吾子适生是
岁耶然春秋托始之岁亦己未也斯文缘契实在斯乎先生请问穷经之要惟告以在乎致思
问致思之道乃举一事为例礼曰女有五不娶其一为丧父长子先儒以丧父无兄者当之如

使其言为然则丧父无兄之子何罪见絕於人如此先生思之久而後得其说曰此盖宋桓夫人许穆夫人之类尔故古注言无所受命犹未失也若丧父而无兄则期功之亲皆得为之主矣黄先生大称善遂授以求春秋书法曰楚杀其大夫得臣此书法也当求之二百四十二年之内夫人姜氏如齐师此书法也当求之二百四十二年之外既又为易置其语曰楚杀其大夫得臣此书法也当求之二百四十二年之外夫人姜氏如齐师此书法也当求之二百四十二年之内先生受其说退而思之久乃悟其意则二百四十二年之外者鲁史书法二百四十二年之内者圣人书法也黄先生各以二义贯一理之旨以为单传密付悉在於斯先生即黄先生六经补注等书取凡为春秋说者参以耳闻类萃为春秋师说三卷复因其意为春秋集传十五卷既而求之於经终有未尽圣人之意因思戴记经解有曰属辞比事春秋之教也始悟是经全以一笔一削见义苟不属辞比事考其异同之故以求之未有得其说者盖左氏与杜注有得於鲁史遗法主史以释经而不知有笔削之法至若公谷啖赵陈氏俱有属辞遗意则知求笔削之旨而不知先考鲁史之旧章二者各得一偏不能无弊合而求之具见得失由是不传之旨焕然复明每谓非黄先生教以先考史法而後经义可求则不得其门而入也及重改集传越四载始克成编复思是经伦类区别为义至精参互错综易相矛盾苟不推类以通之岂无遗憾遂着春秋属辞八篇虽万变不齐始终各有条理於是一经本旨方完每谓苦思之功若有神助圣人复起不易吾言又以为春秋必考左传事实为先杜元凯陈君举皆有得於此而各有所蔽因着左传补注十卷吾乡风林先生亦以穷经为务而莫肯雷同一见是书辄曰前无古人春秋之旨论定於此矣时驸马都尉和阳王公镇徽以春秋属辞师说左氏补注下商山义塾刻梓以广其传然属辞详着笔削之权集传乃明经世之志必二书相表里而後经旨无所遗逮属辞成书复改集传使归於一至昭二十七年而賁志以歿门人倪尚谊证以属辞义例质之以平日所闻於先生者参互考据足成之若尚谊亦可谓有功於先生之门矣其於易经则闻诸黄先生必须明象又曰易象与春秋书法废失之由大畧相同苟通其一则可以触机而悟矣先生春秋本旨既明於易寤寐不忘致思每有所悟则喟然曰黄先生岂欺我哉尝曰春秋文义赖孟子之言而後有据於周易亦必见其说如孟子之论春秋者而後圣人之情可得而推焉先生尝作序卦图说及经文开端乾坤屯三卦解大畧以为羲皇设卦繫辞名之曰易繫辞传上篇所赞皆其事也神农黄帝氏继作各因羲皇之易别定卦序自为一代之书逮夏而商其辞则世有增益盖无不备皆为占筮之用连山归藏是也至周文王以至德而不免羗里之难乃本羲皇之易因其交易对待反易相因之象定于上下二篇以天下之道明君臣之义因阴阳消长盈虚之变以着人事进退存亡之戒其辞之所繫必有关於此者取之而非圣人一时自为是言也逮周公相成王二叔流言召公不悦亦有感於先王忧患故乃即卦爻象象取其爱恶远近相攻相取之情作为爻辞与先王之书相表里以其制作之旨视连山归藏少异题曰周易其书与二易俱掌於太史占筮家得通用之而义则不专主於占筮孔子曰易之兴也其当殷之末世周之盛德邪当文王与纣之事邪是故其辞危危者使平易者使倾其道甚大百物不废惧以始终其要无咎此周易之本义盖先生所求论周易本旨如孟子之论春秋者卒有得於夫子斯言而不假乎他求也诗五言初学六朝後改习建安诸子及老杜近体则学乎唐人其为文曰必以理胜为主然後命意遣辞则沛然矣烜窃观先生之学以积思为本领以自悟为归宿勉夫切已向上之工夫而至乎穷经复古之成效岂偶然哉烜自获交先生不以疎谬进而教之往来请益遂得闻穷经之要及春秋笔削之旨自悔其前学之非而惜闻道之晚也方期以晚年相与讲授周易象学而先生遽已谢世矣何後

学之不幸也抑斯文废兴关於天运非人所得测识欤尚谊偕其子梦吉属烜为状烜末学肤浅何足以知先生哉然受知最厚义不容辞姑述所见闻如右愿学君子尚表章之俾垂永久非为先生九京有光实亦斯文之幸也诸生星源詹烜谨状

附录

附录：

周易文詮四卷（两淮马裕家藏本）

元赵汧撰汧字子常休宁人师事黄泽受易象春秋之学隐居著述作东山精舍以奉母洪武二年召修元史不愿仕乞还未几卒事迹具明史儒林传此书大旨源出程朱主於畧数言理然其门人金居敬跋称其契先天内外之旨且悟後天卦序之义则亦兼用邵氏之学经义考载八卷此本旧钞止四卷然首尾完具不似有所阙佚或後人合并与原书上方节节标题细字详其词意不类汧笔或後来读者所题识於经义亦无所发明今并从删削汧平生学力多在春秋所着说春秋之书亦最多并已别着於录其说易只有此本流传颇罕其中诠释义理大抵宋儒绪论爲多不及春秋诸书之深邃然其於天道人事吉凶悔吝之际反覆推阐亦颇明畅观其名书曰文詮其宗旨固可见矣（四库全书总目卷四?经部四?易类四）

春秋集传十五卷（两江总督采进本）

元赵汧撰汧有周易文詮已着录是书有汧自序及其门人倪尚谊後序尚谊称是书初藁始於至正戊子一再删削迄丁酉成编既而复着属词义精例密乃知集传初藁更须讨论而序文中所列史法经义犹有未至岁在戊寅重着是传草创至昭公二十八年乃疾痰难厄阁笔未续至洪武己酉遂卒自昭公二十八年以下尚谊据属词义例续之序中所谓策书之例十有五笔削之义八者亦尚谊更定而原本有讹误疎遗者咸补正焉则此书实成於尚谊之手然义例一本於汧犹汧书也汧自序曰学者必知策书之例然後笔削之义可求笔削之义既明则凡以虚词说经者皆不攻而自破可谓得说经之要领矣（四库全书总目卷二十八?经部二十八?春秋类三）

春秋师说三卷（两江总督采进本）

元赵汧撰汧常师九江黄泽其初一再登门得六经疑义十余条以归已复往留二载得口授六十四卦大义与学春秋之要故题曰师说明不忘所自也汧作左传补注序曰黄先生论春秋学以左丘明杜元凯爲主又作泽行状述泽之言曰说春秋须先识圣人气象则一切刻削烦碎之说自然退听又称尝考古今礼俗之不同爲文十余通以见虚词说经之无益盖其学有原本而其论则持以和平多深得圣人之旨汧本其意类爲十一篇其门人金居敬又集泽思古十吟与吴澂二序及行状附录於後行状载泽说春秋之书有元年春王正月辨笔削本旨诸侯取女立子通考鲁隐不书即位义殷周诸侯禘祫考周庙太庙单祭合食说作丘甲辨春秋指要盖即所谓爲文十余通者朱彝尊经义考又载有三传义例考今皆不传惟赖汧此书尚可识黄氏之宗旨是亦读孙觉之书得见胡瑗之义者矣（四库全书总目卷二十八?经部二十八?春秋类三）

春秋左氏传补注十卷（两江总督采进本）

元赵汭撰汭尊黄泽之说春秋以左氏传爲主注则宗杜预左有所不及者以公羊谷梁二传通之杜所不及者以陈傅良左传章指通之是书即采傅良之说以补左传集解所未及其大旨谓杜偏於左傅良偏於谷梁若用陈之长以补杜之短用公谷之是以救左传之非则两者兼得笔削义例触类贯通传注得失辨释悉当不独有补於杜解爲功於左传即圣人不言之旨亦灼然可见盖亦春秋家持平之论也至杜预释例自孔穎达散入疏文久无单行之本永乐大典所采录得见者亦稀陈傅良之章指世尤罕睹汭所采录畧存梗槩是固考古者所亟取矣（四库全书总目卷二十八?经部二十八?春秋类三）

春秋金锁匙一卷（两江总督采进本）

元赵汭撰其书撮举圣人之特笔与春秋之大例以事之相类者互相推勘考究其异同而申明其正变盖合比事属词而一之大旨以春秋之初主於抑诸侯春秋之末主於抑大夫中间齐晋主盟则视其尊王与否而进退之其中如谓圣人贬杞之爵降侯爲子与毛伯锡命称天王称锡爲以君与臣之词召伯赐命称天子称赐爲彼此相与之词虽尚沿旧说之陋而发挥书法条理秩然程子所谓大义数十炳如日星者亦庶几近之矣考宋沈棐尝有春秋比事一书与此书大旨相近疑汭未见其本故有此作然二书体例各殊沈详而尽赵简而明固不妨於并行也（四库全书总目卷二十八?经部二十八?春秋类三）

春秋属辞十五卷（两江总督采进本）

元赵汭撰汭於春秋用力至深至正丁酉既定集传初稿又因礼记经解之语悟春秋之义在於比事属词因复推笔削之旨定着此书其爲例凡八一日存策书之大体二日假笔削以行权三日变文以示义四日辨名实之际五日谨内外之辨六日特笔以正名七日因日月以明类八日辞从主人其说以杜预释例陈傅良後传爲本而亦多所补正汭东山集有与朱枫林书曰谓春秋随事笔削决无凡例前辈言此亦多至丹阳洪氏之说出则此段公案不容再举矣其言曰春秋本无例学者因行事之迹以爲例犹天本无度历家即周天之数以爲度此论甚当至黄先生则谓鲁史有例圣经无例非无例也以义爲例隐而不彰则又精矣今汭所纂述却是比事属词法其间异同详畧触事贯通自成义例与先儒所纂所释者殊不同然後知以例说经固不足以知圣人爲一切之说以自欺而漫无统纪者亦不足以言春秋也是故但以属词名书又有与赵伯友书曰承笔削行状作黄先生传特奉纳师说一部属词一部尊兄既熟行状又观师说则於六经复古之学艰苦之由已得大槩然後细看属词一过乃知区区抱此二十余年非得已不已强自附於传注家以徼名当世之谓也其书参互错综若未易观然其入处祇是属词比事法无一义出於杜撰云云其论义例颇确其自命亦甚高今观其书删除繁琐区以八门较诸家爲有绪而目多者失之纠纷目少者失之强配其病亦畧相等至日月一例不出公谷之窠臼尤嫌缴绕故仍爲卓尔康所讥【语见尔康春秋辨义】盖言之易而爲之难也顾其书淹通贯串据传求经多由考证得之终不似他家之臆说故附会穿凿虽不能尽免而宏纲大旨则可取者爲多前有宋濂序所论春秋五变均切中枵腹游谈之病

今并录之俾凭臆说经者知情状不可揜焉（四库全书总目卷二十八?经部二十八?春秋类三）

东山存稿七卷（附录一卷内府藏本）

元赵汭撰汭有周易文诠已着录初汭於洪武二年应召修元史归未逾月而卒其门人汪荫衷辑遗文爲一编後其门人范準又蒐罗补缀汪仲鲁爲之序但称若干卷而不详其数似作序时尚未编定也又有嘉靖戊午鲍志定序称文集散佚问辑於汪范二君而未备也先翰林於先生爲莫逆交故诸所撰述留余家藏书楼中大率悉备先君子棠野公追念世好收摭先生遗文总彙成集携游北雍潜川豫庵汪君亟请绣梓云云则此本乃志定之父所编非汪荫范準之旧也凡诗词一卷文六卷附录一卷诗文间注本事有似汭自注者有称汭爲先生如赠推命焦月岩咏蟋蟀二诗及虞集私试江西六君子策之类灼然爲後人所加者详其语意殆汪范二人所附欤康熙辛酉赵吉士重刻跋称第六卷虞集行状中阙二页今考此篇之末其文未毕盖尚阙其末一页不但二页也有元一代经术莫深於黄泽文律莫精於虞集汭经术出於泽文律得於集其渊源所自皆天下第一故其议论有根柢而波澜意度均有典型在元季亦翹然独出诗词不甚留意然往往颇近元佑体无凋镂繁碎之熊盖有本之学与无所师承剽窃语录自炫爲载道之文者固迴乎殊矣（四库全书总目卷一百六十八?集部二十一?别集类二十）

书名:周易文诠

作者:赵汭（字子常；号东山）（元）撰

部:经 类:易类 属:

参考资料:（《四库大辞典》）

四卷。元赵汭（生卒年不详）撰。汭字子常，休宁（今属安徽）人。师事学者黄泽，受《易象》、《春秋》之学。后复从虞集游，获闻吴澄之学。筑“东山精舍”，读书着述其中。从此，造诣精深，诸经无不通贯，而尤邃于《春秋》。明洪武二年（1369），召修《元史》，书成辞归，未几卒。学者称东山先生。着有《春秋集传》十五卷，《春秋师说》三卷，《春秋属辞》八篇，《左氏补注》十卷，《东山存稿》。该书大旨源出程、朱。然其门人金居敬跋，称其“契先天内外之旨，且悟后天卦序之义”，则亦兼用邵氏之学。汭平生精于《春秋》，说《易》之书仅有此本，流传颇罕。其中诠释义理，大抵宋儒论说，不及其《春秋》诸书之深邃。然其于天道人事吉凶悔吝之际，反复推阐，亦颇明畅。书名曰“文诠”，可知其宗旨。朱彝尊《经义考》载该书为八卷，而该书旧抄只四卷，首尾完具，不似有所缺佚。《四库全书》采两淮马裕家藏本，定为四卷。该书亦收入民国二十三年至二十四年（1934—1935）上海商务印书馆据文渊阁本影印《四库全书珍本初集》，现藏于

北京图书馆、首都图书馆、北京大学图书馆、上海图书馆、吉林大学图书馆等多处。

书名:春秋集传

作者:赵汭（字子常；号东山）（元）撰

部:经 类:春秋类 属:

参考资料:（《四库大辞典》）

十五卷。元赵汭（详见《周易文诠》）撰。据赵汭门人尚谊《序》，此书初稿于至正八年（1348），后又一再修改，至至正十七年方定稿。不久又因《礼记》之语而作《春秋属辞》，由于研究逐渐深入，又认为应再次修改此书，至正二十二年重作此书，草稿至鲁昭公二十八年，因病搁笔未续，至洪武二年遂卒。自昭公二十八年以下是其弟子尚谊据《属辞》义例补续。书中所谓策书之例十五，笔削之例八，也是尚谊更定。尚谊还补正了赵汭作注部分之舛误疏遗，可见此书应是赵尚二人合着，但体例则定于赵汭。赵疏认为，“左氏有见于史，其所发皆史例也，故常主史以释经，是不知笔削之有义也。《公羊》《谷梁》有见于经，其所传者犹有经之佚义焉，故据经以生义，是不知其文则史也。”其所谓“策书之例”大体宗左宗杜，如“公即位不行其礼不书”、“诸侯有命，告则书，崩卒不赴则不书，祸福不告亦不书，虽及灭国，灭不告败，胜不告克不书于策”等等；而其所谓笔削之例八（一曰存策书之大体，二曰假笔削以行权，三曰变文以示义，四曰辨名实之际，五曰谨华夷之变，六曰特笔以正名，七曰因日月以明类，八曰辞从主人）则是杂采诸儒之说并体会经义而得。现存明正德汪克锡刻本、明刻蓝印本、清《通志堂经解》本。

书名:春秋师说

作者:赵汭（字子常；号东山）（元）撰

部:经 类:春秋类 属:

参考资料:（《四库大辞典》）

三卷。元赵汭（详见《周易文诠》）编。此书是由赵汭记录整理的黄泽论《春秋》之语录。赵汭曾师从黄泽，其初一再登门，得六经疑义十余条以归。后复往留住二年，得黄泽口授六十四卦大义与学《春秋》之要。此书行文称“泽谓”，概是黄泽之作，故题曰“师说”。元代《春秋》学，以黄泽和赵汭最有成就。据赵汭《黄楚望先生行状》载黄泽说《春秋》之书，有《元年春王正月辨》、《笔削本旨》、《

诸侯取女立子通考》、《鲁隐不书即位义》、《殷周诸侯禘祫考》、《周庙太庙单祭合食说》、《作丘甲辨》、《春秋指要》。赵汭本黄泽之意，以类分为十一篇，其门人金居敬又集黄泽《思古十吟》与吴澄之序及赵汭《黄楚望先生行状》附录于后。据赵汭所云，黄泽论《春秋》学以《左传》和杜预《集解》为主。黄泽《春秋》学之著作已不可考，其说则赖此书以行。其论《春秋》述作本旨云：“《春秋》如正例变例之实，此是泽破近代诸儒《春秋》不用例之说。三传皆用例，虽未必尽合圣人，然不中不远。”其论鲁史策书遗法云：“鲁史《春秋》有例，夫子《春秋》无例，非无例也，以义为例，隐而不彰也。……《春秋》凡例本周公之遗法……说《春秋》必须兼考史家记载之法，不可专据经文也。”其论三传得失云：“孔子作《春秋》以授史官及高第，在史官者则丘明作《传》：在高第者则一再传而为公羊高、谷梁赤。在史官者则得实之情实而义理间有讹；在高第者则不见事实而往往以意臆度，若其义理则间有可观，而事则多讹矣。酌而论之，则事实而理讹，后人犹有所依据以求经旨，是经本无所损也；事讹而义理间有可观，则虽说得大公正，于经实少所益，是经虽存而实亡也，况未必大公正乎。使非《左氏》事实尚存，则《春秋》不可晓关。”其论《左传》之文体云：“《左氏》乃是春秋时文字（指文体），或以为成国时文字者（按，朱熹有此说），非也。今考其文自成一家，真春秋时文字。战国文字粗豪，贾谊、司马迁尚有余习，而《公羊》、《谷梁》则正是战国文字耳。《左氏》固是后出，然文字丰润，颇带华艳，汉初亦所不尚。至刘歆始好之，其列于学官最后，太抵其文字近《礼记》而最繁富者。”现存元至正二十四年休宁商山义塾刻、明弘治六年高忠重修本、元刻本、明初刻本、明正德汪克锡刻本、清《通志堂经解》本。

书名:春秋左氏传补注

作者:赵汭（字子常；号东山）（元）撰

部:经 类:春秋类 属:

参考资料:（《四库大辞典》）

十卷。元赵汭（详见《周易文诠》）撰。赵汭尊其师黄泽之说，《春秋》以《左传》为主，注则宗杜预。《左传》有所不及者，以《公》、《谷》二传通之；杜所不及者，以陈傅良《左传章旨》通之。此书即是采陈傅良之说以补杜氏《集解》之未及。赵氏认为，杜预偏于《左传》，陈傅良则偏于《谷梁》，如果用陈氏之长以补杜氏之短，用《公》、《谷》之是以救《左传》之非，则双方皆可得笔削义例。触类旁通，传注得失、辨释悉当。不但有补于杜注，有功于《左传》，即孔子不言之旨，亦灼然可见。其《自序》云：“《左氏》于二百四十二年事变略具始终，而赴告之情，策书之体亦一二有见焉，则其事与文庶乎有考矣。其失在不知以笔削见义。《公羊》、《谷梁》以书不书发人，不可谓无所受者，然不知其文则史也。夫得

其事究其文而义有不通者有之，未有不得其事不究其文而能通其义者。故三传得失虽殊，而学《春秋》者必自《左传》始。”赵汭因其师黄泽《春秋》有鲁史书法，有圣人书法，必先考史法而后圣人之法可求，若基本原脉络，则尽在《左传》”之教，乃取《左传注》诸书读之，“数年然后知鲁史旧章犹赖《左氏》存其梗概。…又十余年，又知三传而后，说《春秋》惟杜元凯、陈君举为有据依。”此书与其《集传》，在宋元皆为用力较勤之作。现存元至正二十年刻、明弘治六年重修本、明初刻本、明正德汪克锡刻本、清《通志堂经解》本、玉玲珑阁丛刻本。

书名:春秋金锁匙

作者:赵汭（字子常；号东山）（元）撰

部:经 类:春秋类 属:

参考资料:（《四库大辞典》）

一卷。元赵汭（详见《周易文诠》）撰。此书撮举孔子之“特笔”与《春秋》之大例，以事之同类者互相推勘，研究其异同，以明其属于正例变例。如以隐二年“无骇帅师入极”与桓十一年“柔会宋公盟于折”合为一条，其下云：“春秋以前征伐之不下于大夫也，而大夫专兵自无骇之帅师入极始；春秋以前礼乐之权不下于大夫也，而大夫专盟自柔之会宋盟折始。圣人于无骇去其氏者，谨大夫专兵之始也；于柔去其氏者，谨大夫专盟之始也。”又如以庄十三年“齐侯宋人会于北杏”与庄十五年“宋齐伐郕”合为一条，其下云：“伯主专天下礼乐之权，自齐桓北杏之会始；伯主专天下征伐之权，自齐桓伐郕之役始，《春秋》于北杏之会人四国之君者，谨其从徇之始，所以不与伯主礼乐之权也。于伐郕役加采于齐上者，谨其楼诸侯之始，所以不与伯主以征伐之权。”其书大旨以《春秋》之初，主于抑诸侯；《春秋》之末，主于抑大夫；中间齐晋主盟，则视尊王与否而进退之。其书体例与宋沈棐《春秋比例》大体相近。现存元刻本、《学海类编》本、孔氏微波榭刻本、《学津讨原》本、《翠琅玕馆丛书》本、光绪《藏书堂丛书》本。

书名:春秋属辞

作者:赵汭（字子常；号东山）（元）撰

部:经 类:春秋类 属:

参考资料:（《四库大辞典》）

十五卷。元赵汭（详见《周易文诠》）撰。至正十七年，赵汭完成《春秋集传》初

稿，因《礼记》“比事属辞，《春秋》之教也”之语，悟《春秋》之义在于比事属辞，又重新推究孔子笔削之旨，着为此书。赵汭《东山集》有《与朱枫林书》，其云：“谓《春秋》随事笔削，决无凡例”。引丹阳洪氏曰：“《春秋》本无例，学者因行事之迹以为例，犹天本无度，历家即周天之数以为度”。认为“此论甚当”。又引其师黄泽之语曰：“鲁史有例，圣经无例。非无例也，以义为例，隐而不彰”。认为“则又精矣”。又云“今汭所撰述，则是比事属辞法，其间异同详略，触事贯通，自成一例，与先儒所纂所释者殊不同。”宋濂《序》称：《左氏》之学既盛行，杜预氏为之注，其于史例推之颇详。杜氏之后唯陈傅良氏，固《公》《谷》所举之书法以考证《左传》，笔削大义最为有征，斯固读《春秋》者之所当宗”。又云：赵汭“益竭精毕虑，几废寝食，如是者二十年，一旦豁然有悟入，且谓《春秋》之法在乎属辞比事而已。于是离析部居，分别义例，立为八体以布列之。集杜陈二氏之所长，而弃其短。有未及者，辨而补之，何者为史策之文，何者是圣人笔削，悉有所附丽”。所谓“八体”，即笔削之八条原则，一是存策书之大体（订一百二十一目），二是假笔削以行权（计七十四目），三是变文以示义（计十八目），四是辨名实之际（计六目），五是谨内外之辨（计十四目），六是特笔以正名（计十八目），七是因日月以明类（计十六目），八是辞从主人（计十八目），总计二百八十五目。八篇之下各有序，以释每篇之义。其前六篇篇名即是其义例，后两篇义例在见于篇中。此书重点为《存策书之大体》。其篇序云：“策书者，国之正史也。……古者非大事不登于策，小事简牒而已。……今以《春秋》所书准西周未乱之时，其书于策者不过公即位、逆夫人、朝聘会同、崩薨卒葬、祸福告命、雩社烝尝、搜狩城筑、非礼不时，与夫灾异庆祥之感，而一国纪纲本末略具，善恶亦存其中，盖策书大体不越乎此而已。东迁以来，王室益微，诸侯背叛，伯业又衰，外夷纵横，大夫专政，陪臣擅命。于是伐国灭国，围入迁取之祸交作，弑君、大夫奔放、纳入之变相寻，而策书常法始不足尽其善恶之情矣。故孔子断之隐公，有笔有削，以寓其拨乱之志。其所谓策书之大体，而一国之本末具焉者，皆有笔而无削，使不失鲁国正史之常，所谓存策书之大体者也。……然自左氏不知有笔削之旨，为《公羊》学者遂以《春秋》为夫子博采众国之书通修一代之史者，于是褒贬之说盛行。又有以为有贬无褒者，又有以一经所书皆为非常而常事不书者，有谓黜周王鲁者，有谓用夏变周者，其失在不知有存策书大体之义而已。”此书行世后，颇为后儒所推重。现存元至正二十四年刻、明弘治重修本、明初刻本、明正德汪克锡刻本，清《通志堂经解》本。

书名:东山存稿

作者:赵汭（字子常；号东山）（元）撰

部:集 类:别集类 属:金至元

参考资料:（《四库大辞典》）

七卷。《附录》一卷。元赵汭（1319—1369）撰。汭，字子常。休宁（今属安徽）人。长于经学，所着有《周易文诠》。晚年筑东山精舍，时人称东山先生。明洪武二年（1369）曾预修《元史》。汭门人汪荫衷辑其遗文为一编，后范准又收集补缀。但并不完备。又有嘉靖间鲍志定序。此本乃鲍志定之父所编，诗一卷，文六卷，附录一卷。《四库全书总目》评曰：“有元一代，经术莫深于黄泽，文律莫精于虞集。汭经术出于泽，文律得于集。其渊源所自，皆天下第一。故其议论有根底，而波澜意度均有典型，在元季亦翹然独出。诗词不堪留意，然往往颇近元佑体，无雕镂繁碎之态。”有《四库全书》本。明嘉靖三十七年（1558）汪荫刊本、明抄本（藏于北京图书馆）、清德化李氏木犀轩抄本（藏于北京大学图书馆），均题名《东山赵先生文集》。

赵汭大易文诠八卷（四库全书?史部?正史类?明史卷九十六）

赵汭春秋集传十五卷附录二卷春秋属辞十五卷左传补注十卷（四库全书?史部?正史类?明史卷九十六）

赵汭葬说一卷（四库全书?史部?正史类?明史卷九十八）

赵汭东山集十五卷（四库全书?史部?正史类?明史卷九十九）

赵汭东山先生

字子常南直休宁人洪武初徵士

始就外傳受四书即多疑问师答以初学毋过求意殊不释夜归别室取朱子大全集语类等书读之如是者数年觉所疑渐解慨然有负笈四方之意乃往九江见黄楚望先生泽稟学焉尽得其所举六经疑义千余条以归所辑春秋师说盖始於此初泽以六经复古之说设教九江尝谓近代大儒继出而後朱子四书之教大行然周易春秋二经实夫子手笔圣人精神心术所存必尽得其不传之旨然後孔门之教乃备每患二经学者各以才识所及求之苟非其人虽问勿答其所告语亦皆引不发姑使自思是以及门之士鲜能信从领会者惟先生为高弟得其春秋之学为多【黄楚望传】

先生始拜泽於其门请问治经之要泽告之曰在致思而已然不尽悟传注之说则亦不知所以为思也请问致思之道泽曰当以一事为例礼女有五不娶其一为丧父长子注曰无所受命近代说者曰盖丧父而无兄者也女之丧父无兄者多何罪而见絶於人如此其非先王之意明矣姑以此思之或二三年或七八年傥得其说则知先儒说经其已通者未必皆当其未通者未尝不可致思也先生退而思之女之丧父无兄者诚不当与逆乱刑疾之子同弃於世久之乃得其说曰此盖宋桓夫人许穆夫人之类尔故曰无所受命注犹未失也若丧父而无兄则期功之亲皆得为之主矣尝以质於泽泽曰子能如是求之甚善然六经疑义若此者衆

矣当务完养而慎思之母轻发也遂授以求春秋之要曰楚杀其大夫得臣此书法也当求之於二百四十二年之内夫人姜氏如齐师此书法也当求之於二百四十二年之外先生思之经岁不得其说泽为易置其语曰夫人姜氏如齐师此书法也当求之於二百四十二年之内楚杀其大夫得臣此书法也当求之於二百四十二年之外先生盖自是始達春秋笔削之权

尝往淳安质诸教授夏某夏殊不谓然乃为言其先人安正先生为学本末甚悉久之先生复念泽高年平生精力所到一旦不传可惜也复如九江泽乃授以学春秋之要居二岁请受易得口授六十四卦卦辞大义後夏某教授洪都先生再往见焉夏问易象春秋书法如何先生以所闻对夏犹以枉用心力为戒特出其夏氏先天易书曰此羲易一大象也又曰吾先人遗书当悉付子矣先生敬起谢之然於二经旧说访求考索未尝少後也遂如临川见学士虞集集与黄泽有世契一见遂问泽起居先生间日为言泽着书大意与夏某所以不然者时江西宪私试请题虞即拟策问江右先贤名节文章经学及朱陆二氏立教所以异同先生识其意即具对卒言刘侍读有功圣经及举朱子去短集长之说虞大善之授馆於家以所藏书资其玩索

袁诚夫吴文正公高第弟子也集其师说为四书日録义多与朱子异求先生校正其书先生悉摘其新意极论得失所在时袁公多所更定至论春秋则确守师说不变先生亦以所得较完非口舌可办自是絶不与人谈尝以为春秋名家数十求其论笔削有据依无出陈氏右者遂合杜氏考之悉悟传注得失之由而後笔削义例触类贯通纵横错综各有条理此左氏传补注所由作也【唐荆川左编】

既归故山始集诸家说有合於经者为春秋传又恐学者桎於旧闻因陋就简於交互之义未能遽悉乃离经析义分为八类辨而释之名曰春秋属辞盖集传以明圣人经世之旨属辞乃详着笔削之权二书相为表里而春秋本旨焕然复明然後知六经失传之旨未尝不可更通泽有志而未就者庶可以无憾书成而泽亡矣先生避地古朗山山在星溪上游高寒深阻人迹几絶故虽疾病隐约而覃思之功日盖超诣有不自知其所以然者其夏氏先天易说先生尝以质诸虞虞复以得於前辈者授之於是遂契先天内外之旨而後天上下经卦未易知也尝得庐陵萧汉中氏易说以八卦序分体论上下经所由分与序卦之意如示诸掌然上无徵於羲皇成卦之序下无考於三圣象象之辞则犹有未然者及春秋本旨既明乃知文王据羲皇之图以为後天卦序采夏商之易以成一代之经盖与孔子因鲁史作春秋无异然後知黄先生所谓周易春秋经旨废失之由有相似者盖如此【并左编】

洪武二年诏修元史徵天下山林隐逸之士先生以荐聘预史局书成赐金绮

先生隐居教授筑东山精舍以奉母辅元帅汪同起兵保乡并授江南行枢密院都事丙申内附结茅星溪古閬山屡徵辟继以议礼召皆辞洪武二年再召修元史不愿仕还未几卒年五十有二先生於春秋发明师说本经会传度越汉宋诸儒当为本朝儒林第一【国朝诗选】

先生上虞公书曰圣贤之道大矣学者可不知其要乎尝闻之吾之至尊至贵举天下之物不

足以加之者此心是也吾之至亲至切举天下之物不足以先之者求放心之谓也虞大称之

元末四方扰攘起兵辅汪同保乡里尝论为国家者不能举天下大势以定攻守之宜而所在浪战不求智勇之士真可任将兵者使台省贵人郡县俗吏共军旅之权赏罚不明故是非淆乱而安治拨乱之术行军克敌之方皆废不讲徒欲以岁月削平安可得哉最得其时用兵之弊【史概】

新安自朱子後儒者称为东南邹鲁然其末流或辨析文义纂辑群言为学公独超然得其大者其於春秋不舍史以论事不离传以求经不纯以褒贬泥圣人以为左杜主史释经而不知笔削本旨公谷知求笔削之旨而不考鲁史旧事俱不能无弊乃作春秋属辞以着圣人笔削之旨作春秋集传十五卷以明圣人经世之志左氏传补注十卷师说三卷以为学者求端用力之阶其於易经则闻诸黄先生必须明象又曰易象与春秋书法废失之由大畧相同苟通其一则可以触机而悟矣作序卦图说及经文开瑞乾坤屯三卦解其学以精思为本领以自悟为归宿勉勉向上工夫常曰读书最患多疑每展卷则羣疑起如蝟毛要须得程朱复作面命之而後可释然尔每谓苦思之功若有神助圣人复起不易吾言一时学者皆宗之称东山先生即以名集【开国臣传】

尝作陆文安像赞云儒者曰其学似禅佛者曰我法无是超然独契本心以俟圣人百世（四库全书?史部?传记类?总录之属?明儒言行录卷一）

赵汭字子常休宁人先学於九江黄泽又从临川虞集游获闻吴澄之学覃思冥悟通贯六经尤邃於春秋作春秋属辞以着圣贤笔削之旨作春秋集传以明圣人经世之志着左氏传补注春秋师说以为学者求端用力之阶至正末尝起乡兵保乡井明兴召修元史学者称东山先生（四库全书?史部?地理类?都会郡县之属?江南通志卷一百六十四）

赵汭字子常休宁人姿稟卓絶初读朱子四书多所疑难乃尽取朱子书读之闻九江黄泽有学行往从之游泽之学以精思自悟为主其教人引而不发汭一再登门乃得六经疑义千余条以归已复往留二岁得口授六十四卦大义与学春秋之要後复从临川虞集游闻吴澄之学乃筑东山精舍读书着述其中学者称东山先生【白志】（四库全书?史部?地理类?都会郡县之属?江西通志卷九十六）

赵汭春秋师说三卷附錄二卷【汭辑其师资中黄泽所着书内春秋诸说及平日所闻者为是书凡十有一篇附錄者錄泽所为文及诗□已所为泽行状也】又春秋属词十五卷【离析部居分别义例立为八体以布列之汭以春秋有史氏之旧文有圣人之特笔必先明于二者而後可以读春秋殫精毕虑凡二十年而成】又春秋左氏补注十卷【汭述其师之说云春秋本源脉络尽在左传而杜预之注陈傅良之章旨最为有依据因取陈氏之说附于杜注之下而补其所不及其微词奥义注有未备者采孔氏之说畅而述之】又春秋集传十五卷【始汭至正戊子初作集传既复着属词义精例密集传所列经义史法犹有未备且为属词时推笔削之权而集传大明经世之志必二书相表里而後春秋之旨方完至壬寅复着集传

至昭公二十七年婴痢遂□笔迨洪武己酉冬沆卒其门人倪尚谊据属词义例补成之】（四库全书?史部?目录类?经籍之属?千顷堂书目卷二）

赵沆赵氏葬说一卷（四库全书?史部?目录类?经籍之属?千顷堂书目卷十三）

赵沆东山文集十五卷【字子常休宁人隐居东山洪武二年召修元史书成不愿仕还】（四库全书?史部?目录类?经籍之属?千顷堂书目卷十七）

赵沆杜五言律注四卷（四库全书?史部?目录类?经籍之属?千顷堂书目卷三十二）

赵氏【沆】大易文詮八卷

存

钱陆灿曰沆字子常休宁人师事九江黄泽受易象春秋之学隐居着述筑东山精舍以奉母洪武二年召修元史不愿仕还未几卒（四库全书?史部?目录类?经籍之属?经义考卷四十九）

赵氏【沆】春秋集传十五卷

存

沆自序曰春秋圣人经世之书也书成而孔子卒当时弟子盖仅有得其传者历战国秦汉以及近代说者殆数十百家其深知圣人制作之原者孟氏而已孟氏之言曰王者之迹熄而诗亡诗亡然後春秋作其事则齐桓晋文其文则史孔子曰其义则丘窃取之矣此孔门传春秋学者之微言而制作之原也自孟氏以来鲜有能推是说以论春秋者左氏有见於史故常主史以释经公羊谷梁有见於经故据经以生义後世舍三传无所师承故主左氏则非公谷主公谷则非左氏二者莫能相一其有兼取三传者则臆决无据流遁失中其厌於寻绎者则欲尽舍三传直究遗经分异乖离莫知统纪使圣人经世之道闇而不明郁而不发则其来久矣至永嘉陈君举始用二家之说参之左氏以其所不书实其所书以其所书推见其所不书爲得学春秋之要在三传後卓然名家然其所蔽则遂以左氏所录爲鲁史旧文而不知策书有体夫子所据以加笔削者左氏亦未之见也左氏书首所载不书之例皆史法也非笔削之旨公羊谷梁每难疑以不书发义实与左氏异师陈氏合而求之失其本矣故於左氏所录而经不书者皆以爲夫子所削则其不合於圣人者亦多矣由不考於孟氏而昧夫制作之原故也盖尝论而列之策书之例十有五一日君举必书非君命不书二曰公即位不行其礼不书三曰纳币逆夫人夫人至夫人归皆书之四曰君夫人薨不成丧不书葬不用夫人礼则书卒君见弑则讳而书薨五曰适子生则书之公子大夫在位书卒六曰公嫁女爲诸侯夫人纳币来逆女归娣归来媵致女卒葬来归皆书爲大夫妻书来逆而已七曰时祀时田苟过时越礼则书之军赋改作踰制亦书於策此史氏之录乎内者也八曰诸侯有命告则书崩卒不赴则不

书祸福不告亦不书虽及灭国灭不告败胜不告克不书於策九曰虽霸主之役令不及鲁亦不书十曰凡诸侯之女行惟王后书适诸侯虽告不书十一曰诸侯之大夫奔有玉帛之使则告告则书此史氏之录乎外者也十二曰凡天子之命无不书王臣有事爲诸侯则以内辞书之十三曰大夫已命书名氏未命书名微者名氏不书书其事而已外微者书人十四曰将尊师少称将将卑师衆称师将尊师衆称某帅师君将不言帅师十五曰凡天灾物异无不书外灾告则书之此史氏之通录乎内外者也笔削之义有八一日存策书之大体凡策书之大体曰天道曰王事曰土功曰公即位曰逆夫人夫人至世子生曰公夫人外如曰薨葬曰孙曰夫人归曰内女卒葬曰来归曰大夫公子卒曰公大夫出疆曰盟会曰出师曰国受兵曰祭祀蒐狩越礼军赋改作踰制外诸侯卒葬曰两君之好曰玉帛之使凡此之类其书於策者皆不削也春秋鲁史也策书之大体吾不与易焉以爲犹鲁春秋也二曰假笔削以行权春秋拨乱经世而国史有恒体无辞可以寄文於是书有不书以互显其义书者笔之不书者削之其笔削大凡有五或畧同以存异公行不书致之类也或畧常以明变释不朝正内女归宁之类也或畧彼以见此以来归爲义则不书归以出奔爲义则杀之不书之类也或畧是以着非诸侯有罪及勤王复辟不书之类也或畧轻以明重非有关於天下之故不悉书是也三曰变文以示义春秋虽有笔有削而所书者皆从主人之辞然有事同而文异者有文同而事异者则予夺无章而是非不着於是变文之法焉将使学者即其文之异同详畧以求之则可别嫌疑明是非矣四曰辨名实之际亦变文也正必书王诸侯称爵大夫称名氏四裔大者称子此春秋之名也诸侯不王而霸者兴中国无霸而吴楚横大夫专兵而诸侯散此春秋之实也春秋之名实如此可无辨乎於是去名以全实者征伐在诸侯则大夫将不称名氏中国有霸则楚君侵伐不称君又有去名以责实者诸侯无王则正不书王中国无霸则诸侯不序君大夫将畧其恒称则称人五曰谨内外之辨亦变文也楚至东周僭王猾夏故霸者之兴以攘却爲功然则自晋霸中衰楚益侵陵中国俄而入陈围郑平宋盟於蜀盟於宋会於申甚至伐吴灭陈灭蔡假讨贼之义号於天下天下知有楚而已故春秋书楚事无不一致其严者而书吴越与徐亦必与中国异辞所以信大义於天下也六曰特笔以正名笔削不足以尽义而後有变文然祸乱既极大分不明事有非常情有特异虽变文犹不足以尽义而後圣人特笔是正之所以正其名分也夫变文虽有损益犹曰史氏恒辞若特笔则辞旨卓异非复史氏恒辞矣七曰因日月以明类上下内外之无别天道人事之反常六者尚不能尽见则又假日月之法区而别之大抵以日爲详则以不日爲畧以月爲详则以不月爲畧其以日爲恒则以不日爲变以不日爲恒则以日爲变甚则以不月爲异其以月爲恒则以不月爲变以不月爲恒则以月爲变甚则以日爲异将使属辞比事以求之则笔削变文特笔既各以类明而日月又相爲经纬无微不显矣八曰辞从主人主人谓鲁君也春秋本鲁史成书夫子作经唯以笔削见义自非有所是正皆从史氏旧文而所是正亦不多见故曰辞从主人此八者实制作之权衡也然圣人议而弗辨是非之心人皆有之善而见录则爲褒恶而见录则爲贬其褒贬以千万世人心之公而已圣人何容心哉辞足以明义斯已矣故曰知我者其惟春秋乎罪我者其惟春秋乎是故知春秋存策书之大体而治乎内者恒异乎外也则谓之夫子法书者不足以言春秋矣知春秋假笔削以行权而治乎外者恒异乎内也则谓之实录者不足以言春秋矣知一经之体要议而弗辨则凡谓春秋赏人之功罚人之过去人之族黜人之爵褒而字之贬而名之者亦不足以论圣人矣故学者必知策书之例然後笔削之义可求笔削之义既明则凡以虚辞说经者其刻深辨急之说皆不攻而自破苟知虚辞说经之无益而刻深辨急果不足以论

圣人也然後春秋经世之道可得而明矣虽然使非孟氏之遗言尚在则亦安能追求圣人之意於千数百年之上也哉洴自早岁获闻资中黄楚望先生论五经旨要於春秋以求书法爲先谓有鲁史书法有圣人书法而妙在学者自思而得之乃爲善也於是思之者十有余载卒有得於孟氏之言因其说以考三传及诸家陈氏之书而具知其得失异同之故反覆推明又复数载然後一经之义始完属辞比事莫不灿然各有条理洴经离乱深恐失坠乃辑录爲书以谓後世学春秋稍知本末者赖有左氏而已故取左氏传爲之补注欲学者必以考事爲先其文与义则三传而後诸家之说苟得其本真者皆传以己意畅而通之名曰春秋集传凡十五卷尚意学者溺於所闻不能无惑别撰属辞八篇发其隐蔽传诸同志以俟君子或有取焉

倪尚谊後序曰春秋集传有序东山先生所着初藁始於至正戊子一再删削迄丁酉岁成编既而复着属辞义精例密乃知集传初藁更须讨论而序文中所列史法经义犹有未至且谓属辞时推笔削之权而集传大明经世之志必二书相表里而後春秋之旨方完岁在壬寅重着集传方草创至昭公二十七年乃疾疢难危阁笔未续序文亦不及改洪武己酉仲冬先生遽谢世矣尚谊受教门墙颇久获窥先生着述精思妙契之勤尝俾其校对编抄间有千虑一得先生不以其愚妄或俯从是正者有之窃惟先生於是经所谓一生精力尽於此者诚足以破聚讼未决之疑而发千载不传之秘顾乃功亏一篑集传未及成书所幸初藁具全其义例之精有属辞可据尚谊愚暗然执经有年是以不避僭踰始自昭公二十八年迄於获麟并序中条陈义例一节辄加按定其全书有讹误疎遗者就用考正庶几与属辞归一而前後详畧相因其义例文辞悉据先生成说特施櫟括而已初未敢以臆见傳会其间也谨遵治命分爲一十五卷既脱藁藏之东山精舍以俟君子修饰焉汪元锡後序曰东山赵先生着春秋集传属辞左氏注解共若干卷属辞左氏注解左丞刻之东山书院惟集传无闻弘治闲篁墩先生尝徧求不获正德戊辰予偶知是书藏於程文富氏屡借抄不获嘉靖戊子提学御史东阿刘君按徽下令求是书予语有司就文富氏索之而後是书始出然则斯文之显晦固有时耶刘君以原本藏之学宫休邑刘判簿时济恐其抄录日久不免鲁鱼亥豕之譌属夏司训鎗重加校正捐俸刻之俾与属辞并行於世呜呼春秋者圣人之刑书也夫子生丁季世有德无位於是假鲁史以修经褒善贬恶垂法万世东山先生圣人之徒也愤元之乱甚於春秋筑居东山集传诸书之作固吾夫子修经之意也先生一出与左丞起兵保扞乡井十有余年一郡晏然此吾夫子相鲁会齐夹谷却莱兵之时也先生其善学夫子者乎世人读先生之书与先生之文者知其问学不在宋潜溪诸公下而不知先生平生慷慨大节亦且卓卓如是予忝先生郡人恨生也晚不得供洒埽之役判簿君以刻书之故相谗遂不辞而爲之序

春秋属辞

十五卷

存

洴自序曰六经同出於圣人易诗书礼乐之旨近代说者皆得其宗春秋独未定於一何也学者知不足以知圣人而又不由春秋之教也昔者圣人既作六经以成教於天下而春秋教有

其法独与五经不同所谓属辞比事是也盖诗书礼乐者帝王盛德成功已然之迹易观阴阳消息以见吉凶圣人皆述而传之而已春秋断截鲁史有笔有削以寓其拨乱之权与述而不作者事异自高弟如游夏尚不能赞一辞苟非圣人爲法以教人使考其异同之故以求之则笔削之意何由可见乎此属辞比事所以爲春秋之教不得与五经同也然而圣人之志则有未易知者或属焉而不精比焉而不详则义类弗伦而春秋之旨乱故曰属辞比事而不乱深於春秋者也有志是经者其可舍此而他求乎左氏去七十子之徒未远而不得闻此故虽博览遗文畧见本末而於笔削之旨无所发明此所谓知不足以知圣人而又不由春秋之教者也公羊谷梁以不书发义啖赵二氏纂例以释经犹有属辞遗意而陈君举得之爲多庶几知有春秋之教者然皆泥於褒贬不能推见始终则圣人之志岂易知乎若夫程张邵朱四君子者可谓知足以知圣人矣而於属辞比事有未暇数数焉者此五经微旨所以闇而复明春秋独郁而不发也自是以来说者虽衆而君子谓之虚辞夫文义虽隲而不合於经则谓之虚辞可也而亦何疑於衆说之纷纷乎善乎庄周氏之言曰春秋经世先王之志圣人议而弗辨此制作之本意也微言既絶教义弗彰於是自议而爲讥刺自讥刺而爲褒贬自褒贬而爲赏罚厌其深刻者又爲实录之说以矫之而先王经世之志荒矣此君子所谓虚辞者也故曰春秋之义不明学者知不足以知圣人而又不由春秋之教也岂不然哉间尝窃用其法以求之而得笔削之大凡有八盖制作之原也春秋鲁史也虽有笔有削而一国之纪纲本末未尝不具盖有有笔而无削者以爲犹鲁春秋也故其一曰存策书之大体圣人拨乱以经世而国书有定体非假笔削无以寄文故其二曰假笔削以行权然事有非常情有特异虽笔削有不足以尽其义者於是有变文有特笔而变文之别爲类者曰辨名实曰谨华裔故其三曰变文以示义其四曰辨名实之际其五曰谨内外之辨其六曰特笔以正名上下内外之殊分轻重浅深之弗齐虽六者不能自见则以日月之法区而别之然後六义皆成无微不显故其七曰因日月以明类自非有所是正皆从史文然特笔亦不过数简故其八曰辞从主人是皆所谓议而弗辨者也虽然使非是经有孔门遗教则亦何以得圣人之意於千载之上哉乃离经辨类析类爲凡发其隐蔽辨而释之爲八篇曰春秋属辞将使学者由春秋之教以求制作之原制作之原既得而後圣人经世之义可言矣安得属辞比事而不乱者相与订其说哉

宋濂序曰春秋古史记也夏商周皆有焉至吾孔子则因鲁国之史修之遂爲万代不刊之经其名虽同其实则异也盖在鲁史则有史官一定之法在圣经则有孔子笔削之旨自鲁史云亡学者不复得见以验圣经之所书往往混爲一途莫能致辨所幸左氏传尚存鲁史遗法公羊谷梁二家多举书不书以见义圣经笔削麤若可寻然其所蔽者左氏则以史法爲经文之书法公谷虽详於经义而不知有史例之当言是以两失焉尔左氏之学既盛行杜预氏爲之注其於史例推之颇详杜氏之後惟陈傅良氏因公谷所举之书法以考正左传笔削大义最爲有徵斯固读春秋者之所当宗而可憾者二氏各滞夫一偏未免如前之蔽有能会而同之区以别之则春秋之义昭若日星矣奈何习者多忽焉而弗之察其有致力於此而发千古不传之秘者则赵君子常其人乎子常蚤受春秋於九江黄先生楚望先生之志以六经明晦爲已任其学以积思自悟必得圣人之心爲本尝语子常曰有鲁史之春秋则自伯禽至於顷公是已有孔子之春秋则起隐公元年至於哀公十四年是已必先考史法然後圣人之笔削可得而求矣子常受其说以归昼夜以思忽有所得稽之左传杜注备见鲁史旧法粲然可举亟往质诸先生而先生歿已久矣子常益竭精毕虑几废寝食如是者二十年一旦豁然有所悟

入且谓春秋之法在乎属辞比事而已於是离析部居分别义例立爲八体以布列之集杜陈二氏之所长而弃其所短有未及者辨而补之何者爲史策旧文何者是圣人之笔削悉有所附丽凡暗昧难通历数百年而弗决者亦皆迎刃而解矣遂勒成一十五卷而名之曰春秋属辞云呜呼世之说春秋者至是亦可以定矣濂颇观简策所载说春秋者多至数十百家求其大槩凡五变焉其始变也三家竞爲专门各守师说故有墨守膏肓废疾之论至其後也或觉其胶固已深而不能行远乃仿周官调人之义而和解之是再变也又其後也有恶其是非淆乱而不本诸经择其可者存之其不可者舍之是三变也又其後也解者衆多实有溢於三家之外有志之士会萃成编而集传集义之书愈盛焉是四变也又其後也患恒说不足耸人视听争以立异相雄破碎书法牵合条类譁然自以爲高甚者分配易象逐事而实之是五变也五变之纷扰不定者盖无他焉由不知经文史法之殊此其说愈滋而其旨愈晦也欤子常生於五变之後独能别白二者直探圣人之心於千载之上自非出类之才絶伦之识不足以与於斯呜呼世之说春秋者至是亦可以定矣如濂不敏窃尝从事是经辛勤钻摩不爲不久卒眩衆说不得其門而入近获締交於子常子常不我鄙夷俾题其书之首简濂何足以知春秋间与一二友生啓而诵之见其义精例密咸有据依多发前贤之所未发子常可谓深有功於圣经者矣濂何足以知春秋辄忘僭踰而序其作者之意如此子常姓赵氏名沆歙休宁人隐居东山虽疾病不忘着书四方学子尊之爲东山先生

卓尔康曰子常集传属辞文瞻事核体大思精真可谓集春秋之大成成一经之钜制矣中间亦有穿凿稍过琐屑难名而日月诸义尤无是理然白璧微瑕不足玷也

春秋左氏传补注

十卷

存

沆自序曰黄先生论春秋学以左丘明杜元凯爲主所谓鲁史遗法既於左氏传注中得之而笔削微旨殊未能潜窥其罅隙後思礼记经解始悟春秋之学只是属辞比事法公谷所发书不书之义陈止斋因之以考左传正是暗合此法故其笔削义例独有根据所可惜者偏於公谷与杜元凯正是合得一边乃以陈合杜举经正史以章指附入左传集解中属辞比事以考之今属辞书中八体由此得其六七後考日月之法传中事实钜细往往脗合爲益甚多其他傳会处与凡例之谬爲先儒所攻者并论之然前辈知左氏义例之背谬而不知其事实之可据知後传论世变之可取而不知其以书法解经在三传後独能发笔削之权此补注所以不能已也

春秋师说

三卷

存

沅序曰黄先生所着经说曰六经辨释补注曰翼经罪言曰经学复古枢要等凡十余书所举六经疑义共千有余条其篇目虽殊而反覆辨难使人致思以求失传之旨则一而已盖先生中岁尝爲易春秋二经作传既又以去古益远典籍残阙传注家率多傅会故必积诚研精有所契悟而後可以窥见圣人本真若所得未完而亟爲成书恐蹈前人故辙遂阁笔不续务爲覃思久之乃稍出诸经说以示学者欲其各以所示疑义反求诸经因已成之功而益致其力涂辙既正户庭不差而学者日衆则何患乎经旨之不大明也呜呼先生於经学所以待天下後世之士者如此吾党小子其可勿勉乎沅自弱冠即往拜先生於九江时先生年已七十有九口授学易春秋致思之要具有端绪而顛愚不敏往来馆下数岁无千虑之一得焉既而於春秋大旨一旦若发蒙蔽急往请益比至则先生捐馆矣乃即前诸书中取凡爲春秋说者参以平日耳闻去其重复类次爲十有一篇分三卷题曰春秋师说沅诚愚不敏其敢自画於斯慨思微言盖将没身而已岁至正戊子八月又自述曰黄先生於春秋只令熟读三传於三传内自有向上工夫谓二百四十二年之外自伯禽至鲁国亡之春秋史官相承之法也二百四十二年之中隐公元年至获麟之春秋圣人之法也先生既捐馆春秋微言颇有可思乃摭取诸书中说春秋处参以所闻辑爲春秋师说三卷

李腾鹏曰子常受业於黄楚望作春秋集传以明圣人经世之志左氏补注春秋师说以爲学者用力之阶

金居敬总序曰春秋赵氏集传十五卷属辞十五卷左氏传补注十卷师说三卷皆居敬所按定始资中黄先生以六经复古之说设教九江尝谓近代大儒继出而後朱子四书之教大行然周易春秋二经实夫子手笔圣人精神心术所序必尽得其不传之旨然後孔门之教乃备每患二经学者各以才识所及求之苟非其人虽问弗答其所告语亦皆引而不发姑使自思是以及门之士鲜能信从领会者而当世君子亦莫克知之惟临川吴文正公独敬异焉赵先生始就外傅受四书即多疑问师答以初学毋过求意殊不释夜归别室取朱子大全集语类等书读之如是者数年觉所疑渐解慨然有负笈四方之意乃往九江见黄先生稟学焉尽得其所举六经疑义千余条以归所辑春秋师说盖始於此尝往淳安质诸教授夏公夏公殊不谓然乃爲言其先君子安正先生爲学本末甚悉久之先生复念黄先生高年平生精力所到一旦不传可惜也复如九江黄公乃授以学春秋之要居二岁请受易得口授六十四卦卦辞大义後夏公教授洪都先生再往见焉夏公问易象春秋书法何如先生以所闻对夏公犹以枉用心力爲戒特出其夏氏先天易书曰此羲易一大象也又曰吾先人遗书当悉付子矣先生敬起谢之然於二经旧说访求索考未尝少後也遂如临川见学士雍郡虞公公与黄先生有世契一见首问黄公起居先生闲日爲言黄先生着书大意与夏公所以不然者时江西宪私试请题虞公即拟策问江右先贤名节文章经学及朱陆二子立教所以异同先生识其意即具对卒言刘侍读有功圣经及举朱子弃短集长之说虞公大善之授馆於家以所藏书资其玩索袁公诚夫吴文正公高第弟子也集其师说爲四书日录义多与朱子异求先生校正其书先生悉摭其新意极论得失袁公多所更定至论春秋则确守师说不变先生亦以所得未完非口舌可辨自是絶不与人谈尝以爲春秋名家数十求其论笔削有据依无出陈氏右

者遂合杜氏考之悉悟传注得失之由而後笔削义例触类贯通纵横错综各有条理此左氏传补注所由作也既归故山始集诸家说有合於经者爲春秋传又恐学者桎於旧闻因陋就简於交互之义未能遽悉乃离经析义分爲八类辨而释之名曰春秋属辞盖集传以明圣人经世之志属辞乃详着笔削之权二书相爲表里而春秋本旨焕然复明然後知六经失传之旨未尝不可更通黄先生有志而未就者庶可以无憾惜乎书成而黄先生与诸公皆谢世久矣虽然习实生常虽贤者不能自免黄先生力排衆说创爲复古之论使人思而得之其见卓矣使非先生蚤有立志公听并观潜思默识自任不回则亦岂能卒就其业也哉当先生避地古朗山时居敬与妻侄倪尚谊实从山在星谿上游高寒深阻人迹几絶故虽疾病隐约而覃思之功日益超诣有不自知其所以然者因得窃闻纂述之意与先难後获之由乃备述其说於末简庶有志是经者毋忽焉其夏氏先天易说先生尝以质诸虞公虞公复以得於前辈者授之於是遂契先天内外之旨而後天上下经卦序未易知也尝得庐陵萧汉中氏易说以八卦分体论上下经所由分与序卦之意如示诸掌然上无徵於羲皇成卦之序下无考於三圣彖象之辞则犹有未然者及春秋本旨既明乃悟文王据羲皇之图以爲後天卦序采夏商之易以成一代之经盖与孔子因鲁史作春秋无异然後知黄先生所谓周易春秋经旨废失之由有相似者盖如此故以思古吟等篇及行状附於师说之後庶几方来学者有所感发云尔

陈子龙曰子常於春秋发明师说本经会传度越汉宋诸儒当爲本朝儒林第一

春秋金锁匙

一卷

存（四库全书?史部?目录类?经籍之属?经义考卷一百九十八）

春秋属辞十五卷新安赵汴子常撰其义例有八一曰存策书之大体二曰假笔削以行权三曰变文以示义四曰辨名实之际五曰谨华戎之辨六曰特笔以正名七曰因日月以明类八曰辞从主人宋文宪公濂序之（四库全书?子部?杂家类?杂说之属?居易录卷二十）

赵汴【字子常休宁人尝授业于九江黄楚望究心于春秋作春秋属辞以着圣人笔削之义作春秋集传以明圣人经世之志着左氏补注十卷师说三卷以为学者用力之阶洪武初召修元史】（四库全书?子部?类书类?万姓统谱卷八十三）

跋赵东山春王正月辨【三条】

昔赵汴左传补注辨周正改月之证引据既博分析又明可为不刊之论定千古不决之疑独恨其书不传故谨録之然有一条未引今特着之按文选所收古诗十九首非一人一时之作也其曰玉衡指孟冬衆星何历历白露沾野草时节忽复易秋蝉鸣树间玄鸟逝安适此诗文景之世所作也按汉书高祖以十月至霸上仍以十月为岁首则所谓孟冬乃建申之月也故有白露秋蝉之语盖秦不师古以建亥为岁首无谓之极汉制大抵袭秦故首十月非系十月

至灞上也秦之谬妄不足言然因此可考周正改月之验何也秦上承周秦以建亥为岁首而谓之春故汉代仍之建申之月为之孟冬矣周人以子月为春从可知矣至汉武帝始用夏正以寅月为首故其诗云孟冬寒气至朔风何惨栗此孟冬亥月也故有北风惨栗之语武帝以後之诗可知诗可以观诎不信夫

又

周人之改月无可疑者後世之疑者独谓诗之豳风用夏正及四月维夏六月徂暑致疑尔赵东山谓诗乃歌謠又多言民事故或用夏正以便文通俗是也然未尽事情也如今之制官府文书官职称当时之名而诗文中称吏部为冢宰知府为太守又地理之名称四川为蜀陕西为秦此最明证可知者故不厌博引傍喻也

又

唐储光羲诗夏王纪冬令殷人乃正月此亦可证盖周人改月之说唐人不辨而自了然而或以为改或以为不改起于宋人纷纷多议论之口耳

按赵子常之说本于资中黄楚望而加明晰焉但其书今亦罕传故具录而跋识之非欲剿说袭蹈也（四库全书·集部·别集类·明洪武至崇祯·升庵集卷十）

赵汭

汭字子常休宁人隐居东山元季辅元帅汪同起兵保乡并授江南行枢密院都事丙申内附洪武二年召修元史书成不愿仕还有东山集【汪仲鲁云子常诗因感发而形之咏歌虽不专乎是然长篇短哦亦不一字苟为也

詹烜云先生诗五言初学六朝後改习建安诸子及老杜近体则学唐人】

【静志居诗话东山环谷二先生俱以经学重尤研精春秋还谷守康侯之说东山学於黄楚望首辟夏时冠周月之非不相雷同故陈敬初赠诗云君之博洽汉马融春秋三传以例通百源虽异委则同二先生於吟咏均非所长赵差胜汪赵集岁久沦阙其裔孙吉士视摧扬州镂版以传】（四库全书·集部·总集类·明诗综卷六）

东山先生赵汭

汭字子常休宁人师事九江黄泽楚望严陵夏溥大之义乌黄潛晋卿明易象春秋之学至正初临川虞学士集见其书深加敬异延致于家未几归筑东山精舍隐居著述学者尊之辅元帅汪同起兵保乡并授为江南行枢密院都事丙申後结茆星溪古阊山洪武二年召至京师与修元史既竣事得请还未逾月以疾卒年五十一门人汪荫及范准先後集其所为诗文得若干卷星源汪仲鲁谓子常之诗因感发而形诸咏歌虽不专乎是然长篇短哦亦不一字苟

为也（四库全书·集部·总集类·元诗选二集卷二十四）

赵子常画赞（明）王禕 撰

（四库全书·集部·别集类·明洪武至崇祯·王忠文集卷十五）

形癯而体胖神清而气完躬其纯美之质奋乎强盛之年如不胜衣而学将以成乎已似不能言而心蘄以合乎天人徒见其长往于林壑而孰知其上希於圣贤也耶

书赵东山对江右六君子策（明）程敏政 撰

（四库全书·集部·别集类·明洪武至崇祯·篁墩文集卷三十八）

按此篇曲尽二先生道德之详独谓朱子去短集长之说在陆子没世之後则恐未然盖朱子劾唐仲友在淳熙九年陆子有书亟称之而虞道园考朱子与陆子书所谓病中絶学捐书觉得身心颇相收管及周叔谨胡季随二书皆在一时则两先生殊途同归之好当不出此数岁间而谓陆子去世不及与朱子合并者殆未之深考也

书赵东山陆子像赞（明）程敏政 撰

（四库全书·集部·别集类·明洪武至崇祯·篁墩文集卷三十八）

按此亦因朱子谓陆学固有似禅处一句而发然历考先正之论象山者博而费不若东山此赞之约而该也

过龙源赵东山先生故居（明）程敏政 撰

（四库全书·集部·别集类·明洪武至崇祯·篁墩文集卷八十四）

秋风乔木礧声长峯麓犹存旧讲堂麟史注文高衆子龙源山色胜吾乡藤纏废础荒陶径藓蚀残碑寄孔墙珍重远孙留客意不辞归路踏斜阳

赵东山【沔】字子常可斋之子师黄楚望为时硕儒元末起乡兵辅元帅汪同保乡井授承务郎江南行枢密院都事国初召修元史不愿仕而归所著有春秋集传十五卷属辞八卷左氏传补注十卷师说三卷诗文曰东山集学者称东山先生【见行状】（四库全书·集部·总集类·新安文献志先贤事畧上）